





*John [unclear]*





L. A N N A E I  
S E N E C A E  
P H I L O S O P H I  
O P E R A

AD OPTIMAS EDITIONES COLLATA

PRAEMITTITUR NOTITIA LITERARIA  
STUDIIS SOCIETATIS BIPONTINAE



CLAUDIUS.

VOLUMEN QUARTUM

---

BIPONTI  
EX TYPOGRAPHIA SOCIETATIS  
C1810CCLXXXII

PA  
6661  
A2  
1782  
V.4



L. ANNAEI SENECAE  
AD LUCILIUM  
EPISTOLARUM

T O M U S II.



L. ANNAEI SENECAE  
AD LUCILIUM  
EPISTOLAE.

---

EPISTOLA XCVII.

*Et nunc, & olim, fuisse malos. Exemplum a iudicio  
Clodiano, quod ille nummis & adulteriis corripit.  
De vi deinde Conscientiae; damnari ab ea mala, at-  
que etiam puniri interno flagello aut morfu.*

**E**RRAS, mi Lucili, si existimas nostri seculi esse vitium, luxuriam et negligentiam boni moris, et alia, quae obiicit suis quisque temporibus. Hominum sunt ista, non temporum: nulla aetas vacavit a culpa. Et si aestimare licentiam cuiusque seculi incipias: pudet dicere nunquam apertius, quam coram Catone, peccatum est. Credat aliquis pecuniam esse versatam in eo iudicio, in quo reus erat Clodius ob id adulterium, quod cum Caesaris uxore in opere commiserat, violatis religionibus eius sacrificii, quod pro populo fieri dicitur, sic submotis extra conspectum omnibus viris, ut picturae quoque masculorum animalium contegantur. Atqui dati iudicibus nummi sunt: et quod hac etiamnum pactione turpius est, stupra insuper matronarum et adolescentulorum nobilium, salarii loco exacta sunt. Mi-

nus crimine, quam absolutione, peccatum est. Adulterii reus, adulteria divisit : nec ante fuit de salute securus, quam similes sui iudices suos reddidit. Haec in eo iudicio facta sunt, in quo, si nihil aliud, Cato testimonium dixerat. Ipsa ponam verba Ciceronis, quia res fidem excedit : Arcessivit ad se, promissit, intercessit, dedit. Iam vero, o dii boni, rem perditam ! etiam noctes certarum mulierum, atque adolescentulorum nobilium introductiones, nonnullis iudicibus pro mercedis cumulo fuerunt. Non vacat de pretio queri, plus in accessionibus fuit. Vis severi illius uxorem ? dabō illam. Vis divitis ? huius quoque tibi praestabo concubitus. Adulterium nisi feceris, damna. Illa formosa quam desideras, veniet : illius tibi noctem promitto, nec differo : intra comperendinationem, fides promissi mei stabit. Plus est distribuere adulteria, quam facere : illud est, matribus familiae denuntiare ; hoc, illudere. Hi iudices Clodiani a senatu petierant praesidium, quod non erat nisi damnaturis necessarium : et impetraverant. Itaque eleganter illis Catulus, absoluto reo : Quid vos, inquit, praesidium a nobis petebatis ? an, ne nummi vobis eriperentur ? Inter hos tamen iocos, impune tulit ante iudicium adulter, in iudicio leno : qui damnationem peius effugit, quam meruit. Quidquam fuisse corruptius illis moribus credis, quibus libido non sacris inhiberi, non iudiciis poterat ? quibus in ea ipsa quaestione, quae extra ordinem senatusconsulto exercebatur, plus quam quaerebatur admissum est ? Quaerebatur, an post adulterium aliquis posset tutus ef-

se: apparuit, sine adulterio tutum esse non posse. Hoc inter Pompeium et Caesarem, inter Cicero-  
nem Catonemque commissum est: Catonem, in-  
quam, illum, quo sedente negatur populus permi-  
sisse sibi postulare Florales iocos nudandarum me-  
rettricum. Credis spectasse tunc severius homines,  
quam iudicasse? Et fient, et facta sunt ista: et licen-  
tia urbium, aliquando disciplina metuque, nunquam  
sponte confidet. Non est itaque quod credas, nunc  
plurimum libidini permissum esse, legibus minimum.  
Longe enim frugalior haec iuventus, quam illa,  
est, cum reus adulterium apud iudices negaret, iu-  
dices apud reum confiterentur: cum stuprum com-  
mitteretur rei iudicandae causa: cum Clodius iisdem  
vitiis graciosus quibus nocens, conciliaturas exer-  
ceret in ipsa causae dictione. Credat hoc quisquam?  
qui damnabatur uno adulterio, absolutus est mul-  
tis. Omne tempus Clodios, non omne Catones fe-  
ret. Ad deteriora faciles sumus: quia nec dux po-  
test, nec comes deesse: et res etiam ipsa sine duce,  
sine comite procedit: non primum est tantum ad  
vitia, sed praeceptis. Et, quod plerosque inemenda-  
biles facit, omnium aliarum artium peccata artifi-  
cibus pudori sunt, offenduntque deerrantem: vi-  
tae peccata delectant. Non gaudet navigio gubernator  
everso, non gaudet aegro medicus elato, non  
gaudet orator, si patroni culpa reus cecidit: at con-  
tra, omnibus crimen suum voluptati est. Laetatur  
ille adulterio, in quod irritatus est ipsa difficultate:  
laetatur ille circumscriptione furtoque: nec ante illi  
culpa, quam culpae fortuna displicuit. Id prava con-



fuetudine evenit. Alioqui ut scias, subesse animis, etiam in pessima abductis, boni sensum, nec ignorari turpe, sed negligi; omnes peccata dissimulant, et quamvis feliciter cesserint, fructu illorum utuntur, ipsa subducunt. At bona conscientia prodire vult, et conspici: ipsas nequitia tenebras timet. Eleganter itaque ab Epicuro dictum puto, Potest nocenti contingere ut lateat, latendi fides non potest. Aut si hoc modo melius hunc explicari posse iudicas sensum: Ideo non prodest latere peccantibus, quia latendi etiam si felicitatem habent, fiduciam non habent. Ita est. tuta scelera esse possunt: securi non possunt. Hoc ego repugnare sectae nostrae, si sic expediatur, non iudico. quare? quia prima et maxima peccantium est poena, peccasse: nec ullum scelus, licet illud fortuna exornet muneribus suis, licet tueatur ac vindicet, impunitum est: quoniam sceleris, in scelere, supplicium est. Sed nihilominus et haec, et illa, secundae poenae premunt ac sequuntur: timere semper et expavescere, et securitati diffidere. Quare ego hoc supplicio nequitiam liberem? quare non semper illam in suspenso relinquam? Illic dissentiamus cum Epicuro, ubi dicit, nihil iustum esse natura, et crimina vitanda esse, quia vitari metus non possit. Hic consentiamus, mala facinora conscientia flagellari, et plurima illi tormentorum esse, eo quod perpetua illam sollicitudo urget ac verberat, quod sponsoribus securitatis suae non potest credere. Hoc enim ipsum argumentum Epicuri est, natura nos a scelere abhorrere, quod nulli non etiam inter tuta timor est. Multos



fortuna liberat poena, metu neminem. quare? quia infixata nobis eius rei averfatio est, quam natura damnavit. Ideo nunquam fides latendi fit etiam latentibus: quia coarguit illos conscientia, et ipsos sibi ostendit. Proprium autem est nocentium, trepidare. Male de nobis actum erat, quod multa scelera legem et iudicem effugiunt, et scripta supplicia: nisi illa naturalia et gravia de praesentibus solverent, et in locum patientiae timor cederet.

## EPISTOLA XCVIII.

*Solis internis Bonis fidendum: alia venire, abire. Hoc meditandum, & omnia ut fugacia adspicienda, atque habenda. Praeparandus itaque animus ad amissionem talium, & ad tolerandum obfirmandus. Quidni? alii tulerunt. Sequare exempla, immo ipse esto exemplum. Plane inter bonas utilesque Epistola.*

**N**UNQUAM credideris felicem quenquam, ex felicitate suspensum. fragilibus innititur, qui adventitio laetus est: exhibet gaudium, quod intravit. At illud ex se ortum, fidele, firmumque est, et crescit, et ad extremum usque prosequitur: cetera quorum admiratio est vulgo, in diem bona sunt. Quid ergo? non usui ac voluptati esse possunt? Quis negat? sed ita, si illa ex nobis pendent, non ex illis nos. Omnia quae fortunam intuentur, ita fructifera ac iucunda sunt, si quis habens illa, se quoque habet, nec in rerum suarum potestate est. Errant enim, mi Lucili, qui aut boni aliquid nobis, aut mali iudicant tribuere

fortunam : materiam dat bonorum ac malorum, et initia rerum apud nos in malum bonumve exiturorum. Valentior enim omni fortuna animus est : in utramque partem ipse res suas ducit, beataeque ac miserae vitae sibi causa est. Malus omnia in malum vertit, etiam quae specie optimi venerant : rectus atque integer, corrigit prava fortunae; et dura atque aspera, ferendi scientia mollit : idemque et secunda grate excipit modesteque, et adversa constanter atque fortiter. Qui licet prudens sit, licet exacto faciat cuncta iudicio, licet nihil supra vires suas tentet : non contingit illi bonum integrum illud, et extraminas fortunae positum, nisi certus adversus incerta est. Sive alios observare volueris (liberius enim inter aliena iudicium est) sive teipsum favore seposito; et senties hoc, et confiteberis, nil ex his optabilibus et caris utile esse, nisi te contra levitatem casus, rerumque casum sequentium, instruxeris : nisi illud frequenter et sine querela, inter singula damna dixeris : Diis aliter visum est. Immo mehercule, ut carmen fortius ac iustius petam, quo animum tuum magis fulcias, hoc dicito, quoties aliquid aliter quam cogitabas evenerit : Dii melius ! Sic composito nihil accidet. sic autem componetur, si, quid humanarum rerum varietas possit, cogitaverit, antequam senserit. Si et liberos, et coniugem, atque patrimonium sic habuerit, tanquam non utique semper habiturus : et tanquam non futurus ob hoc miserior, si habere desierit. Calamitosus est animus futuri anxius, et ante misérias miser, qui sollicitus est, ut ea quibus delectatur, ad extremum usque permaneant. Nullo enim

tempore conquiescet; et expectatione futuri, praesentia, quibus frui poterat, amittet. In aequo est autem amissio rei, et timor amittendae. Nec ideo praecipio tibi negligentiam. Quin vero metuenda declina; et quidquid consilio prospici potest, prospice: quodcunque laesurum est, multo antequam accidat, speculare et adverte. In hoc ipsum tibi plurimum conferret fiducia, et ad tolerandum omnino obfirmata mens. Potest fortunam cavere, qui potest ferre: certe in tranquillo non tumultuatur. Nil est nec miserius nec stultius, quam praetimere. quae ista dementia est, malum suum antecedere? Denique, ut breviter includam quod sentio, et istos satageos, ac sibi molestos describam tibi: tam intemperantes in ipsis miseriis sunt, quam ante illas. Plus dolet quam necesse est, qui ante dolet quam necesse sit. Eadem enim infirmitate dolorem non aestimat, qua non expectat. Eadem intemperantia fingit sibi perpetuam felicitatem, fingit sibi crescere debere quaecunque contigerunt, non tantum durare: et oblitus huius petauri, quo humana iactantur, sibi uni fortuitorum constantiam sponder. Egregie itaque videtur mihi Metrodorus dixisse in ea Epistola, qua sororem, amisso optimae indolis filio, alloquitur: Mortale est omne mortaliū bonum. de his loquitur bonis, ad quae concurritur. Nam illud verum bonum non moritur: certum est sempiternumque, sapientia et virtus: hoc unum contingit immortale mortalibus. Ceterum tam improbi sunt, tamque obliti quo eant, quo illos singuli dies trahant, ut mirentur aliquid se amittere, amissuri uno die omnia. Quidquid est, cui dominus

inscriberis, apud te est, tuum non est : nihil firmum infirmo, nihil fragili aeternum et invictum est. Tam necesse est perire quam perdere. et hoc ipsum, si intelligimus, solatium est, aequo animo perdere, quod perituum est. Quid ergo adversus has amissiones auxilii inveniemus? Hoc, ut memoria teneamus amissa, nec cum ipsis fructum excidere patiamur, quem ex illis percepimus. Habere, eripitur : habuisse, nunquam. Peringratus est, qui cum amiserit, pro accepto nihil debet. Rem nobis eripit casus, usum fructumque apud nos relinquit : quem nos iniquitate desiderii perdimus. Dic tibi, Ex istis quae terribilia videntur, nihil est invictum. Singula vice-re iam multi : ignem Mucius, crucem Regulus, venenum Socrates, exilium Rutilius, mortem ferro adactam Cato : et nos vincamus aliquid. Rursus ista, quae ut speciosa et felicia trahunt vulgum, a multis et saepe contempta sunt. Fabricius divitias imperator reiecit, censor notavit : Tubero paupertatem et se dignam et Capitolio iudicavit, cum fictilibus in publica coena usus, ostendit, debere his hominem esse contentum, quibus dii etiamnum uterentur. Honores repulit pater Sextius, qui ita natus ut rempublicam deberet capeffere, latum clavum divo Iulio dante, non recepit. Intelligebat enim, quod dari posset, et eripi posse. Nos quoque aliquid ipsi faciamus animose : simus inter exempla. Quare deficimus? quare desperamus? quidquid fieri potuit, potest. Nos modo purgemus animum, sequamurque naturam, a qua aberranti cupiendum timendumque est, et fortuitis serviendum. Licet reverti in viam,

licet in integrum restitui. Restituamur, ut possimús dolores, quocunque modo corpus invaserint, perferre, et fortunae dicere: Cum viro tibi negotium est, quaere quem vincas. His sermonibus, et his similibus, lenitur illa vis ulceris: quasm opto mehercules mitigari, et aut sanari, aut stare, et cum ipso fenescere. Sed securus de ipso sum. de nostro damno agitur, quibus senex egregius eripitur. Nam ipse vitae plenus est, cui adiici nihil desiderat sua causa, sed eorum quibus utilis est. Liberaliter facit, quod vivit. Alius iam hos cruciatus finisset: hic tam turpe putat mortem fugere, quam ad mortem confugere. Quid ergo? non, si suadebit res, exhibit? Quidni exeat? si nemo iam eo uti poterit? si nihil aliud, quam dolori operam dabit? Hoc est, mi Lucili, philosophiam in opere discere, et ad verum exerceri: videre quid homo prudens animi habeat contra mortem, contra dolorem: cum illa accedat, hic premat. Quid faciendum sit, a faciente discendum est. Adhuc argumentis actum est, an possit aliquis dolori resistere, an mors magnos quoque animos admota submittere. Quid opus est verbis? in rem praesentem eamus. nec mors illum contra dolorem facit fortio-rem, nec dolor contra mortem. contra utrumque sibi fidit: nec spe mortis patienter dolet, nec taedio doloris libenter moritur. hunc fert, illam exspectat.

---



## EPISTOLA XCIX.

*Consolatoria in morte filii. Sapiens, ita me Deus,  
& diserta.*

**E**PISTOLAM, quam scripsi Marullo, cum filium parvulum amisisset, et diceretur molliter ferre, misi tibi. In qua non sum morem solitum secutus, nec putavi leniter illum debere tractari, cum obiurgatione esset quam consolatione dignior. Afflicto enim, et magnum vulnus male ferenti, paulisper cedendum est: exfatiet se, aut certe primum impetum effundat. Hi qui sibi lugere sumserunt, protinus castigentur, et discant, quasdam etiam lacrimarum ineptias esse. Solatia exspectas? convicia accipe. tam molliter tu fers mortem filii? quid faceres, si amicum perdidisses? Decessit filius incertae spei, parvulus: pusillum temporis periit. Causas doloris conquirimus, et de fortuna etiam iniqui queri volumus: quasi non sit iustas querendi causas praebitura. At mehercule satis mihi iam videbaris animi habere, etiam adversus solida mala, nedum ad istas umbras malorum, quibus ingemiscunt homines moris causa. Quod damnorum omnium maximum est, si amicum perdidisses, danda opera erat, ut magis gauderes quod habueras, quam moereris quod amiseras. Sed plerique non computant, quanta perceperint, quantumve gavisi sint. Hoc habet inter reliqua mala dolor, quod non supervacuum tantum, sed ingratus est. Ergo quod habuisti talem amicum, periit opera? tot annis, tanta con-

iunctione vitae, tam familiari studiorum societate, nihil actum est? Cum amico effers amicitiam: et quid doles amisisse, si habuisse non prodest? Mihi crede, magna pars ex illis quos amavimus, licet ipsos casus abstulerit, apud nos manet. Nostrum est quod praeteriit tempus: nec quidquam est loco tutiore, quam quod fuit. Ingrati adversus percepta, spe futuri, sumus: quasi non quod futurum est, si modo successerit nobis, cito in praeterita transiturum sit. Anguste fructus rerum determinat, qui tantum praesentibus laetus est. et futura et praeterita delectant: haec, expectatione; illa, memoria. sed alterum pender, et non fieri potest: alterum non potest non fuisse. Quis ergo furor est, certissimo excidere? Acquiescamus his quae iam hausimus: si modo non perforato animo hauriebamus, et transmittente quidquid acceperat. Innumerabilia sunt exempla eorum, qui liberos iuvenes sine lacrimis extulerint: qui in senatum, aut in aliquod publicum officium a rogo redierint, et statim aliud egerint: nec immerito. Nam primum, supervacuum est dolere, si nihil dolendo proficias: deinde iniquum est queri de eo, quod uni accidit, et omnibus restat. Deinde, desiderii stulta conquestio est, ubi minimum interest inter amissum et desiderantem. Eo itaque aequiore animo esse debemus, quod quos amisimus, sequimur. Respice celeritatem rapidissimi temporis: cogita brevitatem huius spatii, per quod citatissimi currimus: observa hunc comitatum generis humani, eodem tendentis, minimis intervallis distinctum, etiam ubi maxima videntur: quem putas periisse, praemissus est. Quid autem de-

mentius, quam cum idem tibi iter emetiendum sit; flere eum qui anteceffit? Flet aliquis factum, quod non ignoravit futurum? aut si mortem in homine non cogitavit, sibi imposuit. Flet aliquis factum, quod aiebat non posse non fieri? quisquis aliquem queritur mortuum esse, queritur hominem fuisse. Omnes eadem conditio devinxit: cui nasci contingit, mori restat. Intervallis distinguimur, exitu aequamur. Hoc quod inter primum diem et ultimum iacet, varium, et incertum est. si molestias aestimas, etiam puero longum: si velocitatem, etiam seni angustum. Nil non lubricum et fallax, et omni tempestate mobilius. lactantur cuncta, et in contrarium transeunt, iubente fortuna: et in tanta volutatione rerum humanarum, nil cuiquam, nisi mors, certum. Tamen de eo queruntur omnes, in quo uno nemo decipitur. Sed puer decessit. Nondum dico melius agi cum eo qui vita defungitur: ad eum transeamus qui consenuit: quantulo vincit infantem? Propone profundi temporis vastitatem, et universum complectere: deinde hoc quod aetatem vocamus humanam, compara immenso: videbis quam exiguum sit, quod optamus, quod extendimus. Ex hoc quantum lacrimae, quantum sollicitudines occupant, quantum mors, antequam veniat, optata: quantum valetudo, quantum timor, quantum teneri aut rudes aut inuiles anni? dimidium ex hoc edormitur. Adice labores, luctus, pericula: et intelliges, etiam in longissima vita minimum esse quod vivitur. Sed quis tibi concedat, non melius se habere eum cui cito reverti licet, cui ante lassitudinem peractum est iter?



Vita, nec bonum nec malum est : boni ac mali locus est. Ita nihil perdidit ille, nisi aleam in damnum certiores. Potuit evadere modestus ac prudens, potuit sub cura tua in meliora formari : sed (quod iustius timetur) potuit fieri pluribus similis. Adspice illos iuvenes, quos ex nobilissimis domibus in arenam luxuria proiecit : adspice illos, qui suam alienamque libidinem exercent, mutuo impudici ; quorum nullus sine ebrietate, nullus sine aliquo insigni flagitio dies exit : plus timeri quam sperari potuisse, manifestum erit. Non debes itaque causas doloris arcescere, nec levia incommoda indignando cumulare. Non hortor, ut nitaris et urgeas : non tam male de te iudico, ut tibi adversus haec rotam putem virtutem advocandam. Non est dolor iste, sed morsus : tu illum dolorem facis. Sine dubio multum philosophia profecit, si puerum, nutrici adhuc quam patri notiores, animo forti desideras. Quid ? nunc ergo duritiam suadeo, et in funere ipso erigere vultum volo, et animum ne contrahi quidem patior ? Minime. inhumanitas est ista, non virtus, funera suorum iisdem oculis quibus ipsos videre, nec commoveri ad primam familiarium divisionem. Puta autem me vetare : quaedam non sunt sui iuris. Excidunt etiam retinentibus lacrimae, et animum profusae levant. Quid ergo est ? permittamus illis cadere, non imperemus. fluant quantum affectus eiecerit, non quantum poscet imitatio. Nihil vero moerori adiciamus, nec illum ad alienum augeamus exemplum. Plus ostentatio doloris exigit, quam dolor. quoruscumque sibi tristis est ? Clarius,

cum audiuntur, gemunt: et taciti quietique, dum secretum est; cum aliquos viderint, in fletus novos excitantur. Tum capiti suo manus ingerunt, quod potuerant facere, nullo prohibente, liberius: tunc mortem comprecantur sibi, tunc lectulo devolvuntur. Sine spectatore cessat dolor. Sequitur nos, ut in aliis rebus, ita in hac quoque hoc vitium, ad plurium exempla componi; nec quid oporteat, sed quid soleat, adspicere. A natura discedimus: populo nos damus, nullius rei bono auctori, et in hac re, sicut in omnibus, inconstantissimo. Videt aliquem fortem in luctu suo? impium vocat, et effertum. Videt aliquem collabantem, et corpori affusum: effeminatum ait, et enervem. Omnia itaque ad rationem revocanda sunt. Stultius vero nihil est, quam famam captare tristitiae, et lacrimas approbare: quas iudico sapienti viro alias permittas cadere, alias vi sua latas. Dicam quid intersit. Cum primum nos nuntius acerbi funeris perculit, cum tenemus corpus e complexu nostro in ignem transiturum, lacrimas naturalis necessitas exprimit: et spiritus ictu doloris impulsus, quemadmodum totum corpus quatit, ita oculos, quibus adiacentem humorem perpremit et expellit. Hae lacrimae per elisionem cadunt, nolentibus nobis. Aliae sunt, quibus exitum damus, cum memoria eorum quos amissinus retractatur: et inest quiddam dulce tristitiae: cum occurrunt sermones eorum iucundi, conversatio hilaris, officiosa pietas, tunc oculi velut in gaudio relaxantur. His indulgemus, illis vincimur. Non est itaque, quod lacrimas propter circumstan-

tes assidentefque aut contineas, aut exprimas : nec cessant, nec fluunt unquam tam turpiter, quam fiunguntur. Eant sua sponte : ire autem possunt placidis atque compositis. Saepe salva sapientis auctoritate fluxerunt, tanto temperamento, ut illis nec humanitas, nec dignitas deesset. Licet, inquam, naturae obsequi, gravitate servata. Vidi ego in funere suorum verendos, in quorum ore amor eminebat, remota omni lugentium scena. Nihil erat, nisi quod veris dabatur affectibus. Est aliquis et dolendi decor. hic sapienti servandus est : et quemadmodum in ceteris rebus, ita et in lacrimis aliquid sat est. Imprudentium ut gaudia, sic dolores exundavere. Aequo animo excipe necessaria. Quid incredibile, quid novum evenit ? quam multis cum maxime funus locatur ? quam multis vitalia eruuntur ? quam multi post luctum tuum lugent ? Quoties cogitaveris puerum fuisse, cogita et hominem, cui nihil certi promittatur, quem fortuna non utique perducit ad senectutem : unde visum est, dimittit. Ceterum de illo frequenter loquere, et memoriam eius, quantum potes, celebra : quae ad te saepius revertetur, si erit sine acerbitate ventura. Nemo enim libenter tristi conversatur, nedum tristitiae. Si quos sermones eius, si quos quamvis parvuli iocos cum voluptate audieras, saepius repete : potuisse illum implere spes tuas, quas paterna mente conceperas, audacter asfirma. Oblivisci quidem suorum, ac memoriam cum corporibus efferre, et effusissime flere, meminisse parcissime, inhumani animi est. Sic aves, sic ferae foetus suos diligunt : quarum concitatus est amor, et

paene rabidus, sed cum amissis totus exstinguitur. Hoc prudentem virum non decet : meminisse per-severet, lugere desinat. Illud nullo modo probo, quod ait Metrodorus, esse aliquam cognatam tristitiae voluptatem : hanc ipsam captandam in eiusmodi tempore. Ipsa Metrodori verba subscripsi : *Μιχθεῖσα ἡδονὴ ἀνδρεία τις γὰρ ἐστὶ, σοὶ μὲν ζητητέον κατὰ τοῦτον τὸν καιρὸν* : de quibus non dubito, quid sis sensurus. Quid enim turpius, quam captare in ipso luctu voluptatem, immo per luctum : et inter lachrimas quoque, quod iuvet, quaerere ? Hi sunt qui nobis obiiciunt nimium rigorem, et infamant praecepta nostra duritia, quod dicamus dolorem in animum aut admittendum non esse, aut citò expellendum. Utrum tandem est aut incredibilius, aut inhumanius, non sentire amisso amico dolorem, an voluptatem in ipso dolore aucupari ? Nos quod praecipimus honestum est : cum aliquid lacrimarum affectus effuderit, et, ut ita dicam, despumaverit, non esse tradendum animum dolori. Quid tu dicis ? miscendam ipsi dolori voluptatem ? Sic consolamur crustulo pueros, sic infantium fletum infuso lacte compescimus. Ne illo quidem tempore quo filius ardet, aut amicus exspirat, cessare pateris voluptatem, sed ipsum vis titillare moerorem. Utrum honestius dolor ab animo submovetur, an voluptas ad dolorem quoque admittitur ? admittitur, dico ? captatur, et quidem ex ipso. Est aliqua, inquit, voluptas cognata tristitiae. Illud nobis licet dicere : vobis quidem non licet. Unum bonum nostis, voluptatem ; unum malum, dolorem. Quae potest inter bonum, et ma-

lum, esse cognatio? Sed puta esse. nunc potissimum eruntur: et ipsum dolorem scrutamur, an aliquid habeat iucundum circa se, et voluptarium? Quaedam remedia aliis partibus corporis salutaria, velut foeda et indecora, adhiberi aliis nequeunt: et quod aliibi prodesset sine damno verecundiae, id fit inhonestum loco vulneris. Non te pudet luctum voluptate sanare? severius ista plaga curanda est. illud potius admone, nullum mali sensum, ad eum qui perit, pervenire: nam si pervenit, non periit. Nulla, inquam, eum res laedit, qui nullus est: vivit, si laeditur. Utrum putas illi mala esse, quod nullus est, an quod est adhuc aliquis? Atqui nec ex eo potest ei tormentum esse, quod non est: quis enim nullius sensus est? nec ex eo quod est: effugit enim maximum mortis incommodum, non esse. Illud quoque dicamus ei, qui deflet, ac desiderat in aetate prima raptum: Omnes quantum ad brevitatem aevi, si universo compares, et iuvenes et senes in aequo sumus. Minus enim ad nos ex omni aetate venit, quam quod minimum esse quis dixerit: quoniam quidem minimum aliqua pars est; hoc quod vivimus, proximum nihilo est: et tamen (o dementiam nostram!) late disponitur. Haec tibi scripsi, non tanquam expectaturus esses remedium a me tam ferum: liquet enim mihi te locutum tecum, quidquid lecturus es: sed ut castigarem illam exiguum moram, qua a te recessisti: et in reliquum exhortarer, contra fortunam tolleres animos, et omnia eius tela, non tanquam possent venire, sed tanquam utique essent ventura, prospiceres.

## E P I S T O L A C.

*De Papirio Fabiano philosopho iudicium, eiusque scriptis.*

**F**ABIANI Papirii libros, qui inscribuntur Civilium, legisse te cupidissime scribis: sed non respondisse expectationi tuae. deinde, oblitus de philosopho agi, compositionem eius accusas. Puta esse quod dicis: et effundi verba, non fingi. Primum, habet ista res suam gratiam: et est decor proprius orationis leniter lapsae. Multum enim interesse existimo, utrum exciderit, an fluxerit. Nunc in hoc quoque, quod dicturus sum, ingens differentia est. Fabianus mihi non effundere videtur orationem, sed fundere; adeo larga est, et sine perturbatione, non sine cursu tamen, veniens. Illud plane fatetur et praefert, non esse se tractatam, nec diu tortam. Sed ita, ut vis, esse credamus: mores ille, non verba composuit; et animis scripsit ista, non auribus. Praeterea, ipso dicente non vacasset tibi partes intueri: adeo te summa rapuisset: et fere quae impetu placent, minus praestant ad manum relata. Sed illud quoque multum est, primo adspectu oculos occupasse: etiamsi contemplatio diligens inventura est, quod arguat. Si me interrogas, maior ille est qui iudicium abstulit, quam qui meruit. Et scio hunc tutiorem esse: scio audacius sibi de futuro promittere. Oratio sollicita philosophum non decet. Ubi tandem erit fortis et constans, ubi periculum sui



faciet, qui timet verba? Fabianus non erat negligens in oratione, sed securus: itaque nihil invenies sordidum. Electa verba sunt, non captata: nec huius seculi more contra naturam suam posita et inversa; splendida tamen, quamvis sumantur e medio: sensus honestos et magnificos habent, non coactos in sententiam, sed altius ductos. Videbimus, quid parum recisum sit, quid parum structum, quid non huius recentis politurae: cum circumspexeris omnia, nullas videbis angustias inanes. Desit sane varietas marmorum, et concisura aquarum cubiculis interfluentium, et pauperis cella, et quidquid aliud luxuria, non contenta decore simplici, miscet: quod dici solet, domus recta est. Adiice nunc, quod de compositione non constat. Quidam illam volunt esse ex horrido comtam: quidam usque eo aspera gaudent, ut etiam quae mollius casus explicuit, ex industria dissipent, et clausulas abrumpant, ne ad expectatum respondeant. Lege Ciceronem. compositio eius una est: pedem servat, curata, lenta, et sine infamia mollis. At contra, Pollionis Asinii salebrosa et exsiliens, et ubi minime expectes, relictura. Denique apud Ciceronem omnia desinunt: apud Pollionem cadunt: exceptis paucissimis, quae ad certum modum, et ad unum exemplar, adstricta sunt. Humilia praeterea tibi videri dicis omnia, et parum erecta: quo vitio carere eum iudico. Non sunt humilia illa, sed placida, et ad animi tenorem quietum compositumque formata, nec depressa, sed plana. Deest illis oratorius vigor, stimuli que quos quaeris, et subiti ictus sententiarum: sed totum cor-

pus videris; quamvis sit incommum, honestum est. Non habet oratio eius, sed debet dignitatem. Affer quem Fabiano possis praeponere. Dic Ciceronem, cuius libri ad philosophiam pertinentes, paene totidem sunt, quot Fabiani. Cedam. sed non statim pusillum est, si quid maximo minus est. Dic Asinium Pollionem. Cedam. et respondeamus: In re tanta eminere est, et post duos esse. Nomina adhuc Livium. Scripsit enim et dialogos, quos non magis philosophiae annumerare possis, quam historiae: et ex professio philosophiam continentes libros. Huic quoque dabo locum: vide tamen, quam multos antecedit, qui a tribus vincitur, et tribus eloquentissimis. Sed non praestat omnia. non est fortis oratio eius, quamvis elata sit: non est violenta, nec torrens, quamvis effusa sit: non est perspicua, sed pura. Desideres, inquires, contra vitia aliquid aspere dici, contra pericula animose, contra fortunam superbe, contra ambitionem contumeliose. Volo luxuriam obiurgari, libidinem traduci, impotentiam frangi: sit aliquid oratorie acre, tragice grande, comice exile. Vis illum assidere pusillae rei, verbis? Ille rerum se magnitudini addixit: eloquentiam, velut umbram, non hoc agens, contrahit. Non erunt sine dubio singula circumspecta, nec in se collecta, nec omne verbum excitabit ac punget: fateor: exhibunt multa, nec ferient, et interdum otiosa praeterlabetur oratio: sed multum erit in omnibus locis et ingens sine taedio spatium. Denique illud praestabit, ut liqueat tibi, illum sensisse quae scripsit. Intelliges actum hoc, ut tu scires quid illi placeret;



non ut ille placeret tibi. Ad profectum omnia tendunt, et ad bonam mentem: non quaeritur plausus. Talia esse scripta eius, non dubito, etiamsi magis reminiscor quam teneo: haeretque mihi color eorum, non ex recenti conversatione familiariter, sed summatim, ut solet ex vetere notitia. Cum audirem certe illum, talia mihi videbantur: non solida, sed plena, quae adolescentem indolis bonae attollerent, et ad imitationem sui vocarent, sine desperatione vincendi. quae mihi adhortatio videtur efficacissima. Deterret enim, qui imitandi cupiditatem modo fecit, spem abstulit. Ceterum verbis abundabat, sine commendatione partium singularum, in universum magnificus.

## E P I S T O L A C I.

*De subita morte cuiusdam noti: & ex occasione, nihil fidendum aut spondendum nobis. Omnia incerta; ideoque vita bona non differenda. longa autem non optanda: & exagitat Maecenatis turpissimum votum.*

**O**MNIS dies, omnis hora, quam nihil simus ostendit, et aliquo argumento recenti admonet fragilitatis oblitos, cum aeterna meditantes respicere cogit ad mortem. Quid sibi istud principium velit, quaeris? Senecionem Cornelium, equitem Romanum splendidum et officiosum, noveras: ex tenui principio se ipse promoverat, et iam illi declivis erat cursus ad cetera. Facilius enim crescit dignitas, quam incipit. Pecunia quoque circa paupertatem

plurimam moram habet, dum ex illa ereptat. Hic etiam Senecio divitiis imminebat, ad quas illum duces res ducebant efficacissimae, et quaerendi, et custodiendi scientia: quarum vel altera locupletem facere potuisset. Hic homo summae frugalitatis, non minus patrimonii quam corporis diligens, cum me ex consuetudine mane vidisset, cum per totum diem amico graviter affecto, et sine spe iacenti, usque in noctem assedisset, cum hilaris coenasset, genere valetudinis praecipiti abreptus, angina, vix compressum arctatis faucibus spiritum traxit in lucem. Intra paucissimas ergo horas, postquam omnibus erat sani ac valentis officiis functus, decessit. Ille qui et mari et terra pecuniam agitabat, qui ad publica quoque, nullum relinquens inexpertum genus quaestus, accesserat; in ipso actu bene cedentium rerum, in ipso procurrentis pecuniae impetu, raptus est.

*Insere nunc, Meliboe, piros, pone ordine vites.*

Quam stultum est aetatem disponere? ne crastino quidem dominamur. O quanta dementia est, spes longas inchoantium! Eniam, aedificabo, credam, exigam, honores geram, tum demum lassam et plenam senectutem in otium referam. Omnia, mihi crede, etiam felicibus dubia sunt. Nihil sibi quisquam de futuro debet promittere: id quoque quod tenetur, per manus exit, et ipsam quam premimus horam, casus incidit. Volvitur tempus, rata quidem lege, sed per obscurum: quid autem ad me, annatae certum sit, quod mihi incertum est? Navigationes longas, et pererratis litoribus alienis, seròs in

patriam reditus proponimus; militiam, et castresium laborum tarda manupretia; procuraciones, officiorumque per officia processus: cum interim ad latus mors est. quae quoniam nunquam cogitatur, nisi aliena; nobis subinde ingeruntur mortalitatis exempla, non diutius, quam dum miramur, haesura. Quid autem est stultius, quam mirari id ullo die factum, quod omni potest fieri? Stat quidem terminus nobis, ubi illum inexorabilis fatorum necessitas fixit: sed nemo scit nostrum, quam prope versetur. Sic itaque formemus animum, tanquam ad extrema ventum sit: nihil differamus, quotidie cum vita paria faciamus. Maximum vitae vitium est, quod imperfecta semper est, quod etiam aliquid ex illa differtur. qui quotidie vitae suae summam manum imposuit, non indiget tempore. Ex hac autem indigentia timor nascitur, et cupiditas futuri, exedens animum. Nihil est miserius dubitatione venientium, quorsum evadant. Quantum sit illud quod restat, aut quale, collecta mens inexplicabili formidine agitur. Quomodo effugiemus hanc volutationem? uno, si vita nostra non prominebit, si in se colligetur. Ille enim ex futuro suspenditur, cui irritum est praesens. Ubi vero quidquid mihi debui, redditum est, ubi stabilita mens scit, nihil interesse inter diem et seculum: quidquid deinceps dierum rerumque venturum est, ex alto prospicit, et cum multo risu seriem temporum cogitat. Quid enim varietas mobilitasque casuum perturbabit, si certus sit adversus incerta? Ideo, mi Lucili, propera vivere: et singulos dies, singulas vitas puta. Qui hoc modo se aptabit, cui

vita sua quotidie fuit tota, securus est. In spe viventibus, proximum quodque tempus elabitur: subitque aviditas, et miserrimum atque miserrima omnia efficiens, metus mortis. Inde illud Maecenatis turpissimum votum: quo et debilitatem non recusat, et deformitatem, et novissime acutam crucem, dummodo inter haec mala spiritus prorogetur.

*Debilem facito manu,  
 Debilem pede, coxa:  
 Tuber adstrue gibberum,  
 Lubricos quate dentes.  
 Vita dum superest, bene est.  
 Hanc mihi, vel acuta  
 Si sedeam cruce, sustine.*

Quod miserrimum erat, si incidisset, optatur: et tanquam vita petitur, supplicii mora. Contemptissimum putarem, si vivere vellet usque ad crucem. Tu vero, inquit, me debiles licet, dum spiritus in corpore fracto et inutili maneat: depraves licet, dum monstroso et distorto temporis aliquid accedat: suffigas licet, et acutam sessuro crucem subdas: est tanti, vulnus suum premere, et patibulo pendere destitutum, dum differat id quod est in malis optimum, supplicii finem. Est tanti, habere animam, ut agam. Quid huic optes, nisi deos faciles? quid sibi vult ista carminis effeminati turpitudine? quid timoris demeritissimi pactio? quid tam foeda vitae mendicatio? Huic putas unquam recitasse Virgilium,

*Usque adeone mori miserum est?*

Optat ultima malorum : et quae pati gravissimum est ,  
 extendi ac sustineri cupit. qua mercede ? scilicet vitae  
 longioris. Quid autem huius vivere est ? diu mori.  
 Invenitur aliquis , qui malit inter supplicia tabescere ,  
 et perire membratim , et toties per stillicidia amittere  
 animam , quam semel exhalare ? Invenitur qui velit  
 adactus ad illud infelix lignum , iam debilis , iam pra-  
 vus , et in foedum scapularum ac pectoris tuber cli-  
 fus , cui multae moriendi causae etiam citra crucem  
 fuerant , trahere animam tot tormenta tracturam ?  
 Nega nunc magnum beneficium esse naturae , quod  
 necesse est mori. Multi peiora pacisci adhuc parati  
 sunt : etiam amicum prodere , ut diutius vivant : et  
 liberos ad stuprum manu sua tradere , ut contingat  
 lucem videre , tot consciam scelerum. Excutienda  
 vitae cupido est : discendumque , nihil interesse quan-  
 do patiaris quod quandoque patiendum est : quam  
 bene vivas referre , non quamdiu : saepe autem in  
 hoc esse bene , ne diu.

## EPISTOLA CII.

*Aliquid de immortalitate animae. tum quaestiunculae,  
 An claritas post mortem ad nos faciat? Disputat  
 tenuiter primo & scholastice : tum in extremo adsur-  
 git , & ad Deum ac coelestia animum ducit. Corpus  
 hoc , sarcinam aut velamentum esse : sperni debere &  
 exui , cum Deus & dies ille vocant.*

**Q**UOMODO molestus est iucundum somnium  
 videnti , qui excitat : aufert enim voluptatem , etiam-

si falsam, eff etum tamen verae habentem: sic epistola tua mihi fecit iniuriam. revocavit enim me cogitationi aptae traditum, et iturum, si licuisset, ulterius. Iuvabat de aeternitate animarum quaerere, immo mehercule credere. credebam enim facile opinionibus magnorum virorum, rem gratissimam promittentium magis, quam probantium. Dabam me spei tantae. iam eram fastidio mihi, iam reliquias aetatis infractae contemnebam, in immensum illud tempus, et in possessionem omnis aevi transiturus: cum subito experrectus sum, epistola tua accepta, et tam bellum somnium perdidici. quod reperam, si te dimisero, et redimam. Negas me epistola prima totam quaestionem explicuisse, in qua probare conabar id quod nostris placet, claritatem quae post mortem contingit, bonum esse. Id enim me non solvisse, quod opponitur nobis: Nullum, inquit, bonum ex distantibus: hoc autem ex distantibus constat. Quod interrogas, mi Lucili, eiusdem quaestionis est, loci alterius: et ideo non hoc tantum, sed alia quoque eodem pertinentia, distuleram. Quaedam enim, ut scis, moralibus rationalia immixta sunt. Itaque illam partem recta ad mores pertinentem tractavi, Numquid stultum sit ac supervacuum, ultra extremum diem curas transmitters. An cadant bona nostra nobiscum, nihilque sit eius qui nullus est. An ex eo, quod cum erit, sensuri non simus, antequam aliquis fructus percipi aut peti possit. Haec autem omnia ad mores spectant: itaque suo loco posita sunt. At quae a dialecticis contra hanc opinionem dicuntur, segreganda fuerunt: et ideo seposita sunt. Nunc



quia omnia exigis, omnia quae dicunt persequar, deinde singulis occurram. At nisi aliquid praedixero, intelligi non poterunt quae refellentur. Quid est, quod praedicere velim? Quaedam continua esse corpora, ut hominem: quaedam composita, ut navem, domum, omnia denique quorum diversae partes iunctura in unum sunt coactae: quaedam ex distantibus, quorum adhuc membra separata sunt, tanquam exercitus, populus, senatus. Illi enim, per quos ista corpora efficiuntur, iure aut officio cohaerent, natura diducti et singuli sunt. Quid est, quod etiam nunc praedicere velim? Nullum bonum putamus esse, quod ex distantibus constat. uno enim spiritu unum bonum contineri ac regi debet, unum esse unius boni principale. Hoc si quando desideraveris, per se probatur: interim ponendum fuit, quo nostra tela nitatur. Dicitis, inquit, nullum bonum ex distantibus esse: Claritas autem ista, bonorum virorum secunda opinio est. Nam quomodo fama non est unius sermo, nec infamia unius mala existimatio: sic nec claritas, uni bono placuisse. Consentire in hoc plures insignes et praestantes viri debent, ut claritas sit. Haec autem ex iudiciis plurium efficitur, id est, distantium. ergo non est bonum. Claritas, inquit, laus est a bonis bono reddita: laus oratio: oratio vox est, aliquid significans: vox autem, licet virorum sit bonorum, bonum non est. Neque enim quidquid vir bonus facit, bonum est. nam et plaudit, et sibilat: sed nec plausum quisquam, nec sibilum, licet omnia eius admiretur et laudet, bonum dicit, non magis quam sternutamentum aut

tussum. Ergo claritas bonum non est. Ad summam, dicite nobis, utrum laudantis, an laudati bonum sit? Si laudantis bonum esse dicitis, tam ridiculam rem facitis, quam si affirmetis meum esse, quod alius bene valeat. Sed laudare dignos, honesta actio est: ita laudantis bonum est, cuius actio est, non nostrum qui laudamur. atqui hoc quaerebatur. Respondebo nunc singulis cursim. Primum, an sit aliquid ex distantibus bonum, etiam nunc quaeritur, et pars utraque sententias habet. Deinde, claritas desiderat multa suffragia: potest et unius boni viri iudicio esse contenta. Nam omnes bonos bonus unus iudicat. Quid ergo? inquit; et fama erit unius hominis existimatio, et infamia unius, malignus sermo? Gloriam quoque, inquit, latius fufam intelligo: consensum enim multorum exigit. Diversa horum conditio est, et illius. Quare? quia si de me bene vir bonus sentit, eodem loco sum, quo, si omnes boni idem sentirent. omnes enim si me cognoverint, idem sentient. Par illis idemque iudicium est: aequè vero insistitur ab his, qui dissidere non possunt. Ita pro eo est, ac si omnes idem sentiant: quia aliud sentire non possunt. Ad gloriam et famam, non est satis unius opinio. Illic idem potest unius sententia, quod omnium: quia omnium si perrogetur, una erit: hic diversa dissimilium iudicia sunt, dissimiles affectus. Dubia omnia invenias, levia, suspecta. Putas tu posse sententiam unam omnium esse? non est unius una. Illis placet verum: veritatis una vis, una facies est: apud hos falsa sunt, quibus assentiuntur. Nunquam autem falsis constantia est: variantur et dissident.



Sed laus, inquit, nihil aliud quam vox est : vox autem bonum non est. Cum dicunt claritatem laudem esse bonorum, a bonis redditam : iam non ad vocem referunt, sed ad sententiam. Licet enim vir bonus taceat, sed aliquem iudicet dignum laude, laudatus est. Praeterea, aliud est laus, aliud laudatio. Haec et vocem exigit. Itaque nemo dicit laudem funebrem, sed laudationem, cuius officium oratione constat. Cum dicimus aliquem laude dignum, non verba illi benigna hominum, sed iudicia promittimus. Ergo laus etiam taciti est bene sentientis, ac bonum virum apud se laudantis. Deinde, ut dixi, ad animum refertur laus, non ad verba; quae conceptam laudem egerunt, et in notitiam plurium emittunt. Laudat, qui laudandum esse iudicat. Cum Tragicus ille apud nos ait, Magnificum esse laudari a laudato viro : laude digno, ait. Et cum aequae antiquus poëta ait, Laus alit artes : non laudationem dicit, quae corrumpit artes. nihil enim aequae et eloquentiam, et omne aliud studium auribus deditum vitiavit, quam popularis assensio. Fama utique vocem desiderat, claritas non. potest enim citra vocem contingere, contenta iudicio : plena est, non tantum inter tacentes, sed etiam inter reclamantes. Quid inter sit inter claritatem et gloriam, dicam. Gloria multorum iudiciis constat, claritas bonorum. Cuius, inquit, bonum est claritas, id est, laus bona a bonis reddita? utrum laudati, an laudantis? Utriusque : meum qui laudor, quia natura me amantem omnium genuit; et bene fecisse gaudeo, et gratos me invenisse virtutum interpretes laetor. Hoc

plurimum bonum est, quod grati sunt, sed et meum. Ita enim animo compositus sum, ut aliorum bonum meum iudicem: utique eorum, quibus ipse sum boni causa. Est illud laudantium bonum: virtute enim geritur: omnis autem virtutis actio bonum est. Hoc contingere illis non potuisset, nisi ego talis essem. Itaque utriusque bonum est, merito laudari; tam mehercule, quam bene iudicasse, iudicantis bonum est, et eius, secundum quem iudicatum est. Numquid dubitas, quin iustitia et habentis bonum sit, et eius cui debitum solvit? Merentem laudare, iustitia est: igitur utriusque bonum est. Cavillatoribus istis abunde responderimus. Sed non debuit hoc nobis esse propositum, arguta differere, et philosophiam in has angustias ex sua maiestate deerrare. Quanto satius est, ire aperta via et recta, quam sibi ipsi flexus disponere, quos cum magna molestia debeas relegere? neque enim quidquam aliud istae disputationes sunt, quam inter se perite captantium lusus. Dic potius, quam naturale sit, in immensum mentem suam extendere. Magna et generosa res est humanus animus: nullos sibi poni nisi communes et cum Deo terminos patitur. Primum, humilem non accipit patriam: Ephesum aut Alexandriam, aut si quod est etiamnum frequentius incolis, latius tectis solum. Illi patria est, quodcunque suprema et universa circuitu suo cingit: hoc omne convexum, intra quod iacent maria cum terris, intra quod aër humanis divina secernens etiam coniungit, intra quod disposita tot numina in actus suos excubant. Deinde, arctam aetatem sibi dari non finit. Omnes, in-

quit, anni mei sunt. nullum seculum magnis ingeniis clusum est, nullum non cogitationi pervium tempus. Cum venerit dies ille qui mixtum hoc divini humanique fecernat corpus, hoc, ubi inveni, relinquam: ipse me diis reddam. nec nunc sine illis sum, sed gravi terrenoque detineor. Per has mortalis aevi moras, illi meliori vitae longiorique prolu- ditur. Quemadmodum novem mensibus nos tenet maternus uterus, et praeparat non sibi, sed illi loco in quem videmur emitti, iam idonei spiritum tra- here, et in aperto durare: sic per hoc spatium, quod ab infantia patet in senectutem, in alium naturae sumimur partum. Alia origo nos exspectat, alius re- rum status. Nondum coelum, nisi ex intervallo, pati possumus. Proinde intrepidus horam illam de- cretoriam prospice: non est animo suprema, sed corpori. Quidquid circa te iacet rerum, tanquam ho- spitalis loci farcinas specta: transeundum est. Excutit redeuntem natura, sicut intrantem. Non licet plus efferre, quam intuleris: immo etiam ex eo, quod in vitam attulisti, pars magna ponenda est. Detrahe- tur tibi haec circumiecta, novissimum velamentum tui, cutis: detrahetur caro et suffusus sanguis, dis- currensque per totum: detrahentur ossa nervique, firmamenta fluidorum ac labentium. Dies iste, quem tanquam extremum reformidas, aeterni natalis est. Depone onus. quid cunctaris; tanquam non prius quoque, relicto, in quo latebas, corpore, exieris? Haeres et reluctaris: tum quoque magno nisu matris expulsus es. Gemis, ploras: et hoc ipsum flere, na- scentis est. Sed tunc debebat ignosci. rudis et impe-

ritus omnium veneras : ex maternorum viscerum calido mollique fomento emissum, afflavit aura liberior. Deinde offendit durae manus tactus : tenerque adhuc, et nullius rei gnarus obstupuisti inter ignota. Nunc tibi non est novum, separari ab eo, cuius ante pars fueris : aequo animo membra iam supervacua dimitte, et istud corpus inhabitatum diu, pone. Scindetur, obruetur, abolebitur. Quid contristaris? ita solet fieri. Pereunt semper velamenta nascentium. Quid ista sic diligis, quasi tua? istis opertus es. Veniet qui te revelet dies, et ex contubernio foedi atque olidi ventris educat. Hinc nunc quoque tu quantum potes, subvola : utique etiam necessariis, quae cohaerebunt, alienus. Iam hinc, altius aliquid sublimiusque meditare. Aliquando naturae tibi arcana reteguntur, discutiatur ista caligo, et lux undique clara percutiet. Imaginare tecum, quantus ille sit fulgor, tot sideribus inter se lumen miscentibus. Nulla serenum umbra turbabit : aequaliter splendet omne coeli latus : dies et nox, aëris infimi vices sunt. Tunc in tenebris vixisse dices, cum totam lucem totus adspexeris : quam nunc, per angustissimas oculorum vias, obscure intueris, et tamen admiraris tam procul. Quid tibi videbitur divina lux, cum illam suo loco videris? Haec cogitatio nihil sordidum animo subsidere finit, nihil humile, nihil crudele. Deos omnium rerum esse testes ait, illis nos approbati, illis in futurum parari iubet, et aeternitatem proponere; quam qui mente concepit, nullos horret exercitus, non terretur tuba, nullis ad timorem minis agitur. Quidni non timeat, qui mori spe-

rat? si is quoque, qui tamdiu animum iudicat manere, quamdiu retinetur corporis vinculo; exsolutum, statim spargi; id agit, ut etiam post mortem utilis esse possit. Quamvis enim ipse ereptus sit oculis, tamen

*Multa viri virtus animo, multusque recurſat  
Gentis honos.*

Cogita, quantum nobis exempla bona profint: ſcies magnorum virorum, non minus praefentia, eſſe utilem memoriam.

## EPISTOLA CIII.

*Malitia & infidiae inter ſe hominum. Tu tamen non  
eadem facito, aut reponere: ſed mitis in omnes &  
volens eſſo.*

**Q**UID iſta circumſpicias, quae tibi poſſunt fortaſſe evenire, ſed poſſunt et non evenire? incendium dico, ruinam, aliaque, quae nobis incidunt, non infidiantur: illa potius vide, illa devita, quae nos obſervant, quae captant. Rari ſunt caſus, etiamſi graves, naufragium facere, vehiculo everti: ab homine homini quotidianum periculum. Adverſus hoc te expedi, hoc intentis oculis intueri. Nullum enim malum frequentius, nullum pertinacius, nullum blandius. Tempeſtas minatur, antequam ſurgat: crepant aedificia, antequam corruant: praenuntiat ſumus incendium: ſubita eſt ex homine pernicies, et

eo diligentius tegitur, quo propius accedit. Erras; si istorum tibi qui occurrunt vultibus credis, hominum effigies habent, animos ferarum: nisi quod illarum perniciosior est primus incurfus, quos transire non queunt. Nunquam enim illas ad nocendum nisi necessitas inigit: aut fame, aut timore coguntur ad pugnam: homini perdere hominem libet. Tu tamen ita cogita, quod ex homine periculum sit, ut cogites, quod sit hominis officium. Alterum intueri, ne laedaris; alterum, ne laedas. Commodis omnium laeteris, movearis incommodis: et memineris quae praestare debeas, quae cavere. Sic vivendo quid consequeris? non, ut ne noceant; sed ne fallant. Quantum autem potes, in philosophiam secede. illa te sinu suo proteget: in huius sacrario eris aut tutus, aut tutior. Non arietant inter se, nisi in eodem ambulantes. Quin etiam ipsam philosophiam non debbis iactare. multis fuit periculi causa, insolenter tractata, et contumaciter. Vitia tibi detrahat, non alii exprobet: non abhorreat a publicis moribus: nec hoc agat, ut quidquid non facit, damnare videatur. Licet sapere sine pompa, sine invidia.

---



## EPISTOLA CIV.

*De invaletudine sua, de cura & caritate in se uxoris. Locum se mutasse, ut recrearetur : & hinc de Peregrinatione pulcherrima dissertatio. Non esse eam a se utilem, nisi animo talis efficitur. Ille emendetur, affectus recidantur : omnia tunc loca & status iucunda. Peregrinatio etiam alia pulcherrima, ad priscos & magnos viros ire, illos cogitatione intueri atque imitari. Hoc vitia tollit, virtutes inserit : atque istuc Lucilium vocat.*

**I**N Nomentanum meum fugi, quid putas? urbem? immo febrem, et quidem surrepentem. Iam manum mihi iniecerat : protinus itaque parari vehiculum iussi, Paullina mea retinente. Medicus initia esse dicebat, motis venis, sed incertis, et naturalem turbantibus modum. Exire perseveravi. Illud mihi in ore erat domini mei Gallionis : qui cum in Achaia febrem habere coepisset, protinus navem adscendit, clamitans non corporis esse, sed loci morbum. Hoc ego Paullinae meae dixi, quae mihi valetudinem meam commendat. Nam cum sciam spiritum illius in meo verti : incipio, ut illi consulam, mihi consilere : et cum me fortiorem senectus ad multa reddiderit, hoc beneficium aetatis amitto. Venit enim mihi in mentem, in hoc sene et adolescentem esse, cui parcitur. Itaque quoniam ego ab illa non impetro, ut me fortius amet : impetrat illa a me, ut me diligentius amem. Indulgendum est enim honestis affec-

tibus : et interdum etiam si premunt causae , spiritus in honorem suorum vel cum tormento revocandus , et in ipso ore retinendus est ; cum bono viro vivendum sit , non quamdiu iuvat , sed quamdiu oportet. Ille qui non uxorem , non amicum tanti putat , ut diutius in vita commoretur , qui perseverat mori , delicatus est. Hoc quoque imperet sibi animus , ubi utilitas suorum exigit : nec tantum si vult mori , sed si coepit , intermittat , et suis se commodet. Ingentis animi est , aliena causa ad vitam reverti : quod magni viri saepe fecerunt. Sed hoc quoque summae humanitatis existimo , senectutem suam , cuius maximus fructus est , securior sui tutela , et vitae usus animosior , attentius conservare , si scias alicui tuorum esse dulce , utile , optabile. Habet praeterea in se non mediocre ista res gaudium , et mercedem. quid enim iucundius , quam uxori tam carum esse , ut propter hoc tibi carior fias ? Potest itaque Paullina mea non tantum suum mihi timorem imputare , sed etiam meum. Quaeris ergo , quomodo mihi consilium profectionis cesserit ? Ut primum gravitatem urbis excessi , et illum odorem culinarum fumantium , quae motae quidquid pestiferi vaporis obruerant , cum pulvere effundunt , protinus mutatam valetudinem sensi. Quantum deinde adiectum putas viribus , posquam vineas attigi ? In pascuum emissus , cibum meum invasi. Repetivi ergo iam me. non permanfit marcor ille corporis dubii , et male cogitantis : incipio toto animo studere. Non multum ad hoc locus confert , nisi se sibi praestet animus , qui secretum et in occupationibus mediis , si volet , habebit.

At ille qui regiones eligit, et otium captat, ubique quo distringatur inveniet. Nam Socratem quaerenti cuidam, quod nihil sibi peregrinationes profuissent, respondisse ferunt: Non immerito hoc tibi evenit: tecum enim peregrinabar. O quam bene cum quibusdam ageretur, si a se aberrarent! Nunc primi se ipsos sollicitant, corrumpunt, territant. Quid prodest mare traicere, et urbes mutare? si vis ista, quibus urgeris, effugere, non alibi sis oportet, sed alius. Puta venisse te Athenas, puta Rhodon: elige arbitrio tuo civitatem: quid ad rem pertinet, quos illa mores habeat? tuos afferes. Divitias iudicabis bonum? torquebit te paupertas, et (quod est miserrimum) falsa. Quamvis enim multum possideas, tamen quia aliquis plus habet, tanto tibi videberis defici, quanto vinceris. Honores iudicas bonum? male te habebit ille consul factus, ille etiam refectus: ringeris, quoties aliquem in fastis saepius legeris. Tantus erit ambitionis furor, ut nemo tibi post te videatur, si aliquis ante te fuerit. Maximum malum iudicabis mortem: cum in illa nihil sit mali, nisi, quod ante ipsam est, timeri. Exterrebunt te non tantum pericula, sed suspiciones: vanis semper agitaris. Quid enim proderit,

—— evasisse tot urbes .

*Argolicas, mediosque fugam tenuisse per hostes?*

Ipsa pax timores subministrabit. ne tutis quidem habebitur fides, consternata semel mente: quae ubi consuetudinem pavoris improvidi fecit, etiam ad tutelam salutis suae inhabilis est. Non enim vitat, sed

fugit : magis autem periculis patemur averſi. Gra-  
viſſimum iudicabis malum , aliquem ex his quos  
amabis amittere : cum interim hoc tam ineptum erit,  
quam flere , quod arboribus amoenis et domum  
tuam ornantibus decidant folia. Quidquid te delectat,  
aeque viget , ut videras dum vireret. utique aliud  
alio die caſus excutiet. ſed quemadmodum frondium  
iaſtura facilis eſt , quia renaſcuntur : ſic iſtorum quos  
amas , quoſque oblectamenta vitae putas eſſe , dam-  
num : quia reparantur , etiamſi non renaſcantur.  
Sed non erunt iidem. Ne tu quidem idem eris. om-  
nis dies , omnis hora te mutat : ſed in aliis rapina  
facilius apparet : hic latet , quia non ex aperto fit.  
Alii auferuntur : at ipſi nobis furto ſubducimur. Ho-  
rum nihil cogitabis , nec remedia vulneribus appo-  
nes , ſed ipſe tibi ſeres ſollicitudinum cauſas , alia  
ſperando , alia deſperando ? Si ſapis , alterum alteri  
miſceas : nec ſperaveris ſine deſperatione , nec deſpe-  
raveris ſine ſpe. Quid per ſe prodeſſe peregrinatio  
cuiquam potuit ? Non voluptates illa temperavit ,  
non cupiditates refraenavit , non iras repreſſit , non  
indomitos amoris impetus fregit , nulla denique ani-  
mo mala eduxit , non iudicium dedit , non excuſſit  
errorem : ſed ut puerum ignota mirantem , ad breve  
tempus rerum aliqua novitate deſinuit. Ceterum in-  
conſtantiam mentis , quae cum maxime aegra eſt ,  
laceſſit , mobiliorem levioſemque reddit ipſa iaſta-  
tio. Itaque quae petierant cupidiffime loca , cupidius  
deſerunt , et avium modo tranſvolant , citiuſque  
quam venerant , abeunt. Peregrinatio notitiam dabit  
gentium , novas tibi montium formas oſtendet , inu-

fitata spatia camporum, et irriguas perennibus aquis valles, et alicuius fluminis sub observatione naturam: sive, ut Nilus, aestivo incremento tumet; sive, ut Tigris, eripitur ex oculis, et acto per occulta cursu, integrae magnitudini redditur; sive, ut Maeander, poetarum omnium exercitatio et ludus, implicatur crebris anfractibus, et saepe in vicinum alveo suo admotus, antequam sibi influat, flectitur; ceterum neque meliorem faciet, neque saniozem. Inter studia versandum est, et inter auctores sapientiae, ut quaesita discamus, nondum inventa quaeramus. Sic eximendus animus ex miserrima servitute, in libertatem asseritur. Quamdiu quidem nescieris, quid fugiendum, quid petendum, quid necessarium, quid supervacuum, quid iustum, quid honestum sit: non erit hoc peregrinari, sed errare. Nullam tibi opem feret iste discursus: peregrinaris enim cum affectibus tuis, et mala te tua sequuntur. Utinam quidem sequerentur! longius abessent: nunc fers illa, non ducis. Itaque ubique te premunt, et paribus incommodis urunt. Medicina aegro, non regio, quaerenda est. Fregit aliquis crus, aut extorsit articulum? non vehiculum navemque conscendit, sed advocat medicum, ut fracta pars iungatur, ut luxata in locum reponatur. Quid ergo? animum, tot locis fractum et extortum, credis locorum mutatione posse sanari? maius est istud malum, quam ut gestatione curetur. Peregrinatio non facit medicum, non oratorem: nulla ars loco discitur. Quid ergo? Sapientia rerum omnium maxima in itinere colligetur? Nullum, mihi crede, iter est, quod te extra cupiditates, extra



iras, extra metus sistat : aut si quod esset, agmine facto, gens illuc humana pergeret. Tamdiu ista urgebunt mala, macerabuntque per terras ac maria vagum, quamdiu malorum gestaris causas. Fugam tibi non prodesse miraris? tecum sunt quae fugis. Te igitur emenda, onera tibi detrahe et desideria : saltem intra modum contine. Omnem ex animo erade nequitiam. si vis peregrinationes habere iucundas, tuum comitem sana. Haerebit tibi avaritia, quamdiu avaro fordidoque convixeris : haerebit tumor, quamdiu cum superbo conversaberis : nunquam saevitiam in tortoris contubernio pones : incendent libidines tuas adulterorum sodalitia. Si velis vitiis exui, longe a vitiorum exemplis recedendum est. Avarus, corruptor, saevus, fraudulentus, multum nocituri si prope a te fuissent, intra te sunt. Ad meliores transi. cum Catonibus vive, cum Laelio, cum Tuberone : quod si convivere etiam Graecis iuvat, cum Socrate, cum Zenone versare. Alter te docebit mori, si necesse erit : alter antequam necesse erit. Vive cum Chrysippo, cum Posidonio. Hi tibi tradent divinarum humanorumque notitiam. hi iubebunt in opere esse : nec tantum scite loqui, et in oblectationem audientium verba iactare, sed animum indurare, et adversus minas erigere. Unus est enim huius vitae fluctuantis et turbidae portus, eventura contemnere, stare fidenter, aperte tela fortunae adverso pectore excipere, non latitantem, nec tergiversantem. Magnanimos nos natura produxit : et ut quibusdam animalibus ferum dedit, quibusdam subdolum, quibusdam pavidum, ita nobis gloriosum ex excelsum spiritum, quaeren-



tem ubi honestissime, non ubi tutissime vivat; simillimum mundo: quem quantum mortalibus passibus licet, sequitur aemulaturque. Profert se, laudari et adspici credit. Dominus omnium est, supra omnia est. itaque nulli se rei submittit: nihil illi videtur grave, nihil asperum, quod virum incurvet.

*Terribiles visu formae, letumque labosque:*

minime quidem, si quis rectis oculis intueri illa possit, et tenebras perrumpere. Multa per noctem habita terrori, dies vertit ad risum.

*Terribiles visu formae, letumque labosque,*

egregie Virgilius noster. Non re dixit terribiles esse, sed visu: id est, videri, non esse. Quid, inquam, in istis est tam formidabile, quam fama vulgavit? Quid est, obsecro te, Lucili, cur timeat laborem vir, mortem homo? Totiens mihi occurrunt isti, qui non putant fieri posse quidquid facere non possunt, et aiunt nos loqui maiora, quam quae natura humana sustineat. At quanto ego de illis melius existimo? ipsi quoque haec possunt facere, sed nolunt. Denique quem unquam ista desistuerent tentantem? cui non faciliora apparuere in actu? Non quia difficilia sunt, non audemus: sed quia non audemus, difficilia sunt. Si tamen exemplum desideratis, accipite Socratem perpeffitum senem, per omnia aspera iactatum, invictum tamen et paupertate, quam graviozem illi domestica onera faciebant; et laboribus, quos militares quoque pertulit, et quibus ille

domi exercitus. sive uxorem eius spectes moribus feram, lingua petulantem; sive liberos indociles, et matri quam patri similiores. Sic fere aut in bello fuit, aut in tyrannide, aut in libertate, bellis ac tyrannis faeviore. Viginti et septem annis pugnatum est: post finita arma, triginta tyrannis noxae dedita est civitas, ex quibus plerique inimici erant. Novissima damnatio est sub gravissimis hominibus impleta. obiecta est et religionum violatio, et inventuris corruptela, quam immittere in deos, in patres, in rempublicam dictus est: post haec carcer, et venenum. Haec usque eo animum Socratis non moverunt, ut ne vultum quidem moverint. Illam mirabilem laudem, et singularem, usque ad extremum servavit: non hilariorem quisquam, non tristiore Socratem vidit: aequalis fuit in tanta inaequalitate fortunae. Vis alterum exemplum? accipe hunc M. Catonem recentiorum, cum quo et infestius fortuna egit, et pertinacius. Cui cum omnibus locis obstitisset, novissime et in morte: ostendit tamen virum fortem posse invita fortuna vivere, invita mori. Tota illi aetas aut in armis est exacta civilibus, aut in aetate concipiente iam civile bellum. Et hunc licet dicas non minus, quam Socratem, in servitute vixisse: nisi forte Cn. Pompeium, et Caesarem, et Crassum putas libertatis socios fuisse. Nemo mutatum Catonem, toties mutata republica, vidit: eundem se in omni statu praestitit. In praetura, in repulsa, in accusatione, in provincia, in concione, in exercitu, in morte, denique in illa reipublicae trepidatione, cum illinc Caesar esset decem legionibus.

pugnacissimis subnixus, tot externarum gentium praefidiis; hinc Cn. Pompeius, satis unus adversus omnia. Cum alii ad Caesarem inclinarent, alii ad Pompeium, solus Cato fecit aliquas et reipublicae partes. Si animo complecti volueris illius imaginem temporis, videbis illinc plebem et omnem erectum ad res novas vulgum: hinc optimates et equestrem ordinem, quidquid erat in civitate sancti et lecti: duos in medio relictos, Rempublicam et Catonem. Miraberis, inquam, cum animadverteris

*Atridem, Priamumque, & saevum ambobus Achillem.*

Utrumque enim improbat, utrumque exarmat. Hanc fert de utroque sententiam. Ait se, si Caesar vicerit, moriturum: si Pompeius, exsulaturum. Quid habebat quod timeret, qui ea sibi et victo et victori constituerat, quae constituta esse ab hostibus iratissimis poterant? Periit itaque ex decreto suo. Vides posse homines labores pati? per medias Africae solitudines pedes duxit exercitum. Vides posse tolerare sitim? et in collibus arentibus, sine ullis impedimentis victi exercitus reliquias trahens, inopiam humoris loricatus tulit: et quoties aquae fuerat occasio, novissimus bibit. Vides honorem et notam posse contemni? eodem quo repulsus est die, in comitio pila ludit. Vides posse non timeri potentiam superiorum? et Pompeium et Caesarem, quorum nemo alterum offendere audebat, nisi ut alterum demereretur, simul provocavit. Vides tam mortem posse contemni quam exsilium? et exsilium sibi indixit et mortem, et interim bellum. Possumus ita-

que adversus ista tantum habere animi : libeat modo subducere iugo collum. In primis autem despiciendae sunt voluptates : enervant , et effeminant , et multum petunt. multum autem a fortuna petendum est. Deinde spernendae opes : auctoramenta sunt servitutum. Aurum et argentum , et quicquid aliud felices domos onerat , relinquatur. non potest gratis constare libertas. Hanc si magno aestimas , omnia parvo aestimanda sunt.

## E P I S T O L A C V.

*Brevia, sed utilia, praecepta ad Securitatem. Lege, & usurpa.*

**Q**UAE observanda tibi sint, ut tutior vivas, dicam. Tu tamen sic audias censeo ista praecepta, quomodo si tibi praeciperem, qua ratione bonam valetudinem in Ardeatino tuereris. Considera, quae sint quae hominem in perniciem hominis instigent : invenies spem, invidiam, odium, metum, contemptum. Ex omnibus istis, adeo levissimum est contemptus, ut multi in illo remedii causa delituerint. Quem quis contemnit, calcat sine dubio, sed transit. Nemo homini contempto pertinaciter, nemo diligenter nocet. Etiam in acie iacens praeteritur : cum stante pugnatur. Spem improborum vitabis, si nihil habueris quod cupiditatem alienam et improbam irriter, si nihil insigne possederis. Concupiscuntur enim insignia, etiam si parum nota sunt. Sic vero invidiam effugies, si te non ingesseris oculis,

si bona tua non iactaveris, si scieris in finu gaudere. Odium autem ex offensa sic vitabis, neminem lacescendo gratuito: a quo te sensus communis tuebitur. fuit enim hoc multis periculosum. Quidam odium habuerunt, nec inimicum. Illud, ne timearis, praeſtabit tibi et fortunae mediocritas, et ingenii lenitas: cum te esse homines scient, quem offendere sine periculo possint. Reconciliatio tua et facilis sit, et certa. Timeri autem tam domi molestum est, quam foris: tam a servis, quam a liberis. Nulli non ad nocendum satis virium est. Adice nunc, quod, qui timetur, timet. nemo potuit terribilis esse secure. Contemptus superest: cuius modum in sua potestate habet, qui illum sibi adiunxit: qui contemnitur, quia voluit, non quia debuit. Huius incommodum et artes bonae discutiunt, et amicitiae eorum, qui apud aliquem potentem potentes sunt. quibus applicari expediet, non implicari: ne plaris remedium, quam periculum constet. Nihil tamen aequè proderit, quam quiescere, et minimum cum aliis loqui, plurimum secum. Est quaedam dulcedo sermonis, quae irrepit, et blanditur, et non aliter quam ebrietas aut amor secreta producit. Nemo quod audierit, tacebit: nemo quantum audierit, loquetur. Qui rem non tacuerit, non tacebit auctorem. Habet unusquisque aliquem cui tantum credit, quantum ipsi creditum est: ut garrulitatem suam custodiat, et contentus sit unius auribus, populum faciet. Sic quod modo secretum erat, rumor est. Securitatis magna portio est, nihil iniqui facere. Confusam vitam et perturbatam impotentes agunt:



tantum metuunt, quantum nocent : nec ullo tempore vacant. Trepidant enim cum fecerunt, haerent, conscientia aliud agere non patitur, ac subinde respicere ad se cogit. Dat poenas, quisquis exspectat : quisquis autem meruit, exspectat. Tutum aliqua res in mala conscientia praestat, nulla securum. putat enim se, etiamsi non deprehenditur, posse deprehendi : et inter somnos movetur, et quoties alicuius scelus loquitur, de suo cogitat. Non satis illi oblitteratum videtur, non satis rectum. Nocens habuit aliquando latendi fortunam : nunquam fiduciam.

## E P I S T O L A C V I.

*Tenuis & Chrysippaea quaestio, An Bonum sit corpus?  
In extremo aliquid contra argutias.*

**T**ARDIUS rescribo ad epistolas tuas. non quia districtus occupationibus sum : hanc excusationem cave audias : vaco, et omnes qui volunt, vacant. Neminem res sequuntur : ipsi illas amplexantur, et argumentum esse felicitatis occupationem putant. Quid ergo fuit, quare non protinus rescriberem tibi, de quo quaerebas? Veniebat in contextum operis mei : scis enim me mortalem philosophiam velle complecti, et omnes ad eam pertinentes quaestiones explicare. Itaque dubitavi utrum differrem te, an, donec suus isti rei veniret locus, ius tibi extra ordinem dicerem : humanius visum est, tam longe venientem non detinere. Itaque et hoc ex illa serie rerum cohaerentium excerpam, et si qua erunt hu-



iusmodi, non quaerenti tibi ultro mittam. Quae sint haec, interrogas? Quae scire magis iuvat, quam prodest: sicut hoc de quo quaeris, an bonum corpus sit. Bonum prodest: facit enim: quod facit, corpus est: bonum, agitat animum, et quodammodo format et continet: quae ergo propria sunt corporis, ea corporis bona sunt: corpora ergo sunt, et quae animi sunt. nam et hic corpus est. bonum hominis necesse est corpus sit, cum ipse corporalis. Mentior, nisi et quae alunt illud, et quae valetudinem eius vel custodiunt vel restituunt, corpora sunt: ergo et bonum eius corpus est. Non puto te dubitaturum, an affectus corpora sint, ut aliud quoque de quo non quaeris, infulciam: tanquam ira, amor, tristitia. si dubitas, vide an vultum nobis mutant, an frontem adstringant, an faciem diffundant, an ruborem evocent, an fugent sanguinem. Quid ergo? tam manifestas corpori notas credis imprimi, nisi a corpore? Si affectus corpora sunt, et morbi animorum, et avaritia, crudelitas, indurata vitia, et in statum inemendabilem adducta: ergo et malitia, et species eius omnes, malignitas, invidia, superbia. Ergo et bona. primum quia contraria istis sunt: deinde, quia eadem tibi indicia praestabunt. An non vides, quantum oculis det vigorem fortitudo? quantam intentionem prudentia? quantam modestiam et quietem reverentia? quantam serenitatem laetitia? quantum rigorem severitas? quantam remissionem veritas? Corpora ergo sunt, quae colorem habitumque corporum mutant, quae in illis regnum suum exercent. Omnes autem quas retuli virtutes, bona

sunt, et quidquid ex illis est. Numquid est dubium, an id quo quid tangi potest, corpus sit?

*Tangere enim & tangi, nisi corpus, nulla potest res.*

ut ait Lucretius.

Omnia autem ista quae dixi, non mutarent corpus, nisi tangerent: ergo corpora sunt. Etiamnum, cui tanta vis est, ut impellat et cogat et retineat et iubeat, corpus est. Quid ergo? Non timor retinet? non audacia impellit? non fortitudo immittit, et impetum dat? non moderatio refraenat et revocat? non gaudium extollit? non tristitia adducit? Denique quidquid facimus, aut malitiae aut virtutis gerimus imperio: quod imperat corpori, corpus est: quod vim corpori affert, corpus. Bonum corporis corporale est: bonum hominis, et corporis bonum est: itaque corporale est. Quoniam, ut voluisti, morem gessi tibi, nunc ipse dicam mihi, quod dicturum esse te video. Latrunculis ludimus: in supervacuis subtilitas teritur. non faciunt bonos ista, sed doctos. Apertior res est, sapere: immo simplicior. paucis opus est ad mentem bonam literis. Sed nos ut cetera in supervacuum diffundimus, ita philosophiam ipsam. Quemadmodum omnium rerum, sic literarum quoque intemperantia laboramus: non vitae, sed scholae discimus.

## EPISTOLA CVII.

*Solatur Lucilium & erigit, in fuga servorum. Ista & alia in vitam incidere : ideoque non inopinata esse debere. Patere igitur, quod non emendas. Bona & sapiens Epistola.*

**U**BI illa prudentia tua? ubi in dispiciendis rebus subtilitas? ubi magnitudo? Tam pusilla te angunt? servi occupationes tuas, occasionem fugae putaverunt. Si amici deciperent, (habeant enim fane nomen, quod illis Epicurus noster imposuit, et ita vocentur) quo turpius non sint omnibus rebus tuis, desint illi, qui et operam tuam conterebant, et te aliis molestum esse credebant. Nihil horum insolitum, nihil inexpectatum est. Offendi rebus istis tam ridiculum est, quam queri, quod spargaris in publico, aut inquineris in luto. Eadem vitae conditio est, quae balnei, turbae, itineris : quaedam intermittuntur, quaedam incident. Non est delicata res, vivere. Longam viam ingressus es : et labaris oportet, et arietes, et cadas, et lasseris, et exclames, O mors; id est, mentiaris. Alio loco comitem relinques, alio efferes, alio timebis. Per eiusmodi offensas emetiendum est confragosum hoc iter. Mori me vult? praeparetur animus contra omnia. Sciat se venisse, ubi patiatur fulmen; sciat se venisse, ubi

*Luētus & ultrices posuere cubilia curae,*

*Pallentesque habitant morbi, tristisque senectus.*

In hoc contubernio vita degenda est. Effugere ista non potes, contemnere potes: contemnes autem, si saepe cogitaveris, et futura praesumseris. Nemo non fortius ad id cui se diu composuerat, accessit, et duris quoque, si praemeditata erant, obstitit. At contra imparatus, etiam levissima expavit. Id agendum est, ne quid nobis inopinatum sit: et quia omnia novitate graviora sunt, haec cogitatio assidua praestabit, ut nulli sis malo tiro. Servi te reliquerunt. Alium compilaverunt, alium accusaverunt, alium occiderunt, alium prodiderunt, alium calca-verunt, alium veneno, alium criminatione petierunt. Quidquid dixeris, multis accidit. Deinceps quae multa et varia sunt, in nos diriguntur. Quaedam in nos fixa sunt, quaedam vibrant, et cum maxime veniunt, quaedam-ad alios perventura nos stringunt. Nihil miremur eorum ad quae nati sumus: quae ideo nulli quaerenda, quia paria sunt omnibus. Ira dico, paria sunt. nam etiam quod effugit aliquis, pati potuit. Aequum autem ius est, non quo omnes usi sunt, sed quod omnibus latum est. Impere-tur aequitas animo, et sine querela mortalitatis tri-buta pendamus. Hiems frigora adducit: algendum est. aestas calores refert: aestuandum est. intempe-ries coeli valetudinem tentat: aegrotandum est. Et fera nobis loco occurret, et homo perniciosior feris omnibus. Aliud aqua, aliud ignis eripiet. Hanc rerum conditionem mutare non possumus: id possumus, magnum sumere animum, et viro bono dignum, quo fortiter fortuita patiamur, et naturae consentiamus. Natura autem hoc, quod vides, reg-

num mutationibus temperat. Nubilo ferena succedunt : turbantur maria , cum quieverunt : flant invicem venti : noctem dies sequitur : pars coeli confurgit , pars mergitur : contrariis rerum aeternitas constat. Ad hanc legem animus noster aptandus est : hanc sequatur , huic pareat ; et quaecunque fiunt , debuisse fieri putet : nec velit obiurgare naturam. Optimum est pati , quod emendare non possis : et Deum , quo auctore cuncta proveniunt , sine murmuratione comitari. Malus miles est , qui imperatorem gemens sequitur. Quare impigri atque alacres excipiamus imperia , nec deseramus hunc operis pulcherrimi cursum , cui quidquid patimur , intextum est : et sic alloquamur Iovem , cuius gubernaculo moles ista dirigitur , quemadmodum Cleanthes noster versibus disertissimis alloquitur. quos mihi in nostrum sermonem mutare permittitur , Ciceronis viri disertissimi exemplo. Si placuerint , boni consules : si displicuerint , scies me in hoc secutum Ciceronis exemplum.

*Duc me parens , celsique dominator poli ,  
Quocunque placuit. nulla parendi mora est.  
Assum impiger. fac nolle. comitabor gemens :  
Ducunt volentem fata , nolentem trahunt.  
Malusque patiar , quod pati licuit bono.*

Sic vivamus , sic loquamur. paratos nos inveniat atque impigros fatum. Hic est magnus animus , qui se Deo tradidit : at contra ille pusillus ac degener , qui oblectatur , et de ordine mundi male existimat , et emendare mavult deos , quam se.



## E P I S T O L A C V I I I .

*Quomodo Philosophi legendi, vel audiendi sint? Cum dilectu, & ea maxime excerpenda & imbibenda, quae faciunt vitae. Oblectamenta qui quaerunt, frustra sunt: tu emendationem. Nec id difficile. Natura enim ipsa vocat ad Honestum. Semina eius & fomites in animo nostro sunt: surgunt & excitantur, cum doctor & irritator accessit. A suo exemplo, cum apud Attalum disceret. Ostendit deinde, vario fine atque animo ad auctores legendos venire: nos autem debere illo Philosophi. Pareamus: & legite atque audite vos o Philologi.*

**I**D de quo quaeris, ex his est, quae scire, tantum eo, ut scias, pertinet. Sed nihilominus quia pertinet, pertinaciter properas, nec vis expectare libros, quos cum maxime ordino continentes totam moralem philosophiae partem, statim expedium. Illud tamen prius scribam, quemadmodum tibi ista cupiditas discendi, qua flagrare te video, dirigenda sit, ne ipsa se impediat. Nec passim carpenda sunt, nec avide invadenda universa: per partes pervenitur ad totum. Aptari onus viribus debet: nec plus occupari, quam cui sufficere possumus. Non quantum vis, sed quantum capis, hauriendum est. bonum tantum habe animum: capies, quantum voles. Quo plus recipit animus, hoc se magis laxat. Haec nobis praecipere Attalum memini, cum scholam eius obfideremus, et primi veniremus, et novissimi exire-



mus : ambulantiem quoque illum ad aliquas disputaciones evocaremus, non tantum paratum discantibus, sed obvium. Idem, inquit, et docenti, et discenti debet esse propositum : ut ille prodesse velit, hic proficere. Qui ad philosophorum scholas venit, quotidie secum aliquid boni ferat : aut sanior domum redeat, aut sanabilior. Redibit autem. ea enim philosophiae vis est, ut non solum studentes, sed etiam conversantes iuvet. Qui in solem venit, licet non in hoc venerit, colorabitur : qui in unguentaria taberna resederunt, et paulo diutius commorati sunt, odorem secum loci ferunt : et qui apud philosophum fuerunt, traxerint aliquid necesse est, quod prodesset etiam negligentibus. Attende quid dicam : negligentibus, non repugnantibus. Quid ergo ? non novimus quosdam, qui multis apud philosophum annis persederint, et ne colorem quidem duxerint ? Quidni noverim ? pertinacissimos quidem, et assiduos : quos ego non discipulos philosophorum, sed inquilinos voco. Quidam veniunt ut audiant, non ut discant : sicut in theatrum voluptatis causa ad delectandas aures, oratione, vel voce, vel fabulis ducimur. Magnam hanc auditorum partem videbis, cui philosophi schola diversorium otii sit. Non id agunt ut aliqua illic vitia deponant, ut aliquam legem vitae accipiant, ad quam mores suos exigant, sed ut oblectamento aurium perfruantur. Aliqui tamen et cum pugillaribus veniunt, non ut res excipiant, sed verba : quae tam sine profectu alieno discant, quam sine suo audiant. Quidam ad magnificas voces excitantur, et transeunt in affectum dicentium, alacres vultu et

animo : nec aliter concitantur , quam solent Phrygii  
tibicinis sono semiviri , et ex imperio furentes. Rapi-  
tillos instigatque rerum pulchritudo , non verborum  
inanium sonitus. Si quid acriter contra mortem dic-  
tum est , si quid contra fortunam contumaciter , iu-  
vat protinus quae audias facere. Afficiuntur illi : et  
sint quales iubentur , si illa animo forma permaneat ,  
si non impetum insignem protinus populus honesti  
dissuasor excipiat. Pauci illam , quam conceperant ,  
mentem domum perferre potuerunt. Facile est au-  
ditorem concitare ad cupiditatem recti. Omnibus  
enim natura fundamenta dedit , semenque virtutum :  
omnes ad omnia ista nati sumus : cum irritator ac-  
cessit , tunc illa animi bona velut sopita excitantur.  
Non vides quemadmodum theatra consonent , quo-  
ties aliqua dicta sunt , quae publice agnoscimus , et  
consensu vera esse testamur ?

*Desunt inopiae multa , avaritiae omnia.*

*In nullum avarus bonus est , in se pessimus.*

Ad hos versus ille fordidissimus plaudit , et vitiis  
suis fieri convitium gaudet. Quanto magis hoc iudi-  
cas evenire , cum a philosopho ista dicuntur : cum  
salutaribus praeceptis versus inferuntur , efficacius  
eadem illa demissuri in animum imperitorum ? Nam  
(ut dicebat Cleanthes) quemadmodum spiritus no-  
ster clariorem sonum reddit , cum illum tuba per  
longi canalis angustias tractum , patientiore novissi-  
me exitu effudit : sic sensus nostros clariores carminis  
arcta necessitas efficit. Eadem negligentius audiuntur ;  
minusque percutiunt , quamdiu soluta oratione di-

cuntur: ubi accessere numeri, et egregium sensum adstrinxere certi pedes, eadem illa sententia velut lacerto excussa torquetur. De contemptu pecuniae multa dicuntur, et longissimis orationibus hoc praecipitur, ut homines in animo, non in patrimonio putent esse divitias: eum esse locupletem, qui paupertati suae aptus est, et parvo se divitem fecit: magis tamen feriuntur animi, cum carmine eiusmodi dicta sunt:

*Is minimo eget mortalis, qui minimum cupit.*

*Quod vult habet, qui velle quod satis est potest.*

Cum haec atque eiusmodi audimus, ad confessionem veritatis adducimur. Illi enim quibus nihil satis est, admirantur, acclamant, odium pecuniae indicunt. Hunc illorum affectum ubi videris, urge, hoc preme, hoc onera, relictis ambiguitatibus, et syllogismis, et cavillationibus, et ceteris acuminis irriti ludicris. Dic in avaritiam, dic in luxuriam. cum profecisse te videris, et animos audientium affeceris, insta vehementius. Verisimile non est, quantum proficiat talis oratio remedio intenta, et tota in bonum audientium versa. Facillime enim tenera conciliantur ingenia ad honesti rectique amorem. Adhuc docilibus leviterque corruptis iniicit manum veritas, si advocatum idoneum nacta est. Ego certe, cum Attalum audirem, in vitia, in errores, in mala vitae perorantem, saepe misertus sum generis humani, et illum sublimem altioremq; humano fastigio credidi. Ipse regem se esse dicebat: sed plus quam regnare mihi videbatur, cui liceret censuram agere regnantium.

Cum vero commendare paupertatem coeperat, et ostendere, quam quidquid usum excederet, pondus esset supervacuum et grave ferenti: saepe exire e schola pauperi libuit. Cum coeperat voluptates nostras traducere, laudare castum corpus, sobriam mentem, puram mentem, non tantum ab illicitis voluptatibus, sed etiam supervacuis: libebat circumscribere gulam et ventrem. Inde mihi quaedam permanere, Lucili. Magno enim in omnia impetu veneram: deinde ad civitatis vitam reductus, ex bene coeptis pauca servavi. Inde ostreis boletisque in omnem vitam renuntiatum est. Haec enim non cibi, sed oblectamenta sunt, ad edendum saturos cogentia: quod gratissimum est edacibus, et se ultra quam capiunt farcientibus, facile descensura, facile reditura. Inde in omnem vitam unguento abstinemus: quoniam optimus odor in corpore est nullus. Inde vino caret stomachus: inde in omnem vitam balneum fugimus. Decoquere corpus, atque exinanire sudoribus, inutile simul delicatumque credimus. Cetera proiecta redierunt: ita tamen, ut, quorum abstinentiam interrupi, modum servem, et quidem abstinentiae proximior. nescio an difficiliorem: quoniam quaedam abscinduntur facilius animo, quam temperantur. Quoniam coepi tibi exponere, quantum maiori impetu ad philosophiam iuvenis accesserim, quam senex pergam, non pudebit fateri, quem mihi amorem Pythagorae iniecerit Sotion. Docebat, quare ille animalibus abstinuisset, quare postea Sextius. Dissimilis utrique causa erat, sed utrique magnifica. Hic homini satis alimentorum citra sanguinem esse credebat, et crudeli-

tatis consuetudinem fieri, ubi in voluptatem esset adducta laceratio. Adiciebat, contrahendam materiam esse luxuriae : colligebat, bonae valetudini contraria esse alimenta varia, et nostris aliena corporibus. At Pythagoras omnium inter omnia cognationem esse dicebat, et aliorum commercium in alias atque alias formas transeuntium. Nulla (si illi credas) anima interit, nec cessat quidem, nisi tempore exiguo, dum in aliud corpus transfunditur. Viderimus per quas temporum vices, et quando pererratis pluribus domiciliis, in hominem revertatur : interim sceleris hominibus ac parricidii metum fecit, cum possint in parentis animam inscii incurrere, et ferro morsuve violare, in quo cognatus aliquis spiritus hospitaretur. Haec cum exposuisset Sotion, et impleisset argumentis suis, Non credis, inquit, animas in alia corpora atque alia describi? et migrationem esse, quam dicimus esse mortem? Non credis in his pecudibus ferisve, aut aqua merfis, illum quondam hominis animum morari? Non credis nihil perire in hoc mundo, sed mutare regionem? nec tantum coelestia per certos circuitus verti, sed animalia quoque per vices ire, et animos per orbem agi? Magni ista crediderunt viri. itaque iudicium quidem tuum sustine : ceterum omnia tibi integra serua. Si vera sunt ista, abstinuisse animalibus innocentia est : si falsa, frugalitas est. Quod istic crudelitatis tuae damnum est? Alimenta tibi leonum et vulturum eripio. His instinctus, abstinere animalibus coepi : et anno peracto non tantum facilis erat mihi consuetudo, sed dulcis. Agiliorem mihi animum esse cre-



debam : nec tibi hodie affirmaverim an fuerit. Quae-  
ris, quomodo desierim? In Tiberii Caesaris princi-  
patum iuventae tempus inciderat : alienigenarum sa-  
cra movebantur : sed inter argumenta superstitionis  
ponebatur quorundam animalium abstinencia. Patre  
itaque meo rogante, qui non calumniam timebat,  
sed philosophiam oderat, ad pristinam consuetudi-  
nem redii : nec difficulter mihi, ut inciperem me-  
lius coenare, persuasit. Laudare solebat Attalus cul-  
citram, quae resisteret corpori : tali uxor etiam se-  
nex, in qua vestigium apparere non possit. Haec re-  
tuli, ut probarem tibi, quam vehementes haberent  
tirunculi impetus primos ad optima quaeque, si quis  
exhortaretur illos, si quis impelleret. Sed aliquid  
praecipientium vitio peccatur, qui nos docent di-  
sputare, non vivere ; aliquid discentium, qui propo-  
situm afferunt ad praeceptores suos, non animum  
excolendi, sed ingenium. Itaque quae philosophia  
fuit, facta philologia est. Multum autem ad rem per-  
tinet, quo proposito ad quam rem accedas. Qui gram-  
maticus futurus, Virgilium scrutatur, non hoc ani-  
mo legit illud egregium,

—— *Fugit irreparabile tempus.*

Vigilandum est : nisi properamus, relinquimur. agit  
nos, agiturque velox dies : inscii rapimur. Omnia  
in futurum disponimus, et inter praecipitia lenti su-  
mus. Sed ut observeat, quoties Virgilius de celeritate  
temporum dicit, hoc uti verbo illum, Fugit.

*Optima quaeque dies miseris mortalibus aevi*



*Prima fugit. subeunt morbi, tristisque senectus,  
Et labor, & duræ rapit inclementia mortis.*

Ille qui ad philosophiam spectat, hæc eadem quo debet, abducit. Nunquam Virgilius, inquit, dies dicit ire, sed fugere; quod currendi genus concitatissimum est: et optimos quosque primos rapi. Quid ergo cessamus nos ipsi concitare, ut velocitatem rapidissimæ rei possimus æquare? Meliora prætervolant, deteriora succedunt. Quemadmodum ex amphora primum quod est sincerissimum effluit, gravissimum quodque turbidumque subsidit: sic in ætate nostra, quod optimum, in primo est. Id exhauriri in aliis potius patimur, ut nobis faciem reservemus. Inhaereat istud animo, et tanquam missum oraculo placeat:

*Optima quæque dies miseris mortalibus ævi  
Prima fugit. ———*

Quare optima? quia restat quod incertum est. Quare optima? quia iuvenes possumus discere, possumus facilem animum, et adhuc tractabilem, ad meliora convertere: quia hoc tempus idoneum est laboribus, idoneum agitando per studia ingeniis, et exercendis per opera corporibus. Quod superest, segnius et languidius est, et propius a fine. Itaque toto hoc agamus animo, et omissis ad quæ divertimus, in rem unam laboremus: ne hanc temporis perniciosissimi celeritatem, quam retinere non possumus, relictæ demum intelligamus. Primus quisque tanquam optimus dies placeat, et redigatur in no-

strum. quod fugit, occupandum est. Hoc non cogitat ille, qui grammatici oculis carmen istud legit, ideo optimum quemque primum esse diem, quia subeunt morbi, quia senectus premit, et adhuc adolescentiam cogitantibus supra caput est: sed ait, Virgilium semper una ponere morbos et senectutem. non mehercule immerito: senectus enim insanabilis morbus est. Praeterea, inquit, hoc senectuti cognomen imposuit, tristem illam vocat:

—— *subeunt morbi, tristisque senectus.*

Non est quod mireris, ex eadem materia suis quemque studiis apta colligere. In eodem prato bos herbam quaerit, canis leporem, ciconia lacertum. Cum Ciceronis libros de Republicaprehendit hinc philologus aliquis, hinc grammaticus, hinc philosophiae deditus: alius alio curam suam mittit. Philosophus admiratur, contra iustitiam dici tam multa potuisse. Cum ad hanc eandem lectionem philologus accessit, hoc subnotat, duos Romanos reges esse, quorum alter patrem non habet, alter matrem. Nam de Servii matre dubitatur: Anci pater nullus; Numae nepos dicitur. Praeterea notat, eum quem nos dictatorem dicimus, et in historiis ita nominari legimus, apud antiquos magistrum populi vocatum. Hodieque id exstat in Auguralibus libris: et testimonium est, quod qui ab illo nominatur, magister equitum est. Aequae notat, Romulum perisse solis defectione. Provocationem ad populum etiam a regibus fuisse. id ita in Pontificalibus libris aliqui putant, et Fenestella. Eosdem libros cum

grammaticus explicuit, primum *reapse* dici ab Cicerone, id est, reipsa, in commentarium refert; nec minus *seipse*, id est, seipse. Deinde transiit ad ea, quae consuetudo seculi mutavit: tanquam non quod ait Cicero, Quoniam sumus ab ipsa calce, eius interpellatione revocati: hanc quam nunc in circo cretam vocamus, calcem antiqui dicebant. Deinde Ennianos colligit versus, et in primis illos de Africano scriptos:

——— *Cui nemo civis neque hostis*  
*Quivit pro factis reddere opraepretium.*

Ex eo se ait intelligere, apud antiquos non tantum auxilium significasse operam, sed opera. ait enim neminem potuisse Scipioni neque civem, neque hostem reddere operae pretium. Felicem deinde se putat, quod inveniret, unde visum sit Virgilio dicere:

——— *Quem super ingens*  
*Porta tonat coeli.* ———

Ennium hoc ait Homero furripuisse; Ennio Virgilium. Est enim apud Ciceronem in his ipsis de Republica hoc Epigramma:

*Si fas endo plagas coelestium ascendere cuiquam:*  
*Mi soli coeli maxima porta patet.*

Sed ne et ipse, dum aliud ago, in philologum aut grammaticum dilabar, illud admoneo, auditionem

philosophorum, lectionemque, ad propositum beatæ vitæ trahendam : non ut verba prisca aut ficta captemus, et translationes improbas figurasque dicendi, sed ut profutura praecepta, et magnificas voces, et animosas, quae mox in rem transferantur. Sic ista discamus : ut quae fuerunt verba, sint opera. Nullos autem peius mereri de omnibus mortalibus iudico, quam qui philosophiam velut aliquod artificium venale didicerunt : qui aliter vivunt, quam vivendum esse praecipunt. Exempla enim seipsum inutiles disciplinae circumferunt, nulli non vitio quod insequuntur, obnoxii. Non magis mihi potest quisquam prodesse praeceptor, quam gubernator in tempestate nauseabundus. Tenendum est, rapiente fluctu, gubernaculum, luctandum cum ipso mari, eripienda sunt vento vela : quid me potest adiuvere rector navigii attonitus et vomitans ? Quanto maiore putas vitam tempestate iactari, quam ullam ratem ? non est loquendum, sed gubernandum. Omnia quae dicunt, quae turba audiente iactant, aliena sunt. dixit illa Plato, dixit Zeno, dixit Chrysippus, et Posidonius, et ingens agmen tot ac talium. Quomodo probare possint sua esse, monstrabo : faciant quae dixerint. Quoniam quae volueram ad te perferri, iam dixi, nunc desiderio tuo satisfaciam, et in alteram epistolam integrum quod exegeras transferam : ne ad rem spinosam, et auribus erectis curiosisque audiendam, lassus accedas.

## EPISTOLA CIX.

*Quaestiuncula, An sapiens sapienti, & quomodo proficit? Causa dubitandi, quia omnia summa in sapiente, nec adiectioni locus. Respondet tamen prodesse, & distincte exsequitur. In fine detestatur argutias inutiles.*

**A**N sapiens sapienti proficit, scire desideras. Dicimus plenum omni bono esse sapientem, et summa adeptum: quomodo prodesse aliquis possit summum bonum habenti, quaeritur. Profunt inter se boni: exercent enim virtutes, et sapientiam in suo statu continent. desiderat uterque aliquem, cum quo conferat, cum quo quaerat. Peritos luctandi, usus exercet: musicum, qui paria didicit, monet. Opus est et sapienti, agitatione virtutum. Ita quemadmodum ipse se movet, sic movetur ab alio sapiente. Quid sapiens sapienti proderit? impetum illi dabit, occasiones actionum honestarum monstrabit. Praeter haec, aliquas suas cogitationes exprimet, docebit quae invenerit. Semper enim sapienti restabit quod inveniat, et quo animus eius excurrat. Malus malo nocet; facit peiorem, iram, metum incitando, tristitiae assentiendo, voluptates laudando: et tunc maxime laborant mali, ubi plurimum vitia miscuere, et in unum collata nequitia est: ergo ex contrario, bonus bono proderit. Quomodo? inquis. Gaudium illi afferet, fiduciam confirmabit, ex conspectu mutuae tranquillitatis crescet utriusque laeti-



tia. Praeterea, quarundam illi rerum notitiam tradet. non enim omnia sapiens scit : etiamsi sciret, breviores vias rerum aliquis excogitare possit, et has indicare, per quas facilius totum opus circumfertur. Proderit sapienti sapiens : non scilicet tantum suis viribus, sed ipsius quem adiuvat. Potest quidem ille etiam relictus sibi, explicare partes suas. Utetur propria velocitate : sed nihilominus adiuvat etiam, qui currentem hortatur. Non prodest tantum sapiens sapienti, sed sibi ipsi. Obiicies. Detrahe illi vim propriam, et ille nihil agit. Isto modo dicas licet, non esse in melle dulcedinem. Nam ipse ille qui est, esse debet ita aptatus lingua palatoque ad huiusmodi gustum, ut ille tali sapore capiatur, non offendatur. Sunt enim quidam, quibus morbi vitio mel amarum videatur. Oportet utrumque talem esse, ut et ille prodesse possit, et huic profecturo idonea materia sit. In summum, inquit, producto calorem calefieri supervacuum est : et in summum producto bonum supervacuum est, quod proficit. Numquid instructus omnibus rebus agricola, ab alio instrui quaerit ? Numquid armatus miles, quantum in aciem exituro fatis est, amplius arma desiderat ? Ergo nec sapiens. fatis enim vitae instructus, fatis armatus est. Qui in summo est calore, ei non opus est adiecto, ut summum teneat. Ipse se, inquit, calor continet. Ad haec respondeo. Primum multum interest inter ista, quae comparas. Calor enim unus est : prodesse varium est. Deinde calor non adiuvatur adiectione caloris, ut caleat : sapiens non potest in habitu suae mentis stare, nisi



amicos aliquos similes sui admisit, cum quibus virtutes suas communicet. Adiice nunc, quod omnibus inter se virtutibus amicitia est. Itaque prodest, qui virtutes alicuius pares suis amat, amandasque invicem praestat. Similia delectant: utique ubi honesta sunt, et probare ac probari sciunt. Etiamnum. Sapientis animum perite movere nemo alius potest, nisi sapiens: sicut hominem movere rationaliter non potest, nisi homo. Quomodo ergo ad rationem movendam ratione opus est: sic, ut moveatur ratio perfecta, opus est ratione perfecta. Prodesse dicuntur, et qui media nobis largiuntur, pecuniam, gratiam, incolumitatem, alia in usus vitae cara aut necessaria: in his diceretur etiam stultus sapienti prodesse. Prodesse autem est, animum secundum naturam movere virtute sua, aut eius qui movebitur. Hoc non sine ipsius quoque, qui proderit, bono fiet. necesse est enim, alienam virtutem exercendo, exerceat et suam. Sed ut removeas ista, quae aut summa bona sunt, aut summorum efficientia, nihilominus prodesse inter se sapientes possunt. Invenire enim sapientem, sapienti per se res petenda est: quia natura bonum omne carum est bono: et sic quisque conciliatur bono, quemadmodum sibi. Neceffe est, ex hac quaestione, argumenti causa, in alteram transferam. Quaeritur enim, an deliberaturus sit sapiens: an in consilium aliquem advocaturus: quod facere illi necessarium est, cum ad haec civilia et domestica venit, et (ut ita dicam) mortalia. In his sic illi opus est alieno consilio, quomodo medico, quomodo gubernatori, quomodo advocato, et litis

ordinatori. Proderit ergo sapiens aliquando sapienti : suadebit enim : sed in illis quoque magnis ac divinis , ut diximus , communiter honesta tractando , et animos cogitationesque miscendo , utilis erit. Praeterea secundum naturam est et amicos complecti , et amicorum actu , ut suo proprioque laetari. Nam si hoc non fecerimus , ne virtus quidem nobis permanebit , quae in exercendo se , usu valet. Virtus autem suadet praesentia bene collocare , in futurum consulere , deliberare , et intendere animum : facilius intendet explicabitque qui aliquem sibi assumferit. Quaerit itaque aut perfectum virum , aut proficientem , vicinumque perfecto. Proderit autem ille perfectus , si consilium communi prudentia iuverit. Aiunt homines plus in alieno negotio videre , quam in suo : hoc illis evenit , quos amor sui excaecat , quibusque dispectum utilitatis , timor in periculis excutit. Incipiet sapere securior , et extra metum positus. Sed nihilominus quaedam sunt , quae etiam sapientes in alio , quam in se , diligentius vident. Praeterea illud quod dulcissimum honestissimumque est , idem velle atque idem nolle , sapiens sapienti praestabit. Egregium opus pari iugo ducet. persolvi quod exegeras , quanquam in ordine rerum erat , quas moralis philosophiae voluminibus complectimur. Cogita , quod soleo frequenter tibi dicere : In istis nos nihil aliud quam acumen exercere. Toties enim illo revertor : Quid ista me res iuvat ? fortio-rem faciet , iustio-rem , temperatio-rem ? Nondum exerceri vacat : adhuc medico mihi opus est. Quid me doces scientiam inutilem ? magna promissisti : exi-

gua video. Dicebas intrepidum fore, etiamsi circa me gladii micarent, etiamsi mucro tangeret iugulum : dicebas securum fore, etiamsi circa me flagrarent incendia, etiamsi subitus turbo toto navem meam mari raperet. Haec mihi praeſta tu, ut voluptatem, ut gloriam contemnam : poſtea docebis implicita ſolvere, ambigua diſtinguere, obſcura perſpicere : nunc doce, quod neceſſe eſt.

## E P I S T O L A C X.

*Genios ſingulis datos : quos faventes habet, qui Bonam mentem habet. Vota noſtra & iudicia improba eſſe, res non ex vero aeſtimantium. Vana optari, vana timeri. Remedium utriuſque a Philoſophia : quo. nos vocat, ſpretis ſupervacuis. Luxum denique producit, & caſtigat, Attali egregia oratione.*

**E**X Nomentano meo te ſaluto, et iubeo te habere mentem bonam, hoc eſt, propitios deos omnes : quos habet placatos et faventes, quiſquis ſibi ſe propitiavit. Sepone in praefentia, quae quibuſdam placent : Unicuique noſtrum paedagogum dari Deum, non quidem ordinarium, ſed hunc inferioris notae, ex eorum numero quos Ovidius ait, de plebe deos. Ita tamen hoc ſeponas volo, ut memineris maiores noſtros, qui crediderunt hoc, Stoicos fuiſſe : ſingulis enim et Genium et Iunonem dederunt. Poſtea videbimus, an tantum diis vacet, ut privatorum negotia procurent : interim illud ſcito, ſive assignati ſumus, ſive neglecti, et fortunae dati, nulli te poſſe impre-

cari quidquam gravius, quam si imprecatus fueris, ut se habeat iratum. Sed non est, quare cuiquam, quem dignum poena putaveris, optes, ut infestos deos habeat: habet, inquam, etiamsi videtur eorum cura et favore produci. Adhibe diligentiam tuam, et intueri, quid sint res nostrae, non quid vocentur: et scies plura mala contingere nobis, quam accidere. Quoties enim felicitatis causa et initium fuit, quod calamitas vocabatur? Quoties magna gratulatione excepta res gradum sibi struxit in praeceps, et aliquem iam eminentem allevavit etiamnum, tanquam ibi adhuc staret, unde tuto caderet? sed ipsum illud cadere non habet in se mali quidquam, si exitum spectes, ultra quem natura neminem deiecit. Prope est rerum omnium terminus, prope est, inquam, et illud unde felix eiicitur, et illud unde infelix emittitur. Nos utraque extendimus, et longa, spe ac metu facimus. Sed si sapias, omnia humana conditione metire: simul et quod gaudes, et quod times contrahe. Est tanti, diu nihil gaudere, ne quid diu timeas. Sed quare istuc malum adstringo? non est quod quidquam timendum putes. Vana sunt ista quae nos movent, quae attonitos habent. Nemo nostrum quid veri esset, excussit, sed metum alter alteri tradidit. Nemo ausus est ad id quo perturbatur accedere, et naturam ac bonum timoris sui nosse. Itaque res falsa et inanis habet adhuc fidem, quia non coarguitur. Tanti putemus oculos intendere: iam apparebit quam brevia, quam incerta, quam tuta timeantur. Talis est animorum nostrorum confusio, qualis Lucretio visa est:

*Nam veluti pueri trepidant, atque omnia caecis  
In tenebris metuunt: ita nos in luce timemus.*

Quid ergo? Non omni puero stultiores sumus, qui in luce timemus? Sed falsum est, Lucreti: non time-  
mus in luce. omnia nobis fecimus tenebras: nihil vi-  
demus, nec quid noceat, nec quid expediat. tota  
vita incursumus, nec ob hoc resistimus, aut cir-  
cumspectius pedem ponimus. Vides autem quam sit  
furiosa res, in tenebris impetus. At mehercule id agi-  
mus, ut longius revocandi simus: et cum ignoremus  
quo feramur, velociter tamen illo quo intendimus,  
ire perseveramus. Sed lucefcere, si velimus, potest.  
Uno autem modo potest, si quis hanc humanorum  
divinorumque notitiam acceperit: si illa se non per-  
fuderit, sed infecerit: si eadem, quamvis sciat, re-  
tractaverit, et ad se saepe retulerit: si quaesierit quae  
sint bona, quae sint mala; quibus hoc sit falso no-  
men adscriptum: si quaesierit de honestis, de turpi-  
bus, de providentia. Nec intra haec humani ingenii  
sagacitas sistitur. prospicere et ultra mundum libet,  
quo feratur, unde surrexerit, in quem exitum tanta  
rerum velocitas properet. Ab hac divina contem-  
platione abductum animum in sordida et humilia  
pertraximus, ut avaritiae serviret, ut relicto mundo  
terminisque eius, et dominis cuncta versantibus,  
terram rimaretur, et quaereret quid ex illa mali  
effoderet, non contentus oblatiis. Quidquid nobis  
bono futurum erat, Deus et parens noster in pro-  
ximo posuit. Non expectavit inquisitionem nostram:  
ultro dedit: nocitura altissime preffit. Nihil nisi de



nobis queri possumus. ea quibus periremus, nolente rerum natura et abscondente, protulimus. Addiximus animum voluptati: cui indulgere, initium omnium malorum est. Tradidimus ambitioni et famae, ceteris aequae vanis et inanibus. Quid ergo nunc te hortor ut facias? nihil novi: nec enim novis malis remedia quaeruntur: sed hoc primum, ut tecum ipse dispicias, quid sit necessarium, quid supervacuum. Necessaria tibi ubique occurrent: supervacua et semper, et toto animo quaerenda sunt. Non est autem quod te nimis laudes, si contemseris aureos lectos, et gemmeam supellectilem: quae est enim virtus, supervacua contemnere? tunc te admirare, cum contemseris necessaria. Non magnam rem facis, quod vivere sine regio apparatu potes: quod non desideras milliarios apros, nec linguas phoenicopterorum, et alia portenta luxuriae, iam tota animalia fastidientis, et certa membra ex singulis eligentis. Tunc te admirabor, si non contemseris etiam sordidum panem: si tibi persuaseris, herbas, ubi necesse est, non pecori tantum, sed homini nasci: si scieris cacumina arborum explementum esse ventris, in quem sic pretiosa congerimus, tanquam recepta servantem. sine fastidio implendus est. Quid enim ad rem pertinet, quid accipiat, perditurus quidquid acceperit? Delectant te disposita, quae terra marique capiuntur. alia eo gratiora, si recentia perferuntur ad mensam: alia, si diu pasta et coacta pinguescere, fluunt, ac vix saginam continent suam. Delectat te nitor horum, arte quaesitus. At mehercule ista solícite scrutata, varieque condita, cum subierint ventrem, una atque



eadem foeditas occupabit. Vis ciborum voluptatem contemnere? exitum specta. Attalum memini cum magna admiratione omnium haec dicere : Diu mihi, inquit, imposuere divitiae. stupebam, ubi aliquid ex illis alio atque alio loco fulserat : existimabam similia esse quae laterent, his quae ostenderentur. Sed in quodam apparatu vidi totas opes urbis, caelatas ex auro et argento, et his quae pretium auri argentique vicerunt, exquisitos colores, et vestes ultra non tantum nostrum, sed ultra finem hostium advectas. Hinc puerorum perspicuos cultu atque forma greges, hinc feminarum, et alia quae res suas recognoscens summi imperii fortuna protulerat. Quid hoc est, inquam, aliud quam irritare cupiditates hominum per se incitatas? Quid sibi vult ista pecuniae pompa? ad discendam avaritiam convenimus. At mehercules minus cupiditatis istinc effero, quam attuleram. Contemsi divitias, non quia supervacuae, sed quia pusillae sunt. Vidistine, quam intra paucas horas ille ordo, quamvis lentus dispositusque, transierit? hoc totam vitam nostram occupabit, quod totum diem occupare non potuit? Accessit illud quoque. tam supervacuae mihi visae sunt habentibus, quam fuerant spectantibus. Hoc itaque ipsi mihi dico, quoties tale aliquid praestrinxerit oculos meos, quoties occurrit domus splendida, cohors culta servorum, lectica formosis imposita calonibus : Quid miraris? quid stupes? Pompa est. Ostenduntur istae res, non possidentur : et dum placent, transeunt. Ad veras potius te converte divitias : disce parvo esse contentus : et illam vocem magnus atque animosus exclama : Habeamus

aquam, habeamus polentam, Iovi ipsi de felicitate controversiam faciamus. Faciamus, oro te, etiamsi ista defuerint. Turpe est, beatam vitam in auro et argento reponere: aequè turpe est in aqua et polenta. Quid ergo faciam, si ista non fuerint? Quaeris, quod sit remedium inopiae? famem fames finit. Alioqui quid interest, magna sint, an exigua, quae servare te cogunt? quid refert quantum sit, quod tibi possit negare fortuna? Haec ipsa aqua et polenta in alienum arbitrium cadit: liber est autem, non in quem parum licet fortunae, sed in quem nihil. Ita est: nihil desideres oportet, si vis Iovem provocare, nihil desiderantem. Haec nobis Attalus dixit: natura omnibus edixit. Quae si voles frequenter cogitare, id ages, si sis felix, non ut videaris: et ut tibi videaris, non aliis.

## EPISTOLA CXL

*Cavillos, vanam & humilem philosophiam esse: veram illam de moribus, firmam, altam. Huc eundum.*

**Q**UID vocentur Latine sophismata, quaesisti a me. Multi tentaverunt illis nomen imponere, nullum haesit: videlicet quia res ipsa non recipiebatur a nobis, nec in usu erat, nomini quoque repugnatum est. Aptissimum tamen videtur mihi, quo Cicero usus est: Cavillationes vocat. quibus quisquis se tradidit, quaestiunculas quidem vafras nescit: ceterum ad vitam nihil proficit, neque fortior fit, neque temperantior, neque elatior. At ille qui philosophiam in

remedium suum exercuit, ingens fit animo, plenus fiducia, inexsuperabilis, et maior adeunti. Quod in magnis evenit montibus, quorum proceritas minus apparet longe intuentibus; cum accesseris, tunc manifestum fit, quam in arduo summa sint: talis est, mi Lucili, verus, et rebus, non artificiis, philosophus. In edito stat admirabilis, celsus, magnitudinis verae. Non exfurgit in plantas, nec summis ambulat digitis, eorum more qui mendacio staturam adjuvant, longioresque quam sunt, videri volunt: contentus est magnitudine sua. Quidni contentus sit eo usque crevisse, quo manum fortuna non porrigit? ergo et supra humana est. Par sibi in omni statu rerum, sive secundo cursu vita procedit, sive fluctuat per adversa ac difficilia. Hanc constantiam cavillationes istae, de quibus paulo ante loquebar, praestare non possunt. Ludit istis animus, non proficit: et philosophiam a fastigio deducit in planum. Nec te prohibuerim aliquando ista agere, sed tunc cum voles nihil agere. Hoc tamen habent in se pessimum, dulcedinem quandam sui faciunt, et animum specie subtilitatis inductum tenent, ac remorantur: cum tanta rerum moles vacet, cum vix tota vita sufficiat, ut hoc unum discas, vitam contemnere. Quid regere? inquis. secundum opus est. Nam nemo illam bene rexit, nisi qui contemserat.

---

## EPISTOLA CXII.

*Desperat de amico reformando, vetere annorum & vitiorum.*

CUPIO mehercule amicum tuum formari, ut desideras, et institui : sed valde durus capitur, inmodius, quod est molestius, valde mollis capitur, et consuetudine mala ac duritia fractus. Volo tibi ex nostro artificio exemplum referre. Non quaelibet infirmationem vitis patitur. si vetus et exesa est, si infirma graciliſque : aut non recipiet furculum, aut non alet, nec applicabit sibi, nec in qualitatem eius naturamque transibit. Itaque solemus supra terram praecidere : ut, si non responderit, tentari possit secunda fortuna, et iterum repetita infra terram inferatur. Hic de quo scribis et mandas, non habet vires. indulſit vitiis : simul et emarcuit, et induruit. Non potest recipere rationem, non potest nutrire. At cupit ipse. Noli credere. non dico illum mentiri tibi : putat se cupere. Stomachum illi fecit luxuria : cito tamen cum illa redibit in gratiam. Sed dicit se offendi vitam suam. Non negaverim. quis enim non offenditur ? homines vitam suam et amant simul, et oderunt. Tunc itaque de illo feremus sententiam, cum fidem nobis fecerit, invisam iam sibi esse luxuriam. nunc illis male convenit.

## EPISTOLA CXIII.

*Quaestio, An Virtutes sint Animalia? Stoice asserit esse; itemque Vitia, & Affectus. Post ridendam nobis hodie disputatiunculam, a talibus avocat, ad utilia vitae vocat.*

**D**ESIDERAS tibi scribi a me, quid sentiam de hac quaestione iactata apud nostros: An iustitia, an fortitudo, prudentia, ceteraeque virtutes, animalia sint. Hac subtilitate efficimus, Lucili carissime, ut exercere ingenium inter irrita videamur, et disputationibus nihil profuturis otium terere. Faciam quod desideras, et quid nostris videatur, exponam. Sed me in alia sententia profiteor esse. Puto quaedam esse, quae decent phaecasiatum palliatumque. Quae sint ergo, quae antiquos moverint, dicam. Animum constat animal esse: tum ipse efficiat, ut simus animalia, et cum ab illo animalia nomen hoc traxerint. Virtus autem nihil aliud est, quam animus quodammodo se habens: ergo animal est. Deinde: Virtus agit aliquid: agi autem nihil sine impetu potest: si impetum habet, qui nulli est, nisi animali, animal est. Si animal est, inquit, virtus, habet ipsam virtutem. Quidni? habet seipsam. Quomodo sapiens omnia per virtutem gerit, sic virtus per se. Ergo, inquit, et omnes artes animalia sunt, et omnia quae cogitamus, quaeque mente complectimur. Sequitur ut multa animalium millia habitent in his angustiis pectoris, et singuli multa simus animalia, aut mul-

ta habeamus animalia. Quaeris, quid aduersus ista respondeatur? Unaquaeque res ex istis animal erit, multa animalia non erunt. Quare? dicam, si mihi accommodaveris subtilitatem et intentionem tuam. Singula animalia singulas debent habere substantias: ista omnia unum animum habent. Itaque singula esse possunt, multa esse non possunt. Ego et animal sum et homo, non tamen duos esse dices. Quare? quia separati esse debent. Ita dico, alter ab altero debet esse diductus, ut duo sint. Quidquid unum multiplex est, sub unam cadet naturam: itaque unum est. Et animus meus animal est, et ego animal sum, duo tamen non sumus. quare? quia animus mei pars est. Tunc aliquid per se numerabitur, cum per se stabit: ubi vero alterius membrum erit, non poterit videri aliud. Quare? dicam, quia quod aliud est, suum oportet esse, et proprium, et totum, et intra se absolutum. Ego in alia esse me sententia professus sum. Non enim tantum virtutes animalia erunt, si hoc recipitur: sed opposita quoque illis vitia et affectus, tanquam ira, timor, luctus, suspicio. Ultra res ista procedet. omnes sententiae, omnes cogitationes animalia erunt: quod nullo modo recipiendum est. Non enim quidquid ab homine fit, homo est. Iustitia quid est? inquit. Animus quodammodo se habens. Itaque si animus animal est, et iustitia. Minime. haec enim habitus animi est, et quaedam vis. Idem animus in varias figuras convertitur, et non toties animal aliud est, quoties aliud facit: nec illud quod fit ab animo, animal est. Si iustitia animal est, si fortitudo, si ceterae virtutes: utrum de-



finunt animalia esse subinde, ac rursus incipiunt, an semper sunt? Definere virtutes non possunt: ergo multa animalia, immo innumerabilia in hoc animo versantur. Non sunt, inquit, multa: quia ex uno religata sunt, et partes unius ac membra sunt. Talem ergo faciem animi nobis proponimus, qualis est Hydrae, multa habentis capita, quorum unumquodque per se pugnet, per se noceat. Atqui nullum ex illis capitibus animal est, sed animalis caput: ceterum ipsa unum animal est. Nemo in Chimæra leonem esse animal dixit, aut draconem: hæ partes erant eius: partes non sunt animalia. Quid est, quo colligas iustitiam animal esse? agit, inquit, aliquid, et prodest: quod autem agit aliquid, et prodest, impetum habet: quod autem impetum habet, animal est. Verum est, si suum impetum habet: suum autem non habet, sed animi. Omne animal donec moriatur, id est quod coepit: homo donec moriatur, homo est: equus item, et canis: transire enim in aliud non possunt. Iustitia, id est, animus quodammodo se habens, animal est. Credamus. Deinde animal est fortitudo, id est, animus quodammodo se habens. Quis animus? Ille qui modo iustitia erat? tenetur in priore animali: in aliud animal ei transire non licet. In eo illi, in quo primum esse coepit, perseverandum est. Præterea unus animus duorum animalium esse non potest, multo minus plurium. Si iustitia, fortitudo, temperantia, ceteræque virtutes animalia sunt: quomodo unum animum habebunt? Singulos habeant oportet, aut non sunt animalia. Non potest unum corpus plu-

rium animalium esse : hoc et ipsi fatentur. Iustitiae quod est corpus? animus. Fortitudinis quod est corpus? idem animus. Atqui unum corpus esse duorum animalium non potest. Sed idem animus, inquit, iustitiae habitum induit, et fortitudinis, et temperantiae. Hoc fieri posset, si quo tempore iustitia esset, fortitudo non esset : quo tempore fortitudo esset, temperantia non esset. Nunc vero omnes virtutes simul sunt. Ita quomodo erunt singula animalia, cum unus animus sit, qui plus quam unum animal non potest facere? Denique nullum animal pars est alterius animalis : iustitia autem pars est animi : non est ergo animal. Videor mihi in re confessâ perdere operam. Magis enim indignandum de isto, quam disputandum est. Nullum animal alterius pars est. Circumspice omnium corpora : nulli non et color proprius est, et figura sua, et magnitudo. Inter cetera, propter quae mirabile divini artificis ingenium est, hoc quoque existimo, quod in tanta copia rerum nunquam in idem incidit : etiam quae similia videntur, cum contuleris, diversa sunt. Tot fecit genera foliorum, nullum non sua proprietate signatum, tot animalia : nulli similitudo cum altero convenit. Utique aliquid interest. Exegit a se, ut quae alia erant, et dissimilia essent, et imparia. Virtutes, ut dicitis, omnes pares sunt : ergo non sunt animalia. Nullum non animal per se aliquid agit. Virtus autem per se nihil agit, sed cum homine. Omnia animalia aut rationalia sunt, ut homines, ut dii ; aut irrationalia, ut pecora. Virtutes utique rationales sunt : atqui nec homines sunt, nec

dii : ergo non sunt animalia. Omne rationale animal nihil agit, nisi primum specie alicuius rei irritatum est, deinde impetum cepit, deinde assensio confirmavit hunc impetum. Quid sit assensio, dicam. Oportet me ambulare : tunc demum ambulo, cum hoc mihi dixi, et approbavi hanc opinionem meam. oportet me sedere : tunc demum sedeo. haec assensio in virtute non est. Puta enim prudentiam animal esse : quomodo assentietur ? Oportet me ambulare. hoc natura non recipit : prudentia enim ei cuius est prospicit, non sibi. Nam nec ambulare potest, nec sedere : ergo assensionem non habet : quod assensionem non habet, rationale animal non est. Virtus si animal est, rationale est : rationale autem non est, ergo nec animal. Si virtus animal est : virtus autem bonum est : omne bonum animal est. Hoc nostri fatentur. Patrem servare, bonum est : et sententiam prudenter in senatu dicere, bonum est : et iuste decernere, bonum est. Ergo et patrem servare, animal est : et prudenter dicere, animal est. eorumque res excedet, ut risum tenere non possis. prudenter tacere, et coenare bene, bonum est : ita et tacere et coenare, animal est. Ego mehercule titillare non desinam, et ludos mihi ex istis subtilibus ineptiis facere. Iustitia et fortitudo si animalia sunt, certe terrestria sunt. Omne animal terrestre alget, esurit, sitit : ergo iustitia alget, fortitudo eturit, clementia sitit. Quid porro non interrogabo illos, quam figuram habeant ista animalia, hominis, an equi, an ferae ? Si rotundam illis, qualem Deo, dederint formam : quaeram, an et avaritia, et luxuria, et de-

mentia aequae rotundae sint? sunt enim et ipsae animalia. Si has quoque corrotundaverint: etiamnum interrogabo, an prudens ambulatio animal sit, nec ne? confiteantur necesse est. Deinde dicant, ambulationem esse animal, et quidem rotundum. Ne putes autem me primum ex nostris, non ex praescripto loqui, sed meae sententiae esse: inter Cleanthem, et discipulum eius Chrysippum, non convenit quid sit ambulatio. Cleanthes ait, spiritum esse a principali usque in pedes permissum: Chrysippus, ipsum principale. Quid est ergo, cur non ipsius Chrysippi exemplo sibi quisque se vindicet, et ista tot animalia, quot mundus ipse non potest capere, derideat? Non sunt, inquit, virtutes multa animalia, et tamen animalia sunt. Nam quemadmodum aliquis et poëta est et orator, et tamen unus: sic virtutes istae animalia sunt, sed multa non sunt. Idem est animus et iustus, et prudens, et fortis, ad singulas virtutes quodammodo se habens. Sublata est quaestio: convenit nobis. Nam et ego interim fateor, animum animal esse: postea visurus, quam de ista re sententiam feram. Actiones eius animalia esse nego. Alioquin et omnia verba erunt animalia, et omnes versus. Nam si sermo prudens bonum est: bonum autem omne animal est: sermo ergo animal est. Prudens versus, bonum est: bonum autem omne animal est: versus ergo animal est. Itaque,

*Arma virumque cano,*

animal est: quod non possunt rotundum dicere, cum sex pedes habeat. Textorium, inquis, totum meher-

cule istud est, quod cum maxime agitur. diffilio risu, cum mihi propono soloecismum animal esse, et barbarismum, et syllogismum, et aptas illis facies, tanquam pictor, assigno. Haec disputamus, attractis superciliis, fronte rugosa. Non possum hoc loco dicere illud Caecilianum: O tristes ineptias! ridiculae sunt. Quin itaque potius aliquid utile nobis ac salutare tractamus, et quaerimus quomodo ad virtutes venire possimus, quae nos ad illas via adducat. Doceme, non an fortitudo animal sit: sed nullum animal felix esse sine fortitudine, nisi contra fortuita convalluit, et omnes casus antequam exciperet, meditando praedomuit. Quid est fortitudo? munimentum humanae imbecillitatis inexpugnabile: quod qui circumdedit sibi, securus in hac vitae obsidione perdurat. Utitur enim suis viribus, suis telis. Hoc loco tibi Posidonii nostri sententiam referre volo: Non est quod unquam fortunae armis putes esse te tutum: tuis pugna contra ipsam. fortuita non armant. Itaque contra hostes instructi, contra ipsam inermes sunt. Alexander quidem Persas, et Hyrcanos, et Indos, et quidquid gentium usque in Oceanum extendit Oriens, vastabat, fugabatque: sed ipse modo occiso amico, modo amisso, iacebat in tenebris, alias scelus, alias desiderium suum moerens; victor tot regum atque populorum, irae tristitiaque succubuit. Id enim egerat, ut omnia potius haberet in potestate, quam affectus. O quam magnis homines erroribus tenentur, qui ius dominandi trans maria cupiunt permittere: felicissimosque se iudicant, si multas per milites provincias obtinent, et novas veteribus ad-



iungunt, ignari quod sit illud ingens parque diis regnum! Imperare sibi maximum imperium est. doceat me, quam sacra res sit iustitia, alienum bonum spectans, nihil ex se petens, nisi usum sui. Nihil sit illi cum ambitione famaeque: sibi placeat. Hoc ante omnia sibi quisque persuadeat, Me iustum esse gratis oportet. Parum est. adhuc illud persuadeat sibi, Me in hanc pulcherrimam virtutem ultro etiam impendere iuvet: ut tota cogitatio a privatis commodis quam longissime averfa sit. Non est quod spectes, quod sit iustae rei praemium maius, quam iustum esse. Illud adhuc tibi affige, quod paulo ante dicebam: nihil ad rem pertinet, quam multi aequitatem tuam noverint. Qui virtutem suam publicari vult, non virtuti laborat, sed gloriae. Non vis esse iustus sine gloria? at mehercules saepe iustus esse debebis cum infamia. Et tunc, si sapias, mala opinio bene parta delectat.

## E P I S T O L A C X I V.

*Eloquentiam alias aliam esse, & placere: uti mores publici sunt, severi, soluti, fracti. Ab animo colorem illam sumere: idque exemplo Maecenatis docet. Illum igitur curandum & formandum esse: a quo sensus & verba deinde recta. Obiter contra luxuriam.*

**Q**UARE quibusdam temporibus provenerit corrupti generis oratio, quaeris: et quomodo in quaedam vitia inclinatio ingeniorum facta sit, at aliquando inflata explicatio vigeret, aliquando infracta, et



in morem cantici ducta. Quare alias sensus audaces, et fidem egressi placuerint, alias abruptae sententiae et suspiciosae, in quibus plus intelligendum est, quam audiendum: quare aliqua aetas fuerit, quae translationis iure uteretur inuerecunde. Hoc, quod audire vulgo soles, quod apud Graecos in proverbium cessit; talis hominibus fuit oratio, qualis vita. Quemadmodum autem uniuscuiusque actio dicenti similis est, sic genus dicendi aliquando imitatur publicos mores. Si disciplina civitatis laboravit, et se in delicias dedit, argumentum est luxuriae publicae, orationis lascivia: si modo non in uno aut in altero fuit, sed approbata est, et recepta. Non potest alius esse ingenio, alius animo color. Si ille sanus est, si compositus, gravis, temperans, ingenium quoque ficcum ac sobrium est: illo vitiato, hoc quoque afflatur. Non vides, si animus elanguit, trahi membra, et pigre moveri pedes? si ille effeminatus est, in ipso incessu apparere mollitiem? si ille acer est et velox, concitari gradum? si furit, aut (quod furori simile est) irascitur, turbatum esse corporis motum, nec ire, sed ferri? Quanto hoc magis accidere ingenio putas, quod totum animo permixtum est? ab illo fingitur, illi paret, inde legem petit. Quomodo Maecenas vixerit, notius est, quam ut narrari nunc debeat: quomodo ambulaverit, quam delicatus fuerit, quam cupierit videri, quam vitia sua latere noluerit. Quid ergo? non oratio eius aequae soluta est, quam ipse discinctus? non tam insignita illius verba sunt, quam cultus, quam comitatus, quam domus, quam uxor? Magni ingenii vir fuerat, si illud egisset

via rectiore, si non vitasset intelligi, si non etiam in oratione diffunderet. Videbis itaque eloquentiam ebrii hominis involutam, et errantem, et licentiae plenam. Maecenas in cultu suo. Quid turpius amne, silvisque ripa comantibus? Vide ut alveum lintribus arent, verfoque vado remittant hortos. Quid si quis feminae cirro crispatae, et labris columbatur? Incipitque suspirans, ut cervice laxa feratur. nemo tyranni. irremediabilis factio rimantur, epulis, lagenaque tentant domos, et saepe mortem exigunt. Genium festo vix suo testem, tenuis cerei fila et crepacem molam, focum mater aut uxor investiunt. Non statim haec cum legeris, hoc tibi occurret, hunc esse qui solutis tunicis in urbe semper incessest? Nam etiam cum absentis partibus Caesaris fungeretur, signum a distincto petebatur. Hunc esse qui in tribunali, in rostris, in omni publico coetu sic apparuerit, ut pallio velaretur caput, exclusis utrimque auribus, non aliter quam in Mimo divites fugitivi solent? Hunc esse cui, cum maxime civilibus bellis strepentibus, et sollicita urbe et armata, comitatus hic fuerit in publico: spadones duo, magis tamen viri quam ipse? Hunc esse, qui uxorem millies duxit: cum unam habuerit? Haec verba tam improbe structa, tam negligenter abiecta, tam contra consuetudinem omnium posita, ostendunt, mores quoque non minus novos et pravos, et singulares fuisse. Maxima laus illi tribuitur mansuetudinis: pepercit gladio, sanguine abstinuit: nec ulla alia re, quid posset, quam licentia ostendit. Hanc ipsam laudem suam corruptit istis orationis portentosissimae deliciis. Apparet enim

mollem fuisse, non mitem. Hoc istae ambages compositionis, hoc verba transversa, hoc sensus magni quidem saepe, sed enervati dum exeunt, cuius manifestum facient. motum illi felicitate nimia caput: quod vitium hominis esse interdum, interdum temporis solet. Ubi luxuriam late felicitas fudit, cultus primum corporum esse diligentior incipit; deinde supellectili laboratur; deinde in ipsas domos impenditur cura, ut in laxitatem ruris excurrant, ut parietes advectis trans maria marmoribus fulgeant, ut tecta varientur auro, ut lacunaribus pavementorum respondeat nitor; deinde ad coenas lautitia transferitur, et illic commendatio ex novitate et soliti ordinis commutatione captatur. ut ea quae claudere coenam solent, prima ponantur; ut quae advenientibus dabantur, exeuntibus dentur. Cum assuevit animus fastidire quae ex more sunt, et illi pro sordidis solita sunt; etiam in oratione quod novum est, quaerit: et modo antiqua verba atque exoleta revocat et profert: modo fingit, et ignota deflectit: modo id quod nuper increbuit, pro cultu habetur, audax translatio, ac frequens. Sunt qui sensus praecedant, et hinc gratiam sperent, si sententia pependerit, et audienti suspicionem sui fecerit: sunt qui illos detineant, et porrigant: sunt qui non usque ad vitium accedant (necesse est enim hoc facere, aliquid grande tentanti) sed qui ipsum vitium ament. Itaque ubicunque videris orationem corruptam placere, ibi mores quoque a recto descivisse, non erit dubium. Quomodo conviviorum luxuria, quomodo vestium, aegrae civitatis indicia sunt: sic orationis licentia (si modo

frequens est) ostendit animos quoque, a quibus verba exeunt, procidisse. Mirari quidem non debes corrupta excipi, non tantum a corona fordidiore, sed ab hac turba quoque cultiore. Togis enim inter se isti, non iudiciis distant. Hoc magis mirari potes, quod non tantum vitiosa, sed et vitia laudantur. Nam illud semper factum est: nullum sine venia placuit ingenium. Da mihi quemcunque vis magni nominis virum. dicam, quid illi aetas sua ignoverit, quid in illo sciens dissimulaverit. Multos dabo, quibus vitia non nocuerint: quosdam, quibus profuerint. Dabo, inquam, maximae famae et inter miranda propositos: quos si quis corrigit, delet. Sic enim vitia virtutibus immixta sunt, ut illas secum tractura sint. Adhuc nunc, quod oratio certam regulam non habet. Consuetudo illam civitatis, quae nunquam in eodem diu stetit, versat. Multi ex alieno seculo petunt verba: duodecim tabulas loquuntur: Gracchus illis, et Crassus, et Curio, nimis culti et recentes sunt: ad Appium usque, et ad Coruncanum redeunt. Quidam contra, dum nihil nisi tritum et usitatum volunt, in sordes incidunt. Utrumque diverso genere corruptum est, tam mehercules, quam si vellent, splendidis uti, ac sonantibus, et poetiis; necessaria, et in usu posita vitare: tam hunc dicam peccare, quam illum. Alter se iusto plus colit, alter se iusto plus negligit: ille et crura, hic nec alas quidem vellit. Ad compositionem transeamus. quot genera tibi dabo in hac, quibus peccetur? Quidam praefractam et asperam probant; disturbant de industria, si quid placidius effluxit; nolunt sine salebra

esse iuncturam; virilem putant et fortem, quae aurem inaequalitate percutiat. Quorundam non est compositio: modulatio est: adeo blanditur, et molliter labitur. Quid de illa loquar, in qua verba differuntur, et diu expectata vix ad clausulas redduntur? Quid de illa in exitu lenta, qualis Ciceronis est, deversa, et molliter desinens, nec aliter quam solet, ad morem suum pedemque respondens? Non tantum in genere sententiarum vitium est, si aut pusillae sunt et pueriles, aut improbae, et plus ausae quam pudore salvo licet: sed si floridae sunt, et nimis dulces, si in vanum exeunt, et sine effectum, nihil amplius quam sonant. Haec vitia unus aliquis inducit, sub quo tunc eloquentia est: ceteri imitantur, et alter alteri tradunt. Sic Sallustio vigente, amputatae sententiae, et verba ante expectatum cadentia, et obscura brevitatis, fuere pro cultu. Arruntius vir rarae frugalitatis, qui historias belli Punici scripsit, fuit Sallustianus, et in illud genus nitens. Est apud Sallustium: Exercitum argento fecit: id est, pecunia paravit. Hoc Arruntius amare coepit: posuit illud omnibus paginis. Dicit quodam loco: Fugam nostris fecere. Alio loco: Hiero Rex Syracusanorum, bellum facit. Et alio loco: Quae audita Panormitanos dedere Romanis fecere. Gustum tibi dare volui. Totus his contextitur liber. Quae apud Sallustium rara fuerunt, apud hunc crebra sunt, et paene continua, nec sine causa. ille enim in haec incidebat: at hic illa quaerebat. Vides autem quid sequatur, ubi alicui vitium pro exemplo est. Dixit Sallustius: Aquis hiemantibus. Arruntius in primo



libro belli Punici ait; Repente hiemavit tempestas. Et alio loco, cum dicere vellet frigidum annum fuisse, ait: Totus hiemavit annus. Et alio loco: Inde sexaginta onerarias, leves, praeter militem et necessarios nautarum, hiemante Aquilone misit. Non desinit omnibus locis hoc verbum infulcire. Quodam loco Sallustius dicit: Inter arma civilia aequi boni famas petit. Arruntius non temperavit, quo minus primo statim libro poneret: ingentes esse famas de Regulo. Haec ergo et huiusmodi vitia, quae alicui impressit imitatio, non sunt indicia luxuriae, nec animi corrupti. Propria enim esse debent, et ex ipso nata, ex quibus tu aestimes alicuius affectus. Iracundi hominis iracunda oratio est: commoti nimis incitata, delicati tenera et fluxa. Quod vides istos sequi, qui aut vellunt barbam, aut intervellunt: qui labra pressius tondent et abradunt, servata et submissa cetera parte: qui lacerinas coloris improbi sumunt, qui perluculentem togam: qui nolunt facere quidquam quod hominum oculis transire liceat. Irritant illos, et in se advertunt: volunt vel reprehendi, dum conspiciantur. Talis est oratio Maecenatis, omniumque aliorum, qui non casu errant, sed scientes volentesque. Hoc a magno animi malo oritur. Quomodo in vino non ante lingua titubat, quam mens cessit oneri, et inclinata vel perdita est: ita ista oratio (quid aliud quam ebrietas?) nulli molesta est, nisi animus labat. Ideo ille curetur: ab illo sensus, ab illo verba exeunt, ab illo nobis est habitus, vultus, incessus. Illo sano ac valente, oratio quoque robusta, fortis, virilis



est : si ille procubuit , et cetera sequuntur ruinam.

—— *Rege incolumi , mens omnibus una est.*

*Amisso , rupere fidem.*

Rex noster est animus. hoc incolumi , cetera manent in officio , parent et obtemperant : cum ille paulum vacillavit , simul nutant. Cum vero cessit voluptati , artes quoque eius , actusque marcent , et omnis ex languido fluxoque conatus est. Quoniam hac similitudine usus sum , perseverabo. Animus noster modo rex est , modo tyrannus. rex , cum honesta intuetur , salutem sibi commissi corporis curat , et nihil imperat turpe , nihil sordidum : ubi vero impotens , cupidus , delicatus est , transit in nomen detestabile ac dirum , et fit tyrannus. Tunc illum excipiunt affectus impotentes , instantque : qui initio quidem gaudet , ut solet populus largitione nocitura frustra plenus , et quae non potest haurire , contrectat. Cum vero magis ac magis vires morbus exedit , et in medullas nervosque descendere deliciae : conspectu eorum , quibus se nimia aviditate inutilem reddidit , laetus , pro suis voluptatibus habet spectaculum alienarum , subministrator libidinum testisque , quarum sibi usum ingerendo abstulit ; nec illi tam gratum est abundare iucundis , quam acerbum , quod non omnem illum apparatus per gulam ventremque transmittit : non cum omni exoletorum feminarumque turba convolutatur : moeretque , quod magna pars suae felicitatis exclusa corporis angustiiis , cessat. Numquid enim , mi Lucili , hic furor est , quod nemo nostrum mortalem se cogitat ? quod ne-

mo imbecillum? immo quod nemo nostrum unum esse se cogitat? Adspice culinas nostras, et concursantes inter tot ignes coquos nostros: unum videri putas ventrem, cui tanto tumultu comparatur cibus? Adspice veteraria nostra, et plena multorum seculorum vindemiis horrea: unum putas videri ventrem, cui tot consulum regionumque vina conduntur? Adspice quot locis vertatur terra, quot millia colonorum arent, fodiant: unum putas videri ventrem, cui et in Sicilia, et in Africa feritur? Sani erimus, et modica concupiscemus, si unusquisque se numeret: metiatur simul corpus, sciatque, nec multum capere, nec diu posse. Nihil tamen aequè tibi profuerit ad temperantiam omnium rerum, quam frequens cogitatio brevis aevi, et huius incerti. Quidquid facies, respice ad mortem.

## E P I S T O L A C X V.

*Contra nimis sermonis aut stili anxios: & minuti hoc animi esse. Cum fiducia scribendum loquendumque, sine quaesito ornatu. Quem in animo potius spectā. O qualis ille, ubi Virtutes eum excoluerunt! omnes in amorem rapiat, si conspici possit. At eternus iste splendor falsus, aut nihili est: item aurum omne & pecunia, quae miramur. Non faciunt haec felices, aut securos: immo & miseros, & miserandos.*

**N**IMIS anxium esse te circa verba et compositionem, mi Lucili, nolo: habeo maiora quae cures.

Quaere quid scribas, non quemadmodum : et hoc ipsum, non ut scribas, sed ut sentias : ut illa quae fenseris, magis applies tibi, et veluti signes. Cuiuscunque orationem videris sollicitam et politam, scito animum quoque non minus esse pusillis occupatum. Magnus ille remissius loquitur, et securius : quaecunque dicit, plus habent fiduciae, quam curae. Nosti complures iuvenes, barba et coma nidos, de capsula totos : nihil ab illis speraveris forte, nihil solidum. Oratio vultus animi est : si circumtonsa est, et fucata, et manufacta, ostendit illum quoque non esse sincerum, et habere aliquid fracti. Non est ornamentum virile, concinnitas. Si nobis animum boni viri liceret inspicere, o quam pulchram faciem, quam sanctam, quam ex magnifico placidoque fulgentem videremus ? hinc iustitia, illinc fortitudine, hinc temperantia prudentiaque lucentibus. Praeter has frugalitas, et continentia, et tolerantia, et libertas, comitaeque, et (quis credat ?) in homine rarum humanitas bonum, splendorem illi suum affunderent. Tum providentia, tum elegantia, et ex istis magnanimitas eminentissima, quantum, dii boni ! decoris illi, quantum ponderis, gravitatisque adderent : quanta esset cum gratia auctoritas ! Nemo illum amabilem, qui non simul venerabilem diceret. Si quis viderit hanc faciem altiorrem fulgentioremque, quam cerni inter humana consuevit, nonne velut numinis occursum obitupefactus resistat, et ut fas sit vidisse, tacitus precetur ? Tum advocante ipsum vultus benignitate productus, adoret ac supplicet : et diu contemplatus multum ex-

stantem, supraque mensuram solitorum inter nos aspici, elatam, oculis miti quidem, sed nihilominus vivido igni flagrantibus, tunc demum illam Virgilio nostri vocem verens atque attonitus emittat:

*O quam te memorem virgo? namque haud tibi  
vultus*

*Mortalis, nec vox hominem sonat. —*

*Sis felix, nostrumque leves quaecunque laborem.*

Aderit, levabitque, si colere eam voluerimus. Colitur autem non taurorum opimis corporibus contrucidatis, nec auro argentoque suspenso, nec in thesauros stipe infusa, sed pia et recta voluntate. Nemo, inquam, non amore eius arderet, si nobis illam videre contingeret. Nunc enim multa obstrigilant, et aciem nostram aut splendore nimio percutiunt, aut obscuro retinent. Sed quemadmodum visus oculorum quibusdam medicamentis acui solet, et repurgari: sic et nos, si aciem animi liberare impedimentis voluerimus, poterimus perspicere virtutem, etiam obrutam corpore, etiam paupertate opposita, et humilitate et infamia obiacentibus. Cernemus, inquam, pulchritudinem illam, quamvis sordido obtectam. Rursus aequae malitiam, et aerumnosi animi veterum perspicimus: quamvis multus circa divitiarum radiantium splendor impediatur, et intuentem hinc bonorum, illinc magnarum potestatum falsa lux verberet. Tunc intelligere nobis licebit, quam contemnenda miremur, simillimi pueris, quibus omne ludicrum in pretio

est. Parentibus quippe, nec minus fratribus, praeferunt parvo aere emta monilia. Quid ergo inter nos et illos interest, ut Aristo ait, nisi quod nos circa tabulas et statuas insanimus, carius inepti? Illos reperti in litore calculi leves, et aliquid habentes varietatis, delectant; nos ingentium maculae columnarum: sive ex Aegyptiis arenis, sive ex Africae solitudinibus advectae, porticum aliquam vel capacem populi coenationem ferunt. Miramur parietes tenui marmore indutos: cum sciamus quale sit, quod absconditur, oculis nostris imponimus. Et cum auro tecta perfundimus, quid aliud quam mendacio gaudemus? scimus enim sub illo auro foeda ligna latitare. Nec tantum parietibus aut lacunaribus ornamentum tenue praetenditur: omnium istorum quos incedere altos vides, bracteata felicitas est. Inspice, et disces sub ista tenui membrana dignitatis, quantum mali lateat. Haec ipsa res tot magistratus, tot iudices detinet, quae magistratus et iudices facit, pecunia; quae ex quo in honore esse coepit, verus rerum honor cecidit: mercatoresque et venales invicem facti, quaerimus, non quale sit quidque, sed quanti. Ad mercedem pii sumus, ad mercedem impii. Honesta, quamdiu aliqua illis spes inest, sequimur: in contrarium transaturi, si plus scelera promittant. Admirationem nobis parentes auri argentique fecerunt: et teneris infusa cupiditas altius sedit, crevitque nobiscum. Deinde totus populus in alia discors, in hoc convenit: hoc suspiciunt, hoc suis optant, hoc diis velut rerum humanarum maximum, cum grati videri volunt, con-



fecrant. Denique eo mores redacti sunt, ut paupertas maledicto probroque sit, contempta divitibus, invisa pauperibus. Accedunt deinde carmina poetarum, quae affectibus nostris facem subdant, quibus divitiae velut unicum vitae decus ornamentumque laudantur. Nihil illis melius nec dare videntur dii immortales posse, nec habere.

*Regia solis erat sublimibus alta columnis,  
Clara micante auro.*

Eiusdem currum adspice.

*Aureus axis erat, temo aureus, aurea summae  
Curvatura rotae, radiorum argenteus ordo.*

Denique quod optimum videri volunt seculum, aureum appellant. Nec apud tragicos defunt, qui lucro innocentiam, salutem, opinionem bonam mutant.

*Sine me vocari pessimum, ut dives vocer.  
An dives, omnes quaerimus: nemo, an bonus.  
Non quare, & unde: quid habeas, tantum rogant.  
Ubique tanti quisque, quantum habuit, fuit.  
Quid habere nobis turpe sit, quaeris? nihil.  
Aut dives opto vivere, aut pauper mori.  
Bene moritur, qui, dum moritur, lucrum facit.  
Pecunia ingens generis humani bonum,  
Cui non voluptas matris, aut blanda potest  
Par esse prolis, non sacer meritis parens.  
Tam dulce si quid Veneris in vultu micat,  
Merito illi amores coelitus atque hominum movet.*



Cum hi novissimi versus in tragoedia Euripidis pronuntiati essent, totus populus ad eiiciendum et actorem et carmen confurrexit uno impetu: donec Euripides in medium ipse profiluit, petens, ut expectarent, viderentque quem admirator auri exitum faceret. Dabat in illa fabula poenas Bellerophontes, quas in sua quisque dat. Nulla enim avaritia sine poena est, quamvis satis sit ipsa poenarum. O quantum lacrimarum, o quantum laborum exigit! quam misera desideratis, quam misera partis est! Adice quotidianas sollicitudines, quae pro modo habendi quemque discruciant. Maiore tormento pecunia possidetur, quam quaeritur. Quantum damnis ingemiscunt, quae et magna incidunt, et maiora videntur! denique ut nihil illis fortuna detrahat, quidquid non acquiritur, damnum est. At felicem illum homines, et divitem vocant, et consequi optant, quantum ille possidet. Fateor. Quid ergo? tu ullos esse conditionis peioris existimas, quam qui habent et miseriam, et invidiam? Utinam qui divitias appetituri essent, cum divitibus deliberarent! utinam honores petituri, cum ambitiosis, et summum adeptis dignitatis statum! profecto vota mutassent: cum interim illi nova suscipiunt, qui priora damnaverant. Nemo enim est cui felicitas sua, etiamsi cursu venit, satisfaciat. Queruntur et de consiliis, et de processibus suis: maluntque semper, quae reliquerunt. Itaque hoc tibi philosophia praeftabit, quo equidem nihil maius existimo: nunquam te poenitebit tui. Ad hanc tam solidam felicitatem, quam tempestas nulla concutiat, non perducunt te apte verba contexta, et oratio fluens le-

niter. Eant ut volent, dum animo compositio sua constet, dum sit magnus, et opinionum securus, et ob ipsa quae aliis displicent, sibi placens: qui profectum suum vita aestimet, et tantum scire se iudicet, quantum non cupit, quantum non timet.

## EPISTOLA CXVI.

*Contra Peripateticos, exscindendos Affectus, non temperandos esse: neque a Natura induci. A mollitie sententiam adversam nasci.*

**U**TRUM fatius sit, modicos habere affectus, an nullos, saepe quaesitum est. Nostri illos expellunt: Peripatetici temperant. Ego non video, quomodo salubris esse aut utilis possit ulla mediocritas morbi. Noli timere. nihil eorum, quae tibi non vis negari, eripio: facilem me, indulgentemque praebebo rebus, ad quas tendis, et quas aut vitae necessarias, aut utiles, aut iucundas putes: detraham vitium. Nam cum tibi cupere interdixero, velle permittam: ut eadem illa intrepidus facias, ut certiore consilio, ut voluptates illas magis sentias. Quidni? ad te magis perventurae sunt, si illis imperabis, quam si servies. Sed naturale est, inquis, ut desiderio amici torquear: da ius lacrimis tam iuste cadentibus. Naturale est opinionibus hominum tangi, et adversis contristari: quare non permittas mihi hunc tam honestum malae opinionis metum? Nullum vitium est sine patrocinio: nulli non initium est verecundum et exorabile, sed ob hoc latius funditur. Non obtinebis ut

definat, si incipere permiseris. Imbecillis est primo omnis affectus, deinde ipse se concitat, et vires, dum procedit, parat: excluditur facilius, quam expellitur. Quis negat omnes affectus a quodam quasi naturali fluere principio? curam nobis nostri natura mandavit: sed huic ubi nimium indulseris, vitium est. Voluptatem natura necessariis rebus admiscuit, non ut illam peteremus, sed ut ea, sine quibus non possumus vivere, gratiora nobis illius faceret accessio: si suo veniat iure, luxuria est. Ergo intrantibus resistamus: quia facilius, ut dixi, non recipiuntur quam exeunt. Aliquatenus, inquis, dolere, aliquatenus timere permitte. sed illud aliquatenus longe producit, nec ubi vis, accipit finem. Sapienti non sollicite custodire se tutum est: et lacrimas suas et voluptates, ubi volet, sistet. Nobis quia non est regredi facile, optimum est omnino non progredi. Eleganter mihi videtur Panaetius respondisse adolescentulo cuidam quaerenti, An sapiens amaturus esset? De sapiente, inquit, videbimus: mihi et tibi, qui adhuc a sapiente longe absumus, non est committendum, ut incidamus in rem commotam, impotentem, alteri emancipatam, vilem sibi. Sive enim nos respexit, humanitate eius irritamur; sive contempsit, superbia accendimur. Aequae facilitas amoris, quam difficultas nocet: facilitate capimur, cum difficultate certamus. Itaque conscii nobis imbecillitatis nostrae, quiescamus. Nec vino infirmum animum committamus, nec formae, nec adulationi, nec ullis rebus blande trahentibus. Quod Panaetius de amore quaerenti respondit, hoc ego de omnibus

dico. Quantum possumus nos, a lubrico recedamus : in sicco quoque parum fortiter stamus. Occurres hoc loco mihi illa publica contra Stoicos voce : Nimis magna promittitis, nimis dura praecipitis. nos homunciones sumus, omnia nobis negare non possumus. Dolebimus, sed parum : concupiscemus, sed temperate : irascemur, sed placabimur. Scis quare non possumus ista ? quia nos posse non credimus. Immo mehercules, aliud est in re. Vitia nostra, quia amamus, defendimus, et malumus excusare illa, quam excutere. Satis natura homini dedit roboris, si illo utamur, si vires nostras colligamus, ac totas pro nobis, certe non contra nos concitemus. Nolle in causa est : non posse praetenditur.

## E P I S T O L A CXVII.

*Quaestiuncula, An, cum Sapientia bonum sit, etiam sapere ? Stoici istud vulgo negant : alii asserunt, & ipse istis pronior. Denique amolitur haec supervacua, & ad formationem morum serio vocat.*

**M**ULTUM mihi tibiue negotii concinnabis, et, dum nescis, in magnam me litem ac molestiam impinges, qui mihi tales quaestiunculas ponis, in quibus ego nec dissentire a nostris salva gratia, nec consentire salva conscientia possum. Quaeris, an verum sit, quod Stoicis placet, Sapientiam bonum esse, sapere bonum non esse ? Primum exponam, quid Stoicis videatur : tum dicere sententiam audebo. Placet nostris, quod bonum est, esse corpus : quia

quod bonum est, facit: quidquid facit, corpus est. Quod bonum est, prodest: faciat autem aliquid oportet, ut proficit: si facit, corpus est. Sapientiam bonum esse dicunt: sequitur, ut necesse sit illam corporalem quoque dicere. At sapere non putant eisdem conditionis esse. Incorporale est et accidens alteri, id est, sapientiae: itaque nec facit quidquam, nec prodest. Quid ergo, inquiunt, non dicimus, Bonum est sapere? dicimus, referentes ad id ex quo pendet, id est, ad ipsam sapientiam. Adversus hos quid ab aliis respondeatur, audi, antequam ego incipio secedere, et in alia parte considerare. Isto modo, inquiunt, nec beate vivere bonum est. Velint nolint, respondendum est, beatam vitam bonum esse, et beate vivere bonum non esse. Etiamnum quoque nostris illud opponitur. Vultis sapere? ergo expetenda res est, sapere: si expetenda res est, bonum est. Coguntur nostri verba torquere, et unam syllabam expetendo interponere, quam sermo noster inferi non finit. Ego illam, si pateris, adiungam. Expetendum est, inquiunt, quod bonum est: adexpetendum, quod bono contingit: quod, cum bonum consecuti sumus, non petitur tanquam bonum, sed petito bono accedit. Ego non idem sentio, et nostros iudico in hoc descendere: quia iam primo vinculo tenentur, et mutare illis formulam non licet. Multum dare solemus praesumptioni omnium hominum. Apud nos veritatis argumentum est, aliquid omnibus videri: tanquam deos esse, inter alia sic colligimus, quod omnibus de diis opinio insita est: nec ulla gens usquam est adeo extra leges mo-



resque proiēcta , ut non aliquos deos credat. Cum de animarum aeternitate differimus , non leve momentum apud nos habet consensus hominum , aut timentium inferos , aut colentium. Utor hac publica persuasione : neminem invenies , qui non putet et sapientiam bonum , et sapere. Non faciam quod victi solent , ut provocem ad populum : nostris incipiemus armis conflagere. Quod accidit alicui , utrum extra id cui accidit est , an in eo cui accidit ? Si in eo est cui accidit , tam corpus est , quam illud cui accidit. Nihil enim accidere sine tactu potest : quod tangit , corpus est. Si extra est , postquam acciderat , recessit : quod recessit , motum habet : quod motum habet , corpus est. Speres me dicturum , non esse aliud cursum , aliud currere : nec aliud calorem , aliud calere : nec aliud lucem , aliud lucere. Concedo ista alia esse , sed non fortis alterius. Si valetudo indifferens est : et valere indifferens est. Si forma indifferens est : et formosum esse indifferens est. Si iustitia bonum est : et iustum esse bonum est. Si turpitudine malum est : et turpem esse malum est. tam mehercules quam si lippitudo malum est , et lippire malum est. Hoc ut scias , neutrum esse sine altero potest. Quod sapit , sapiens est : quod sapiens est , sapit. Adeo non potest dubitari , an quale illud sit , tale hoc sit , ut quibusdam utrumque unum videatur atque idem. Sed illud libenter quaesierim : Cum omnia aut bona sint , aut mala , aut indifferentia , sapere in quo numero sit ? Bonum negant esse. malum utique non est : sequitur , ut medium sit. Id autem medium atque indifferens vocamus , quod tam malo contin-



gere quam bono potest : tanquam pecunia , forma , nobilitas. Hoc , ut sapiat , contingere nisi bono non potest : ergo indifferens non est. Atqui ne malum quidem est , quod contingere malo non potest : ergo bonum est. Quod nisi bonus non habet , bonum est : sapere non nisi bonus habet : ergo bonum est. Accidens est , inquit , sapientiae. Hoc ergo quod vocas sapere , utrum facit sapientiam , an patitur ? sive facit illud , sive patitur , utroque modo corpus est. Nam et quod sit , et quod facit , corpus est. si corpus est , bonum est : unum enim deerat illi , quominus bonum esset , quod incorporale erat. Peripateticis placet , nihil interesse inter sapientiam et sapere , cum in utrolibet eorum et alterum sit. Numquid enim quenquam existimas sapere , nisi qui sapientiam habet ? Numquid quenquam qui sapiat , non putas habere sapientiam ? Dialectici veteres ista distinguunt : ab illis divisio usque ad Stoicos venit. Qualis sit haec , dicam. Aliud est ager , aliud agrum habere. Quidni ? cum habere agrum ad habentem , non ad agrum pertineat. Sic aliud est sapientia , aliud sapere. Puto concedes duo esse haec , id quod habetur , et eum qui habet : habetur sapientia : habet , qui sapit. Sapientia est mens perfecta , vel ad summum optimumque perducta : ars enim vitae est. Sapere quid est ? non possum dicere , mens perfecta , sed id quod contingit perfectam mentem habenti. Ita alterum est , mens bona : alterum , quasi habere mentem bonam. Sunt , inquit , naturae corporum : tanquam , hic homo est , hic equus : has deinde sequuntur motus animorum enuntiativi corporum. Hi ha-

bent proprium quiddam, et a corporibus seductum: tanquam, video Catonem ambulantiem: hoc sensus ostendit, animus credit. Corpus est quod video, cui et oculos, et animum intendi. Dico deinde, Cato ambulat: non corpus quidem est quod nunc loquor, sed enuntiativum quiddam de corpore: quod alii effatum vocant, alii enuntiatum, alii edictum. Sic cum dicimus sapientiam, incorporale quiddam intelligimus: cum dicimus, Sapit: de corpore loquimur. Plurimum autem interest, utrum illud dicas, an de illo. Putemus in praesentia ista duo esse: nondum enim quid mihi videatur, pronuntio: quid prohibet, quo minus aliud quidem sit, sed nihilominus bonum? Dicebas paulo ante, aliud esse agrum, aliud habere agrum. Quidni? in alia enim natura est qui habet, in alia quod habetur. illa terra est, hic homo est. At in hoc de quo agitur, eiusdem naturae sunt utraque, et qui habet sapientiam, et ipsa quae habetur. Praeterea illic aliud est quod habetur, alius qui habet: hic in eodem est, et quod habetur, et qui habet. Ager iure possidetur: sapientia natura. ille abalienari potest, et alteri tradi: haec non discedit a domino. Non est itaque quod compares inter se dissimilia. Coeperam dicere, posse ista duo esse, et tamen utraque bona. Sapientia, et sapiens duo sunt: et utrumque bonum esse concedit. Quomodo nihil obstat, quo minus et sapientia bonum sit, et habens sapientiam: sic nihil obstat, quo minus et sapientia bonum sit, et habere sapientiam, id est, sapere. Ego in hoc volo sapiens esse, ut sapiam. Quid ergo? non est id bonum, sine quo nec

illud bonum est? Vos certe dicitis, sapientiam, si sine usu detur, accipiendam non esse. Quis est usus sapientiae? Sapere : hoc est in illa pretiosissimum : quo detracto, supervacua fit. Si tormenta mala sunt, torqueri malum est : adeo quidem, ut illa non sint mala, si quod sequitur, detraxeris. Sapientia habitus perfectae mentis est : sapere, usus perfectae mentis. Quomodo potest usus eius bonum non esse, quae sine usu bonum non est? Interrogo te, an sapientia sit expetenda. fateris. Interrogo, an usus sapientiae sit expetendus. fateris. negas enim te illam recepturum, si uti ea prohibearis. quod expetendum est, bonum est. Sapere, sapientiae usus est : quomodo eloquentiae, loqui : quomodo oculorum, videre : ergo sapere sapientiae usus est. usus autem sapientiae expetendus est : sapere ergo expetendum est : si expetendum est, bonum est. Olim ipse me damno, qui illos imitor dum accuso, et verba apertae rei impendo. Cui enim dubium potest esse, quin si aestus malum est, et aestuare malum sit? si aliorum malum est, malum sit algere? si vita bonum est, et vivere bonum est? Omnia ista circa sapientiam, non in ipsa sunt : at nobis in ipsa commorandum est, etiam si quid evagari liber, amplos habet illa spatiososque secessus. De deorum natura quaeramus. de siderum alimento, de his tam variis stellarum discursibus : an ad illarum motus nostra moveantur corpora, an corporibus omnium, animisque illinc impetus veniat. An et haec quae forrui dicuntur, certa lege constricta sint, nihilque in hoc mundo repentinum, aut expers ordinis volutetur. Ista iam a formatione mo-

rum recesserunt : sed levant animum, et ad ipsarum quas tractant rerum magnitudinem attollunt. Haec vero de quibus paulo ante dicebam, minuunt, et deprimunt, nec ut putas exacuunt, sed extenuant. Obsecro vos, cur tam necessariam curam maioribus melioribusque debitam, in re nescio an falsa, certe inutili, terimus? Quid mihi profuturum est scire, an aliud sit sapientia, aliud sapere? quid mihi profuturum est scire, illud bonum esse, hoc non esse? Temere me geram, subibo huius voti aleam. tibi sapientia, mihi sapere contingat : pares erimus. Potius id age, ut mihi viam monstres, qua ad ista perveniam. Dic mihi quid vitare debeam, quid appetere : quibus animum labantem studiis firmem : quemadmodum quae me ex transverso ferunt aguntque, procul a me repellam. Quomodo par esse tot malis possim : quomodo istas calamitates removeam, quae ad me irruperunt : quomodo illas, ad quas ego irrupi. Doce, quomodo feram aerumnam sine gemitu meo, felicitatem sine alieno : quomodo ultimum necessarium vitae terminum non exspectem, sed ipsemet, cum visum erit, profugiam. Nihil mihi videtur turpius, quam optare mortem. Nam si vis vivere, quid optas mori? si non vis, quid deos rogas, quod tibi nascenti dederunt? Nam ut quandoque moriaris, etiam invito positum est : ut cum voles, in tua manu est. Alterum tibi necesse est, alterum licet. Turpissimum his diebus principium diferti mehercules viri legi : Ita, inquit, quamprimum moriar. Homo demens, optas rem tuam. Ita quamprimum moriar. Fortasse inter has voces se-

nex factus es. Alioqui quid in mora est? nemo te tenet, evade qua visum est. Elige quamlibet rerum naturae partem, qua tibi praeberi exitum iubeas. Haec nempe sunt elementa, quibus hic mundus administratur, aqua, terra, spiritus. Omnia ista tam causa vivendi sunt, quam viae mortis. Ita quamprimum moriar. Quamprimum istud, quod esse vis? quem illi diem ponis? citius fieri quam optas, potest. Imbecillae mentis ista sunt verba, et hac detestatione misericordiam captantis. Non vult mori, qui optat. Deos vitam roga, et salutem: si mori placuit, hic mortis est fructus, optare desinere. Haec, mi Lucili, tractemus, his formemus animum. Haec est sapientia, hoc est sapere, non disputatiunculis inanibus subtilitatem vanissimam agitare. Tot quaestiones tibi fortuna posuit. nondum illas solvistis: iam cavillaris. Quam stultum est, cum signum pugnae acceperis, ventilare? remove ista luforia arma, decretoriis opus est. Dic qua ratione nulla animum tristitia, nulla formido perturbet: qua ratione hoc secretarum cupiditatum pondus effundam. Agatur aliquid. Sapientia bonum est, sapere non est bonum. Sic sit. negemus, sapere bonum esse: ut hoc totum studium derideatur, tanquam operatum supervacuis. Quid si scires etiam illud quaeri, an bonum sit futura sapientia? Quid enim dubii est, oro te, an nec messes futuram iam sentiant horrea, nec futuram adolescentiam pueritia viribus aut ullo robore intelligat? Aegro interim nihil ventura sanitas prodest, non magis, quam currentem luctantemque post multos secuturum sensus otium reficit.



Quis nescit hoc ipso non esse bonum id quod futurum est, quia futurum est? nam quod bonum est, utique prodest: nisi praesentia, prodesse non possunt. Si non prodest, bonum non est utique: si prodest, iam est. Futurus sum sapiens: hoc bonum erit, cum fuero: interim non est. Prius aliquid esse debet, deinde qualè esse. Quomodo, oro te, quod adhuc nihil est, iam bonum est? Quomodo autem tibi magis vis probari, non esse aliquid, quam si dixerò, futurum est? nondum enim venisse apparet, quòd venit. Ver secuturum est: scio nunc hiemem esse. aestas secutura est: scio aestatem non esse. Maximum argumentum habeo nondum praesentis, futurum esse. Sapiam, spero: sed interim non sapio. si illud bonum haberem, iam hoc carerem malo. Futurum est, ut sapiam. ex hoc licet nondum me sapere intelligas. non possum simul et in illo bono, et in hoc malo esse. Duo ista non coeunt, nec apud eundem sunt una, bonum et malum. Transcurramus solertissimas nugas, et ad illa quae nobis aliquam opem sunt latura, properemus. Nemo qui obstetricem parturienti filiae sollicitus arcessit, edictum et ludorum ordinem perlegit. nemo qui ad incendium domus suae currit, tabulam latrunculariam perspicit, ut sciat quomodo alligatus exeat calculus. At mehercules omnia tibi undique nuntiantur, et incendium domus, et periculum liberorum, et obsidium patriae, et bonorum direptio: adiice istis naufragium, motusque terrarum, et quidquid aliud timeri potest. Inter ista districtus, rebus, nihil aliud quam animum oblectantibus, vacas? Quid inter sapientiam, et sa-



pere interfit, inquiris? nodos neſtis ac ſolvis, tanta mole impendente capiti tuo? Non tam benignum ac liberale tempus natura nobis dedit, ut aliquid ex illo vacet perdere: et vide, quam multa etiam diligentiffimis pereant. Aliud valetudo ſua cuique abſtulit, aliud ſuorum: aliud neceſſaria negotia, aliud publica occupaverunt: vitam nobiſcum dividit ſomnus. Ex hoc tempore tam anguſto, et rapido, et nos auferente, quid iuvāt maiorem partem mittere in vanum? Adiice nunc, quod aſſueſcit animus delectare ſe potius, quam ſanare: et philoſophiam oblectamentum facere, cum remedium ſit. Inter ſapientiam, et ſapere quid interfit, neſcio: ſcio mea non intereſſe, ſciam iſta, an neſciam. Dic mihi, cum, quid inter ſapientiam et ſapere interfit, didicero, ſapiam? Cur ergo potius inter vocabula me ſapientiae detines, quam inter opera? Fac me fortiorem, fac me ſecuriorem, fac fortunae parem, fac ſuperiorem. poſſum autem ſuperior eſſe, ſi fecero omne quod diſco.

---

## EPISTOLA CXVIII.

*Inanes epistolas nolle se scribere : potius monitorum utilium uberes : et iam facit. Suadet sua , non aliena tractare : a Fortuna nihil petere , nec ab ea pendere. Verum bonum quaerendum : et quid illud sit , definitum. Itemque quid ab honesto differat. Omne Bonum , secundum Naturam esse : nec tamen quidquid secundum Naturam , Bonum.*

**E**XIGIS a me frequentiores epistolas. Rationes conferamus : solvendo non eris. Convenerat quidem , ut tua priora essent ; tu scriberes , ego rescriberem : sed non ero difficilis. bene credi tibi scio : itaque in antecessum dabo. Nec faciam , quod Cicero vir disertissimus facere Atticum iubet , ut etiam si rem nullam habebit , quod in buccam venerit , scribat. Nunquam potest deesse quod scribam , ut omnia illa quae Ciceronis implent epistolas , trans-eam : quis candidatus laboret , quis alienis , quis suis viribus pugnet , quis consulatum fiducia Caesaris , quis Pompeii , quis ab se petat : quam durus sit foenerator Caecilius , a quo minoris centesimis propinqui nummum movere non possunt. Sua satius est mala , quam aliena tractare : se excutere , et videre , quam multarum rerum candidatus sit , et non suffragari. Hoc est , mi Lucili , egregium , hoc securum ac liberum , nihil petere , et tota fortunae comitia transire. Quam putas esse iucundum , tribus vocatis ; cum candidati in templis suis pendeant ,

et alius nummos pronuntiet, alius per sequestrum agat, alius eorum manus osculis conterat, quibus designatus contingendam manum negaturus est, omnes attoniti, vocem praeconis expectant; stare otiosum, et spectare illas nundinas, nec ementem quidquam, nec vendentem? Quanto hic maiore gaudio fruitur, qui non praetoria, aut consularia comitia securus intuetur, sed magna illa, in quibus alii honores anniversarios petunt, alii perpetuas potestates, alii bellorum eventus prosperos triumphosque, alii divitias, alii matrimonia ac liberos, alii salutem suam suorumque! Quanti animi res est, solum nihil petere, nulli supplicare, et dicere: Nihil mihi tecum, fortuna: non facio mei tibi copiam. scio apud te Catones repelli, Vatinios fieri: nihil rogo. Hoc est privatam facere fortunam. Libet ergo haec invicem scribere, et hanc integram semper egerere materiam, circumspicientibus tot millia hominum inquieta: qui ut aliquid pestiferi consequantur, per mala nituntur in malum, petuntque mox fugienda, aut etiam fastidienda. Cui enim affecuto satis fuit, quod optanti nimium videbatur? Non est, ut existimant homines, avida felicitas, sed pusilla. itaque neminem fatiat. Tu ista credis excelsa, quia longe ab illis iaces: ei vero qui ad illa pervenit, humilia sunt. Mentior, nisi adhuc quaerit adscendere. Istud quod tu summum putas, gradus est. Omnes autem male habet ignorantia veri. tanquam ad bona feruntur, decepti rumoribus. Deinde mala esse, aut inania, aut minora quam speraverint, adepti ac multa passi vident: maiorque pars miratur ex inter-

vallo fallentia, et vulgo magna pro bonis sunt. Hoc ne nobis quoque eveniat, quaeramus quid sit bonum. Varia eius interpretatio fuit. Finivit hoc alius alio modo, alius illud aliter expressit. Quidam ita finiunt: Bonum est, quod invitat animos, quod ad se vocat. Huic statim opponitur: Quid si invitat quidem, sed in perniciem? scis quam multa mala, blanda sint. Verum, et verisimile, inter se differunt ita: Quod bonum est, vero iungitur: non est enim bonum, nisi verum est. At quod invitat ad se, et allicit facie, verisimile est: subrepat, sollicitat, attrahit. Quidam ita finierunt: Bonum est, quod appétitionem sui movet, vel quod impetum animi tendentis ad se movet. Et huic idem opponitur: multa enim impetum animi movent, quae petuntur perentium malo. Melius illi qui sic finierunt: Bonum est, quod ad se impetum animi secundum naturam movet: et ita demum petendum est, cum coepit esse expetendum. Iam et honestum est: hoc enim perfecte est petendum. Locus ipse me admonet, ut, quid intersit inter bonum honestumque, dicam. Aliquid inter se habent mixtum, et inseparabile: nec potest bonum esse, nisi cui aliquid honesti inest: et honestum utique bonum est. Quid ergo inter duo interest? Honestum est perfectum bonum, quo beata vita completur, cuius contactu alia quoque bona fiunt. Quod dico, tale est. Sunt quaedam neque bona, neque mala: tanquam militia, legatio, iurisdictio. Haec cum honeste administrata sunt, bona esse incipiunt, et ex dubio in bonum transeunt. Bonum societate honesti fit, honestum per se bonum

est. Bonum ex honesto fluit, honestum ex se est. Quod bonum est, malum esse potuit: quod honestum est, nisi bonum esse non potuit. Hanc quidam finitionem reddiderunt: Bonum est, quod secundum naturam est. Attende quid dicam. Quod bonum est, et secundum naturam est: non protinus quod secundum naturam est, et bonum est. Multa quidem naturae consentiunt: sed tam pusilla sunt, ut non conveniat illis boni nomen. Levia enim sunt, et contemnenda: nullum nec minimum contemnendum bonum. Nam quamdiu exiguum est, bonum non est: cum bonum esse coepit, non exiguum est. Unde aliquid cognoscitur bonum? si perfecte secundum naturam est. Fateris, inquis, quod bonum est, secundum naturam esse: haec eius proprietas est. Fateris et alia secundum naturam quidem esse; sed bona non esse. Quomodo ergo illud bonum est, cum haec non sint? quomodo ad aliam proprietatem pervenit, cum utrique praecipuum illud commune sit, secundum naturam esse? ipsa scilicet magnitudine. Nec hoc novum est, quaedam crescendo mutari. Infans fuit, factus est pubes: alia eius proprietas fit: ille irrationalis est, hic rationalis. Quaedam incremento non tantum in maius exeunt, sed in aliud. Non fit, inquit, aliud quod maius fit. Utrum lagenam an dolium impleas vino, nihil refert: in utroque proprietas vini est. Exiguum mellis potus, et magnum, sapore non differt. Diversa ponis exempla. in istis enim eadem qualitas est: quamvis augeantur, manent. Quaedam amplificata in suo genere, in sua proprietate perdurant: quaedam post

multa incrementa, ultima demum vertit adiectio, et novam illis, aliamque, quam in qua fuerant, conditionem imprimit. Unus lapis fecit fornicem, ille qui latera inclinata cuneavit, et interventu suo vinxit. Summa adiectio quare plurimum facit, vel exigua? quia non auget, sed implet. Quaedam processu priorem exuunt formam, et in novam trans-eunt. Ubi animus aliquid diu protulit, et magnitudinem eius sequendo lassatus est, infinitum coepit vocari; quod longe aliud factum est quam fuit, cum magnum videretur, sed finitum. Eodem modo aliquid difficulter secari cogitavimus: novissime crescente difficultate, infecabile inventum est. Sic ab eo quod vix et aegre movebatur, processimus ad immobile. Eadem ratione aliquid secundum naturam fuit: hoc in aliam proprietatem magnitudo sua transtulit, et bonum fecit.

## EPISTOLA CXIX.

*Divitias a nobis peti posse, et accipi, nil supervacuum petendo. Finem omnium rerum spectandum, qui Naturam non excedit. Satis ea habere, non multum, quaerit. Ostendit deinde divites vulgo, omnes pauperes esse. Pulchra, et (Deus bone!) vera sunt.*

**Q**UOTIES aliquid inveni, non exspecto donec dicas, In commune: ipse mihi dico. Quid sit quod invenerim, quaeris? finum laxa, merum lucrum est. Docebo quomodo fieri dives celerrime possis, quod valde cupis audire. Nec immerito: ad maximas te



divitias compendiaria ducam. Opus erit tamen tibi creditore. ut negotiari possis, aes alienum facias oportet: sed nolo per intercessorem mutueris, nolo proxenetae nomen tuum iactent. Paratum tibi creditorem dabo, Catonianum illum: a te mutuum sumes. Quantulumcunque est, satis erit, si quidquid deerit, id a nobis petierimus. Nihil enim, mi Lucili, interest, utrum non desideres, an habeas. Summa rei in utroque est eadem: non torqueberis. Nec illud praecipio, ut aliquid naturae neges: contumax est, non potest vinci, suum poscit: sed ut quidquid naturam excedit, scias precarium esse, non necessarium. Esurio: edendum est. utrum hic panis sit plebeius, an filigineus, ad naturam nihil pertinet. Illa ventrem non delectari vult, sed impleri. Sitio. utrum haec aqua sit quam ex lacu proximo excepero, an ea quam multa nive clusero, ut rigore refrigeretur alieno, ad naturam nihil pertinet. Illa hoc unum iubet, sitim exstingui. Utrum sit aureum poculum, an crystallinum, an myrrhinum, an Tiburtinus calix, an manus concava, nihil refert. Finem omnium rerum specta, et supervacua dimittes. Fames me appellat: ad proxima quaeque tendatur manus: ipsa mihi commendabit, quodcunque comprehendero. Nihil contemnit esuriens. Quid sit ergo, quod me delectaverit, quaeris? Videtur mihi egregie dictum: Sapiens, divitiarum naturalium est quaesitor acerrimus. Inani me, inquis, lance muneras. Quid est illud in commune? iam ego paraveram fiscos: circumspiciebam in quod me mare negotiaturus immitterem, quod publicum agi-

tarem, quas arcefferem merces. Decipere est istud, docere paupertatem, cum divitias promiseris. Ita tu pauperem iudicas, cui nihil deest? Suo, inquis, et patientiae suae beneficio, non fortunae. Ideo ergo illum non iudicas divitem, quia divitiae eius desinere non possunt? Utrum malis habere multum, an satis? qui multum habet, plus cupit; quod est argumentum, nondum illum satis habere: qui satis habet, consecutus est, quod nunquam diviti contingit, finem. An has ideo non putas esse divitias, quia propter illas nemo proscriptus est? quia propter illas nulli venenum filius, nulli uxor impegit? quia in bello tutae sunt? quia in pace otiosae? quia nec habere illas periculosum est, nec operosum disponere? An parum habet, qui tantum non alget, non esurit, non sitit? plus Iupiter non habet. Nunquam parum est, quod satis est: nunquam multum est, quod satis non est. Post Darium et Indos pauper est Alexander Macedo: quaerit quod suum faciat, scrutatur maria ignota, in Oceanum classes mittit novas, et, ut ita dicam, mundi claustra perumpit. Quod naturae satis est, homini non est. Inventus est qui concupisceret aliquid post omnia. tanta est caecitas mentium, et tanta initiorum suorum unicuique, cum processit, oblivio. Ille modo ignobilis anguli non sine controversia dominus, de tanto fine terrarum per suum rediturus orbem tristis est. Neminem pecunia divitem fecit: immo contra, nulli non maiorem sui cupiditatem incussit. Quaeris, quae sit huius rei causa? plus incipit habere posse, qui plus habet. Ad summam, quem voles

mihi ex his quorum nomina cum Crasso Licinoque numerantur, in medium licet protrahas: afferat censum, et quidquid habet, et quidquid sperat, simul computet: iste, si mihi credis, pauper est; si tibi, potest esse. At hic qui se ad id quod natura exigit, composuit, non tantum extra sensum est paupertatis, sed extra metum. Sed ut scias, quam difficile sit res suas ad naturalem modum coarctare, hic ipse quem circa naturam diximus, quem tu vocas pauperem, habet aliquid et supervacui. At excaecant populum, et in se convertunt opes, si numerati multum ex aliqua domo effertur, si multum auri tecto quoque eius illinitur, si familia aut corporibus electa, aut spectabilis cultu est. Omnium istorum felicitas in publicum spectat: ille quem nos et populo et fortunae subduximus, beatus introrsum est. Nam quod ad illos pertinet, apud quos falso divitiarum nomen invasit occupata paupertas: sic divitias habent, quomodo habere dicimur febrem, cum illa nos habeat. E contrario dicere debemus: Febris illum tenet. eodem modo dicendum est, Divitiae illum tenent. Nihil ergo monuisse te malim, quam hoc, quod nemo monetur satis: ut omnia naturalibus desideriis metiaris, quibus aut gratis satis fiat, aut parvo. Tantum miscere vitia desideriis noli. Quaeris, quali mensa, quali argento, quam paribus ministeriis, et levibus, afferatur cibus? nihil praeter cibum natura desiderat.

*Num tibi, cum fauces urit sitis, aurea quaeris  
Pocula? num esuriens fastidis omnia praeter  
Pavonem rhombumque?*

Ambitiosa non est fames: contenta desinere est: quo desinat, non nimis curat. Infelicitis luxuriae ista tormenta sunt. quaerit quemadmodum post saturitatem quoque esuriant; quemadmodum non impleat ventrem, sed farciat; quemadmodum sitim prima potione sedatam revocet. Egregie itaque Horatius negat ad sitim pertinere, quo poculo aqua, aut quam eleganti manu ministratur. Nam si pertinere ad te iudicas, quam crinitus puer, et quam perlucidum tibi poculum porrigat, non sitis. Inter reliqua, hoc nobis natura praestitit praecipuum, quod necessitati fastidium excussit. Recipiunt supervacua delectum. Hoc parum decens, illud parum lautum, oculos hoc meos laedit. Id actum est ab illo mundi conditore, qui nobis vivendi iura descripsit, ut salvi essemus, non delicati. Ad salutem omnia parata sunt, et in promptu: deliciis omnia misere ac solícite comparantur. Utamur ergo hoc naturae beneficio inter magna numerando: et cogitemus, nullo nomine melius illam meruisse de nobis, quam quia quidquid ex necessitate desideratur, sine fastidio fumitur.

---

## EPISTOLA CXX.

*Boni notitia quomodo ad nos venerit? observatione, & collatione: natura etiam ducente. Venit & ex contrario: id est, vitii detestatione. Describit Sapi-entem, & vulgo petenda aut timenda calcantem, etiam ipsam mortem. Denique unum semper, & sibi constantem.*

**E**PISTOLA tua per plures quaestiuunculas vaga-  
ta est, sed in una constitit, et hanc expediri desi-  
derat: Quomodo ad nos boni honestique notitia per-  
venerit. Haec duo apud alios diversa sunt, apud nos  
tantum divisa. Quid sit hoc, dicam. Bonum putant  
esse aliqui, quod utile est. itaque hoc et divitiis,  
et equo, et vino, et calceo nomen imponunt: tan-  
ta est apud illos boni vilitas, et adeo usque ad sordi-  
da descendit. Honestum putant, cui ratio recti of-  
ficii constat: tanquam pie curatam patris senectutem,  
adiutam amici paupertatem, fortem expeditionem,  
prudentem moderatamque sententiam. Ista duo  
quidem facimus, sed ex uno. Nihil est bonum, nisi  
quod honestum est: quod honestum est, utique bo-  
num. Supervacuum iudico adiicere, quid inter ista  
discriminis sit, cum saepe dixerim. Hoc unum di-  
cam: Nihil nobis bonum videri, quo quis et male  
uti potest. Vides autem, divitiis, nobilitate, viri-  
bus, quam multi male utantur. Nunc ergo ad id rever-  
tor, de quo desideras dici: Quomodo ad nos prima  
boni honestique notitia pervenerit. Hoc nos doce-



re natura non potuit : semina nobis scientiae dedit, scientiam non dedit. Quidam aiunt nos in notitiam incidisse : quod est incredibile, virtutis alicui speciem casu occurrisset. Nobis videtur observatio collegisse, et rerum saepe factarum inter se collatio, per analogiam nostro intellectu et honestum et bonum iudicante. Hoc verbum cum latini grammatici civitate donaverint, ego damnandum non puto, nec in civitatem suam redigendum. Utar ergo illo non tanquam recepto, sed tanquam usitato. Quae sit haec analogia, dicam. Noveramus corporis sanitatem : ex hac collegimus esse aliquam et animi. noveramus corporis vires : ex his collegimus esse et animi robur. Aliqua benigna facta, aliqua humana, aliqua fortia, nos obstupefecerant : haec coepimus tanquam perfecta mirari. Suberant illis multa vitia, quae species alicuius conspicui facti fulgorque celabat : haec dissimulavimus. Natura iubet augere laudanda : nemo non gloriam ultra verum tulit. Ex his ergo speciem ingentis boni traximus. Fabricius Pyrrhi regis aurum repulit, maiusque regno iudicavit, regias opes posse contemnere. Idem, medico Pyrrhi promittente venenum se regi daturum, monuit Pyrrhum, caveret insidias. Eiusdem animi fuit, auro non vinci, veneno non vincere. Admirati sumus ingentem virum, quem non regis, non contra regem promissa flexissent, boni exempli tenacem : quod difficillimum est, in bello innocentem : qui aliquod esse crederet etiam in hoste nefas : qui in summa paupertate, qua sibi decus fecerat, non aliter refugit divitias quam venenum. Vive, inquit, beneficio



meo, Pyrrhe, et gaude, quod adhuc dolebas, Fabricium non posse corrumpi. Horatius Cocles solus implevit pontis angustias, adimique a tergo sibi reditum, dummodo iter hosti auferretur, iussit: et tam diu restitit prementibus, donec revulsa ingenti ruina tigna sonuerunt. Postquam respexit, et extra periculum esse patriam periculo suo sensit: Veniat, si quis vult, inquit, sic euntem sequi: deditque se in praeceps: et non minus sollicitus in illo rapido alveo fluminis, ut armatus, quam ut salvus exiret, retento armorum victricium decore, tam tutus rediit, quam si ponte venisset. Haec et huiusmodi facta imaginem nobis ostendere virtutis. Adiciam quod mirum fortasse videatur: mala interdum speciem honesti obtulerunt, et optimum ex contrario nituit. Sunt enim, ut scis, virtutibus vitia confinia, et perditis quoque ac turpibus recti similitudo est. Sic mentitur prodigus liberalem: cum plurimum interfit, utrum quis dare sciat, an servare nesciat. Multi, inquam, sunt, Lucili, qui non donant, sed proiciunt. non voco ego liberalem, pecuniae suae iratum. Imitatur negligentia facilitatem, temeritas fortitudinem. Haec nos similitudo coëgit attendere, et distinguere specie quidem vicina, re autem plurimum inter se dissidentia. Dum observamus eos, quos insignes egregium opus fecerat, coepimus annotare, quis rem aliquam generoso animo fecisset et magno impetu, sed semel. Hunc vidimus in bello fortem, in foro timidum; animose paupertatem ferentem, humiliter infamiam: factum laudavimus, contempsimus virum. Alium vidimus adversus amicos

benignum, adversus inimicos temperatum, et publica et privata sancte ac religiose administrantem: non deesse ei, et in his quae toleranda erant, patientiam, et in his quae agenda, prudentiam. Vidimus ubitribuendum esset, plena manu dantem: ubi laborandum, pertinacem et obnoxium, et lassitudinem corporis animo sublevantem. Praeterea idem erat semper, et in omni actu par sibi, iam non consilio bonus, sed more eo perductus, ut non tantum recte facere posset, sed nisi recte facere non posset. Intelleximus in illo perfectam esse virtutem: hanc in partes divisimus. Oportebat cupiditates refrænari, metus comprimi, facienda provideri, reddenda distribui: comprehendimus temperantiam, fortitudinem, prudentiam, iustitiam, et suum cuique dedimus officium. Ex quo ergo virtutem intelleximus? Ostendit illam nobis ordo eius, et decor, et constantia, et omnium inter se actionum concordia, et magnitudo super omnia efferens sese. Hinc intellecta est illa beata vita, secundo defluens cursu, arbitrii sui tota. Quomodo ergo hoc ipsum nobis apparuit? dicam. Nunquam vir ille perfectus adeptusque virtutem, fortunae maledixit: nunquam accidentia tristis excepit; civem esse se universi et militem credens, labores velut imperatos subiit. Quidquid inciderat, non tanquam malum aspernatus est, et in se casu delatum, sed quasi delegatum sibi. Hoc quaecunque est, inquit, meum est: asperum est, durum est: in ipso navemus operam. Necessario itaque magnus apparuit, qui nunquam malis ingemuit, nunquam de fato suo questus est, fecit multis intellectum sui, et

non aliter quam in tenebris lumen effulsit : advertitque in se omnium animos, cum esset placidus et lenis, et humanis divinisque rebus pariter aequus. Habebat perfectum animum, ad summam sui adductus, supra quam nihil est nisi mens Dei, ex qua pars et in hoc pectus mortale defluxit : quod nunquam magis divinum est, quam ubi mortalitatem suam cogitat, et scit in hoc natum hominem, ut vita defungeretur : nec domum esse hoc corpus, sed hospitium, et quidem breve hospitium : quod relinquendum est, ubi te gravem esse hospiti videas. Maximum, inquam, mi Lucili, argumentum est animi ab altiori venientis sede, si haec in quibus versatur, humilia iudicat, et angusta, si exire non metuit. Scit enim quo exiturus sit, qui unde venerit, meminit. Non videmus, quam multa nos incommoda exagitant, quam male nobis conveniat hoc corpus? Nunc de ventre, nunc de capite, nunc de pectore ac faucibus querimur : alias nervi nos, alias pedes vexant : nunc deiectio, nunc destillatio : aliquando superest sanguis, aliquando deest : hinc atque illinc tentamur, et expellimur. Hoc evenire solet in alieno habitantibus. At nos corpus tam putre sortiti, nihilominus aeterna proponimus, et in quantum potest aetas humana pro- tendi, tantum spe occupamus, nulla contenti pecunia, nulla potentia. Quid hac re fieri impudentius, quid stultius potest? Nihil satis est morituris, immo morientibus. quotidie enim propius ab ultimo flamus, et illo unde nobis cadendum est, hora nos omnis impellit. Vide in quanta caecitate mens nostra sit! Hoc quod futurum dico, cum maxime sit, et

pars eius magna iam facta est. nam quod viximus tempus, eo loco est, quo erat antequam viximus. Erramus autem, qui ultimum timemus diem : cum tantundem in mortem singuli conferant. Non ille gradus lassitudinem facit, in quo defecimus, sed ille profitetur. Ad mortem dies extremus pervenit, accedit omnis. Carpit nos illa, non corripit. Ideo magnus animus, conscius sibi melioris naturae, dat quidem operam, ut in hac statione, qua positus est, honeste se atque industrie gerat: ceterum nihil horum quae circa ipsum sunt, suum iudicat, sed ut commodatis utitur, peregrinus et properans. Cum aliquem huius viderimus constantiae, quidni subiret nos species non usitatae indolis? utique si hanc, ut dixi, magnitudinem veram esse ostendebat. Qualitatis verae tenor permanet, falsa non durant. Quidam alternis Vatinii, alternis Catones sunt: et modo parum illis severus est Curius, parum pauper Fabricius, parum frugi et contentus vili Tubero: modo Licinum divitiis, Apicium coenis, Maecenatem deliciis provocant. Maximum iudicium est malae mentis, fluctuatio, et inter simulationem virtutum, amoremque vitiorum, assidua iactatio.

———— *habebat saepe ducentos,*  
*Saepe decem servos : modo reges atque tetrarchas,*  
*Omnia magna loquens : modo, sit mihi mensa tripes, &*  
*Concha salis puri, & toga quae defendere frigus,*  
*Quamvis crassa, queat. decies centena dedisses*  
*Huic parco paucis contento : quinque diebus*  
*Nil erat in oculis.*

Omnes isti tales sunt, qualem hunc describit Horatius : nunquam eundem, nec similem quidem sibi. adeo in diversum aberrat. Multos dixi : prope est ut omnes sint. Nemo non quotidie et consilium mutat, et votum. modo uxorem vult habere, modo amicam : modo regnare vult : modo id agit, ne quis sit officiosior servus : modo dilatat se usque ad invidiam ; modo subsidit, et contrahitur infra humilitatem vere iacentium : nunc pecuniam spargit, nunc rapit. Sic maxime coarguitur animus imprudens : alius prodit atque alius, et (quo turpius nihil iudico) impar sibi est. Magnam rem puta, unum hominem agere. Praeter sapientem autem nemo unum agit : ceteri multiformes sumus. Modo frugi tibi videbimur et graves, modo prodigi et vani. Mutamus subinde personam, et contrariam ei sumimus, quam exuimus. Hoc ergo a te exige, ut qualem institueris praestare te, talem usque ad exitum serves. Effice ut possis laudari : si minus, ut agnosci. De aliquo, quem vidisti heri, merito dici potest : Hic quis est ? tanta mutatio est.

## EPISTOLA CXXI.

*Aliquid pro argutiis praetendit : tum proponit, An omnibus animalibus constitutionis suae sensus ? id est, sponte & natura eant, quo debent & sunt facta. Dicit esse, & exemplis rationibusque varie docet.*

**L**ITIGABIS, ego video : cum tibi hodiernam quaestiunculam, in qua satis diu haesimus, expo-



fuero. Iterum enim clamabis, Hoc quid ad mores? Sed exclama, dum tibi primum alios opponam, cum quibus litiges, Posidonium et Archidemum. Hi iudicium accipient, deinde dicam. Non quidquid morale est, bonos mores facit. Aliud ad hominem alendum pertinet, aliud ad exercendum, aliud ad vestiendum, aliud ad docendum, aliud ad delectandum. Omnia tamen ad hominem pertinent, etiam si non omnia meliorem eum faciunt. Mores alia aliter attingunt. Quaedam illos corrigunt et ordinant, quaedam naturam eorum et originem scrutantur. Cum quaeritur, quare hominem natura produxerit, quare praetulerit animalibus ceteris, longe me iudicas mores reliquisse? falsum est. Quomodo enim scies, qui habendi sint, nisi quid homini sit optimum, inveneris? nisi naturam eius inspexeris? Tunc demum intelliges, quid faciendum tibi, quid vitandum sit, cum didiceris quid naturae tuae debeas. Ego, inquis, volo discere, quomodo minus cupiam, minus timeam. Superstitionem mihi excute: doce leve esse vanumque hoc, quod felicitas dicitur: unam illi syllabam facillime accedere. Desiderio tuo satisfaciam, et ad virtutes exhortabor, et vitia converberabo, licet aliquis nimium immoderatumque in hac parte me iudicet, non desistam persequi nequitiam, et affectus efferatissimos inhibere, et voluptates ituras in dolorem compescere, et votis obstrepere. Quidni? cum maxima malorum optaverimus, et ex gratulatione natum sit quidquid obloquimur. Interim permitte mihi, ea quae paulo remotiora videntur, excutere. Quaerebamus, an esset omnibus ani-



malibus constitutionis suae sensus? Sensum autem esse, ex eo maxime apparet, quod membra apte et expedite movent, non aliter quam in hoc erudita. Nulli non partium suarum agilitas est. Artifex instrumenta sua tractat ex facili: rector navis scit gubernaculum flectere: pictor colores quos ad reddendam similitudinem multos variosque ante se posuit, celerrime denotat, et inter ceram opusque facili vultu ac manu commeat. Sic animal in omnem usum sui mobile. Mirari solemus scenae peritos, quod in omnem significationem rerum et effectuum parata illorum est manus, et verborum velocitatem gestus assequitur. Quod illis ars praestat, his natura. Nemo aegre molitur artus suos, nemo in usu sui haesit: ad hoc edita, protinus faciunt. Cum hac scientia prodeunt, instituta nascuntur. Ideo, inquit, partes suas animalia apte movebunt: quia si aliter moverint, dolorem sensura sunt. Ita, ut vos dicitis, coguntur, metusque illa in rectum, non voluntas mover; quod est falsum. Tarda enim sunt, quae necessitate impelluntur. Agilitas, spontaneus motus est. Adeo autem non adigit illa ad hoc doloris timor, ut in naturalem motum etiam dolore prohibente nitantur. Sic infans qui stare meditatur, et ferre se assuescit, simul tentare vires suas coepit, cadit: et cum fletu toties resurgit, donec se per dolorem ad id quod natura poscit, exercuit. Animalia quaedam tergi durioris inversa tamdiu se torquent, ac pedes exferunt, et obliquant, donec ad locum reponantur. Nullum tormentum sentit supinata testudo. inquieta est tamen desiderio natura-

lis status : nec ante definit niti, quaterere se, quam in pedes constitit. Ergo omnibus constitutionis suae sensus est, et inde membrorum tam expedita tractatio : nec ullum maius indicium habemus, cum hac illa ad vivendum venire notitia, quam quod nullum animal ad usum sui rude est. Constitutio est, inquit, ut vos dicitis, principale animi quodam modo se habens erga corpus. Hoc tam perplexum et subtile, et vobis quoque vix enarrabile, quomodo infans intelligit ? Omnia animalia dialectica nasci oporteret, ut istam finitionem magnae parti hominum togatorum obscuram intelligant. Verum erat quod opponis, si ego ab animalibus constitutionis finitionem intelligi dicerem. Nam ipsa constitutio facilius natura intelligitur, quam enarratur. Itaque infans ille, quid sit constitutio, non novit : constitutionem suam novit : et quid sit animal nescit, animal esse se sentit. Praeterea ipsam constitutionem suam crasse intelligit, et summatim, et obscure. Nos quoque animum habere nos scimus : quid sit animus, ubi sit, qualis sit, et unde, nescimus. Qualis ad nos pervenit animi nostri sensus, quamvis naturam eius ignoremus, ac sedem, talis ad omnia animalia constitutionis suae sensus. Neceffe est enim id sentiant, per quod alia quoque sentiunt : neceffe est sensum eius habeant, cui parent, a quo reguntur. Nemo non ex nobis intelligit, esse aliquid, quod impetus suos moveat : quid sit illud, ignorat. et conatum sibi esse scit : quid sit, aut unde sit, nescit. Sicut infantibus, sic quoque animalibus, principalis partis suae sensus est non satis dilucidus, non ex-

pressus. Dicitis, inquit, omne animal primum constitutioni suae conciliari : hominis autem constitutionem rationalem esse : et ideo conciliari hominem sibi, non tanquam animali, sed tanquam rationali. Ea enim parte sibi carus est homo, qua homo est. Quomodo ergo infans conciliari constitutioni rationali potest, cum rationalis nondum sit? Unicuique aetati sua constitutio est : alia infanti, alia puero, alia seni. Omnes enim constitutioni conciliantur, in qua sunt. Infans sine dentibus est : huic constitutioni suae conciliatur. enati sunt dentes : huic constitutioni conciliatur. Nam et illa herba, quae in segetem frugemque ventura est, alienam constitutionem habet tenera, et vix eminens sulco : aliam cum convaluit, et molli quidem culmo, sed qui ferat onus suum, constitit : aliam cum flavescit, et ad aream spectat, et spica eius induruit : in quamcunque constitutionem venit, eam tuetur, in eam componitur. Alia est aetas infantis, pueri, adolescentis, senis : ego tamen idem sum, qui et infans fui, et puer, et adolescens. Sic quamvis alia atque alia cuique constitutio sit, conciliatio constitutionis suae eadem est. Non enim puerum mihi aut iuvenem, aut senem, sed me natura commendat. Ergo infans ei constitutioni suae conciliatur, quae tunc infanti est, non quae futura iuveni est. Neque enim, si aliquid illi maius, in quo transeat, restat ; non hoc quoque in quo nascitur, secundum naturam est. Primum sibi ipsi conciliatur animal : debet enim aliquid esse, ad quod alia referantur. Voluptatem peto. cui ? mihi. ergo mei curam ago. Dolorem refugio. pro quo ? pro me.

ergo mei curam ago. Si omnia propter curam mei facio, ante omnia est mei cura. Haec animalibus inest cunctis: nec inferitur, sed innascitur. Producit foetus suos natura, non abiicit: et quia tutela certissima ex proximo est, sibi quisque commissus est. Itaque ut in prioribus dixi, tenera quoque animalia e materno utero vel quoquo modo effusa, quid sit infestum ipsis, protinus norunt, et mortifera devitant: umbram quoque transvolantium reformidant, obnoxia avibus raptis viventibus. Nullum animal ad vitam prodit sine metu mortis. Quemadmodum, inquit, editum animal intellectum habere, aut salutaris aut mortiferae rei, potest? Primum quaeritur, an intelligat, non quemadmodum intelligat. Esse autem illis intellectum, ex eo apparet, quod nihil amplius, si intellexerint, faciant. Quid est quare pavonem, quare anserem gallina non refugiat, cum tanto minorem, et ne notum quidem sibi, accipitrem fugiat? quare pulli felem timent, canem non timent? Apparet illis inesse scientiam nocituri, non exprimento collectam. nam antequam possint experiri, cavent. Deinde, ne hoc casu existimes fieri, nec metuunt alia quam debent, nec unquam obliviscuntur huius tutelae et diligentiae. aequalis est illis a pernicioso fuga. Praeterea, non fiunt timidiore vivendo. Ex quo quidem apparet, non usu illa ad hoc pervenire, sed naturali amore salutis suae. Et tardum est et varium, quod usus docet: quidquid natura tradit, et aequale est omnibus, et statim. Si tamen exis, dicam quomodo omne animal perniciose intelligere conetur. Sentit se carne con-

stare : itaque sentit, quid sit, quo secari caro, quo uri, quo obteri possit. Quae sunt animalia armata ad nocendum, horum speciem trahit inimicam et hostilem. Inter se ista coniuncta sunt. Simul enim conciliatur saluti suae quidque : et quae iuvant, illa petit ; laesura formidat. Naturales a contrariis aspernationes sunt. sine ulla cogitatione, sine consilio fit, quidquid natura praecipit. Non vides, quanta subtilitas sit apibus ad fingenda domicilia ? quanta dividui laboris obeundi concordia ? Non vides quam nulli mortalium imitabilis sit illa araneae textura ? quanti operis sit, fila disponere ? alia in rectum immissa firmamenti loco, alia in orbem currentia ex denso rara, quae minora animalia, in quorum perniciem illa tenduntur, velut retibus implicata teneant. Nascitur ars ista, non discitur. Itaque nullum est animal altero doctius. videbis aranearum pares telas, par in favis angulorum omnium foramen. Incertum est et inaequale, quidquid ars tradit : ex aequo venit, quod natura distribuit. Haec nihil magis, quam tutelam sui, et eius peritiam tradidit : ideoque etiam simul incipiunt, et discere et vivere. Nec est mirum, cum eo nasci illa, sine quo frustra nascerentur. Primum hoc instrumentum illis natura contulit ad permanendum in conciliatione et caritate sui. Non poterant salva esse, ni vellent. Nec hoc per se profuturum erat : sed sine hoc nulla res profuisset. Sed in nullo deprehendes utilitatem sui, ne negligentiam quidem. Tacitis quoque et brutis, quamvis in cetera torpeant, ad vivendum solertia est. Videbis quae aliis inutilia sunt, sibi ipsa non deesse.



## E P I S T O L A CXXII.

*Ingenium luxuriae, adversa moribus facere. Aliter  
coenare, bibere, dormire, surgere : & tales aliquot  
Antipodas facete describit.*

**D**ETRIMENTUM iam dies sensit : resiliuit aliquantulum : ita tamen, ut liberale adhuc spatium sit, si quis cum ipso, ut ita dicam, die surgat, officiosior, meliorque, quam si quis illum exspectet, ut luce prima exeat. Turpis, qui alto sole semisomnis iacet, cuius vigilia medio die incipit : et adhuc multis hoc antelucanum est. Sunt qui officia lucis noctisque pervertunt : nec ante diducunt oculos hesternae graves crapula, quam appetere nox coepit. Qualis illorum conditio dicitur, quos natura (ut ait Virgilius) sedibus nostris subditos e contrario posuit,

*Nosque ubi primus equis oriens afflavit anhelis,  
Illis fera rubens accendit lumina vespere :*

talis horum contraria omnibus non regio, sed vita est. Sunt quidam in eadem urbe antipodes, qui, ut M. Cato ait, nec orientem unquam solem viderunt, nec occidentem. Hos tu existimas scire, quemadmodum vivendum sit, qui nesciunt quando ? et hi mortem timent, in quam se vivi condiderunt : tam infausi ominis, quam nocturnae aves sunt ? Licet in vino unguentoque tenebras suas exigant, licet epu-

lis, et in multa quidem fercula distinctis, totum per-versae vigiliae tempus diducant: non convivantur, sed iusta sibi faciunt. Mortuis certe interdiu parentatur. At mehercules nullus agenti dies longus est. Extendamus vitam: huius et officium, et argumentum, actus est. circumscribatur nox, et aliquid ex illa in diem transferatur. Aves, quae conviviiis comparantur, ut immotae facile pinguescant, in obscuro continentur: ita sine ulla exercitatione iacentibus, tumor pigrum corpus invadit, et super membra iners sagina succrescit. Ita istorum corpora, qui se tenebris dicaverunt, foeda visuntur. Quippe suspici-  
tior illis, quam morbo pallentibus, color est: languidi, et evanidi albent, et in vivis caro morticina est. Hoc tamen minimum in illis malorum dixerim: quanto plus tenebrarum in animo est? ille in se stupet, ille caligat, invidet caecis. Quis unquam oculos tenebrarum causa habuit? Interrogas, quomodo haec animo pravitas fiat, aversandi diem, et totam vitam in noctem transferendi? Omnia vitia contra naturam pugnant: omnia debitum ordinem deferunt. hoc est luxuriae propositum, gaudere per-versis: nec tantum discedere a recto, sed quam longissime abire, deinde etiam e contrario stare. Isti non videntur tibi contra naturam vivere, qui ieiuni bibunt, qui vinum recipiunt inanibus venis, et ad cibum ebrii transeunt? Atqui frequens hoc adolescentium vitium est, qui vires excolunt. in ipso paene balnei limine, inter nudos bibunt, immo potant: ut sudorem, quem moverunt potionibus crebris ac ferventibus, subinde distringant. Post prandium aut

coenam bibere, vulgare est: hoc patresfamiliae rustici faciunt, et verae voluptatis ignari. Merum illud delectat, quod non innatat cibo, quod libere penetrat ad nervos: illa ebrietas iuvat, quae in vacuum venit. Non videntur tibi contra naturam vivere, qui commutant cum feminis vestem? Non vivunt contra naturam, qui exspectant, ut pueritia splendeat tempore alieno? Quid fieri vel crudelius, vel iniferius potest? nunquam vir erit, ut diu virum pati possit? et cum illum contumeliae sexus eripuisse debuerat, ne aetas quidem eripiet? Non vivunt contra naturam, qui hieme concupiscunt rosam? fomentoque aquarum calentium, et, calorum apta mutatione, bruma lilium, florem verum, exprimunt? Non vivunt contra naturam, qui pomaria in summis turribus ferunt? quorum silvae in tectis domorum ac fastigiis nutant, inde ortis radicibus, quo improbe cacumina egissent? Non vivunt contra naturam, qui fundamenta thermarum in mare iaciunt: nec delicate natare ipsi sibi videntur, nisi calentia stagna fluctu ac tempestate feriantur? Cum instituerunt omnia contra naturae consuetudinem velle, novissime in totum ab illa desciscunt. Lucet: somni tempus est, quies est: nunc exerceamur, nunc gestemur, nunc prandeamus. Iam lux propius accedit: tempus est coenae. Non oportet id facere, quod populus: res sordida est, trita ac vulgari via vivere. Dies publicus relinquatur: proprium nobis ac peculiare mane fiat. Isti vero mihi defunctorum loco sunt. quantulum enim a funere absunt, et quidem acerbo, qui ad faces et cereos vivunt? Hanc

vitam agere eodem tempore multos meminimus : inter quos et Atilium Butam praetorium, cui post patrimonium ingens consumtum, Tiberius paupertatem confitenti, Sero, inquit, experrectus es. Recitabat Montanus Iulius carmen, tolerabilis poëta, et amicitia Tiberii notus, et frigore. Ortus et occasus libentissime inferebat. itaque cum indignarentur quidam illum tota die recitasse, et negaret accedendum ad recitationes eius, Natta Pinarius ait : Numquid liberalius possum agere? Paratus sum illum audire ab ortu ad occasum. Cum hos versus recitasset :

*Incipit arduos Phoebus producere flammis ,  
Spargere se rubicunda dies , iam tristis hirundo  
Argutis reditura cibos immittere nidis  
Incipit , et molli paritos ore ministrat :*

Varus eques Romanus L. Vinicii comes , coenarum bonarum affectator , quas improbitate linguae merebatur , exclamavit : Incipit Buta dormire. Deinde cum subinde recitasset :

*Iam sui pastores stabulis armenta locarunt ,  
Iam dare sopitis nox nigra silentia terris  
Incipit :*

Idem Varus inquit : Quid dicit ? iam nox est : ibo , et Butam salutabo. Nihil erat notius hac eius vita in contrarium circumacta : quam , ut dixi , multi eodem tempore egerunt. Causa autem est ita vivendi quibusdam , non quia aliquid existiment noctem ipsam habere iucundius , sed quia nihil iuvat obvium ,

et gravis malae conscientiae lux est: et omnia concupiscenti aut contemnenti, prout magno aut parvo emta sunt, fastidio est lumen gratuitum. Praeterea, luxuriosi vitam suam esse in sermonibus, dum vivunt, volunt. nam si tacetur, perdere se putant operam. Itaque male habent, quoties non faciunt, quod excitet famam. Multi bona comedunt, multi amicas habent: ut inter istos nomen invenias, opus est non tantum luxuriosam rem, sed notabilem facere. In tam occupata civitate, fabulas vulgaris nequitia non invenit. Pedonem Albinovanum narrantem audieramus (erat autem fabulator elegantissimus) habitasse se supra domum Sp. Papinii. is erat ex hac turba lucifugarum. Audio, inquit, circa horam tertiam noctis, flagellorum sonos: quaero, quid faciat? Dicitur rationes accipere. Audio, circa horam sextam noctis, clamorem concitatum: quaero, quid sit? Dicitur vocem exercere. Quaero circa octavam horam noctis, quis sit ille sonus rotarum? velle gestari dicitur. Circa lucem discurritur, pueri vocantur, cellarii, coqui tumultuantur. Quaero quid sit? Dicitur mulsum et alicam poposcisse, a balneo exisse. Excedebat, inquit, coena eius diem? minime. valde enim frugaliter vivebat, nihil consumebat nisi noctem. Itaque crebro dicentibus illum quibusdam avarum et sordidum: Vos, inquit, illum et lychnobium dicetis. Non debes admirari, si tantas invenis vitiorum proprietates: varia sunt, et innumerabiles habent facies: comprehendere eorum genera non possunt. Simplex recti cura est; multiplex pravi, et quantumvis novas declina-



tiones capit. Idem moribus evenit. naturam sequentium, faciles sunt, soluti sunt, exiguas differentias habent: ab his distorti plurimum, et omnibus et inter se dissident. Causa tamen praecipua mihi videtur huius morbi, vitae communis fastidium. Quomodo cultu se a ceteris distinguunt, quomodo elegantia coenarum, munditiis vehiculorum, sic volunt separare etiam temporum dispositione. nolunt solita peccare, quibus peccandi praemium infamia est. Hanc petunt omnes isti, qui, ut ita dicam, retro vivunt. Ideo, Lucili, tenenda nobis via est, quam natura praescripsit, nec ab illa declinandum. illam sequentibus, omnia facilia et expedita sunt: contra illam nitentibus, non alia vita est, quam contra aquam remigantibus.

## EPISTOLA CXXIII.

*Tenuem aut vilem victum decreto animi, & fame, bonum optandumque fieri. Hoc usurpandum etiam divitibus: quis scit an non opus habituris? Consuetudo, et alieni mores, ne abducant. Sperne et iudicia aut voces alienas.*

**I**TINERE confectus incommodo magis quam longo; in Albanum meum nocte multa perveni. Nihil habeo paratum, nisi me. Itaque in lecto lassitudinem pono: hanc coqui, hanc pistoris moram boni consulo. Mecum enim de hoc ipso loquor, quam nihil sit grave, quod leviter excipias: quam indignan-

dum nihil, nisi ipse indignando adstruas. Non habet panem meus pistor: sed habet villicus, sed habet atriensis, sed habet colonus. Malum panem, inquis. Expecta, bonus fiet: etiam illum tenerum tibi et filigineum fames reddet. Ideo non est ante edendum, quam illa imperet. Expectabo ergo: nec ante edam, quam aut bonum panem habere coepero, aut malum fastidire desiero. Necessarium est, parvo assuescere. Multae difficultates locorum, multae temporum, etiam locupletibus et instructis. a diis optantem prohibent et occurrunt. Quidquid vult, habere nemo potest: illud potest, nolle quod non habet: rebus oblati hilaris uti. Magna pars libertatis est, bene moratus venter et contumeliae patiens. Aestimari non potest, quantam voluptatem capiam ex eo, quod lassitudo mea sibi ipsi acquiescit. Non unctiones, non balneum, non ullum aliud remedium quam temporis quaero. Nam quod labor contraxit, quies tollit: haec qualiscunque coena adiuciali iucundior erit. Aliquando enim experimentum animi sumsi subitum: hoc est, simplicius et verius. nam ubi se praeparavit, et indixit sibi patientiam, non aequae apparet, quantum habeat verae firmitatis. Illa sunt certissima argumenta, quae ex tempore dedit, si non tantum aequus molesta, sed placidus adspexit: si non excanduit, non litigavit, si quod dari deberet, ipse sibi non desiderando supplevit, et cogitavit, aliquid consuetudini suae, sibi nihil deesse. Multa quam supervacua essent, non intelleximus, nisi cum deesse coeperunt. Utebamur enim illis, non quia debebamus, sed quia habeba-

mus. Quam multa autem paramus, quia alii paraverunt? quia apud plerofque sunt? Inter causas malorum nostrorum est, quod vivimus ad exempla: nec ratione componimur, sed consuetudine abducimur. Quod si pauci facerent, nollemus imitari: cum plures facere coeperunt, quasi honestius sit, quia frequentius, sequimur: et recti apud nos locum tenet error, ubi publicus factus est. Omnes iam sic peregrinantur, ut illos Numidarum praecurrat equitatus, ut agmen cursorum antecedit. turpe est, nullos esse, qui occurrentes via deiciant, qui honestum hominem venire magno pulvere ostendant. Omnes iam mulos habent, qui crystallina et murrhina, et caelata magnorum artificum manu, portent. turpe est, videri, eas te habere sarcinas, quae tuto concuti possint. Omnium paedagogia oblita facie vehuntur, ne sol, ne frigus teneram cutem laedat. turpe est, neminem esse in comitatu puerorum, cuius sana facies medicamentum desideret. Horum omnium sermo vitandus est. hi sunt, qui vitia tradunt, et alio aliunde transferunt. Pessimum genus hominum videbatur, qui verba gestarent: sunt quidam qui vitia gestant. Horum sermo multum nocet. nam etiam si non statim officit: semina in animo relinquit, sequiturque nos etiam cum ab illis discefferimus, resurrecturum postea malum. Quemadmodum qui audierunt symphoniam, ferunt secum in auribus modulationem illam ac dulcedinem cantus, quae cogitationes impedit, nec ad seria patitur intendi: sic adulatorum, et prava laudantium sermo, diutius haeret quam auditur: nec facile est, animo dulcem sonum

excutare. prosequitur et durat, et ex intervallo recurrit. Ideo claudendae sunt aures malis vocibus, et quidem primis. Nam cum initium fecerunt, admis-  
saeque sunt, plus audent. Inde ad haec pervenitur  
verba: Virtus et philosophia, et iustitia, verborum  
inanium crepitus est. Una felicitas est, bona vita:  
facere omnia libere, frui patrimonio. hoc est vivere,  
hoc est se mortalem esse meminisse. Fluunt dies,  
et irreparabilis vita decurrit. Dubitamus quod iuvat  
sapere, et aetati non semper voluptates decerptu-  
rae, interim dum potest, dum poscit, ingerere?  
Quid iuvat frugalitate ultro mortem praecurrere, et  
quidquid illa ablatura est, iam sibi interdicere? Non  
amicam habes, non puerum, qui amicae moveat  
invidiam. quotidie sobrius prodis: sic coenas, tan-  
quam ephemeridem patri approbaturus. Non est  
istud vivere, sed alienae vitae interesse. Quanta de-  
mentia est, heredi suo procurare, et sibi negare  
omnia, ut tibi ex amico inimicum magna faciat he-  
reditas? Plus enim gaudebit tua morte, quo plus ac-  
ceperit. Istos tristes et superciliosos alienae vitae  
censores, suae hostes, publicos paedagogos, assis ne  
feceris: nec dubitaveris, bonam vitam, quam opi-  
nionem bonam, malle. Hae voces non aliter fugien-  
dae sunt, quam illae, quas Ulysses nisi alligatus,  
praetervehi noluit. Idem possunt: abducunt a pa-  
tria, a parentibus, ab amicis, a virtutibus, et in  
turpem vitam miseros turpius illidunt. Quanto satius  
est, rectum sequi limitem, et eo se perducere, ut  
ea demum sint tibi iucunda, quae honesta? Quod  
assequi poterimus, si fecerimus duo esse genera re-

rum, quae nos aut invitent, aut fugent. Invitent; ut divitiae, voluptates, forma, ambitio, cetera blanda et arridentia. Fugent; labor, mors, dolor, ignominia, victus adstrictior. Debemus itaque exerceri, ne haec timeamus, ne illa cupiamus. In contrarium pugnemus, et ab invitantibus recedamus, adversus petentia concitemur. Non vides, quam diversus sit ascendentium habitus, et descendentium? qui per primum eunt, resupinant corpora: qui in arduum, incumbunt. Nam si descendas, pondus suum in priorem partem dare: si ascendas, retro abducere, cum vitio, Lucili, consentire est. In voluptates descenditur: in res asperas et duras subeundum est. hic impellamus corpora, illic refraenemus. Hoc nunc me existimas dicere, eos tantum perniciosos esse auribus nostris, qui voluptatem laudant, qui doloris metum, per se formidabilis rei, incutiunt? Illos quoque nocere nobis existimo, qui nos sub specie Stoicae sectae hortantur ad vitia. Hoc enim iactant: solum sapientem et doctum, esse amatorem. solus apte ad hanc artem, aequè combibendi et convivendi, sapiens est peritissimus. Quaeramus, ad quam usque aetatem iuvenes amandi sint. Haec Graecae consuetudini data sint: nos ad illa potius aures dirigamus: Nemo est casu bonus: discenda virtus est. Voluptas humilis res et pusilla est, et in medio habenda pretio, communis cum mutis animalibus, ad quam minima et contemptissima advolant. Gloria vanum et volatile quiddam est, auraque mobilis. Paupertas nulli malum est, nisi repugnant. Mors malum non est: quid quereris? sola ius aequum est ge-



neris humani. Superstitio error insanus est : amandos timet ; quos colit, violat. Quid enim interest, utrum deos nēges, an infames? Haec discenda, immo ediscenda sunt. non debet excusationes vitio philosophia suggerere. Nullam habet spem salutis aeger, quem ad intemperantiam medicus hortatur.

## EPISTOLA CXXIV.

*Contra Epicureos, in Ratione, non Sensu, Bonum esse. Itaque infantes nondum eius capaces : neque plenum est, nisi ubi plena Ratio. Quomodo intelligam in me esse? si extra me nihil quaeram.*

**P**OSSUM multa tibi veterum praecepta referre,  
Ni refugis, tenuisque piget cognoscere curas.

Non refugis autem, nec ulla te subtilitas abigit. Non est elegantiae tuae, tantum magna sectari. Sicut illud probō, quod omnia ad aliquem profectum redigis, et tunc tantum offenderis, ubi summa subtilitate nihil agitur : quod ne nunc quidem fieri laborabo. Quaeritur, utrum sensu an intellectu comprehendatur bonum. Huic adiunctum est, in mutis animalibus et infantibus non esse. Quicumque voluptatem in summo ponunt; sensibile iudicant bonum : nos contra intelligibile, qui illud animo damus. Si de bono sensus iudicarent, nullam voluptatem reiiceremus : nulla enim non invitat, nulla non delectat. Et e contrario nullum dolorem volentes subiremus : nullus enim non offendit sensum. Praeterea,

non essent digni reprehensione, quibus nimium voluptas placet, quibusque summus est doloris timor. Atqui improbanus gulæ ac libidini addictos: et contemnimus illos qui nihil viriliter ausuri sunt doloris metu. Quid autem peccant, si sensibus, id est, iudicibus boni ac mali, parent? his enim tradidistis appetitionis et fugæ arbitrium. Sed videlicet ratio isti rei præposita est, quemadmodum debeat de vita, quemadmodum de virtute, de honesto, sic et de bono maloque constitui. Nam apud istos vilissimæ parti datur de meliore sententia, ut de bono pronuntiet sensus, obtusa res et hebes, et in homine quam in aliis animalibus tardior. Quid si quis velit non oculis, sed tactu minuta discernere? subtilior ad hoc nulla acies, quam oculorum, et intentior daretur, bonum malumque dignoscere. Vides in quanta ignorantia veritatis versetur, et quam humi sublimia ac divina proiecerit, apud quem de summo bono maloque iudicat tactus. Quemadmodum, inquit, omnis scientia atque ars aliquid debet habere manifestum, sensu comprehensum, ex quo oriatur et crescat: sic beata vita fundamentum et initium a manifestis ducit, et eo quod sub sensum cadit. Nempe vos a manifestis beatam vitam sui initium capere dicitis. Dicimus beata esse, quæ secundum naturam sunt: quid autem secundum naturam sit, palam et protinus apparet, sicut quid sit integrum. Quid est secundum naturam? quod contingit et protinus nato, non dico bonum, sed initium boni. Tu summum bonum voluptatem infantiae donas, ut inde incipiat nascens, quo consummatus ho-

mo pervenit. Cacumen radice loco ponis. Si quis diceret illum in materno utero latentem sexus quoque incerti, tenerum, et imperfectum et informem, iam in aliquo bono esse, aperte videretur errare. Atqui quantum interest inter eum, qui cummaxime vitam accipit, et illum qui maternorum viscerum latens onus est? Uterque, quantum ad intellectum boni ac mali, aequè maturus est: et non magis infans adhuc boni capax est, quam arbor, aut mutum aliquod animal. Quare autem bonum in arbore animalique muto non est? quia nec ratio. ob hoc in infante quoque non est: nam et huic deest. Tunc ad bonum perveniet, cum ad rationem pervenerit. Est aliquod irrationale animal: est aliquod nondum rationale: est rationale, sed imperfectum. In nullo horum bonum: ratio illud secum affert. Quid ergo inter ista, quae retuli, distat? Nunquam erit bonum in eo quod irrationale est: in eo quod nondum rationale est, tunc esse bonum non potest: in imperfecto iam potest esse bonum, sed non est. Ita dico, Lucili, bonum non in quolibet corpore, non in qualibet aetate invenitur: et tantum abest ab infantia, quantum a primo ultimum; quantum ab initio perfectum. ergo nec in tenero modo coalescente corpusculo est. Quidni non sit? non magis quam in femine. Ut si dicas, aliquod arboris, aut sati, bonum: hoc non est in prima fronde, quae emissæ cummaxime solum rumpit. Est aliquod bonum tritici: hoc nondum est in herba lactente: nec cum folliculo se exferit spica mollis, sed cum frumentum aetas et debita maturitas coxit. Quemadmodum omnis natura bo-

num suum nisi consummata non profert : ita hominis bonum non est in homine, nisi cum in illo ratio perfecta est. Quod autem hoc sit bonum, dicam. Liber animus est ac rectus, alia subiiciens sibi, se nulli. Hoc bonum adeo non recipit infantia, ut pueritia non speret, adolescentia improbe speret. Bene agitur cum senectute, si illuc longo studio intentoque pervenit : ubi hoc et bonum, et intelligibile est. Dixisti, inquit, aliquod bonum esse arboris, aliquod herbae : potest ergo esse aliquod et infantis. Verum bonum nec in arboribus, nec in mutis animalibus est : hoc quod in illis bonum est, precario bonum dicitur. Quod est ? inquis. hoc quod secundum naturam cuiusque est. Bonum quidem cadere in mutum animal nullo modo potest : felicitatis meliorisque naturae est. Nisi, ubi rationi locus est, bonum non est. Quatuor hae naturae sunt, arboris, animalis, hominis, et Dei. Haec duo quae irrationalia sunt, eandem naturam habent : illa diversa sunt, quod alterum immortale, alterum mortale est. Ex his ergo unius bonum natura perficit, Dei scilicet : alterius cura, hominis. Cetera in sua natura perfecta sunt, non vere perfecta, a quibus abest ratio. Hoc enim demum perfectum est, quod secundum universam naturam perfectum est : universa autem natura rationalis est : cetera possunt in suo genere perfecta esse. In quo non potest beata vita esse, nec id potest quo beata vita efficitur : beata autem vita bonis efficitur : in muto animali non est quo beata vita efficitur : ergo in muto animali bonum non est. Mutum animal sensu compre-

hendit praesentia : praeteritorum reminiscitur, cum id incidit, quo sensus admonetur : tanquam equus reminiscitur viae, cum ad initium eius admotus est. In stabulo quidem nulla viae, quamvis saepe calcatae, memoria est. tertium vero tempus, id est, futurum, ad muta non pertinet. Quomodo ergo potest eorum videri perfecta natura, quibus usus perfecti temporis non est? Tempus enim tribus partibus constat : praeterito, praesente, et futuro. Animalibus tantum quod brevissimum est in transcurso datum, praesens : praeteriti rara memoria est, nec unquam revocatur, nisi praesentium occurso. Non potest ergo perfectae naturae bonum in imperfecta esse natura. Aut si natura habet, hoc habet, quod habent et fata. Nec illud nego, ad ea quae videntur secundum naturam, magnos esse mutis animalibus impetus et concitatos, sed inordinatos ac turbidos. Nunquam autem aut inordinatum est bonum, aut turbidum. Quid ergo, inquis, muta animalia perturbate et indisposite moventur? Dicerem illa perturbate et indisposite moveri, si natura illorum ordinem caperet : nunc moventur secundum naturam suam. Perturbatum enim id est, quod esse aliquando et non perturbatum potest. Sollicitum est, quod potest esse securum. Nulli vitium est, nisi cui virtus potest esse. Mutis animalibus talis ex sua natura motus est. Sed ne te diu teneam, aliquod erit bonum in muto animali, erit aliqua virtus, erit aliquid perfectum : sed quale? nec bonum absolute, nec virtus, nec perfectum. Haec enim rationalibus solis contingunt, quibus datum est scire, quare, quatenus, quemad-



modum. Ita bonum in nullo est, nisi in quo ratio. Quo nunc pertineat ista disputatio, quaeris, et quid animo tuo profutura sit? Dico. et exercet illum, et acuit, et utique aliquid acturum occupatione honesta tenet. Prodest autem et quod moratur ad prava properantem. Sed illud dico, nullo modo prodesse tibi possum magis, quam si tibi bonum tuum ostendo, si te a mutis animalibus separo, si cum Deo pono. Quid, inquam, vires corporis alis et exerceas? pecudibus istas maiores ferisque natura concessit. Quid excolis formam? cum omnia feceris, a multis animalibus decore vinceris. Quid capillum ingenti diligentia comis? cum illum vel effuderis more Parthorum, vel ut Germanorum nodo vinxeris, vel ut Scythae solent, sparseris: in quolibet equo densior iactabitur iuba, horrebit in leonum cervice formosior. Cum te ad velocitatem paraveris, par lepusculo non eris. Vis tu, relictis in quibus vinci te necesse est, dum in aliena niteris, ad bonum reverti tuum? Quod hoc est? animus scilicet emendatus ac purus, aemulator Dei, super humana se extollens, nihil extra se sui ponens. Rationale animal es. quod ergo in te bonum est? perfecta ratio. Hanc tu ad summum finem evoca, in quantum potest plurimum crescere. Tunc beatum esse te iudica, cum tibi ex te gaudium omne nascetur. cum in his quae homines eripiunt, optant, custodiunt nihil inveneris, non dico quod malis, sed quod velis. Brevem tibi formulam dabo, qua te metiaris, qua perfectum esse iam sentias: Bonum tunc habebis tuum, cum intelliges infelicissimos esse felices.



L. ANNAEI SENECAE  
AD LUCILIUM  
NATURALIUM QUAESTIONUM  
LIBRI VII.

THE NEW YORK PUBLIC LIBRARY

ASTOR LENOX AND TILDEN FOUNDATIONS

500 N. 5TH ST. NEW YORK, N. Y.

1897

L. ANNAEI SENECAE

## AD LUCILIUM

NATURALIUM QUAESTIONUM

LIBER PRIMUS.

## A R G U M E N T U M.

*Praefatur, altissimam & animosissimam philosophiae partem esse, quae coelestia & Deum contemplatur, ac scientiâ morali potiozem. Eam a meteoris ignitis orditur, deinde ad Coronam, Iridem, & alia apparentia transgreditur. Coronam undique in orbem aperiri, quemadmodum circuli solent, cum lapis in lacum aut piscinam deiicitur. Iridem a sole colorari, & fieri nube formata in modum concavi speculi & rotundi, cui forma sit partis e pila sectae, quod etiam censuerat Posidonius olim. Hic multa de speculis cumulat, & iis quae radiorum reflexione aut refractione videntur. Ab Arcu ad Virgas & Parelia transit, deinde ad nocturnos fulgores, chasmata, stellas discurrentes, & leviter aliquid de Cometis delibatum. Specula ei memoriam Hostii obscoenissimi nebulonis excitaverunt. Inde legitimum usum speculorum docet & abusum.*



## P R A E F A T I O.

**Q**UANTUM inter philosophiam interest, Lucili virorum optime, et ceteras artes : tantum interesse existimo in ipsa philosophia, inter illam partem quae ad homines, et hanc quae ad deos spectat. Altior est haec, et animosior : multum permisit sibi : non fuit oculis contenta. maius esse quiddam suspicata est, ac pulchrius, quod extra conspectum natura posuisset. Denique tantum inter duas interest, quantum inter Deum et hominem. Altera docet, quid in terris agendum sit : altera, quid agatur in coelo. Altera errores nostros discutit, et lumen admovet, quo discernantur ambigua vitae : altera multo hanc supra caliginem in qua volutamur excedit; et e tenebris ereptos, illo perducit, unde lucet. Equidem tunc naturae rerum gratias ago, cum illam non ab hac parte video, quae publica est, sed cum secretiora eius intravi : cum disco, quae universi materia sit, quis auctor, aut custos : quid sit Deus, totus in se intendat, an ad nos aliquando respiciat : faciat quotidie aliquid, an semel fecerit : pars mundi sit, an mundus : liceat illi hodieque decernere, et ex lege factorum aliquid derogare; an maiestatis deminutio sit, et confessio erroris, mutanda fecisse. Necesse est enim ei eadem placere, cui nisi optima placere non possunt : nec ob hoc minus liber et potens est. ipse enim est necessitas sua. Nisi ad haec admitterer, non fuerat operae pretium nasci. Quid enim erat, cur in numero viventium me positum esse gauderem? An ut cibos et potiones percolarem? ut hoc corpus causarium ac

fluidum, periturumque nisi subinde impleatur, facirem, et viverem aegri minister? ut mortem timerem, cui omnes nascimur? Detrahe hoc inaeestimabile bonum, non est vita tanti, ut sudem, ut aestuem. O quam contempta res est homo, nisi supra humana surrexerit! Quamdiu cum affectibus colluctamur, quid magnifici facimus? etiam si superiores sumus, portenta vincimus. Quid est, cur suspiciamus nosmetipsos, quia dissimiles deterrimis sumus? non video quare sibi placeat, qui robustior est invaletudinario. Multum interest inter vires et bonam valetudinem. Effugisti vitia animi: non est tibi frons ficta, nec in alienam voluntatem sermo compositus, nec cor involutum, nec avaritia; quae quidquid omnibus abstulit, sibi ipsa negat: nec luxuria pecuniam turpiter amittens, quam turpius reparet: nec ambitio, quae te ad dignitatem nisi per indigna non ducet. Nihil adhuc consecutus es. multa effugisti: te nondum. Virtus enim quam affectamus, magnifica est. non quia per se beatum est, malo caruisse, sed quia animum laxat, ac praeparat ad cognitionem coelestium, dignumque efficit, qui in consortium Dei veniat. Tunc consummatum habet plenumque bonum fortis humanae, cum, calcato omni malo, petit altum, et in interiorem naturae sinum venit. Tunc iuvat inter sidera ipsa vagantem, divitum pavimenta ridere, et totam cum auro suo terram: non illud tantum, dico, quod egeffit, et signandum monetae dedit, sed et illud quod in occulto servat posterorum avaritiae. Nec potest ante contemnere porticus, et lacunaria ebore fulgentia, et tonsiles silvas, et de-

rivata in domos flumina, quam totum circumeat mundum, et terrarum orbem superne despiciens, angustum, et magna ex parte opertum mari, etiam qua exstat, late squalidum, et aut ustum aut rigentem. sibi ipse ait: Hoc est illud punctum, quod inter tot gentes ferro et igni dividitur? O quam ridiculi sunt mortalium termini! Ultra Istrum Dacus non exeat: Strymo Thracas includat: Parthis obstet Euphrates: Danubius Sarmatica ac Romana distermine: Rhenus Germaniae modum faciat: Pyrenaeus medium inter Gallias et Hispanias iugum extollat: inter Aegyptum et Aethiopias harenarum inculta vastitas iaceat. Si quis formicis det intellectum hominis, nonne et illae unam aream in multas provincias dividunt? Cum te in illa vere magna sustuleris; quotiens videbis exercitus subrectis ire vexillis, et quasi magnum aliquid agatur, equitem modo ulteriora explorantem, modo a lateribus affusum, libebit dicere:

*It nigrum campis agmen. ———*

Formicarum iste discursus est, in angusto laborantium. Quid illis et nobis interest, nisi exigui mensura corpusculi? Punctum est istud in quo navigatis, in quo bellatis, in quo regna disponitis: minima, etiam cum illis utrimque Oceanus occurrit. Sursum ingentia spatia sunt, in quorum possessionem animus admittitur: at ita minimum secum ex corpore tulit, si fordidum omne deterfit, et expeditus levisque ac contentus modico emicuit. Cum illa tetigit, alitur, crescit: ac velut vinculis liberatus, in originem redit. Et hoc habet argumentum divinitatis suae, quod

illum divina delectant: nec ut alienis interest, sed ut suis. Secure spectat occasus siderum atque ortus, et tam diversas concordantium vias. Observat ubi quaeque stella primum terris lumen ostendat, ubi culmen eius summum, qua cursus sit, quousque descendat. Curiosus spectator excutit singula, et quaerit. Quidni quaerat? Scit illa ad se pertinere. Tunc contemnit domicilii prioris angustias. Quantum enim est, quod ab ultimis litoribus Hispaniae usque ad Indos iacet? Paucissimorum dierum spatium, si navem suus ventus implevit. At illa regio coelestis per triginta annos, velocissimo sideri viam praestat, nusquam resistenti, sed aequaliter cito. Illic demum discit, quod diu quaesivit: illic incipit Deum nosse. Quid est Deus? Mens universi. Quid est Deus? Quod vides totum, et quod non vides totum. Sic demum magnitudo sua illi redditur, qua nihil maius excogitari potest, si solus est omnia, opus suum et extra et intra tenet. Quid ergo interest inter naturam Dei, et nostram? Nostri melior pars, animus est: in illo, nulla pars extra animum. totus ratio est. Cum interim tantus error mortalia teneat, ut hoc, quo neque formosius est quidquam, nec dispositius, nec in proposito constantius, existiment homines fortuitum et casu volubile, ideoque tumultuosum inter fulmina, nubes, tempestates, et cetera quibus terrae ac terris vicina pulsantur. Nec haec intra vulgum dementia est, sapientiam quoque profectos contigit. Sunt qui putent, sibi ipsis animum esse, et quidem providum ac dispensantem singula, et sua, et aliena: hoc autem universum, in quo nos quoque sumus, expers

esse consilii , et aut ferri temeritate quadam , aut natura nesciente quid faciat. Quam utile existimas ista cognoscere , et rebus terminos ponere ? quantum Deus possit : materiam ipse sibi formet , an data utatur ? utrum idea materiae prius superveniat , an materia ideae ? Deus quidquid vult efficiat , an in multis rebus illum tractanda destituant : et a magno artifice prave formentur multa , non quia cessat ars , sed quia id in quo exercetur , saepe inobsequens arti est ? Haec inspicere , haec discere , his incubare , nonne transilire est mortalitatem suam , et in meliorem transcribi sortem ? Quid tibi , inquis , ista proderunt ? Si nihil aliud , hoc certe sciam , omnia angusta esse , mensus Deum. Sed haec deinde.

## C A P U T I.

**N**UNC ad propositum veniam opus. Audi quid de ignibus philosophia velit , quos aër transversos agit. Magna vi illos excuti argumentum est , quod obliqui feruntur , et praerapida celeritate. Apparet illos non ire , sed proiici. Ignium multae variaeque facies sunt. Aristoteles quoddam genus illorum Capram vocat. Si me interrogaveris , quare ? prior mihi rationem reddas oportet , quare Hoedi vocentur. Si autem , quod commodissimum est , convenerit inter nos , ne alter alterum interroget , Quid dicit ille ? fatius erit de re ipsa quaerere , quam mirari , quid ita Aristoteles globum ignis appellaverit Capram. Talis fuit forma eius , qui , bellum adversus Perseum Paullo gerente , lunari magnitudiae , apparuit. Nos



quoque vidimus non semel flammam ingentis pilae specie, quae tamen in ipso cursu suo dissipata est. Vidimus circa divi Augusti excessum simile prodigium: vidimus cum de Seiano actum est: nec Germanici mors sine denuntiatione tali fuit. Dices mihi: Ergo tu in tantis erroribus es, ut existimes Deos mortium signa praemittere, et quidquam esse in terris tam magnum, quod perire mundus sciat? Erit aliud isti rei tempus. Videbimus, an certus omnium rerum ordo ducatur, et alia aliis ita complexa sint, ut quod antecedit, aut causa sit sequentium, aut signum. Videbimus, an diis humana sint curae; an series ipsa, quid factura sit, certis rerum notis nuntiet. Interim illud existimo, huiusmodi ignes existere, aëre vehementius trito, cum inclinatio eius in alteram partem facta est, et non cessit, sed intra se pugnavit. Ex hac vexatione nascuntur trabes, et globi, et faces, et ardores. At cum levius collisus, et (ut ita dicam) strictus est, minora lumina excutuntur, crinemque volantia sidera ducunt. Tunc ignes tenuissimi iter exile designant, et coelo producunt. Ideo nulla sine huiusmodi spectaculis nox est. non enim opus est ad efficienda ista magno aëris motu. Denique, ut breviter dicam, eadem ratione fiunt ista, qua fulmina, sed vi minore. Quemadmodum nubes mediocriter collisae, fulgurationes efficiunt; maiore impetu pulsae, fulmina. Aristoteles eiusmodi rationem reddit: Varia et multa terrarum orbis exspirat, quaedam humida, quaedam sicca, quaedam argentia, quaedam concipiendis ignibus idonea. Nec mirum est, si terrae omnis gene-



ris et varia evaporatio est : cum in coelo quoque non unus appareat color rerum , sed acrior sit caniculae rubor , Martis remissior , Iovis nullus , in lucem puram nitore perducto. Neceſſe eſt ergo in magna copia corpusculorum , quae terrae eieſtant , et in ſuperiorem agunt partem , aliqua in nubes pervenire alimenta ignium , quae non tantum collifa poſſint ardere , ſed etiam afflata radiis ſolis. Nam apud nos quoque , ſtramenta ſulphure aſperſa , ignem ex intervallo trahunt. Veri ergo ſimile eſt , talem materiam intra nubes congregatam facile ſuccendi , et maiores minoresve ignes exiſtere , prout illis fuit plus aut minus virium. Illud enim ſtultiſſimum eſt exiſtimare , aut ſtellas decidere , aut tranſilire , aut aliquid illis auferri et abradi : nam ſi hoc fuiſſet , iam deſuiſſent. Nulla enim nox eſt , qua non plurimae ire , et in diverſum videantur abduci. Atqui , quo ſolent , quaeque inveniuntur loco : magnitudo ſua ſingulis conſtat. Sequitur ergo , ut infra illas iſta naſcantur : et cito intercidant , quia ſine fundamento ſunt et ſede certa. Quare ergo etiam non interdum tranſferuntur ? Quid ſi dicam ſtellas interdum non eſſe , quia non apparent ? Quemadmodum illae latent , et ſolis fulgore obumbrantur : ſic faces quoque tranſcurrunt etiam interdum , ſed abſcondit eas diurni luminis claritas. Si quando tamen tanta vis emicuit , ut etiam adverſus diem vindicare ſibi ſuum fulgorem poſſint , apparent. Noſtra certe aetas non ſemel vidit diurnas faces , alias ab oriente in occidentem verſas , alias ab occaſu in orium. Argumentum tempeſtatis nautae putant , cum multae trans-

volant stellae. quod si signum ventorum est, ibi est, ubi venti sunt, id est, in aëre, qui medius inter lunam et terram est. In magna tempestate apparent quasi stellae velo insidentes. Adiuvari se tunc periclitantes existimant Pollucis et Castoris numine. Causa autem melioris spei est, quod iam apparet frangi tempestatem, et desinere ventos. Aliquando feruntur ignes, non sedent. Gylippo Syracusas petenti, visa est stella super ipsam lanceam constitisse. In Romanorum castris, visa sunt ardere pila, ignibus scilicet in illa delapsis: qui saepe, fulminum more, animalia ferire solent et arbuta. Sed si minore vi mittuntur, defluunt tantum et insident, non feriunt, nec vulnerant. Alii inter nubes eliduntur, alii sereno, si aër ad exprimendum ignem aptus fuit. Nam sereno quoque coelo aliquando tonat, ex eadem causa, qua nubilo, aëre inter se colliso. Qui etiam si est lucidior ac siccior, coire tamen et facere corpora quaedam similia nubibus potest, quae percussa reddant sonum. Quandoque igitur fiunt trabes, quandoque clypei, et vastorum imagines ignium, ubi in talem materiam incidit similis causa, sed maior.

II. Videamus nunc, quemadmodum fiat is fulgor, qui sidera circumnectit. Memoriae proditum est, quod die divus Augustus urbem, ex Apollonia reversus, intravit, circa solem visum coloris varii circulum, qualis esse in arcu solet: hunc Graeci Halo vocant; nos dicere Coronam aptissime possumus. Quemadmodum fieri dicatur, exponam. Cum in piscinam lapis missus est, videmus in multos orbes aquam discedere, et fieri primum angustissimum orbem, de-

inde latiore, ac deinde alios maiores, donec evanescat impetus, et in planitiem immotarum aquarum solvatur. Tale quiddam cogitemus fieri etiam in aëre. cum spissior factus, plagam sentire potest, lux solis aut lunae vel cuiuslibet sideris incurrens, recedere illum in circulos cogit. Nam humor, et aër, et omne quod ex ictu formam accipit, in talem habitum impellitur, qualis est eius quod impellit. Omne autem lumen rotundum est: ergo et aër in hunc modum percussus lumine, exhibit. Ob hoc tales splendores Graeci Areas vocavere: quia fere terendis frugibus loca destinata sunt rotunda. Non est autem quod existimemus, istas, sive areae, sive coronae sint, in vicinia siderum fieri. Plurimum enim absunt, quamvis cingere ea et coronare videntur. Non longe a terra sit talis effigies: quam visus noster solita imbecillitate deceptus, circa ipsum sidus putat positam. In vicinia autem solis et stellarum nihil tale potest fieri: quia illic aether tenuis est. Nam formae crassis demum spissisque corporibus imprimi solent: in subtilibus non habent ubi consistent, aut haereant. In balneis quoque circa lucernam tale quiddam adspici solet, ob aëris densi obscuritatem: frequentissime autem austro, cum coelum maxime grave et spissum est. Nonnunquam paulatim diluuntur et desinunt, nonnunquam ab aliqua parte rumpuntur: et inde venturi nautici expectant, unde contextus coronae perit. Si enim a septentrione discesserit, Aquilo erit: si ab occidente, Favonius. Quod argumentum est, intra eam partem coeli has fieri coronas, intra quam venti quo-

que solent. Superiora autem non habent coronas: quia ne ventos quidem. His argumentis et illud adice, nunquam coronam colligi, nisi stabili aëre et pigro. Aliter non solet adspici. Nam qui stat aër, impelli et deduci, et in aliquam faciem fingi potest. Is autem qui fluit, ne feritur quidem lumine. Non enim formatur, nec resistit: quia prima quaeque pars eius dissipatur. Nunquam ergo ullum sidus talem sibi effigiem circumdabit, nisi cum aër erit densus atque immotus, et ob hoc custodiens incidentem in se rotundi lineam luminis: nec sine causa. Repete enim exemplum, quod paulo ante proposui. Lapillus in piscinam aut lacum et aliquam alligatam aquam missus, circulos facit innumerabiles: et hoc idem non facit in flumine. Quare? quia omnem figuram fugiens aqua disturbat. Idem ergo in aëre evenit, ut ille qui manet, possit figurari: at ille qui rapitur et currit, non det sui potestatem, et omnem ictum venientemque formam exturbet. Hae, de quibus dixi, coronae, cum dilapsae sunt aequaliter, et in semet ipsis evanuerint, significatur aëris quies et otium et tranquillitas. Cum ab una parte cesserunt, illinc ventus est unde finduntur. Si ruptae pluribus locis sunt, tempestas fit. Quare id accadat, ex his quae iam exposui, intelligi potest. Nam si facies universa subsedit, apparet temperatum esse aëra, et sic placidum. Si ab una parte intercisa est, apparet inde, aëra incumbere, et ideo illa regio ventum dabit. At cum undique et concerpta et lacerata est, manifestum est a pluribus partibus in illam impetum fieri, et inquietum aëra hinc atque illinc assilire. Itaque ex hac in-



constantia coeli tam multa tentantis, et undique laborantis, futura tempestas et ventorum proelium apparet. Hae coronae noctibus fere circa lunam et alias stellas notantur, interdium raro: adeo ut quidam ex Graecis negaverint eas omnino fieri, cum illos historiae coarguant. Causa autem raritatis haec est, quod solis fortius lumen est, et aër ipse agitat<sup>us</sup> ab illo, calefactusque, solutior est: lunae autem interior vis est, et ideo a circumposito aëre facilius sustinetur: aequae sidera cetera infirma sunt, nec perrumpere aëra vi sua possunt. Excipitur itaque illorum imago, et in materia solidiore ac minus cedente versatur. Debet enim aër nec tam spissus esse, ut excludat ac submoveat a se lumen immissum, nec tam tenuis et solutus, ut nullam venientibus radiis moram praebet. Haec noctibus temperatura contingit, cum sidera collectum aëra luce levi non pugnantiter nec aspere feriunt, spissioremq<sup>ue</sup>, quam solet esse interdium, inficiunt.

III. At contra arcus in nocte non fit, nisi admodum raro: quia luna non habet tantum virium, ut nubes transeat, et illis colorem suffundat, qualem accipiunt sole perstrictae. Sic enim formam arcus discoloris efficiunt: quia aliae partes in nubibus tumidiore<sup>s</sup> sunt, aliae submissiores: quaedam crassiores, quam ut solem transmittant; aliae imbecilliores, quam ut excludant. Haec inaequalitas alternis lucem umbramque permiscet, et exprimit illam mirabilem arcus varietatem. Altera causa eiusmodi arcus redditur. Videmus, cum fistula aliquo loco rupta est, aquam per tenue foramen elidi: quae sparsa

contra solem oblique positum, faciem arcus repraesentat. Idem videbis accidere, si quando volueris observare fullonem: cum os aqua implevit, et vestimenta rediculis diducta leviter aspergit, apparet varios edi colores in illo aëre asperso, quales in arcu fulgere solent. Huius rei causam in humore esse ne dubitaveris. Non fit enim unquam arcus, nisi nubilo. Sed quaeramus quomodo fiat. Quidam aiunt esse aliqua stillicidia, quae solem transmittant, quaedam magis coacta, quam ut transluceant: itaque ab illis fulgorem reddi, ab his umbram, et sic utriusque inter cursu effici arcum, in quo pars fulgeat, quae solem recipit, pars obscurior sit, quae excludit, et ex se umbram proximis fecit. Hoc ita esse quidam negant. Poterat enim umbra et lux causa videri, si arcus duos tantum haberet colores, et si ex lumine umbrae constaret.

*Sed nunc diversi niteant cum mille colores,*

*Transitus ipse tamen spectantia lumina fallit.*

*Usque adeo quod tangit idem est, tamen ultima distant.*

Videmus in eo aliquid flammei, aliquid lutei, aliquid caerulei, et alia in picturae modum subtilibus lineis ducta, at ait Poëta, ut an dissimiles colores sint, scire non possis, nisi cum primis extrema contuleris. Nam commissura decipit: usque adeo mira arte naturae, quod a simillimis coepit, in dissimilia desinit. Quid ergo istic duo colores faciunt luminis atque umbrae, cum innumerabilium ratio reddenda sit? Quidam ita existimant arcum fieri. dicunt in ea



parte in qua pluit, singula stillicidia pluviae cadentis, singula specula esse: a singulis ergo imaginem reddi solis. deinde multas imagines, immo innumera- biles, et devexas, et in praeceps transeuntes con- fundi: itaque et arcum esse multarum imaginum so- lis confusionem. Hoc sic colligunt. Pelves, inquit, mille die sereno pone, et omnes habebunt imaginem solis. in singulis foliis dispone singulas guttas: sin- gulae habebunt imaginem solis. At contra ingens stag- num non habebit nisi imaginem unam. Quare? quia omnis circumscripta laevis et circumdata suis fini- bus, speculum est. Itaque piscinam ingentis magni- tudinis, insertis parietibus in plures divide: totidem illa habet imagines solis, quot lacus habuerit. Re- linque illam sicut est diffusa: semel tibi imaginem reddet. Nihil refert, quam exiguus sit humor aut la- cus. Si circumseptus est, speculum est. Ergo stillici- dia illa infinita, quae imber cadens defert, totidem specula sunt, totidem solis facies habent. Hae con- tra intuenti perturbatae apparent: nec dispiciuntur intervalla, quibus singula distant, spatio prohibente discerni. Deinde pro singulis apparet una facies tur- bida ex omnibus. Aristoteles idem iudicat. Ab om- ni, inquit, laevitate acies radios suos replicat. Nihil autem laevius aqua et aëre. Ergo etiam ab aëre spisso visus noster in nos redit. Ubi vero hebes et infirma est acies, quolibet aëris ictu deficit. Quidam hoc genere valetudinis laborant, ut ipsi sibi videantur occurrere, ut ubique imaginem suam cernant. Qua- re? quia infirma vis oculorum non potest ne proxi- mum quidem sibi aërem perrumpere, sed resistit.

Itaque quod in aliis efficit densus aër, in his facit omnis. Satis enim valet qualiscunque ad imbecillem aciem repellendam : longe autem magis visum nostrum nobis remittit, qui crassior est, et pervinci non potest, sed radios luminum nostrorum moratur, et eo unde exierint, reflectit. Ergo cum multa stillicidia sint, totidem specula sunt. Sed quia parva sunt, solis colorem sine figura exprimunt. Deinde cum in stillicidiis innumerabilibus, et sine intervallo cadentibus, reddatur idem color, incipit facies esse non multarum imaginum intermissarum, sed unius longae atque continuæ. Quomodo, inquis, tu mihi multa millia istic imaginum esse dicis, ubi nullam video ? Et quare cum solis color unus sit, imaginum diversus est ? Ut et hac quæ proposuisti, refellam et alia quæ non minus refellenda sunt, illud dicam oportet : nihil acie nostra fallacius, non tantum in his a quibus subtiliter pervidendis illam colorum diversitas summovet, sed et in his quoque, quæ ad manum cernit. Remus integer in tenui aqua fracti speciem reddit. Poma per vitrum adspicientibus multo maiora sunt. Columnarum intervalla porticus longiores iungunt. Ad ipsum solem revertere : hunc quem toto orbe terrarum maiorem probat ratio, acies nostra sic contraxit, ut sapientes viri pedalem esse contenderint. Quem velocissimum omnium esse scimus, nemo nostrum videt moveri : nec ire crederemus, nisi appareret isse. Mundum ipsum præcipiti velocitate labentem, et ortus occasusque intra momentum temporis revolvantem, nemo nostrum sentit procedere. Quid ergo miraris, si oculi nostri

imbrium stillicidia non separant, et ingenti spatio intuentibus minutarum imaginum discrimen interit? Illud esse dubium nulli potest, quin arcus imago solis sit, roscida et cava nube concepta. Quod ex hoc tibi apparet. Nunquam non adversa soli est, sublimis aut humilis, prout ille se submisit, aut sustulit, contrario motu. Illo enim descendente altior est, alto depressior. Saepe talis nubes a latere solis est, nec arcum efficit; quia non ex recto imaginem trahit. Varietas autem non ob aliam causam fit, quam quia pars coloris a sole est, pars a nube illa: humor autem modo caeruleas lineas, modo virides, modo purpurae similes, et luteas aut igneas ducit, duobus coloribus hanc varietatem efficientibus, remisso et intento. Sic enim et purpura eodem conchylio non in unum modum exit. Interest, quamdiu macerata sit, crassius medicamentum, an aquatius traxerit; saepius merfa sit et excocta, an semel tincta. Non est ergo mirum, cum duae res sint, sol et nubes, id est, corpus et speculum, si tam multa genera colorum exprimuntur: quae in multis generibus possunt aut incitari, aut relanguescere. Alius enim est color ex igneo lumine, alius ex obtuso et leniore. In aliis rebus vaga inquisitio est, ubi non habemus quod manu tenere possimus, et late coniectura mittenda est: hic apparet duas causas esse arcus, solem, nubemque, quia nec sereno unquam fit, nec ita nubilo, ut sol lateat. Ergo utique ex his est, quorum sine altero non est.

IV. Iam illud accedit, quod aetque manifestum est, speculi ratione imaginem reddi, quia nunquam

nisi e contrario redditur : id est , nisi ex altera parte steterit quod apparet , ex altera quod ostendit. Rationes quae non persuadent , sed cogunt , a Geometris afferuntur. Nec dubium cuiquam relinquitur , quin arcus imago solis sit male expressi , ob vitium figuramque speculi. Nos interim tentemus alias probationes , quae de plano legi possint. Inter argumenta sic nascentis arcus pono , quod celerrime nascitur : ingens enim variumque corpus coelo intra momentum subtextitur , et aequae celeriter aboletur. nihil autem tam cito redditur , quam a speculo imago. Non enim facit quidquam , sed ostendit. Parianus Artemidorus adiicit , et quale genus nubis esse debeat , quod talem solis imaginem reddit. Si speculum , inquit , concavum feceris , quod sit sectae pilae pars , si extra medium constiteris , quicumque iuxta te steterint , universi a te videbuntur , propiores tibi quam speculo. Idem , inquit , evenit , cum rotundam et cavam nubem intuemur a latere , ut solis imago a nube discedat , propiorque nobis sit , et in nos magis conversa. Color igitur igneus a sole est , caeruleus a nube : ceteri utriusque mixturae.

V. Contra haec illa dicuntur. De speculis duae opiniones sunt : alii enim in his simulacra cerni putant , id est , corporum nostrorum figuras , a nostris corporibus emissas ac separatas : alii imagines aiunt non esse in speculo , sed ipsa adspici corpora , retorta oculorum acie , et in se rursus reflexa. Nunc nihil ad rem pertinet , quomodo videamus quodcunque videmus : sed quomodo imago similis debet e speculo reddi. Quidnam est tam dissimile , quam sol , et ar-

cus, in quo neque color, neque figura solis, neque magnitudo apparet? Arcus enim longior ampliorque est, longeque ea parte, qua fulget, rubicundior quam sol: ceteris vero coloribus diversus. Deinde cum velis speculum aëri comparare, des oportet mihi eandem laevitatem corporis, eandem aequalitatem, eundem nitorem. Atqui nullae nubes habent similitudinem speculi. per in medias saepe transimus, nec in illis nos cernimus. Qui montium summa conscendunt, spectant nubem: nec tamen imaginem suam in illa cernunt. Singula stillicidia singula specula sunt. Concedo: sed illud nego, ex stillicidiis constare nubem. Habet enim quaedam ex quibus fieri stillicidia possunt, non ipsa. Nec aquam quidem habet nubes, sed materiam futurae aquae. Concedam etiam tibi et guttas innumerabiles in nubibus esse, et illas faciem reddere: non tamen omnes unam reddunt, sed singulae singulas. Deinde inter se specula coniunge: in unam imaginem non coibunt: sed quaeque particula in se rei similitudinem claudet. Sunt quaedam specula ex multis minutisque composita: quibus si unum ostenderis hominem, populus apparet, unaquaque parte faciem suam exprimente. Haec cum sint coniuncta et simul collocata, nihilominus seducunt imagines suas, et ex uno turbam efficiunt. Ceterum catervam illam non confundunt, sed diremtam in facies singulas distrahunt. arcus uno circumscriptus est ductu; una totius est facies. Quid ergo? non et aqua, rupta fistula, sparfa, et ore excussa, habere quiddam simile his quos videmus in arcu, coloribus solet? Verum est: sed non ex hac



causa, ex qua tu videri vis : quia unaquaeque stilla recipit imaginem solis. Citius enim cadunt stillae, quam ut concipere imaginem possint. Standum est, ut id quod imitantur, excipiant. Quid ergo sit? Colorem, non imaginem ducunt : alioquin, ut ait Nero Caesar disertissime,

*Colla Cytheriacae splendent agitata columbae :*

et variis coloribus pavonum cervix, quoties aliquo deflectitur, niter. Numquid ergo dicemus specula eiusmodi plumas, quarum omnis inclinatio in colores novos transit? Non minus nubes diversam speculis naturam habent, quam aves quas retuli, et chamaeleontes, et reliqua animalia, quorum color aut ex ipsis mutatur, cum ira vel cupidine accensa, cutem suam variant humore suffuso, aut positione lucis, quam prout rectam vel obliquam receperint, ita colorantur. Quid enim simile speculis habent nubes : cum illa non perluceant, hae transmittant lucem? Illa densa et coacta, hae rarae sint? illa eiusdem materiae tota, hae e diversis temere compositae, et ob hoc discordes, nec diu cohaesurae? Praeterea videmus, ortu solis partem quandam coeli rubere : videmus nubes aliquando ignei coloris. Quid ergo prohibet, quomodo hunc colorem unum accipiunt solis occurso, sic multos ab illis trahi, quamvis non habeant speculi potentiam? Modo, inquit, inter argumenta ponebas, semper arcum contra solem excitari, quia nec a speculo quidem imago redderetur, nisi adverso. Hoc, inquit, commune nobis est. Nam quemadmodum opponendum est spe-

culo id, cuius imaginem in se transferat: sic ut nubes infici possint; ita solis ad hoc opus est radiorum idoneus ictus. Haec dicuntur ab iis qui videri volunt nubem colorari. Posidonius, et hi qui speculari ratione effici iudicant visum, hoc respondent: Si ullus esset in arcu color, permaneret, et videretur eo manifestius, quo propius. Nunc imago arcus ex longinquo clara est: interit, cum in vicino est. Huic contradictioni non consentio, cum ipsam sententiam probem. Quare? dicam. Quia coloratur quidem nubes: sed ita, ut color eius non undique appareat. Nam ne ipsa quidem undique apparet. Nubem enim nemo qui in ipsa est, videt. Quid ergo mirum, si color eius non videtur ab eo, a quo ipsa non visitur? Atqui, quamvis ipsa non videatur, est: ergo et color. Ita non est argumentum falsi coloris: quia idem apparere accedentibus desinit. Idem enim in ipsis evenit nubibus: nec ideo falsae sunt, quia non videntur. Praeterea cum dicitur tibi, nubem sole esse suffectam, non dicitur tibi, colorem illum immixtum esse velut duro corpori ac stabili et manenti, sed ut fluido et vago, et nihil amplius quam per brevem speciem recipienti. Sunt etiam quidam colores, qui ex intervallo vim suam ostendunt. Purpuram Tyriam, quo melior saturiorque est, eo oportet altius teneas, ut fulgorem suum ostendat. Non tamen ideo non habet illa colorem: quia quem optimum habet, non quomodocunque explicetur, ostendit. In eadem sententia sum, qua Posidonius, ut arcum iudicem fieri nube formata in modum concavi speculi et rotundi, cui forma sit partis e pila sectae.

Hoc probari, nisi Geometrae adiuverint, non potest: qui argumentis nihil dubii relinquentibus docent, solis illam esse effigiem, non similem. Neque enim omnia ad verum specula respondent. Sunt, quae videre extimescas; tanta deformitate corruptam faciem visentium reddunt, servata similitudine in peius. Sunt, quae cum videris, placere tibi vires tuae possint: in tantum lacerti crescunt, et totius corporis supra humanam magnitudinem habitus augetur. Sunt, quae dextras facies ostendant, sunt quae sinistras, sunt quae torqueant vel evertant. Quid ergo mirum est, eiusmodi speculum quo solis species vitiosa reddatur, in nube quoque fieri?

VI. Inter cetera argumenta et hoc erit, quod nunquam maior arcus dimidio circulo apparet: et quod eo minor est, quo altior est sol.

——— *Et bibit ingens*  
*Arcus* ———

ut ait Virgilius noster, cum adventat imber: sed non easdem, undecunque apparuit, minas affert. A meridie ortus magnam vim aquarum vehet. Vinci enim non potuerunt valentissimo sole; tantum est illis virium. Si circa occasum refulsit, rorabit, et leviter impluet. Si ab ortu circave surrexit, serena promittit. Quare tamen, si imago solis est arcus, longe ipso sole maior apparet? Quia est alicuius speculi natura talis, ut maiora multo quam videat, ostendat, et in portentosam magnitudinem augeat formas: alicuius invicem talis est, ut minuat. Illud mihi dic, quare in orbem eat facies, nisi orbi reddi-

tur? Dices fortasse, unde sit ille color varius: unde talis figura sit, non dices, nisi aliquod exemplar, ad quod formetur, ostenderis. Nullum autem aliud, quam solis est, a quo fatearis illi colorem dari. sequitur ut detur et forma. Denique inter me et te convenit, colores illos quibus regio coeli depingitur, a sole esse. Illud unum inter nos non convenit: tu dicis illum colorem esse, ego videri. Qui sive est, sive videtur, a sole, tu non expedies, quare subito desinat, cum omnes fulgores paulatim discutiantur. Pro me est et repentina eius facies, et repentinus interitus. Proprium enim est speculi hoc, quod non per partes struitur, quod apparet, sed statim totum fit. Aequae cito omnis imago in illo aboletur, quam componitur. Nihil enim aliud ad ista efficienda vel removenda opus est, quam ostendi et abduci. Non est propria in ista nube substantia, nec corpus; sed mendacium, et sine re similitudo. Vis scire hoc ita esse? Desinet arcus, si obtexeris solem. Oppone, inquam, soli alteram nubem: huius varietas peribit. At maior est aliquanto arcus, quam sol. Dixi modo, fieri specula, quae multiplicent omne corpus quod imitantur. Illud adiiciam, omnia per aquam videntibus longe esse maiora. Literae quamvis minutae et obscurae, per vitream pilam aqua plenam maiores clarioresque cernuntur. Poma formosiora quam sint videntur, si innatant vitro. Sidera ampliora per nubem adspicienti videntur: quia acies nostra in humido labitur, nec apprehendere, quod vult, fideliter potest. Quod manifestum fiet, si poculum impleveris aqua, et in id conieceris annu-

lum. Nam cum in ipso fundo iaceat annulus, facies eius in summo aquae redditur. Quidquid videtur per humorem, longe amplius vero est. Quid mirum, maiorem reddi imaginem solis, quae in nube humida visitur, cum de causis duabus hoc accadat? quia in nube est aliquid vitro simile, quod potest perluce-re, est aliquid et aquae: quam si nondum habet, tamen iam apparet eius natura, in quam ex sua ver-tatur.

VII. Quoniam, inquis, vitri fecisti mentionem, ex hoc ipso contra te argumentum sumam. Vir-gula solet fieri vitrea, stricta, vel pluribus angulis in modum clavae torosa: haec si ex transverso so-lem accipit, colorem talem qualis in arcu videri so-let, reddit: ut scias hic non imaginem solis esse, sed coloris imitationem ex repercussu. In hoc argu-mento multa sunt pro me. Primum, quod apparet quiddam laeve esse debere, simile speculo, quod so-lem repercutiat: deinde, quod apparet non fieri ul-lum colorem, sed speciem falsi coloris, qualem (ut dixi) columbarum cervix et sumit et ponit, utcun-que deflectitur. hoc autem et in speculo est, cuius nul-lus videtur color, sed simulatio quaedam coloris alieni. Unum tamen hoc solvendum est, quod non visitur in illa virgula solis imago, cuius bene expri-mendae capax non est. Ita conatur quidem reddere imaginem, quia laevis est materia, et ad hoc ha-bilis: sed non potest, quia enormiter facta est. Si apte fabricata foret, totidem redderet soles, quot ha-buisset infecturas. Quae quia non discernuntur inter se, non satis in vicem speculi nitent: inchoant tan-



tum imagines, nec exprimunt: et ob ipsam viciniam turbant, et in speciem coloris unius adducunt.

VIII. At quare arcus non implet orbem, sed dimidia pars eius videtur, cum plurimum porrigitur, incurvaturque? Quidam ita opinantur. Sol cum sit multo altior nubibus, a superiore tantum illas percutit parte: sequitur ut inferior pars earum non tangatur lumine. Ergo cum ab una parte solem accipiant, unam partem eius tantum imitantur, quae nunquam dimidia maior est. Hoc argumentum parum potens est. Quare? quia quamvis sol a superiori parte sit, totam tamen percutit nubem. Ergo et tingit. Quidni? cum radios transmittere soleat, et omnem densitatem perrumpere. Deinde contrariam rem proposito suo dicunt. Nam si superior est sol, et ideo tantum superiori parte nubium affunditur, nunquam terra tenus descendit arcus. Atqui usque in humum demittitur. Praeterea nunquam non contra solem est arcus. Nihil ad rem pertinet, supra infrave sit: quia totum, quod contra est, latus verberatur. Deinde aliquando arcum et occidens facit, cum certe ex inferiore parte nubes ferit, terris propinquus. Atqui et tunc dimidia pars est, quamvis solem nubes ex humili et sordido accipiant. Nostrum qui sic in nube, quomodo in speculo, lumen reddi volunt, nubem cavam faciunt, et sectae pilae partem: quae non potest totum orbem reddere, quia ipsa est pars orbis. Proposito accedo, argumento non consentio. Nam si in concavo speculo tota facies oppositi orbis exprimitur, et in semiorbe nihil prohibet adspici totam pilam. Eriamnum dixi-

mus circulos apparere soli lunaeque in similitudinem arcus circumdatos : quare in illis circulus iungitur, in arcu nunquam ? Deinde quare semper concavae nubes solem accipiunt, nec aliquando planae et tumentes ? Aristoteles ait, post autumnale aequinoctium, qualibet hora diei arcum fieri, aestate non fieri, nisi aut incipiente aut inclinato iam die. Cuius rei causa manifesta est. Primum, quia medio die sol calidissimas nubes evincit : nec potest ab his imaginem suam recipere, quas scindit. At matutino tempore, et vergens ad occasum, minus virium habet : et ideo a nubibus et sustineri et reperi potest. Deinde cum arcum facere non soleat, nisi adversus his, in quibus facit, nubibus : cum breviores dies sunt, semper obliquus est. Itaque qualibet diei parte, etiam cum altissimus est, habet aliquas nubes, quas ex adverso ferire potest. At temporibus aestivis supra nostrum verticem fertur. Itaque medio die excelssimus terras rectiore adspicit linea, quam ut ullis nubibus possit occurri. Omnes enim tunc sub se habet.

IX. Nunc dicendum est de virgis, quas non minus pictas variasque, et aequae pluviarum signa soleamus accipere. In quibus non multum operae consumendum est : quia virgae nihil aliud quam imperfecti arcus sunt. Nam facies quidem illis est picta, sed nihil curvati habent. In rectum iacent. Fiunt autem iuxta solem fere in nube humida, et iam se spargente. Itaque idem est in illis qui in arcu color, tantum figura mutatur : quia nubium quoque, in quibus extenduntur, alia est.

X. Similis varietas in coronis est : sed hoc dif-

ferunt, quod coronae ubique sunt, ubicunque fidus est : arcus non nisi contra solem : virgae non nisi in vicinia solis. Possiam et hoc modo differentiam omnium reddere. Coronam si divideris, arcus erit : si direxeris, virga. In omnibus color multiplex est, ex caeruleo fulvoque varius. Virgae soli tantum adiacent. Arcus solares lunaresque omnes sunt. Coronae omnium siderum.

XI. Aliud quoque virgarum genus apparet, cum radii per angusta foramina nubium tenues, intenti distantesque inter se diriguntur : et ipsi signa imbrium sunt. Quomodo nunc me hoc loco geram? Quid eas vocem? imagines solis? Historici soles vocant, et binos ternosque apparuisse memoriae tradunt. Graeci parelia appellant : quia in propinquo fere a sole visuntur, aut quia accedunt ad aliquam similitudinem solis. Non enim totum imitantur, sed imaginem ejus, figuramque. Ceterum nihil habent ardoris, hebetes ac languidi. His quod nomen imponimus? An facio quod Virgilius, qui dubitavit de nomine, deinde id de quo dubitaverat, posuit?

——— & quo te nomine dicam,  
*Rhetica? nec cellis ideo contende Falernis.*

Nihil ergo prohibet illas parelia vocari. Sunt autem imagines solis in nube spissa et vicina, in modum speculi. Quidam parelion ita definiunt, Nubes rotunda, et splendida, similisque soli. Sequitur enim illum, nec unquam longius relinquitur, quam fuit cum apparuerit. Numquis nostrum miratur, si solis effigiem in aliquo fonte aut placido lacu vidit? Non,

ut puto. Atqui tam in sublimi facies eius potest, quam inter nos, reddi: si modo idonea est materia, quae reddat.

XII. Quoties defectionem solis volumus deprehendere, ponimus pelves, quas aut oleo aut pice implemus: quia pinguis humor minus facile turbatur, et ideo quas recipit imagines, servat. Apparere autem imagines non possunt, nisi in liquido et inmoto. Tunc solemus notare, quemadmodum se luna soli opponat, ut illum tanto maiorem, subiecto corpore abscondat, modo ex parte, si ita contigit, ut latus occurrerit, modo totum. Haec dicitur perfecta defectio, quae stellas quoque ostendit, et intercipit lucem, tunc scilicet, cum uterque orbis sub eodem libramento stetit. Quemadmodum ergo utriusque imago in terris adspici potest: ita in aëre, cum sit coactus aër et limpidus, constitit, ut faciem solis acciperet, quam et aliae nubes accipiunt, sed transmittunt, si aut mobiles sunt, aut rariae, aut sordidae. Mobiles enim spargunt illam, rariae emittunt, sordidae turpesque non sentiunt, sicut apud nos imaginem maculosa non reddunt.

XIII. Solent et bina fieri parelia, eadem ratione: Quid enim impedit quo minus tot sint, quot nubes fuerunt aptae ad exhibendam effigiem solis? Quidam in illa sententia sunt, quotiens duo simulacra talia existunt, ut iudicent, unum esse solis, alterum imaginis. Nam apud nos quoque cum plura specula disposita sunt ita, ut alteri sit conspectus alterius, omnia implentur, et una imago à vero est, ceterae imaginum effigies sunt. Nihil enim refert quid sit, quod

speculo ostendatur. Quidquid enim videt, reddit. Ita illic quoque in sublimi, si nubes fors aliqua disposuit, ut inter se adspiciant, altera nubes solis imaginem, altera imaginis reddit. Debent autem hae nubes, quae hoc praestant, densae esse, laeves, splendidae, plane naturae solis. Ob hoc omnia quae huiusmodi sunt simulacra, candida sunt, et similia lunaribus circulis: quia ex percussu oblique accepto sole resplendent. Nam si infra solem nubes fuerit, et propior, ab eo dissipatur: longe autem posita radios non remittit, nec imaginem efficit. Quia apud nos quoque specula cum a nobis procul abducta sunt, faciem non reddunt, quia acies nostra non habet usque ad nos recursum. Pluviarum autem et hi soles (utar enim historica lingua) indicia sunt: utique si a parte Austri constiterunt, unde maximae nubes ingravescunt: cum utrinque solem cinxit talis effigies, (si Arato credimus) tempestas surgit.

XIV. Tempus est, alios quoque ignes percurrere, quorum diversae figurae sunt. Aliquando emicat stella, aliquando ardores sunt, aliquando fixi et haerentes, nonnunquam volubiles. Horum plura genera conspiciuntur. Sunt Bothynoe, cum velut corona cingente introrsus ingens coeli recessus est similis effossae in orbem speluncae. Sunt Pithyae, cum magnitudo vasti rotundique ignis dolio similis, vel fertur, vel in uno loco flagrat. Sunt Chasmata, cum aliquod coeli spatium discedit, et flammam dehiscens velut in abdito ostentat. Colores quoque horum omnium plurimi sunt. Quidam ruboris acerrimi, quidam evanidae ac levis flammae, quidam candidae



lucis, quidam micantes, quidam aequaliter et sine eruptionibus aut radiis fulvi. Videmus ergo,

*Stellarum longos a tergo albescere tractus.*

Hae velut stellae exsiliunt et transvolant, videnturque longum ignem porrigere, propter immensam celeritatem: cum acies nostra non discernat transitum earum, sed quacunque cucurrerunt, id totum igneum credat. Tanta enim est velocitas motus, ut partes eius non dispiciantur, sed tantum summa prendatur. Intelligimus magis, qua appareat stella, quam qua eat. Itaque velut igne continuo totum iter signat: quia visus nostri tarditas non subsequitur momenta currentis, sed videt simul et unde exsilierit, et quo pervenerit. Quod fit in fulmine, longus nobis videtur ignis eius: quia cito spatium suum transilit, et oculis nostris occurrit universum per quod deiectus est. At ille non est extenti corporis, per omne qua venit. Neque tam longa et extenuata in impetum valent. Quomodo ergo profiliunt? Attritu aëris ignis incensus, vento praeceps impellitur: non semper tamen vento attrituve fit. Nonnunquam ex aliqua opportunitate aëris nascitur. Multa enim sunt in sublimi ficca, calida, terrena, inter quae oritur, et pabulum suum subsequens defluit, ideoque velociter rapitur. At quare color diversus est? Quia refert, quale sit id quod incenditur, et quam vehemens quo incenditur. Ventum autem significat eiusmodi lapsus, et quidem ab ea parte qua erumpit.

XV. Fulgores, inquit, quomodo fiunt, quos Graeci Sela appellant? Multis, ut aiunt, modis. Potest illos ventorum vis edere, potest superioris coe-

li fervor. Nam cum late fufus fit ignis, inferiora aliquando, fi funt idonea accendi, corripit. Potest ftellarum motus cursu fuo excitare ignem, et in subiecta transmittere. Quid porro? non potest fieri ut aër vim igneam usque in aethera elidat, ex qua fulgor ardorve sit stellae, vel similis excursus? Ex his fulgoribus quaedam in praeceps eunt, similia profolientibus stellis: quaedam certo loco permanent, et tantum lucis emittunt, ut fugent tenebras, et diem repraesentent, donec consumto alimento, primum obscuriora sint, deinde flammae modo, quae in se cadit, per assiduam diminutionem redigantur in nihilum. Ex his quaedam in nubibus apparent, quaedam supra nubes, cum aër spissus ignem, quem propior terris diu paverat, usque in sidera expressit. Horum aliqua non patiuntur moram, sed transcurrunt aut exstinguuntur subinde qua reluxerant. Hi fulgores dicuntur: quia brevis facies illorum et caduca est, nec sine iniuria decidens: saepe enim fulminum noxas ediderunt. Ab his recta videmus ista sine fulmine, quae Astrapoplecta Graeci vocant. At quibus longior mora et fortior ignis est, motumque coeli sequens, aut qui proprios cursus agunt, Cometas nostri putant: de quibus dicendum est. Horum genera sunt pogoniae, lampades, et cyparissiae, et alia omnia: quorum ignis in exitu sparsus est. Dubium, an inter hos ponantur trabes, et pithiae, quae raro sunt visae. Multa enim conglobatione ignium indigent, cum ingens illorum orbis aliquando matutini amplitudinem solis exsuperet. Inter haec ponas licet, et quod frequenter in historiis legimus, coelum ardere visum:

cuius nonnunquam tam sublimis ardor est, ut inter ipsa sidera videatur : nonnunquam tam humilis, ut speciem longinqui incendii praebeat. Sub Tiberio Caesare cohortes in auxilium Ostiensis coloniae currerunt, tanquam conflagrantis : cum coeli ardor fuisset per magnam partem noctis, parum lucidus, crassi fumidique ignis. De his nemo dubitat quin habeant flammam quam ostendunt : certa illis substantia est. De prioribus quaeritur, de arcu dico et coronis, an decipiant aciem, et mendacio consent : an illis quoque verum sit quod apparet. Nobis non placet, in arcu aut coronis subesse aliquid corporis certi. nihil enim iudicamus in speculis, nisi fallaciam esse, nihil aliud quam alienum corpus mentientibus. Non enim est in speculo, quod ostenditur. Alioquin non exiret, nec alia protinus imagine obduceretur : nec innumerabiles modo interirent, modo exciperentur formae. Quid ergo ? Simulacra ista sunt, et inanis verorum corporum imitatio : suntque ista a quibusdam ita composita, ut possint detorquere in pravam. Nam (ut dixi) sunt specula, quae faciem prospicientium obliquent : sunt, quae in infinitum augeant, et humanum habitum excedant, modumque nostrorum corporum.

XVI. Hoc loco volo tibi narrare fabellam, ut intelligas, quam nullum instrumentum irritandae voluptatis libido contemnat, et ingeniosa sit ad incitandum furorem suum. Hostius quidam fuit obscoenitatis usque in scenam productae. Hunc divitem avaram, festerii millies servum, divus Augustus indignum vindicta iudicavit, cum a servis occisus esset :

et tamen non pronuntiavit iure caesum videri. Non erat ille tantummodo ab uno sexu impurus, sed tam virorum quam feminarum avidus fuit. Fecitque specula eius notae, cuius modo retuli, imagines longe maiores reddentia, in quibus digitus brachii mensuram et longitudine et crassitudine excederet. Haec autem ita disponebat, ut cum virum ipse pateretur, aversus omnes admissarii sui motus in speculo videret, ac deinde falsa magnitudine ipsius membri tanquam vera gauderet. In omnibus quidem balneis agebat ille dilectum, et aperta mensura legebat viros: sed nihilominus mendaciis quoque insatiabile malum delectabat. I nunc, et dic, speculum munditiarum causa repertum. Foeda dictu sunt, quae portentum illud lacerandum ore suo dixerit, feceritque, cum illi specula ab omni parte opponerentur, ut ipse flagitiorum suorum spectator esset: et quae secreta quoque conscientia premuntur, et quae accusatus quisque fecisse se negat, non in os tantum, sed in oculos suos ingereret. At hercules scelera conspectum suum reformidant. In perditis quoque, et ad omne dedecus expositis, tenerrima est oculorum verecundia. Ille autem, quasi parum esset, inaudita et incognita pati, oculos suos ad illa advocavit: nec quantum peccabat videre contentus, specula sibi per quae flagitia sua divideret, disponderetque, circumdedit: et quia non tam diligenter intueri poterat, cum compressus erat, et caput merferat, inguinibusque alienis obhaeserat, opus sibi suum per imagines offerebat. Speculabatur illam libidinem oris sui, spectabat sibi admissos pariter in omnia viros. Nonnunquam inter marem et se-

minam distributus, et toto corpore patientiae expositus, spectabat nefanda. Quidnam homo impurus reliquit, quod in tenebris faceret? Non pertimuit diem, sed ipsos concubitus portentosos sibi ipse ostendit, sibi ipse approbavit. Quid? non putas, eo ipso habitu voluisse pingi? Est aliqua etiam prostitutis modestia: et illa corpora, publico obiecta ludibrio, aliquid, quo infelix patientia lateat, obtendunt: adeo quodammodo lupanar quoque verecundum est. At illud monstrum obscoenitatem suam, spectaculum fecerat, et ea sibi ostentabat, quibus abscondendis nulla satis alta nox est. Simul, inquit, et virum et feminam patior: nihilominus illa quoque supervacua mihi parte, alicuius contumelia marem exerceo. Omnia membra stupris occupata sunt. Oculi quoque in partem libidinis veniant, et testes eius exactoresque sint. Etiam ea quae ab adspectu corporis nostri positio submovit, arte visantur, ne quis me putet nescire, quid faciam. Nihil egit natura, quod humanae libidini ministeria tam maligna dedit, quod aliorum animalium concubitus melius instruxit. Inveniam, quemadmodum morbo meo imponam et satisfaciam. Quo nequitiam meam, si ad naturae modum pecco? Id genus speculorum circumponam mihi, quod incredibilem imaginum magnitudinem reddat. Si liceret mihi, ad verum ista perducerem: quia non licet, mendacio pascar. Obscoenitas mea, plus quam capit, videat, et patientiam suam ipsa miretur. Facinus indignum. Hic fortasse cito, et antequam videret, occisus est. Ad speculum suum immolandus fuit.

XVII. Derideantur nunc philosophi, quod de spe-



culi natura differant, quod inquirent, quid ita facies nostra nobis, et quidem in nos obversa, reddatur. Quid sibi rerum natura voluit, quod cum vera corpora dedisset, etiam simulacra eorum adspici voluit. Quorsus pertinuerit, hanc comparare materiam, excipiendarum imaginum potentem. Non in hoc scilicet, ut ad speculum barbam faciemque velleremus, aut ut faciem viri poliremus. In nulla re illa negotium luxuriae concessit: sed primum omnium, quia imbecilli oculi ad sustinendum cominus solem, ignoraturi erant formam eius, hebetato illum lumine ostendit. Quamvis enim eum orientem occidentemque contemplari liceat: tamen habitum eius, ipsum qui verus est, non rubentis, sed candida luce fulgentis, nesciremus, nisi in aliquo nobis humore laevior et adspici facilior occurreret. Praeterea duorum siderum occursum, quo interpolari dies solet, non videremus, nec scire possemus, quid esset, nisi liberius humi solis lunaeque imagines videremus. Inventa sunt specula, ut homo ipse se nosceret. Multa ex hoc consecuta: primo sui notitia, deinde et ad quaedam consilium. Formosus, ut vitaret infamiam: deformis, ut sciret redimendum esse virtutibus, quidquid corpori deesset: iuvenis, ut flore aetatis admoneretur, illud tempus esse discendi, et fortia audendi: senex, ut indecora canis deponeret, et de morte aliquid cogitaret. Ad hoc rerum natura facultatem nobis dedit, nosmetipsos videndi. Fons cuique per lucidus aut laeve saxum imaginem reddit.

———— *Nuper me in litore vidi,*

*Cum placidum ventis staret mare. ———*

Qualem fuisse cultum putas ad hoc speculum se commentum? Aetas illa simplicior, et fortuitis contenta, nondum in vitium beneficium detorquebat, nec inventum naturae in libidinem luxumque rapiebat. Primo faciem suam cuique casus ostendit: deinde cum insitus sui mortalibus amor, dulcem adspectum formae suae faceret, saepius ea despexere, in quibus prius effigies suas viderant. Postquam deterior populus ipsas subiit terras, effossurus obruenda, ferrum primo in usu fuit, et id homines impune eruerant, si solum eruissent. Tunc demum alia terrae mala, quorum laeuitas aliud agentibus speciem suam obtulit, quam hic in poculo, ille in aere ad alios usus comparato vidit. et mox proprius huic ministerio praeparatus est orbis: nondum argenti nitor, sed fragilis vilisque materia. Tunc quoque cum antiqui illi viri incondite viverent, fatis nitidi, si squalorem opere collectum adverso flumine eluerent, cura comere capillum fuit, ac prominentem barbam depectere: et in hac re quisque sibi, alterique operam dabat invicem. Coniugum quidem manu crinis ille, quem effundere olim mos viris fuit, attrectabatur: sed illum sibi sine ullo artifice formosi quatiebant, non aliter quam iubam generosa animalia. Postea rerum iam potente luxuria, specula totis paria corporibus auro argentoque caelata sunt, denique gemmis adornata: et pluris unum ex his feminae constitit, quam antiquarum dos fuit illa, quae publice dabatur imperatorum pauperum filiabus. An tu existimas, ex auro nitidum habuisse Scipionis filias speculum, cum illis dos fuisset aes grave? O paupertas felix, quae

tanto titulo locum fecit! Non fecisset illis Senatus dotem, si habuissent. At quisquis ille fuit, cui soceri loco senatus fuit, intellexit, se accepisse dotem, quam fas non esset reddere. Iam libertinorum virgunculis in unum speculum non sufficit illa dos, quam dedit senatus pro Scipione. Processit enim immodestius, paulatim opibus ipsis invitata luxuria: et incrementum ingens vitia acceperunt. Adeoque omnia indiscreta sunt perversissimis artibus, ut quidquid mundus muliebris vocabatur, sarcinae viriles sint: minus dico, etiam militares. Iam speculum ornatus tantum causa adhibitum, nulli non vitio necessarium factum est.

---

L. ANNAEI SENECAE  
AD LUCILIUM  
NATURALIUM QUAESTIONUM

LIBER II.

---

ARGUMENTUM.

*Doctrinam rei naturalis, in eam quae coelestia, meteo-  
ra, & terrena pertractat, partitur. De aëre aliquid  
praemittit, quia meteororum & omnium sublimium  
locus communis est. Eum ex distantibus corpusculis,  
ut pulverem, constructum non esse. Divisio eius in  
tres regiones. In aëre fulgura, fulmina, tonitrua  
concipi. Anaxagoras refutatus, qui fulmina credit  
siderum emunctiones & distillationes esse. Aristotele  
etiam, Anaximene, Anaximandro, Diogene Apol-  
loniate reiectis, sustinet nubium collisione fieri & eli-  
di: maximam tamen eorum vim penes sidera esse,  
quorum ingens, ait, & confessa potentia est. Vi sub-  
terranei ignis, insulam maiorum aevo in mari Ae-  
geo, & alteram sua memoria enatam esse. Tonitruo-  
rum & fulminum divisiones, tam ex physica ratione,  
quam vana disciplina Thuscorum. Fulminum & au-  
guriarum significationes non averti sacrificiis, sed haec  
aegre mentis solatia esse. fata enim nulla prece aut*

*miseriordia commoveri : quaedam tamen a Diis immortalibus ita suspensa relicta esse , ut in bonum veriant , si admotae Diis preces fuerint , si vota suscepta. Quia vero melius fulmina non timere , quam nosse , ad contemptum fulminum & mortis digreditur. Hanc qui non timet , nec fulmina , nec naufragia , nec bella , nec feras metuet. Mortem autem cur tantopere metuamus ? Omnes ad eam proditi sumus , & melius est ultroneum ire , quam invitum trahi.*

## C A P U T I.

**O**MNIS de universo quaestio in coelestia , sublimia , et terrena dividitur. Prima pars naturam siderum scrutatur , et magnitudinem , et formam ignium quibus mundus includitur : solidum ne sit coelum , ac firmæ concretaeque materiae , an ex subtili tenuique nexum : agatur , an agat : et infra se sidera habeat , an in contextu sui fixa : quemadmodum sol anni vices servet : an retro flectat : cetera deinceps his similia. Secunda pars tractat inter coelum terramque versantia. Haec sunt nubila , imbres , nives , et humanas motura tonitrua mentes : quaecunque aër facit patiturve. Haec sublimia dicimus , quia editiora imis sunt. Tertia illa pars de agris , terris , arbutis , satis quaerit , et (ut Iuriconsultorum verbo utar) de omnibus quae solo continentur. Quomodo , inquis , de terrarum motu quaestionem eo posuisti loco , quo de tonitruis fulgoribusque dicturus ? Quia cum motus terrae fiat spiritu , spiritus autem sit aër



agitatus, et si subeat terras, non ibi spectandus est: cogitetur in ea fede, in qua illum natura disposuit. Dicam, quod magis videbitur mirum: inter coelestia et de terra dicendum erit. Quare? inquis. quia cum propria terrae excutimus suo loco, utrum lata sit, et inaequalis, et enormiter proiecta, an tota in formam pilae spectet, et in orbem partes suas cogat, alliget aquas, an aquis alligetur ipsa: animal sit an iners corpus, et sine sensu, plenum quidem spiritus, sed alieni; et cetera huiusmodi quotiens in manus venerint, terram sequentur, et in imis collocabuntur. At ubi quaeretur, quis terrae sit situs, qua parte mundi subsederit, quomodo adversus sidera coelumque posita sit, haec quaestio cedit superioribus, et (ut ita dicam) meliorem conditionem sequitur.

II. Quoniam dixi de partibus, in quas omnis rerum naturae materia dividitur, quaedam in commune sunt dicenda, et hoc primum praesumendum, inter ea corpora, a quibus unitas est, aëra esse. Quid sit hoc et quare praecipiendum fuerit, scies, si paulo altius repetiero, et dixerò aliquid esse continuum, aliquid commissum. Continuatio est partium inter se non intermissa coniunctio. Unitas est sine commissura continuatio, et duorum inter se coniunctorum corporum tactus. Numquid dubium est, quin ex his corporibus quae videmus tractamusque, quae aut sentiuntur aut sentiunt, quaedam sint composita? Illa constant aut nexu, aut acervatione: ut puta funis, frumentum, navis. Rursus non composita: ut arbor, lapis. Ergo concedas oportet, ex his quoque quae sensum quidem effugiunt, ce-

terum ratione prenduntur; esse in quibusdam unitatem corporum. Vide, quomodo auribus tuis parcam. Expedire me poteram, si philosophorum lingua uti voluisssem, ut dicerem unita corpora: hoc cum tibi remittam, tu invicem mihi refer gratiam. Quare istud? si quando dixero unum, memineris me non ad numerum referre, sed ad naturam corporis, nulla ope externa, sed unitate sua cohaerentis. Ex hac nota corporum aër est.

III. Omnia quae in notitiam nostram cadere possunt, mundus complectitur. Ex his quaedam sunt partes, quaedam materiae loco relicta. Desiderat omnis natura materiam, sicut ars omnis quae manu constat. Quid si hoc apertius faciam? Pars est nostri, manus, ossa, nervi, oculi: materia, succus retenti cibi iturus in partes. Rursus, quasi pars nostri est sanguis: qui tamen et materia est. Praeparat enim et alia: et nihilominus in numero est eorum, quibus totum corpus efficitur.

IV. Sic mundi pars est aër, et quidem necessaria. hic est enim qui coelum terramque connectit, qui ima ac summa sic separat, ut tamen iungat. Separat, quia medius intervenit: iungit, quia utrique per hoc inter se consensus est. Supra se dat, quidquid accipit a terris. Rursus vim siderum in terrena transfundit. Quam sic partem mundi voco, ut animalia et arbuta. Nam genus animalium arbutorumque, pars est universi: quia in consummationem totius assumptum: et quia non est sine hoc universum. Unum autem animal, et una arbor, quasi pars est: quia quamvis perierit, tamen id ex quo

perit, totum est. Aër autem, ut dicebam, et coelo et terris cohaeret. Utrique innatus est. Habet autem unitatem, quidquid alicuius rei nativa pars est. Nihil enim nascitur sine unitate.

V. Terra et pars est mundi, et materia. Pars quare sit, non puto te interrogaturum, aut aequè interrogēs, quare coelum pars sit: quia scilicet non magis sine hoc, quam sine illa universum esse potest, quod cum his universum est, ex quibus, id est, tam ex illo, quam ex ista, alimenta omnibus animalibus, omnibus fatis, omnibus stellis dividuntur. Hinc quidquid est virium singulis, hinc ipsi mundo tam multa poscenti subministratur: hinc profertur quo sustineantur tot sidera, tam exercitata, tam avida, per diem noctemque, ut in opere, ita et in pastu. Et omnium quidem rerum natura, quantum in nutrimentum sui satis sit, apprehendit. Mundus autem, quantum in aeternum desiderabat, invasit. Pusillum tibi exemplum magnae rei ponam. Ova tantum complectuntur humoris, quantum ad effectum animalis exituri satis est.

VI. Aër continuus terrae est, et sic appositus, ut statim ibi futurus sit, unde illa discessit. Pars est totius mundi: sed idem tamen, quidquid terra in alimentum misit, recipit: ut scilicet materia, non pars intelligi debeat. Ex hoc omnis inconstantia tumultusque est. Hunc quidam ex distantibus corpusculis, ut pulverem struunt, plurimumque a vero recedunt. Nunquam enim contexti nisi per unitatem corporis niscus est, cum partes consentire ad intensionem debeant, et conferre vires. Aër autem,

si in atomos dividitur, sparsus est. Teneri vero disiecta non possunt. Intensionem aëris ostendent tibi inflata, nec ad ictum cedentia. Ostendent pondera, per magnum spatium ablata, gestante vento. Ostendent voces, quae remissae elataeque sunt, prout aër se concitavit. Quid enim est vox, nisi intensio aëris, ut audiatur, linguae formata percussu? Quid cursus et motus omnis, nonne intenti spiritus opera sunt? Hic facit vim nervis, et velocitatem curren-  
tibus. Hic cum vehementer concitatus ipse se tor-  
sit, arbuscula silvasque convellit, et aedificia tota  
corripiens in altum frangit. Hic mare per se lan-  
guidum et iacens incitat. Ad minora veniamus. Quis  
enim sine intensione spiritus cantus est? cornua et  
tubae, et ea quae aliqua pressura maiorem sonitum  
reddunt, quam qui ore reddi potest, nonne aëris  
intensione partes suas explicant? Consideremus quam  
ingentem vim per occultum agant parvula admodum  
semina: et quorum exilitas in commissura lapidum vix  
locum inveniat, in tantum convalescunt, ut ingen-  
tia saxa distrahant, et in momenta dissolvant; sco-  
pulos rupesque, radices minutissimae, ac tenuissimae.  
Hoc quid est aliud, quam intensio spiritus, sine qua  
nil validum, et contra quam nil validius est? Esse  
autem unitatem in aëre, vel ex hoc intelligi potest,  
quod corpora nostra inter se cohaerent. Quid enim  
aliud est quod tenet ea, quam spiritus? Quid est  
aliud quo animus noster agitetur? Quis est ille mo-  
tus, nisi intensio? Quae intensio, nisi ex unitate?  
Quae unitas, nisi haec esset in aëre? quid autem  
aliud producit fruges et segetem imbecillam, ac

virentes erigit arbores, ac distendit in ramos, aut in altum erigit, quam spiritus intensio et unitas?

VII. Quidam aëra discerpunt, et in particulas diducunt, ita ut illi inane permisceant. Argumentum autem existimant non pleni corporis, sed multum vacui habentis, quod avibus in illo tam facilis motus, quod maximis minimisque per illum transcursus est. Sed falluntur. Nam aquarum quoque similis facilitas est: nec de unitate illarum dubium est, quae sic corpora accipiunt, ut semper in contrarium acceptis refluant. Hanc nostri circumstantiam, Graeci autem *περίστασις* appellant, quae in aëre quoque sicut in aqua fit. Circumstat enim omne corpus a quo impellitur. Nihil autem opus erit inani admixto. Sed hoc alias.

VIII. Nunc autem esse quandam in rerum natura vehementiam, magni impetus, est colligendum. Nihil enim non intensione vehementius est: et tam mehercule quam nihil intendi ab alio poterit, nisi per semetipsum fuerit intentum. Dicimus enim, eodem modo non posse quidquam ab alio moveri, nisi aliquid fuerit mobile ex semetipso. Quid autem est, quod magis credatur ex semetipso habere intensiorem, quam spiritus? Hunc intendi quis negabit, cum viderit iactari terram cum montibus, tecta, murosque plures, et magnas cum populis urbes, cum totis maria litoribus? Ostendit intensiorem spiritus, velocitas eius et diductio. Oculus statim per multa millia aciem suam intendit: vox una totas urbes simul percutit: lumen non paulatim prorepat, sed semel universis infunditur rebus.

IX. Aqua autem sine spiritu quemadmodum pos-



set intendi? Numquid dubitas, quin sparsio illa quae ex fundamentis mediae arenae crescens in summam altitudinem amphitheatri pervenit, cum intensione aquae fiat? Atqui nec tolleno magis, nec ullum aliud tormentum aquam poterit mittere, aut agere, quam spiritus. Huic se commodat: hoc inserto et cogente attollitur, et contra naturam suam multa conatur, et ascendit, nata defluere. Quid navigia farcina depressa, parum ostendunt, non aquam sibi resistere quo minus mergantur, sed spiritum? Aqua enim cederet: nec posset pondera sustinere, nisi ipsa sustineretur. Discus ex loco superiore in piscinam missus, non descendit, sed resilit. quemadmodum, nisi spiritu referente? Vox autem qua ratione per parietum munimenta transmittitur, nisi quod solido quoque aër inest, qui sonum extrinsecus missum et accipit et remittit? scilicet spiritu non aperta tantum intendens, sed etiam abdita et inclusa. Quod illi facere expeditum est, quia nusquam divisus, sed per ipsa quibus separari videtur, coit secum. Interponas licet muros et mediam altitudinem montium, per omnia ista prohibetur nobis esse pervius, non sibi. id enim intercluditur tantum, per quod illum nos sequi possumus.

X. Ipse quidem transit per ipsum quod scinditur, et media non circumfundit tantum, et utrimque cingit, sed permeat, ab aethere lucidissimo aër, in terram usque diffusus: agilior quidem, tenuiorque et altior terris, nec minus aquis: ceterum aethere spissior graviorque, frigidus per se et obscurus. lumen illi calorque aliunde sunt; sed per omne spa-

fium sui similis non est : mutatur enim a proximis. Summa pars eius est siccissima calidissimaque, et ob hoc etiam tenuissima, propter viciniam aeternorum ignium, et illos tot motus siderum, assiduumque coeli circumactum. Illa pars ima et vicina terris, densa et caliginosa est : quia terrenas exhalationes receptat. Media pars temperatior, si summis imisque conferas, quantum ad siccitatem tenuitatemque pertinet : ceterum utraque parte frigidior. Nam superiora eius calorem vicinorum siderum sentiunt : inferiora quoque tepent, primum terrarum halitu, qui multum secum calidi affert, deinde quia radii solis replicantur, et quousque redire potuerunt, duplicato calore benignius fovent. Deinde etiam illo spiritu, qui omnibus animalibus, arbutisque ac satis calidus est. Nihil enim viveret sine calore. Adice nunc ignes, non tantum manu factos et certos, sed opertos terris : quorum aliqui eruperunt, innumera- biles in abscondito flagrant et obscuro semper. Etiamnum tot partes eius fertiles rerum, habent aliquid teporis : quoniam sterile est frigidum, calor autem gignit. Media ergo pars aëris ab his submota in frigore suo manet. Natura enim aëris gelida est.

XI. Qui cum sic divisus sit, ima sui parte maxime varius et inconstans et mutabilis est. Circa terram plurimum audet, plurimum patitur, exagitat et exagitur : nec tamen eodem modo totus afficitur, sed aliter alibi : ac partibus inquietus est ac turbidus. Causas autem illius mutationis et inconstantiae alias terra praeber, cuius positiones huc aut illo versae ; magna ad aëris temperiem momenta sunt : alias si-

derum cursus. Ex quibus soli plurimum imputes. Illud sequitur annus : ad illius flexum hiemes aestatesque vertuntur. Lunae proximum ius est. Sed et ceterae quoque stellae non minus terrera quam incumbentem spiritum terris afficiunt, et ortu suo occasive contrario, modo frigora, modo imbres, aliasque terrarum iniurias turbidae movent. Hoc necessarium fuit praeloqui, dicturo de tonitruo ac fulminibus et fulgurationibus. Nam quia in aëre fiunt, naturam eius explicare oportebat : quo facilius appareret, quid facere aut pati posset.

XII. Tria sunt ergo quae accidunt, fulgurationes, fulmina, et tonitrua : quae una facta, serius audiuntur. Fulguratio ostendit ignem : fulminatio emittit. Illa (ut ita dicam) comminatio est, et conatio sine ictu : ista, iaculatio cum ictu. Quaedam sunt ex his, de quibus inter omnes convenit : quaedam, in quibus diversae sententiae sunt. Convenit illis, omnia ista in nubibus et e nubibus fieri : etiamnum convenit, et fulgurationes et fulminationes, aut igneas esse, aut ignea specie. Ad illa nunc transeamus, in quibus lis est. Quidam putant ignem esse in nubibus, quidam ad tempus fieri : nec prius esse, quam mitti. Nec inter illos quidem quid proferat ignem, convenit. Alius enim a lumine illum colligit. Quidam autem radios solis intercurrentis recurrentisque, saepius in se relatos, ignem excitare dicit. Anaxagoras ait illum ex aethere distillari, et ex tanto ardore coeli multa decidere, quae nubes diu inclusa custodiant. Aristoteles multo ante ignem colligi non putat, sed eodem momento exsilire, quo fiat. Cuius

sententia talis est : Duæ mundi partes in imo iacent, terra et aqua : utraque ex se reddit aliquid. Terrenus vapor siccus est, et fumo similis, qui ventos, tonitrua, et fulmina facit : aquarum halitus humidus est, et imbres et nives creat. Sed siccus ille terrarum vapor, unde ventis origo est, quia coacervatus est, cum coitu nubium vehementer impactarum a latere eliditur : deinde, ubi latius ferit nubes proximas, plaga et cum sono incutitur, qualis in nostris ignibus redditur, cum flamma vitio lignorum virentium crepat. Et ut ille spiritus habens aliquid humidi secum, cum est conglobatus, rumpitur flamma : eodem modo spiritus ille, quem paulo ante exprimi collisis nubibus dixi, impactus aliis, nec rumpi nec exsilire silentio potest. Dissimilis autem crepitus fit, ob dissimilem impactionem nubium. Quare aliae maiorem sonitum habent, aliae minorem. Ceterum illa vis expressi spiritus ignis est, qui fulgurationis nomen habet, levi impetu accensus et varius. Ante autem videmus fulgurationem, quam sonum audiamus : quia oculorum velocior est sensus, et multum aures antecedit.

XIII. Falsam autem esse opinionem eorum, qui ignem in nubibus servant, per multa colligi potest. Si de coelo cadit, quomodo non quotidie fit, cum tantundem illic semper ardeat ? Deinde nullam rationem reddiderunt, quare ignis, quem natura sursum vocat, defluat. Alia enim conditio nostrorum ignium est, ex quibus favillae cadunt, quae ponderis secum aliquid habent. Ita non descendit ignis, sed praecipitatur et deducitur. Huic simile nihil accidit

in igne purissimo, in quo nihil est quod deprimatur: aut si ulla pars eius deciderit, in periculo totus est: quia totum potest excidere, quod potest carpi. Deinde illud quod quotidie levitas cadere prohibet, si in abdito suo tenet grave, quomodo illic esse potuit, unde caderet? Quid ergo? Non aliqui ignes in inferiora ferri solent, sicut haec ipsa de quibus quaerimus fulmina? Fato enim non eunt, sed feruntur. Aliqua illos potentia deprimat, quae non est in aethere. Nihil enim iniuria illic cogitur, nihil rumpitur, nihil praeter solitum evenit. Ordo rerum est, et expurgatus ignis in custodia mundi, summas sortitus oras, operas pulcherrime circumit: hinc discedere non potest, sed ne ab externo quidem exprimi: quia in aethere nulli incerto corpori locus est. Certa enim et ordinata non pugnant.

XIV. Vos, inquam, dicitis, cum causas stellarum transvolantium redditis, posse aliquas partes aëris ad se trahere ignem, ex aethere decidentem, et ex eo superioribus locis ardore hic accendi. Sed plurimum interest, utrum aliquis dicat ignem ex aethere decidere, quod natura non patitur: an dicat, ex ignea vi calorem in ea, quae subiecta sunt, transilire, an hic accendi. Non enim illinc ignis cadit, quod non potest fieri, sed hic nascitur. Videmus certe, apud nos late incendio pervagante, quasdam insulas, quae diu concaluerant, ex se concipere flammam. Itaque verisimile est, in aëre summo, qui naturam rapiendi ignis habet, aliquid accendi calore aetheris superpositi. Necessesse est enim, ut et imus aether habeat aliquid aëri simile, et summus aër non sit dissimilis



imo aetheri : quia non fit statim ex diverso in diversum transitus. Paulatim ista confinio vim suam miscent ita, ut dubitare possis, an aër, an hic iam aether sit.

XV. Quidam ex nostris existimant, aëra, cum in ignem et aquam mutabilis sit, non trahere aliunde causas flammaram novas : ipse enim se movendo accendit, et cum densos compactosque nubium sinus dissipat, necessario vastum in tam magnorum corporum diruptione reddit sonum. Illa porro nubium difficulter cedentium pugna, aliquid confert ad concitandum ignem : sic, quemadmodum ferro aliquid manus ad secandum confert : sed secare, ferri est.

XVI. Quid ergo inter fulgurationem et fulmen interest? dicam. Fulguratio, est late ignis explicitus : Fulmen, est coactus ignis, et impetu iactus. Solemus duabus manibus inter se iunctis aquam concipere, et compressa utrimque palma in modum siphonis exprimere. Simile quiddam et illic fieri puta. Nubium inter se compressarum angustiae medium spiritum emittunt, et hoc ipso inflammant, et tormenti modo eiiciunt. Nam balistae quoque et scorpiones tela cum sono expellunt.

XVII. Quidam existimant, ipsum spiritum per frigida atque humida euntem, sonum reddere. Nam ne ferrum quidem ardens silentio tingitur. Sed quemadmodum, si in aquam fervens massa descendit, cum multo murmure exstinguitur : ita, ut Anaximenes ait, spiritus incidens nubibus tonitrua edit, et dum luctatur, per obstantia et intercisiva vadens, ipsa ignem fuga accendit.

XVIII. Anaximander omnia ad spiritum retulit. Tonitrua, inquit, sunt nubis istae sonus. Quare inaequalia sunt? quia et ipse ictus inaequalis est. Quare et sereno tonat? quia tunc quoque per crassum et ficcum aëra spiritus profilit. At quare aliquando non fulgurat et tonat? quia tenuior et infirmior spiritus, qui in flammam non valuit, in sonum valuit. Quid est ergo ipsa fulguratio? aëris diducentis se, corruentisque iactatio; languidum ignem, nec exiturum aperiens. Quid est fulmen? acrioris densiorisque spiritus cursus.

XIX. Anaximandrus ait, omnia ista sic fieri, ut ex aethere aliqua vis in inferiora descendit. Ita ignis impactus nubibus frigidis sonat. At cum illas interfcindit, fulget: et minor vis ignium, fulgurationes facit, maior fulmina.

XX. Diogenes Apolloniates ait, quaedam tonitrua igne, quaedam spiritu fieri. Illa ignis facit, quae ipse antecedit et nuntiat: illa spiritus, quae sine splendore crepuerunt. Utrumque sine altero fieri, et esse aliquando, concedo: ita tamen, ut non discreta illis potestas sit, sed utrumque ab utroque effici possit: Quis enim negabit spiritum magno impetu latum, cum efficit sonum, effecturum et ignem? Quis et hoc non concedet, aliquando ignem quoque rumpere posse nubes, et non exsilire, si plurimarum acervo nubium, cum paucas perfcidisset, oppressus est? Ergo et ignis ibit in spiritum, perderque fulgorem et speciem, dum secuta in terra incendit. Adiice nunc, quod necesse est, ut impetus fulminis et praemittat spiritus, et agat ante se, et a tergo trahat ventum, cum tam vasto

iectu aëra inciderit. Itaque omnia, antequam feriantur, intremiscunt vibrata vento, quem ignis ante se pressit.

XXI. Dimissis nunc praeceptoribus, incipiamus per nos moveri, et a confessis transeamus ad dubia. Quid enim confessi est? Fulmen ignem esse: aequae fulgurationem, quae nihil aliud est, quam flamma; futura fulmen, si plus virium habuisset. Non natura ista, sed impetu distant. Esse illum ignem, calor ostendit: qui si non esset, ostendit effectus. Magnorum enim saepe incendiorum causa fulmen fuit. Silvae illo crematae, et urbium partes: etiam quae non percussa sunt, tamen adusta cernuntur: quaedam vero velut fuligine colorantur. Quid, quod omnibus fulguritis odor sulphureus est? Ergo et utramque rem ignem esse constat, et utramque rem inter se meando distare. Fulguratio est fulmen, non in terras usque perlatum. Et rursus licet dicas, fulmen esse fulgurationem, usque in terras perductam. Non ad exercendum verba haec diutius pertracto: sed ut ista cognata esse, et eiusdem notae ac naturae, probem. Fulmen est quiddam plus, quam fulguratio. Vertamus istud. Fulguratio est paene fulmen.

XXII. Quoniam constat esse utramque rem ignem, videamus quemadmodum apud nos fieri soleat ignis. Eadem enim ratione et supra fit. Duobus modis: uno, si excitatur sicut ex lapide percusso: altero, si attritu invenitur, sicut cum duo ligna inter se diutius trita sunt. Non omnis hoc tibi materia praestabit, sed idonea eliciendis ignibus: sicut laurus, hederæ, et alia in hunc usum nota pastoribus. Potest ergo fieri, ut

nubes quoque ignem eodem modo vel percussae red-  
dant, vel attritae. Videamus quantis procellae viri-  
bus ruant, quanto vertantur impetu turbines. Id in  
quod tormentum obvium fit, dissipatur, et rapitur,  
et longe a loco suo proiicitur. Quid ergo mirum, si  
tanta vis ignem excutit, vel aliunde, vel sibi? Vides  
enim quantum fervorem sensura corpora sunt, ho-  
rum transitu trita, exanimata. Nihil tamen tantum in  
his debet credi, ac in vi siderum, quorum ingens et  
confessa potentia est.

XXIII. Sed fortasse nubes quoque in nubes inci-  
tatae, fremente vento, et leviter urgente, ignem  
evocabunt, qui exsplendescat, nec exiliat. Minore  
enim vi ad fulgurandum opus est, quam ad fulminan-  
dum. Superioribus collegimus, in quantum fervo-  
rem quaedam attrita perducerentur. Cum autem aër  
mutabilis in ignem, maximis viribus suis in ignem  
conversus, atteratur, credibile est et verisimile, ig-  
nem caducum excuti, et cito interiturum, quia non  
ex solida materia oritur, nec in qua possit consistere.  
Transit itaque: tantumque habet morae, quantum  
itineris: et cursus sine alimento coniectus est.

XXIV. Quomodo, inquis, cum dicatis hanc ignis  
esse naturam, ut petat superiora, fulmen tamen ter-  
ram petit? an falsum est, quod de igne dixistis? Est  
enim illi aequae fursum iter, atque deorsum. Utrum-  
que verum potest esse. Ignis enim natura in verti-  
cem surgit, et si nihil illum prohibet, ascendit. Sicut  
aqua natura defertur: si tamen aliqua vis accessit,  
quae illam in contrarium ageret, illo intenditur, un-  
de imbre deiecta est. Fulmen autem cadit eadem ne-

cessitate, qua excutitur. Id his ignibus accidit quod arboribus: quarum cacumina si tenera sunt, ita deorsum trahi possunt, ut etiam terram attingant, sed cum permiseris, in locum suum exsiliunt. Itaque non est, quod eum spectes cuiusque rei habitum, qui illi non ex voluntate est. Si ignem permittis ire quo velit, coelum, id est, levissimi cuiusque sedem repetet: ubi est aliquid, quod eum ferat, et ab impetu suo avertat, id non natura, sed servitus eius fit.

XXV. Dicitis, inquit, nubes attritas edere ignem, cum sint humidae, immo udae: quomodo ergo possunt gignere ignem, quem non magis verisimile est ex nube, quam ex aqua generari?

XXVI. Ignis qui nascitur, primum in nubibus non est aqua, sed aër spissus, ad gignendam aquam praeparatus, nondum in illam mutatus, sed iam pronus et vergens. Non est quod eam existimes tunc colligi, sed effundi. Simul et fit, et cadit. Deinde si concessero humidam esse nubem, conceptis aquis plenam: nihil tamen prohibet, ignem ex humido quoque educi, immo ex ipso (quod magis mireris) humore. Quidam negaverunt, in ignem quidquam posse mutari, priusquam mutatum esset in aquam. Potest ergo nubes, salva, quam continet, aqua, ignem parte aliqua sui reddere: ut saepe alia pars ligni ardet, alia sudat. Nec hoc dico, non contraria inter se ista esse, et alterum altero perimi: sed ubi valentior ignis, quam humor est, vincit. Rursus ubi copia humoris exsuperat, tunc ignis sine effectu est. Itaque non ardent virentia. Refert ergo, quantum aquae sit. Exigua enim non resistit, nec ignem impedit. Quidni &



Maiorum nostrorum memoria, ut Posidonius tradit, cum insula in Aegeo mari surgeret, spumabat interdum mare, et fumus ex alto ferebatur. Nam demum prodebat ignem, non continuum, sed ex intervallis emicantem, fulminum more, quotiens ardor inferius iacentis superum pondus evicerat. Deinde saxa revoluta, rupeſque partim illaefae, quas spiritus, antequam verteretur, expulerat, partim exesae, et in levitatem pumicis versae: novissime cacumen exusti montis emicuit. Postea altitudini adiectum, et saxum illud in magnitudinem insulae crevit. Idem nostra memoria, Valerio Asiatico consule iterum accidit. Quorsus haec retuli? ut appareret, nec extinctum ignem mari superfuso, nec impetum eius, gravitate ingentis undae prohibitum exire. Ducentorum passuum fuisse altitudinem Asclepiodotus Posidonii auditor tradidit, per quam, disruptis aquis, ignis emerſit. Quod si immensa aquarum vis, subeuntem ex imo flammarum vim non potuit opprimere: quanto minus in aëre exstinguere ignem poterit, nubium tenuis humor et roscidus? Adeo res ista non habet ullam moram, quae contra causas ignium sit; quos non videmus emicare, nisi impendente coelo. Serenum sine fulmine est. Non habet istos metus dies purus, nec nox quidem, nisi obscura nubibus. Quid ergo? Non aliquando etiam apparentibus stellis, et nocte tranquilla fulgurat? Sed scias licet nubes illic esse, unde splendor effertur: quas videri a nobis terrarum tumor non finit. Adiice nunc, quod fieri potest, ut nubes sudae et humiles attritu suo ignem reddant: qui in superiora expressus, in

parte sincera puraque coeli visatur: sed fit in sordida.

XXVII. Tonitrua distinxere quidam ita, ut dicerent, unum esse genus, cuius fit grave murmur, quale terrarum motum antecedit, clauso vento et fremente. Hoc quomodo illis videatur fieri, dicam. Cum spiritum intra se clausere nubes, in concavis partibus earum volutatus aër, similem agit mugitibus sonum, raucum et aequalem, et continuum. Itaque etiam ubi illa regio humida est, exitum claudit. Ideo huiusmodi tonitrua venturi praenuntia imbris sunt. Aliud genus est acre, quod acerbum magis dixerim, quam sonorum: qualem audire solemus, cum super caput alicuius dirupta vesica est. Talia eduntur tonitrua, cum globata dissolvitur nubes, et spiritum, quo distenta fuerat, emittit. Hoc proprie fragor dicitur, subitus et vehemens: quo edito concidunt homines, et exanimantur, quidam vero vivi stupent, et in totum sibi excidunt, quos vocamus attonitos, quorum mentes sonus ille coelestis loco pepulit. Hic fieri illo quoque modo potest, ut inclusus aër cava nube et motu ipso extenuatus diffundatur. Deinde cum maiorem sibi locum quaerit, a quibus involutus est, sonum patitur. Quid autem? non quemadmodum illisae manus inter se plausum edunt, sic illisarum inter se nubium sonus potest esse magnus, quia magna concurrunt?

XXVIII. Videmus, inquit, nubes impingi montibus, nec sonum fieri. Primum omnium non quocunque modo illisae sunt, sonant, sed si apte sunt compositae ad sonum edendum. Aversae inter se manus collisae non plaudunt, sed palma cum pal-

ma collata plausum facit. Et plurimum interest, utrum cavae concutiantur, an planae et extentae. Deinde non tantum nubes ire oportet, sed agi magna vi, et procellosa. Etiam mons non scindit nubem, sed dirigit, et primam quamque partem eius solvit. Ne vesica quidem, quocunque modo spiritum emisit, sonat. Si ferro divisa est, sine ullo aurium sensu exit. Rumpi illam oportet, ut sonet, non secari. Idem de nubibus dico: nisi multo impetu dissiluire, non sonant. Adice nunc, quod nubes in monte actae, non franguntur, sed circumfunduntur in aliquas partes montis, arboris ramos, frutices, aspera saxa et eminentia. Et ita discutuntur, et si quem habent spiritum, multifariam emittunt: qui nisi universus erumpit, nec crepat. Hoc ut scias, ventus qui circa arborem funditur, sibilat, non tonat. Lato (ut ita dicam) ictu, et totum globum semel dissipante opus est, ut sonitus erumpat: qualis auditur cum tonat.

XXIX. Praeter haec natura aptus est aër ad voces. Quidni? cum vox nihil aliud sit, quam ictus aër. Debent ergo nubes utrimque dissecari, et cavae et intentae. Vides enim quanto vocaliora sunt vacua quam plena, quanto intentae quam remissae. Ita tympana et cymbala sonant: quia illa repugnantem ex ulteriore parte spiritum pulsant, haec ad ipsum aërem actae, nisi concavo, non tinniunt.

XXX. Quidam, inter quos Asclepiodotus est, iudicant sic, quorundam quoque corporum concursu tonitrua et fulmina excuti posse. Aetna aliquando multo igne abundavit: ingentem vim arenae

urentis effudit. Involutus est dies pulvere, populosque subita nox terruit. Illo tempore aiunt plurima fuisse tonitrua et fulmina: quae concursu aridorum corporum facta sunt, non nubium: quas verisimile est, in tanto fervore aëris, nullas fuisse. Aliquando Cambyfes ad Ammonem misit exercitum: quem arena Austro mota, et more nivis incidens, texit, deinde obruit. Tunc quoque verisimile est fuisse tonitrua fulminaque, attritu arenae sese affricantis. Non repugnat proposito nostro ista opinio. Diximus enim, utriusque naturae corpora efflare terras, et sicci aliquid et humidi in toto aëre vagari. Itaque si quid tale intervenit, nubem facit solidiorem crassioremque, quam si tantum simplici spiritu intexeretur. Illa frangi potest, et edere sonum: ista quae dixi, sive incendiis vaporantibus aëra repleverunt, sive ventis terras verrentibus, necesse est nubem faciant antequam sonum. Nubem autem tam arida quam humida conferunt. Est autem nubes (ut diximus) spissitudo aëris crassi.

XXXI. Ceterum mira fulminis, si intueri velis, opera sunt, nec quidquam dubii relinquentia, quin divina insit illis et subtilis potentia. Loculis integris ac illaesis conflatur argentum. Manente vagina, gladius liquefcit. Et inviolato ligno, circa pila ferrum omne distillat. Stat fracto dolio vinum, nec ultra tri-duum rigor ille durat. Illud aequè inter annotanda ponas licet, quod et hominum, et ceterorum animalium quae ista sunt, caput spectat ad exitum fulminis: quod omnium percussarum arborum contra fulmina hastulae surgunt. Quid, quod malorum ser-

pentium, et aliorum animalium, quibus mortifera vis inest, cum fulmine icta sunt, venenum omne consumitur? Unde, inquit, scis? in venenatis corporibus vermis non nascitur. Fulmina icta, intra dies verminant.

XXXII. Quid, quod futura portendunt: nec unius tantum aut alterius rei signa dant, sed saepe totum fatorum sequentium ordinem nuntiant, et quidem decretis evidentibus, longeque clarioribus, quam si scriberentur? Hoc autem inter nos et Tuscus, quibus summa persequendorum fulminum est scientia, interest. Nos putamus, quod nubes collisae sunt, ideo fulmina emitti. Ipsi existimant, nubes collidi, ut fulmina emittantur. Nam cum omnia ad Deum referant, in ea sunt opinione, tanquam, non quia facta sunt, significant; sed quia significatura sunt, fiant: eadem tamen ratione fiunt, siue illis significare propositum est, siue consequens. Quomodo ergo significant, nisi a Deo mittantur? Quomodo aves non in hoc motae, ut nobis occurrerent, dextrum auspiciam, sinistramve fecerunt. Et illas, inquit, Deus movit. Nimis illum otiosum, et pusillae rei ministrum facis, si aliis somnia, aliis exta disponit. Ista nihilominus divina ope geruntur. Sed non a Deo pennae avium reguntur, nec pecudum viscera sub ipsa securi formantur. Alia ratione fatorum series explicatur, indicia venturi ubique praemittens, ex quibus nobis quaedam familiaria, quaedam ignota sunt. Quidquid fit, alicuius rei futurae signum est: fortuita, et sine ratione vaga, divinationem non recipiunt. Cuius rei ordo est,



etiam praedictio est. Cur ergo aquilae hic honor datus est, ut magnarum rerum faceret auspicia: aut corvo, aut paucissimis avibus: ceterarum sine praefagio vox est? Quia quaedam in artem nondum redacta sunt. Quaedam vero ne redigi quidem possunt, ob nimium remotam conversationem. Ceterum nullum animal est, quod non motu et occursum suo praedicat aliquid. Non omnia scilicet, sed quaedam notantur. Auspicium est observantis. Ad eum itaque pertinet, qui in ea direxerit animum. Ceterum et illa quae pereunt. Quinque stellarum potestatem Chaldaeorum observatio excepit. Quid tu? tot millia siderum iudicas otiosa lucere? Quid est porro aliud, quod errorem incutiat peritis natalium, quam quod paucis nos sideribus assignant: cum omnia quae supra nos sunt, partem sibi nostri vindicent? Submissiora forsitan in nos propius vim suam dirigunt; et ea quae frequentius mota, aliter nos, aliter cetera animalia prospiciunt. Ceterum et illa quae aut immota sunt, aut propter velocitatem universo mundo parem immotis similia, non extra ius dominiumque nostri sunt. Aliud aspice, et distributis rem efficis, tractas. Non magis autem facile est, scire quid possint, quam dubitari debet, an possint.

XXXIII. Nunc ad fulmina revertamur: quorum ars in tria dividitur: quemadmodum exploremus, quemadmodum interpretemur, quemadmodum exoremus. Prima pars ad formulam spectat; secunda, ad divinationem; tertia, ad propitiandos deos: quos bona rogare oportet, mala deprecari. Rogare, ut

promissa firment: deprecari, ut remittant minas.

XXXIV. Summam esse vim fulminum iudicant: quia quidquid alia portendunt, interventus fulminis tollit. Quidquid ab hoc portenditur, fixum est, nec alterius ostenti significatione minuitur. Quidquid exta, quidquid aves minabuntur, secundo fulmine abolebitur. Quidquid fulmine denuntiatum est, nec extis, nec ave contraria refellitur. In quo mihi falli videntur. Quare? quia vero verius nihil est. Si aves futura cecinerunt, non potest hoc auspiciū fulmine irritum fieri: aut si potest, non futura cecinerunt. Non enim nunc avem comparo et fulmen, sed duo veri signa: quae si verum significant, paria sunt. Itaque si fulminis interventus submovet extorum vel augurum iudicia, male inspecta exta, male observata auguria sunt. Non enim refert, utrius rei maior potentiorve natura sit, si utraque res veri attulit signum, quantum ad hoc par est. Si dicas, flammae vim maiorem esse, quam fumi, non mentieris: sed ad indicandum ignem, idem valet flamma, quod fumus. Itaque si hoc dicunt, quoties exta aliud significabunt, aliud fulmina, fulminum erit auctoritas maior, fortasse consentiam: sed si hoc dicunt, quamvis altera signa verum praedixerint, fulminis ictus priora delevit, et ad se fidem traxit, falsum est. Quare? quia nihil interest, quam multa auspicia sint. fatum unum est: quod si bene primo auspicio intellectum est, secundo non interit: idem est. Ita dico, non refert, idem an aliud sit, per quod quaerimus: quoniam de quo quaerimus, idem est.

XXXV. Fatum fulmine mutari non potest. Quid-

ni ? Nam fulmen ipsum fati pars est. Quid ergo expiationes , procurationesque , quo pertinent , si immutabilia sunt fata ? Permitte mihi illam rigidam sectam tueri eorum , qui excipiunt ista , et nihil aliud esse existimant , quam aegrae mentis solatia. Fata aliter ius suum peragunt , nec ulla commoventur prece , non misericordia flectuntur , non gratia. Servant cursum irrevocabilem , ex destinato fluunt. Quemadmodum rapidorum aqua torrentium in se non recurrit , nec moratur quidem , quia priorem superveniens praecipitat : sic ordinem rerum fati aeterna series rotat , cuius haec prima lex est , stare decreto.

XXXVI. Quid enim intelligis fatum ? Existimo necessitatem rerum omnium actionumque , quam nulla vis rumpat. Hanc si sacrificiis , et capite niveae agnae , exorari iudicas : divina non nosti. Sapientis quoque viri sententiam negatis posse mutari. Quanto magis Dei ? cum sapiens quid sit optimum in praesentia sciat , illius divinitati omne praesens sit. Agere tamen nunc eorum volo causam , qui procuranda existimant fulmina : et expiationes non dubitant prodesse , aliquando ad submovenda pericula , aliquando ad levanda , aliquando ad differenda.

XXXVII. Quid sit quod sequitur , paulo post prosequar. Interim hoc habent commune nobiscum , quod nos quoque existimamus vota proficere , salva vi ac potestate factorum. quaedam enim a diis immortalibus ita suspensa relictæ sunt , ut in bonum ver-  
tant , si admotæ diis preces fuerint , si vota suscepta. Ita non est hoc contra fatum , sed ipsum quoque in fato est. Aut futurum , inquit , est , aut non. Si futu-

rum est, etiam si non susceperis vota, fiet. Si non est futurum, etiam si susceperis vota, non fiet. Falsa est ista interrogatio: quia illam mediam inter ista exceptionem praeteris. Futurum, inquam, hoc est, sed si vota suscepta fuerint. Hoc quoque necesse, inquit, est, fato comprehensum sit, aut suscipias vota, aut non.

XXXVIII. Puta me tibi manus dare, et fateri, hoc quoque fato esse comprehensum, ut utique fiant vota. Ideo fient. Fatum est, ut hic disertus sit, sed si literas didicerit: ab eodem fato continetur, ut literas discat: ideo discet. Hic dives erit, sed si navigaverit. At in illo fati ordine, quo patrimonium illi grande promittitur, hoc quoque protinus fatum est, ut naviget: ideo navigabit. Idem dico tibi de expiationibus. Effugiet pericula, si expiaverit praedictas divinitus minas. At hoc quoque in fato est, ut expiet: ideo expiabit. Ista nobis opponi solent, ut probetur nihil voluntati nostrae relictum, et omne ius fato traditum. Cum de ista re agetur, dicam, quemadmodum, inanente fato, aliquid sit in hominis arbitrio. Nunc vero id de quo agitur, explicavi, quomodo si fati certus est ordo, expiationes procurationesque prodigiorum, pericula avertant: quia cum fato non pugnant, sed ipsa lege fati fiunt. Quid ergo, inquis, aruspex mihi prodest? Utique enim expiare, etiam non suadente illo, mihi necesse est. Hoc prodest, quod fati minister est. Sic cum sanitas videatur esse de fato, debetur et medico: quia ad nos beneficium fati per huius manus venit.

XXXIX. Genera fulminum tria esse ait Caecinna:

Consiliarium, Auctoritatis, et quod Status dicitur. Consiliarium ante rem fit, sed post cogitationem: cum aliquid in animo versantibus, aut suadetur fulminis ictu, aut dissuadetur. Auctoritatis est, ubi post rem factam venit, quam futuram bono malove significat. Status est, ubi quietis, nec agentibus quidquam, nec cogitantibus quidem, fulmen intervenit. Hoc aut minatur, aut promittit, aut monet. Hoc monitorium vocat: sed nescio quare non idem sit, quod consiliarium. Nam et qui monet, consilium dat: sed habet aliquam distinctionem. Ideoque separatur a consiliario: quia illud suadet dissuadetque, hoc solam impendentis periculi evitationem continet. Ut cum timeamus ignem aut fraudem a proximis, aut insidias a servis. Etiamnum tamen aliam distinctionem utriusque video: Consiliarium est, quod cogitanti factum est: monitorium, quod nihil cogitanti. Habet autem utraque res suam proprietatem. Suadetur deliberantibus, at ultro monentur.

XL. Primo omnium non sunt fulminum genera, sed significationum. Nam fulminum genera sunt illa, quod terebrat, quod discutit, quod urit. Quod terebrat, subtile est et flammeum, cui per angustissimum fuga est, ob sinceram et puram flammae tenuitatem. Quod dissipat, conglobatum est, et habet admixtam vim spiritus coacti et procellosi. Itaque illud fulmen per id foramen, quod ingressum est, redit et evadit. Huius late sparsa vis, rumpit icta, non perforat. Tertium illud genus, quod urit, multum terreni habet, et igneum magis est quam flammeum. Itaque relinquit magnas ignium notas, quae percussis



inhaereant. Nullum quidem sine igni fulmen venit : sed hoc proprie igneum dicimus, quod manifesta ardoris vestigia imprimit. Quod aut urit, aut fuscatur, tribus modis urit : aut enim afflat, et leni iniuria laedit, aut comburit, aut accendit. Omnia ista urunt, sed genere et modo differunt. Quodcunque combustum est, utique et ustum est. At non omne quod ustum, utique et combustum est. Item quod accensum est. potest enim illud ipso transitu ignis ussisse. Quis nescit quaedam uri quidem, nec ardere? Nihil autem potest ardere, quod non uratur. Unum hoc adiciam. Potest aliquid esse combustum, quod non sit accensum. potest accensum esse, nec combustum.

XLI. Nunc ad id transeo genus fulminis, quo ista fuscantur. Hoc aut decolorat, aut colorat. Utrique distinctionem suam reddam. Decoloratur, id cuius color vitatur, non mutatur. Coloratur, id cuius alia sit quam fuit facies : tanquam caerulea, vel nigra, vel pallida. Haec adhuc Etruscis et philosophis communia sunt. In illo dissentiunt, quod fulmina dicunt a Iove mitti, et tres illi manubias dant. Prima ( ut aiunt ) monet, et placata est, et ipsius consilio Iovis mittitur. Secundam mittit quidem Iupiter, sed ex consilii sententia. duodecim enim deos advocat. Hoc fulmen boni aliquid aliquando facit, sed tunc quoque non aliter, quam ut noceat. Ne prodest quidem impune. Tertiam manubiam idem Iupiter mittit : sed adhibitis in consilium diis, quos superiores et involutos vocant. Quae vastat et includit, et mutat statum privatum utique et publicum, quem invenit. Ignis enim nihil esse, quod sit, patitur.

XLII. In his prima specie si intueri velis, errat antiquitas. Quid enim tam imperitum est, quam credere fulmina e nubibus Iovem mittere, columnas, arbores, statuas suas nonnunquam petere, ut, impunitis sacrilegis, percussis ovibus, incensis aris, pecudes innoxias feriat, et ad suum consilium a Iove deos, quasi in ipso parum consilii sit, advocari: illa laeta et placata esse fulmina, quae solus excutiat: perniciofa, quibus mittendis maior numinum turba interfuit? Si quaeris a me, quid sentiam, non existimo tam hebetes fuisse, ut crederent Iovem, aut non aequae voluntatis, aut certe minus paratum esse. Utrum enim cum emisit ignes, quibus innoxia capita percuteret, scelerata transfiret, aut noluit iustius mittere, aut non successit? Quid ergo secuti sunt, cum hoc dicerent? Ad coercendos animos imperitorum, sapientissimi viri iudicaverunt inevitabilem metum, ut supra nos aliquid timeremus. Utile erat in tanta audacia scelerum aliquid esse, adversum quod nemo sibi satis potens videretur. Ad conterrendos itaque eos, quibus innocentia nisi metu non placet, posuere super caput vindicem, et quidem armatum.

XLIII. Quare ergo id fulmen quod solus Iupiter mittit, placabile est: perniciosum id, de quo deliberavit, et quod aliis quoque diis auctoribus misit? Quia Iovem, id est, regem, prodesse etiam solum oportet, nocere non, nisi cum pluribus visum est. Discant hoc ii, quicumque magnam potentiam inter homines adepti sunt, sine consilio nec fulmen quidem mitti: advocent, considerent multorum sententias, placita temperent, et hoc sibi proponant, ubi

aliquid percuti debet, ne Iovi quidem suum fati  
esse consilium.

XLIV. In hoc quoque tam imperiti non fuere, ut  
Iovem existimarent tela mutare. poëticam ista licen-  
tiam decent.

*Est aliud levius fulmen, cui dextra Cyclopus,  
Saevitiae flammaeque minus, minus addidit irae.  
Tela secunda vocant superi. ———*

Illos vero altissimos viros error iste non tenuit, ut  
existimarent, Iovem modo levioribus fulminibus et  
lusoriis uti: sed voluerunt admonere eos quibus ad-  
versus peccata hominum fulminandum est, non co-  
dem modo omnia esse percutienda: quaedam frangi  
debere, quaedam elidi et distringi, quaedam ad-  
moveri.

XLV. Ne hoc quidem crediderunt, Iovem, qualem  
in Capitolio et in ceteris aedibus colimus, mittere  
manu fulmina, sed eundem quem nos Iovem intel-  
ligunt, custodem rectoremque universi, animum ac  
spiritum, mundani huius operis dominum et artifi-  
cem, cui nomen omne convenit. Vis illum fatum  
vocare? non errabis. Hic est, ex quo suspensa sunt  
omnia, causa causarum. Vis illum providentiam di-  
cere? recte dices. Est enim, cuius consilio huic  
mundo providetur, ut inconfusus eat, et actus suos  
explicet. Vis illum naturam vocare? non peccabis.  
Est enim, ex quo nata sunt omnia, cuius spiritu vivi-  
mus. Vis illum vocare mundum? non falleris. Ipse  
enim est, totum quod vides, totus suis partibus in-

ditus, et se sustinens vi sua. Idem Etruscis quoque visum est: et ideo fulmina a Iove mitti dixerunt, quia sine illo nihil geritur.

XLVI. At quare Iupiter aut ferienda transit, aut innoxia ferit? In maiorem me quaestionem vocas: cui suus locus, suus dies dandus est. Interim hoc dico, fulmina non mitti a Iove, sed sic omnia disposita, ut ea etiam quae ab illo non fiunt, tamen sine ratione non fiant; quae illius est. Vis eorum, illius permissio est. Nam etsi Iupiter illa nunc non facit, fecit ut fierent. Singulis non adest: sed signum, et vim, et causam dedit omnibus.

XLVII. Huic illorum divisioni non accedo. Aiunt aut perpetua, aut finita esse fulmina, aut prorogativa. Perpetua, quorum significatio in totam vitam pertinet; nec unam rem id enuntiat, sed contextum rerum per omnem deinceps aetatem futurarum complectitur. Haec sunt fulmina, quae prima accepto patrimonio, et in novo hominis aut urbis statu fiunt. Finita ad diem utique respondent. Prorogativa sunt, quorum minae differri possunt, averti tollique non possunt.

XLVIII. Dicam quid sit, quare huic divisioni non consentiam. Nam et quod perpetuum vocant fulmen, finitum est. Aequae enim talia ad diem respondent. Nec ideo finita non sunt, quia multum tempus significant. Et quod prorogativum videtur, finitum est. Nam illorum quoque confessione certum est, quousque impetretur dilatio. Privata enim fulmina negant ultra decimum annum, publica ultra tricesimum posse deferri. Hoc modo et ista finita sunt: quia ultra

quod non prorogentur, inclusum est. Omnium ergo fulminum et omnis eventus dies statuta est. Non potest enim ulla incerti esse comprehensio. Quae inspicienda sunt in fulgure, passim et vage dicunt, cum possint sic dividere, quemadmodum ab Attalo philosopho, qui se huic disciplinae dederat, divisa sunt, ut inspiciatur ubi factum sit, quando, cui, in qua re, quale, quantum. Haec si digerere in partes suas voluero, quid postea faciam, nisi in immensum procedam?

XLIX. Nunc nomina fulminum, quae a Caecinna ponuntur, perstringam: et quid de his sentiam, exponam. Ait esse postulatoria, quibus sacrificia intermissa, aut non rite facta repetuntur. Monitoria, quibus docetur, quid cavendum sit. Pestifera, quae mortem exiliumque portendunt. Fallacia, quae per speciem alicuius boni nocent. Dant consulatum, malo futurum gerentibus; et hereditatem, cuius compendium magno sit luendum incommodo. Deprecanea, quae speciem periculi sine periculo afferunt. Peremtalia, quibus tolluntur priorum fulminum minae. Attestata, quae prioribus consentiunt. Atterranea, quae in incluso fiunt. Obruta, quibus iam prius percussa nec procurata feriuntur. Regalia, quorum vi tangitur vel comitium, vel principalia urbis liberae loca: quorum significatio regnum civitati minatur. Inferna, cum e terra exsiliunt ignes. Hospitalia, quae sacrificiis ad nos Iovem arcessunt, et (ut verbo eorum molliori utar) invitant. sed si irascente domino invitant, tunc venire cum magno invitantium periculo affirmat. Auxi-



liaria, quae advocata, sed advocantium bono veniunt.

L. Quanto simplicior divisio est, qua utebatur Attalus noster, egregius vir, qui Etruscorum disciplinam Graeca subtilitate miscuerat. Ex fulminibus quaedam sunt, quae significant id quod ad nos pertinet: quaedam aut nihil significant, aut id cuius intellectus ad nos non pervenit. Ex his quae significant, quaedam sunt laeta, quaedam adversa, quaedam nec adversa nec laeta. Adversorum hae species sunt. Aut inevitabilia mala portendunt, aut evitabilia, aut quae minui possunt, aut quae prorogari. Laeta aut mansura significant, aut caduca. Mixta aut partem habent boni, partem mali; aut mala in bonum, aut bona in malum vertunt. Nec adversa nec laeta sunt, quae aliquam nobis actionem significant, qua nec terreri nec laetari debemus: ut peregrinationem in qua nec metus, nec spei quidquam sit.

LI. Revertar ad ea fulmina, quae significant quidem aliquid, sed quod ad nos non pertineat. tanquam, utrum eodem anno idem futurum sit fulmen, quod factum est. Nihil significant fulmina, aut id cuius notitia nos effugit: ut illa quae in vastum mare sparguntur, aut in desertas solitudines: quorum significatio vel nulla est, vel perit.

LII. Pauca adhuc adiiciam ad enarrandam vim fulminis, quae non eodem modo omnem materiam vexat. Valentiora, quia resistunt, vehementius dissipat: cedentia nonnunquam sine iniuria transit. Cum lapide ferroque, et durissimis quibusque, confligit:

quia viam necesse est per illa impetu quaerat. Itaque facit viam qua effugiat. teneris et rarioribus parcit, quanquam et flammis opportuna videantur: quia transitu patente minus saevit. Loculis itaque, ut dixi, integris, pecunia quae in his fuerat, conflata reperitur: quia ignis tenuissimus per occulta foramina transcurrit. Quidquid autem in tigno solidum invenit, ut contumax vincit. Non uno autem, ut dixi, modo saevit: sed quid quaeque vis fecerit, ex ipso genere iniuriae intelligis, et fulmen opere cognoscis. Interdum in eadem materia, multa diversa, eiusdem vis fulminis facit: sicut in arbore, quod aridissimum est, urit: quod solidissimum et durissimum est, terebrat et frangit: summos cortices dissipat, interiores libros interioris arboris rumpit ac scindit, folia perstringit ac tundit: vinum gelat, ferrum et aes fundit.

LIII. Illud est mirum, quod vinum fulmine gelatum, cum ad priorem habitum redit, potum aut exanimat, aut dementes facit. Quare id accadat quaerenti mihi, illud occurrit. Inest fulmini vis pestifera. Ex hoc aliquem remanere spiritum in eo humore quem coëgit gelavitque, verisimile est. Nec enim alligari potuisset, nisi aliquod illi esset additum vinculum. Praeterea olei quoque, et omnis unguenti, taeter post fulmen odor est. Ex quo apparet, inesse quandam subtilissimo igni, et contra naturam actio, pestilentem potentiam, quo non tantum ista cadunt, sed etiam afflata. Praeterea quocumque decidit fulmen, ibi odorem sulphuris esse certum est: qui quia natura gravis est, saepius haustus alienat. Sed ad

hoc vacui revertemur. Fortasse enim libebit ostendere, quantum omnia ista a philosophia artium parente fluxere. Illa primum et quaesivit causas rerum, et observavit effectus: et quod fulminis inspectione longe melius est, initiis rerum exitus contulit.

LIV. Nunc ad opinionem Posidonii revertar. E terra terrenisque omnibus pars humida efflatur, pars sicca et fumida. Haec fulminibus alimentum est: illa imbris. Quidquid in aëra sicci fumosque pervenit, id includi se nubibus non fert, sed rumpit claudentia. Inde est sonus, quem nos tonitruum vocamus. In ipso quoque aëre quidquid attenuatur, simul siccatur et calet. Hoc quoque si inclusum est, aequae fugam quaerit, et cum sono evadit. Et modo universam eruptionem facit, eoque vehementius intonat: modo per partes et minutatim. Ergo tonitrua hic spiritus exprimit, dum aut rumpit nubes, aut pervolat. Volutatio autem spiritus, in nube conclusi, valentissimum est accendendi genus.

LV. Tonitrua nihil aliud sunt, quam sicci aëris sonitus, qui fieri, nisi dum aut terit, aut rumpitur, non potest. Et si colliduntur, inquit, nubes inter se, fit is quem desideras ictus, sed non universus. Neque enim tota totis concurrunt, sed partibus partes. Nec sonant mollia, nisi illisa duris sint. Itaque non auditur fluctus, nisi impactus. Ignis, inquit, missus in aquam, sonat, dum exstinguitur. Puta ita esse. pro me est. Non enim ignis tunc sonum efficit, sed spiritus per exstinguentia effugiens. Utdem tibi, et fieri ignem in nube, et exstingui, e spiritu nascitur et attritu. Quid ergo? inquit. non po-

test aliqua ex his transcurrentibus stellis incidere in nubem, et exstingui? Existimemus posse aliquando et hoc fieri. Nunc naturalem causam quaerimus et assiduam, non raram et fortuitam. Puta me confiteri verum esse, quod dicis, aliquando post tonitrua emicare ignes, stellis transversis et cadentibus similes. Non ob hoc tonitrua facta sunt: sed cum hoc fieret, tonitrua facta sunt. Clidemus ait, fulgurationem speciem inanem esse, non ignem. Sic enim per noctem splendorem motu remorum videri. Dissimile est exemplum. illic enim splendor intra ipsam aquam apparet: hic qui fit in aëre, erumpit et exsilit.

LVI. Heraclitus existimat fulgurationem esse velut apud nos incipientium ignium conatus, et primum flammam incertam, modo intereuntem, modo resurgentem. Haec antiqui fulgetra dicebant: tonitrua nos pluraliter dicimus. Antiqui aut tonitruum dixerunt, aut tonum. Hoc apud Caecinnam invenio, facundum virum; qui habuisset aliquod in eloquentia nomen, nisi illum Ciceronis umbra pressisset. Etiamnum illo verbo utebantur antiqui, correpto, quo nos producta una syllaba utimur. Dicimus enim ut splendere, sic fulgere. At illis ad significandum hanc e nubibus subitae lucis eruptionem mos erat, media syllaba correpta, ut dicerent fulgere.

LVII. Quid ipse existimem, quaeris? Adhuc enim alienis opinionibus accommodavi manum. Dicam: Fulgurat, cum repentinum late lumen emicuit. Id evenit, ubi in ignem extenuatus in nubibus aër

vertitur, nec vires, quibus longius profiliat, invenit. Non miraris, putę, si aëra aut motus extenuat, aut extenuatio incendit. Sic liquefcit excuffa glans funda, et attritu aëris velut igne diffillat. Ideo aestate plurima fiunt fulmina, quia plurimum calidi est. Facilius autem attritu calidorum ignis exiftit. Eodem modo fit fulgor qui tantum splendet, et fulmen quod mittitur. Sed illi levior vis, alimenti-que est minus. Et, ut breviter dicam quod sentio: Fulmen est fulgur intentum. Ergo ubi calidi fumidique natura, emiffa terris, in nubes incidit, et diu in illarum finu volutata est, noviffime erumpit. Et quia vires non habet, splendor est. At ubi fulgura plus habuere materiae, et maiore impetu arferunt, non apparent tantum, fed decidunt.

LVIII. Quidam utique exiftimant fulmen reverti: quidam fubfidere, ubi alimenta praegravaverunt, et fulmen ictu languidiore delatum est. At quare fulmen fubitum apparet, nec continuatur affiduus ignis? Quia celerrimi motus est: fimul et nubes rumpit, et aëra incendit. Deinde definit flamma quiefcente motu. Non enim est affiduus fpiritus curfus, ut ignis poffit extendi, fed quoties fortius ipfa iactatione fe accendit, fugiendi impetum capit. Deinde cum evafit, et pugna defuit, ex eadem caufa modo ufque ad terram profertur, modo diffolvitur, fi minore vi depreffus est. Quare oblique fertur? Quia fpiritu conftat. Spiritus obliquus est, flexuofusque. Et quia natura ignem furfum vocat, iniuria deorfum premit, incipit obliquus efle. Interdum dum neutra vis alteri cedit, et ignis in fu-



periora nititur, et in inferiora deprimitur. Quare frequenter cacumina montium feriuntur? Quia opposita sunt nubibus, et e coelo cadentibus, per haec transeundum est.

LIX. Intelligo quid iam dudum desideres, quid efflagites. Malo, inquis, fulmina non timere, quam nosse. Itaque alios doce, quemadmodum fiant. Ego mihi metum illorum excuti volo, quam naturam indicari. Sequar quo vocas. omnibus enim rebus, omnibusque sermonibus aliquid salutare miscendum est. Cum imus per occulta naturae, cum divina tractamus, vindicandus est a malis suis animus, ac subinde firmandus: quod etiam eruditis, et hoc unum agentibus, necessarium est: non ut effugiamus ictus rerum; (undique enim tela in nos iaciuntur) sed ut fortiter constanterque patiamur. Inviçti esse possumus, inconcussi non possumus: quanquam interim spes subit, inconcussos quoque esse nos posse. Quemadmodum, inquis? Contemne mortem; et omnia quae ad mortem ducunt, contemta sunt: sive illa bella sint, sive naufragia, seu morsus ferarum, seu ruinarum subito lapsu procidentium pondera. Numquid amplius facere possunt, quam ut corpus ab anima resolvant? Hæc nulla diligentia evirat, nulla felicitas domat, nulla potentia evincit. Alia varia forte disponuntur: mors omnes aequè vocat. Iratis diis propitiisque moriendum est: animus ex ipsa desperatione fumatur. Ignavissima animalia, quae natura ad fugam genuit, ubi exitus non patet, tentant fugam corpore imbelli. Nullus perniciosior hostis est, quam quem audacem angustiae faciunt:

longeque violentius semper ex necessitate, quam ex virtute corrumpitur. Maiora, aut certe paria, conatur animus magnus ac perditus. Cogitemus, nos, quantum ad mortem, proditos esse: et sumus. Ita est, Lucili. Omnes reservamur ad mortem. Totum hunc quem vides populum, quos usquam cogitas esse, cito natura revocabit et condet: nec de re, sed de die queritur. Eodem citius tardiusve veniendum est. Quid ergo? Non tibi timidissimus omnium videtur, et insipientissimus, qui magno ambitu rogat moram mortis? Nonne contemneres eum, qui inter perituros constitutus, beneficii loco peteret, ut ultimus cervicem praeberet? Idem facimus. Magno aestimamus, mori tardius. In omnes constitutum est capitale supplicium, et quidem constitutione iustissima. Nam, quod maximum solet esse solatium extrema passuris, quorum eadem causa, fors eadem est. Sequeremur traditi a iudice aut magistratu, et carnifici nostro praestaremus obsequium: quid interest, utrum ad mortem iussi eamus, an ultronei? O te dementem, et oblitum fragilitatis tuae, si tunc mortem times, cum tonat! Itane salus tua in hoc vertitur? Vives, si fulmen effugeris? Petet te gladius, petet lapis, petet febris. Non maximum ex periculis, sed speciosissimum fulmen est. Male scilicet erit actum tecum, si sensum mortis tuae celeritas infinita praevenierit, si mors tua procurabitur, si ne tunc quidem cum expiras, supervacuum, sed alicuius magnae rei signum es. Male scilicet tecum agitur, si cum fulmine conderis. Sed pavescis ad coeli fragorem, et ad inane nubilum trepidas, et quoties aliquid effulsit, exspiras.

ras. Quid ergo? honestius iudicas deiectione animi perire quam fulmine? Eo itaque fortior adversus coeli minas surge, et cum mundus undique exarserit, cogita te nihil habere de tanta mole perdendum. Quod si tibi parari credis illam coeli confusionem, illam tempestatum discordiam, si propter te ingestae illisaeque nubes strepunt, si in tuum exitium tanta vis ignium excutitur: at tu solatii loco numera tanti esse mortem tuam. Sed non erit huic cogitationi locus. Casus iste donat metum. Est inter cetera quoque hoc commodum eius, quod expectationem tuam antecedit. Nemo unquam fulmen timuit, nisi qui effugit.

---

L. ANNAEI SENECAE

## AD LUCILIUM

NATURALIUM QUAESTIONUM

LIBER III.

QUI EST DE AQUIS.

A R G U M E N T U M.

Anitio dolet tam sero ad studium naturae accessisse, cum satius sit Dei opera, quam Philippi aut Alexandri latrocinia celebrare. Aquarum deinde tractationem, a divisione in dulces & medicatas, instituit. Negat fontes & flumina ex imbribus nasci, quia experimento proprio didicit maximas pluviarum non ultra decem pedes terram madefacere. Terram igitur potius in aquas mutabilem facit. Thaletem, qui terram aqua, more navigii vehit, ineptire dicit: sed telluris corpus instar humani esse, in quo venae aquarum, ceu sanguinis, arteriae spiritus sint conceptacula. Quidam etiam fontes implentur aut deplentur certis horis aut mensibus, quomodo quartana ad horam venit, aut podagra ad tempus respondet. Ab aquis ad pisces transit, & aliquantulum circa mullos adhæret; quos lu-

*xuria Romana Euripis sub mensas fluentibus exemptos, & vitreis ollis inclusos, vario & maculoso colore, id est, picta & formosa morte exspirantes spectabat, oculosque pascebat ante gulam. Redit dein ad aquas, & de earum medicaminibus & miraculis plurima ex Aristotele & aliunde permiscet. Ad diluvia postremo & fatales aquarum inundationes gressum movet. Ea evenire, cum mare, flumina, coelum in exitium humani generis conspiraverint. Oceanus deinde & omnis aquarum illa eluvies in sedes suas revocatur, redditurque iterum terris homo inscius scelerum; qui tamen in innocentia sua non diurnat, & cito redit in nequitiam.*

P R A E F A T I O.

**N**ON praeterit me, Lucili virorum optime, quam magnarum rerum fundamenta ponam senex, qui mundum circuire constitui, et causas secretaque eius eruere, atque aliis noscenda prodere. Quando tam multa consequar? tam sparsa colligam? tam occulta perspiciam? Premit a tergo senectus, et obiicit annos inter vana studia consumptos. tanto magis urgeamus, et damna aetatis male exemptae labor farciat. Nox ad diem accedat. Occupationes recidantur: patrimonii longe a domino iacentis cura solvatur: sibi totus animus vacet, et ad contemplationem sui saltem in ipso fugae impetu respiciat. Faciet, ac sibi instabit, et quotidie brevitatem temporis metietur. Quidquid amissum est, id diligenti usu praesentis vitae recolliget. Fidelissimus est ad honesta ex poenitentia trans-



itus. Libet mihi exclamare illum poëtae inclyti  
versum :

*Tollimus ingentes animos, & maxima parvo  
Tempore molimur. ———*

Hoc dicerem, si puer iuvenisse molirer. Nullum enim non tam magnis rebus tempus angustum est. Nunc vero ad rem seriam, gravem, immensam, post meridianas horas accessimus. Faciamus quod in itinere fieri solet. Qui tardius exierunt, velocitate pensant moram. Festinemus, et opus nescio an superabile, magnum certe, sine aetatis excusatione tractemus. Crescit animus, quoties coepti magnitudinem attendit, et cogitat, quantum proposito, non quantum sibi supersit. Consumere se quidam, dum acta regum externorum componunt, quaeque passi invicem auferunt sunt populi. Quanto satius est, sua mala extinguere, quam aliena posteris tradere? Quanto potius deorum opera celebrare, quam Philippi aut Alexandri latrocinia, ceterorumque, qui exitio gentium clari, non minores fuere pestes mortalium, quam inundatio, qua planum omne perfusum est; quam conflagratio, qua magna pars animantium exaruit? Quemadmodum Hannibal superaverit Alpes, scribunt: quemadmodum confirmatum Hispaniae claudibus bellum Italiae inopinatus intulerit: fractisque rebus etiam post Carthaginem pertinax, reges pererraverit, contra Romanos ducem se promittens, etiam sine exercitu. quemadmodum non desierit senex omnibus angulis bellum quaerere. adeo sine patria esse pati poterat, sine hoste non poterat. Quanto

fatius, quid faciendum sit, quam quid factum sit; quaerere; ac docere eos qui sua permisere fortunae, nihil stabile ab illa datum esse, eius omnia fluere aura mobilius? nescit enim quiescere, gaudet laetis tristitia sustinere, et utraque miscere. Itaque in secundis nemo confidat, in adversis nemo deficiat. alternae sunt vices rerum. Quid exsultas? Ista quibus vetheris in summum, nescis ubi te relictura sint: habebunt suum, non tuum, finem. Quid iaces? ad imum delatus es: nunc est resurgendi locus. In melius adversa, in deterius optata flectuntur. Ita concipienda est animo varietas, non privatarum tantum domuum, quas levis casus impellit, sed etiam publicarum. Regna ex infimo coorta supra imperantes constituerunt. Vetera imperia in ipso flore cecidere. Iniri non potest numerus, quam multa ab aliis fracta sint. nunc cum maxime Deus alia exaltat, alia submittit, nec molliter ponit, sed ex fastigio suo nullas habitura reliquias iactat. Magna ista, quia parvi sumus, credimus. Multis rebus non ex natura sua, sed ex humilitate nostra, magnitudo est. Quid praecipuum in rebus humanis est? Non classibus maria complexisse, nec in rubri maris litore signa fixisse, nec deficiente terra ad iniurias aliorum errasse in Oceano, ignota quaerentem: sed animo omne vidisse, et qua nulla est maior victoria, vitia domuisse. Innumerabiles sunt, qui urbes, qui populos habuere in potestate: paucissimi, qui se. Quid est praecipuum? Erigere animum supra minas et promissa fortunae. Nihil dignum putare quod speres. Quid enim habet dignum, quod concupiscas? qui a divinorum conversatione

quoties ad humana recideris, non aliter caligabis; quam quorum oculi in densam umbram ex claro sole rediere. Quid est praecipuum? Posse laeto animo adversa tolerare: quidquid acciderit, sic ferre, quasi tibi volueris accidere. Debuiſſes enim velle, si scisſes omnia ex decreto Dei fieri. Flere, queri, ingemere, desciscere est. Quid est praecipuum? Animus contra calamitates fortis et contumax, luxuriae non adversus tantum, sed et infestus: nec avidus periculi; nec fugax, qui sciat fortunam non exspectare, sed facere: et adversus utramque intrepidus inconfususque prodire, nec illius tumultu, nec huius fulgore percussus. Quid est praecipuum? non admittere in animum mala consilia, puras ad coelum manus tollere: nullum petere bonum, quod ut ad te transeat, aliquis dare debet, aliquis amittere: optare, quod sine adversario optatur, bonam mentem: cetera magno aestimata mortalibus, etiamsi quis domum casus attulerit, sic intueri, quasi exitura, qua venerint. Quid est praecipuum? Altos supra fortuita spiritus attollere: hominis meminisse, ut, si ve felix eris, scias hoc non futurum diu; si ve infelix, scias hoc te non esse, si non putes. Quid est praecipuum? in primis labris animam habere. Haec res efficit non e iure Quiritium liberum, sed e iure naturae. Liber autem est, qui servitutem effugit sui. Haec est assidua servitus, et ineluctabilis, et per diem ac noctem aequaliter premens, sine intervallo, sine com-  
meatu. Sibi servire, gravissima servitus est: quam discutere facile est, si desieris multa te poscere, si desieris tibi referre mercedem, si ante oculos et na-

turam tuam posueris et aetatem, licet prima sit; ac tibi ipse dixeris: Quid insanio? quid anhelio? quid sudo? quid terram verso? quid forum viso? Nec multo opus est, nec diu. Ad hoc proderit nobis inspicere rerum naturam. primo discedemus a sordidis, deinde animum ipsum, quo magno summoque opus est, seducemus a corpore. Deinde in occultis exercitata subtilitas, non erit in aperto deterior. Nihil autem est apertius his salutaribus, quae contra nequitiam nostram furoremque discuntur, quae damnamus, nec ponimus.

## C A P U T I.

**Q**UAERAMUS ergo de aquis, et investigemus, qua ratione fiant: sive, ut ait Ovidius,

*Fons erat illimis nitidis argenteus undis:*

sive, ut ait Virgilius,

*Unde per ora novem vasto cum murmure montis*

*It mare praeruptum, & pelago premit arva sonanti:*

sive ut apud te, Iunior carissime, invenio,

*Eleus Siculis de fontibus exsilit amnis.*

quae ratio aquas subministret: quomodo tot flumina ingentia per diem noctemque decurrant: quare alia hibernis aquis intumescant, alia in defectu ceterorum annuum crescant. Nilum interim seponamus a turba, propriae naturae et singularis: illi diem suum dabi-

mus, nunc vulgares aquas prosequemur, tam frigidas quam calentes. In quibus quaerendum erit, utrum calidae nascantur, an fiant. De ceteris quoque differemus, quas insignes aut sapor, aut aliqua reddit utilitas. Quaedam enim oculos, quaedam nervos iuvant, quaedam inveterata et desperata a medicis vitia percurant. Quaedam medentur ulceribus, quaedam interiora fovent potu, et pulmonis ac viscerum querelas levant. Quaedam supprimunt sanguinem: tam varius singulis usus, quam gustus est.

II. Aut stant omnes aquae, aut eunt, aut colliguntur, aut varias habent venas. Aliae sunt dulces, aliae variae: asperae quippe interveniunt, falsae amaraeque aut medicatae: ex quibus sulphuratas dicimus, ferratas, aluminosas. Indicat vim sapor. Habent praeterea multa discrimina. Primum tactus: frigidae calidaeque sunt. deinde ponderis: leves et graves sunt. deinde coloris: purae sunt et turbidae, caeruleae, lucidae. deinde salubritatis: sunt enim salubres et utiles, sunt mortiferae, sunt quae cogantur in lapidem. Quaedam tenues, quaedam pingues: quaedam alunt, quaedam sine ulla bibentis ope transeunt, quaedam haustae foecunditatem afferunt.

III. Ut stet aqua, aut fluat, loci positio efficit: in devexo fluit, in plano continetur et stagnat, et aliquando in adversum spiritu impellitur: tunc cogitur, non fluit. Colligitur ex imbribus: ex suo fonte nativa est. Nihil tamen prohibet, eodem loco aquam colligi, et nasci: quod in Fucino videmus, in quem montis circumiecti fluvii derivantur. Sed et magnae latentisque in ipso undae sunt. itaque etiam cum



hiberni defluxere torrentes, faciem suam servant.

IV. Primum ergo quaeramus, quomodo ad continuandos fluminum cursus terra sufficiat, unde tantum aquarum exeat. Miramur, quod accessionem fluminum maria non sentiant. Aequè mirandum est, quod detrimenta exeuntium terra non sentit. Quid est, quod illam sic implevit, ut praebere tantum ex recondito possit, ac subinde suppleat? Quamcunque rationem reddiderimus de flumine, eadem erit rivo-  
rum ac fontium.

V. Quidam iudicant, terram, quidquid aquarum emisit, rursus accipere: et ob hoc maria non crescere, quia quod influxit, non in suum vertunt, sed protinus reddunt. Occulto enim itinere subit terras, et palam venit, secreto revertitur, colaturque in transitu mare: quod per multiplices anfractus terrarum verberatum, amaritudinem ponit, et pravitatem saporis in tanta soli varietate exuit, et in sinceram aquam transit.

VI. Quidam existimant, quidquid ex imbribus terra concipit, in flumina rursus emitti. Et hoc argumenti loco ponunt, quod paucissima flumina sunt in his locis, in quibus rarus est imber. Ideo siccas esse aiunt Aethiopiae solitudines, paucosque inveniri in interiore Africa fontes: quia fervida coeli natura sit, et paene semper aestiva. Squalidae itaque sine arbore, sine cultore arenae iacent, raris imbribus sparsae, quos statim combibunt. At contra constat, Germaniam Galliamque, et proxime ab his Italiam, abundare rivis et fluminibus: quia coelo humido utuntur, et ne aestas quidem imbribus caret.

VII. Adversus haec multa dici posse vides. Primum ego tibi vinearum diligens fossor affirmo, nullam pluviam esse tam magnam, quae terram ultra decem pedes in altitudinem madefaciat. Omnis humor intra primam crustam consumitur, nec in inferiora descendit. Quomodo ergo potest imber suggerere omnibus vires, qui summam humum tingit? Pars maior eius per fluminum alveos in mare aufertur. Exiguum est quod sorbet terra, nec id servat. Aut enim arida est, et absorbit quidquid in se fustum est: aut satiata, si quid supra desiderium cecidit, excludit. Et ideo primis imbribus non augentur amnes: quia totos in se sitiens terra trahit. Quid, quod quaedam flumina erumpunt saxi et montibus? His quid conferent pluviae, quae per nudas rupes deferuntur, nec habent terram cui infideant. Adice, quod in siccissimis locis putei in altum acti, per ducenum aut trecentum pedum spatia, inveniunt aquarum uberes venas, in ea altitudine, in quam aqua non penetret: ut scias illic non coelestem esse, nec collectitium humorem, sed quod dici solet, vivam aquam. Illo quoque argumento haec opinio refellitur, quod quidam fontes in summo montis cacumine redundant. Apparet ergo, illos sursum agi, aut ibi concipi, cum omnis aqua pluvialis decurrat.

VIII. Quidam existimant, quemadmodum in exteriori parte terrarum vastae paludes iacent, magni et navigabiles lacus, quemadmodum ingenti spatio terrae maria porrecta sunt, infusa vallibus: sic interiora terrarum abundare aquis dulcibus, nec minus illas stagnare, quam apud nos Oceanum, et sinus

eius : immo eo latius, quo plus terra in altum patet. Ergo ex illa profunda copia isti amnes egeruntur : quos quid miraris si terra detractos non sentiat, cum adiectos maria non sentiant ?

IX. Quibusdam haec placet causa. Aiunt habere terram intra se cavos recessus, et multum spiritus : qui necessario frigescit, umbra gravi pressus. Deinde piger et immotus, in aquam, cum se desiit ferre, convertitur. Quemadmodum supra nos mutatio aëris imbrem facit, ita infra terras flumen aut rivum agit. Supra nos stare non potest segnis diu et gravis. Aliquando enim sole tenuatur, aliquando ventis expanditur. Itaque intervalla magna imbribus sunt. Sub terra vero quidquid est, quod illum in aquam convertat, idem semper est, umbra perpetua, frigus aeternum, inexercitata densitas : semper ergo praebebit fonti aut flumini causas. Placet nobis terram esse mutabilem. Hoc quoque quidquid efflavit, quia non aëre libero concipitur, crassescit, et protinus in humorem convertitur.

X. Habes primam aquarum sub terra nascentium causam. Adicias etiam licet, quod fiant omnia ex omnibus. Ex aqua aër. Ex aëre aqua. Ignis ex aëre. Ex igne aër. Quare ergo non terra fiat ex aqua, et ex terra aqua ? quae si in alia mutabilis est, et in aquam : immo maxime in hanc. Utraque cognata res est, utraque gravis, utraque densa, utraque in extremum mundi compulsa. Ex aqua terra fit. Cur non aqua fiat e terra ? At magna flumina sunt. Cum videris, quanta sunt : rursus ex quanto prodeant, adspice. Miraris, cum labantur assidue, quaedam ve-

ro concitata rapiantur, quae praesto sit illis semper aqua nova? Quid si mireris quod cum venti totum aëra impellant, non deficit spiritus, sed per dies noctesque aequaliter fluit: nec ut flumina certo alveo fertur, sed per vastum coeli spatium lato impetu vadit? Quid si ullam undam superesse mireris, quae superveniat tot fluctibus fractis? Nihil deficit quod in se redit. Omnium elementorum alterni recursus sunt. Quidquid alteri perit, in alterum transit. Et natura partes suas velut in ponderibus constitutas examinat: ne portionum aequitate turbata, mundus praeponderet. Omnia in omnibus sunt. Non tantum aër in ignem transit, sed nunquam sine igne est. Detrahe illi calorem: rigescet, stabit, durabitur. Transit aër in humorem: sed nihilominus non sine humore. Et aëra et aquam facit terra: sed non magis unquam sine aqua est, quam sine aëre. Et ideo facilior invicem transitus est: quia illis in quae transeundum est, iam mixta est. Habet ergo terra humorem: hunc exprimit. Habet aëra: hunc umbra hiberni frigoris densat, ut faciat humorem. Ipsa quoque mutabilis est in humorem: natura sua utitur.

XI. Quid ergo? inquis, si perpetuae sunt causae, quibus flumina oriuntur, ac fontes: quare aliquando siccantur, aliquando quibus non fuere locis, exeunt? Saepe motu terrarum itinera turbantur, et ruina interfcindit aquas, quae retentae novos exitus quaerunt, et aliquo impetu faciunt, aut ipsius quassatione terrae aliunde alio transferuntur. Apud nos evenire solet, ut amisso canali suo flumina primum refundantur: deinde quia perdiderunt viam, faciant. Hoc accidisse

ait Theophrastus in Coryco monte, in quo post terrarum tremorem nova vis fontium emerfit. Sed et alios quoque casus intervenire quidam opinantur, qui aliter evocent aquas, aut a cursu suo deiciant, atque avertant. Fuit aliquando aquarum inops Haemus: sed cum Gallorum gens a Cassandro obfessa in illum se contulisset, et silvas cecidisset, ingens aquarum copia apparuit, quas videlicet in alimentum suum nemora ducebant; quibus excisis, humor, qui desit in arbusa consumi, superflus est. Idem ait et circa Magnesiam accidisse. Sed pace Theophrasti dixisse liceat, non hoc est simile veri: quia fere aquosissima sunt, quaecunque umbrosissima. Quod non eveniret, si aquas arbusa sicarent; quibus alimentum ex proximo est: fluminum vero vis ex intimo manat, ultraque excipitur, quam radicibus evagari licet. Deinde succisae arbores plus humoris desiderant. Non enim tantum id quo vivunt, sed et id quo crescant, trahunt. Idem ait, circa Arcadium, quae urbs in Creta insula fuit, fontes et lacus substitisse, quia desierit coli terra, diruta urbe: postea vero quam cultores receperit, aquas quoque recepisse. Causam siccitatis hanc ponit, quod obduruerit constricta tellus, nec potuerit imbres inagitata transmittere. Quomodo ergo plurimos videmus in locis desertissimis fontes? Plura denique invenimus, quae propter aquas coli coeperunt, quam quae aquas habere coeperint, quia colebantur. Non enim esse pluvialem hanc aquam, quae vastissima flumina a fonte statim, magnis apta navigiis defert, ex hoc intelligas licet, quod per



hiemem aestatemque par est a capite deiectus. Pluvia potest facere torrentem : non potest autem aequali inter ripas suas tenore labentem. Aquam non faciunt imbres , sed incitant.

XII. Paulo repetamus hoc altius , si videtur : et scies non habere quod quaeras , cum ad veram annuum originem accesseris. Flumen nempe fecit copia cursusque aquae perennis. Ergo si quaeris a me , quomodo aqua fiat : interrogabo invicem , quomodo aër fiat , aut terra. Si rerum elementa sunt quatuor , non potes interrogare unde aqua sit : quarta enim pars est naturae. Quid ergo miraris , si rerum naturae portio tam magna , potest aliquid ex se semper effundere ? Quomodo aër , et ipse quarta pars mundi , ventos et auras movet , sic aqua rivos et flumina. Si ventus est fluens aër , et flumen est fluens aqua. Satis multum illi virium dedi , cum dixi , elementum est. Intelligis , quod ab illo proficiscitur , non posse deficere.

XIII. Aqua , ait Thales , valentissimum elementum est. hoc fuisse primum putat , ex hoc surrexisse omnia. Sed et nos quoque aut in eadem sententia , aut in ultima sumus. Dicimus enim ignem esse , qui occupet mundum , et in se cuncta convertat. Hunc evanidum considerare , et nihil relinqui aliud in rerum natura , igne restincto , quam humorem : in hoc futuri mundi spem latere. Ita ignis exitus mundi est , humor primordium. Miraris amnes ex hoc posse exire semper , qui pro omnibus fuit , et ex quo sunt omnia ? Hic humor in diductione rerum ad quartas redactus est , sic positus , ut fluminibus edendis suf-

ficere, ut rivis, ut fontibus posset. Quae sequitur, Thaletis inepta sententia est. Ait enim, terrarum orbem aqua sustineri, et vehi more navigii, mobilitaque eius fluctuare, tunc cum dicitur tremere. Non est ergo mirum, si abundat humor ad flumina fundenda, cum mundus in humore sit totus. Hanc veterem et rudem sententiam explode. Nec est quod credas, in hunc orbem aquam subire per rimas et facere sentinam.

XIV. Aegyptii quatuor elementa fecere: deinde ex singulis bina, marem et feminam. Aërem marem iudicant, qua ventus est: feminam, qua nebulosus et iners. Aquam virilem vocant mare: muliebrem omnem aliam. Ignem vocant masculum, qua ardet flamma: et feminam, qua lucet innoxius tactu. Terram fortio rem marem vocant, saxa cautesque: feminae nomen assignant huic tractabili ad culturam.

XV. Mare unum est, ab initio scilicet ita constitutum: habet suas venas, quibus impellitur atque aestuat. Quomodo maris, sic et huius aquae mitioris vasta in occulto via est, quam nullius fluminis cursus exhauriet. Abdita est virium eius ratio. Tantum ex illa, quantum superfluum fit, emittitur. Quaedam ex istis sunt, quibus assentire possumus: sed hoc amplius censeo. Placet natura regi terram: et quidem ad nostrorum corporum exemplar, in quibus et venae sunt et arteriae: illae sanguinis, hae spiritus receptacula. In terra quoque sunt alia itinera, per quae aqua; et alia, per quae spiritus currit: adeoque illam ad similitudinem humanorum corporum natura formavit, ut maiores quoque nostri aquarum appella-

verint venas. Sed quemadmodum in nobis non tantum sanguis est; sed multa genera humoris, alia necessarii, alia corrupti, ac paulo pinguioris, in capite cerebrum, in ossibus medullae, muci, salivaeque et lacrimae, et quiddam additum articulis, per quod citius flectantur ex lubrico: sic in terra quoque sunt humoris genera complura. Quaedam quae matura durentur. Hinc est omnis metallorum humus, ex quibus aurum argentumque petit avaritia: et quae in lapidem ex liquore vertuntur. In quibusdam vero locis terra humorque liquescit: sicut bitumen, et cetera huic similia. Haec est causa aquarum, secundum legem naturae, voluntatemque nascentium. Ceterum ut in nostris corporibus, ita in illa saepe humores viria concipiunt: aut ictus, aut quassatio aliqua, aut loci senium, aut frigus, aut aestus, corrumpere naturam; et sulphuratio contraxit humorem, qui modo diuturnus est, modo brevis. Ergo ut in corporibus nostris sanguis, cum percussa vena est, tamdiu manat, donec omnis effluxit, aut donec venae scissura subsedit, atque interclusit, vel aliqua alia causa retro dedit sanguinem: ita in terra, solutis ac patefactis venis, rivus aut flumen effunditur. Interest, quantum aperta sit vena, quomodo consumpta aqua fit: modo exsiccatur aliquo impedimento, modo coit velut in cicatricem, comprimitque quam fecerat viam: modo illa vis terrae, quam esse mutabilem diximus, desinit posse alimenta in humorem convertere: aliquando autem exhausta replentur: modo per se viribus recollectis, modo aliunde translatis. Saepe enim inania apposita plenis humorem in se attrahunt.

Saepe terra, si facilis est, ipsa in tabem resolvitur, et humescit. Idem evenit sub terra, quod in nubibus, ut spissetur, graviolemque quam ut manere in natura sua possit, gignat humorem. Saepe colligitur roris modo, tenuis et dispersus liquor, qui ex multis in unum locis confluit. Sudorem aquileges vocant: quia guttae quaedam vel pressura loci eliduntur, vel aestu evocantur. Haec tenuis unda vix fonti sufficit. At ex magnis causis, magnisque conceptibus excidunt amnes: nonnunquam leviter, si aqua pondere suo se tantum detulit; nonnunquam vehementer et cum sono suo, si illam spiritus intermixtus eiecit.

XVI. Sed quare quidam fontes senis horis pleni, senisque sicci sunt? Supervacuum est nominare singula flumina, quae certis mensibus magna, certis angusta sunt: et occasionem singulis quaerere, cum possim eandem causam omnibus reddere. Quemadmodum quartana ad horam venit, quemadmodum podagra ad tempus respondet, quemadmodum purgatio, si nihil obstitit, statum diem servat, quemadmodum praesto est ad mensem suum partus: sic aquae intervalla habent, quibus se retrahant, et quibus reddant. Quaedam autem intervalla minora sunt, et ideo notabilia: quaedam maiora, nec minus certa. Et quid hoc mirum est, cum videas ordinem rerum et naturam per constituta procedere? Hiems nunquam aberravit. Aestas suo tempore incanduit. Autumnus, verisque, ut solet, facta mutatio est. Tam solstitium, quam aequinoctium, suos dies retulit. Sunt et sub terra minus nota nobis iura naturae, sed non minus certa. Crede infra, quidquid vides supra. Sunt et illic

specus vasti, sunt ingentes recessus, et spatia suspensis hinc et inde montibus laxa. Sunt abrupti in infinitum hiatus, qui saepe illapsas urbes receperunt, et ingentem in alto ruinam condiderunt. Haec spiritu plena sunt. Nihil enim usquam inane est, et stagna obsessa tenebris et locis ampliis. Animalia quoque illis innascuntur, sed tarda et informia: ut in aëre caeco pinguique concepta, et in aquis torpentibus situ: pleraque ex his caeca, ut talpae et subterranei mures, quibus deest lumen, quia supervacuum est. Inde ut Theophrastus affirmat, pisces quibusdam locis eruntur.

XVII. Multa hoc loco tibi in mentem venient, quae urbane in re incredibili fabulam dicas. Non cum retibus aliquem, aut cum hamis, sed cum dolabra ire piscatum. Exspecto ut aliquis in mari venetur. Quid est autem, quare pisces in terram non transeant, si nos maria transimus? Permutabimus sedes. Hoc miraris accidere. Quanto incredibilia sunt opera luxuriae, quoties naturam aut mentitur, aut vincit? In cubili natant pisces: et sub ipsa mensa capitur, qui statim transferatur in mensam. Parum videtur recens nullus, nisi qui in convivae manu moritur. Vitreis ollis inclusi offeruntur, et observatur morientium color, quem in multas mutationes mors luctante spiritu vertit: alios necant in garo, et condiunt vivos. Et sunt qui fabulas putant, piscem vivere posse sub terra, et effodi, non capi. Quam incredibile illis videretur, si audirent natare in garo piscem: nec coenae causa occisum esse super coenam, cum multum in deliciis fuit, et oculos, antequam gulam, pavit.



XVIII. Permite mihi, quaestione seposita, castigare luxuriam. Nihil est, inquis, nullo expirante formosius. Ipsa colluctatione animam agenti rubor primum, deinde pallor suffunditur: quam aequè variatur, et incerta facies inter vitam et mortem coloris est. Vacatio longa somniculosae inertisque luxuriae. Quam sero experrecta, circumscripti se et fraudari tanto bono sensit. Hoc adhuc tanto spectaculo et tam pulchro piscatores fruebantur. Quo cœtum piscem? quo exanimem? in ipso ferculo exspiret. Mirabamur tantum in illis esse fastidium, ut nolent attingere, nisi eodem die captum piscem: qui, ut aiunt, saperet ipsum mare. Ideo cursu advehebatur, ideo gerulis cum anhelitu et clamore properantibus dabatur via. Quo pervenere deliciae? Is pro putrido iam piscis affertur, qui non hodie eductus, hodie occisus est. Nescio de re magna tibi credere. Ipse oportet mihi credam: huc afferatur, coram me animam agat. Ad hunc fastum pervenire ventres delicatorum, ut gustare non possint piscem, nisi quem in ipso convivio natantem, palpitantemque viderint. Quantum ad solertiam luxuriae pereuntis accedit, tanto subtilius quotidie et elegantius aliquid excogitat furor, usitata contemnens. Illa audiebamus, Nihil esse melius faxatili nullo. At nunc audimus: Nihil est moriente formosius. Da mihi in manus vas vitreum, in quo exsultet, in quo trepidet. Ubi multum diuque laudatus est, ex illo perlucido vivario extrahitur: tunc ut quisque peritior est, monstrat. Vide quomodo exarserit rubor, omni acrior minio: vide quas per latera venas agat: ecce sanguineum putes ventrem:

quam lucidum quiddam, caeruleumque sub ipso tempore effulsit! iam porrigitur et pallet, et in unum colorem componitur. Ex his nemo morienti amico affidet, nemo videre mortem patris sui sustinet, quam optavit. Quotusquisque funus domesticum ad rogum prosequitur? Fratrum, propinquorumque extrema hora deferitur: ad mortem nulli concurritur. Nihil enim est illo formosius. Non tempero mihi, quin utar interdum temerariis verbis, et proprietatis modum excedam. Non sunt ad popinam dentibus, et ventre, et ore contenti: oculis quoque gulosi sunt.

XIX. Sed ut ad propositum revertar, accipe argumentum: magnam vim aquarum in subterraneis oculi, fertilem foedorum situ piscium. Si quando erupit, affert secum immensam animalium turbam, horridam adspici, et turpem ac noxiam gustu. Certe cum in Caria circa Lorymam urbem talis exsiluisset unda, periere quicunque illos ederant pisces, quos ignoto ante eum diem coelo novus annis ostendit. Nec id mirum. Erant enim pingua et differta, ut ex longo otio, corpora: ceterum inexercitata, et in tenebris faginata, et lucis expertia, ex qua salubritas ducitur. Nasci autem posse pisces in illo terrarum profundo, sit indicium, quod anguillae quoque latebrosis locis nascuntur, gravis et ipse cibus ob ignaviam, utique si altitudo illas luti penitus abscondit. Habet ergo non tantum venas aquarum terra, ex quibus corrivatis flumina effici possunt, sed et amnes magnitudinis vastae: quorum aliis semper in occulto cursus est, donec aliquo sinu devorentur: alii sub

aliquo lacu emergunt. Iam quis ignorat, esse quaedam stagna sine fundo? Quorsus hoc pertinet? Ut appareat, hanc magnis amnis aeternam esse materiam, cuius non tanguntur extrema; sicut fluminum et fontium.

XX. At quare aquis sapor varius? propter quatuor causas. Ex solo prima est, per quod feruntur. Secunda, ex eadem simulatione eius nascitur. Tertia ex spiritu, qui in aquam transfiguratus est. Quarta ex vitio, quod saepe concipiunt corruptae per iniuriam. Hae causae saporem dant aquis varium: hae medicatam potentiam: hae gravem spiritum, odoremque pestiferum: hae levitatem gravitatemque, aut calorem, aut nimium rigorem. Interest, utrum per loca sulphure, an nitro, an bitumine plena transcant. Hac ratione corruptae, cum vitae periculo bibuntur. Hinc illud, de quo Ovidius ait:

*Flumen habent Cicones, quod potum saxea reddit  
Viscera, quod tactis inducit marmora rebus.*

Medicamentum est, et eius naturae habet limum, ut corpora et agglutinet et induret. Quemadmodum Puteolani pulvis, si aquam attigit, saxum est: sic e contrario, haec aqua si solidum tetigit, haeret et affigitur. Inde est, quod res abiectae in eundem lacum, lapideae subinde extrahuntur. Quod in Italia quibusdam locis evenit, sive virgam, sive frondem demerferis, lapidem post paucos dies extrahis. Circumsunditur enim corpori limus, alliniturque paulatim. Hoc minus videbitur tibi mirum, si notaveris, Albulam, et fere sulphuratam aquam, circa canales suos rivof-

que durari. Aliquam harum habent causam illi lacus, quos quisquis faucibus hausit, ut idem poeta ait,

*Aut furit, aut patitur mirum gravitate soporem.*

Similem habet vim mero, sed vehementiorem. Nam quemadmodum ebrietas, donec exsiccetur, dementia est, et nimia gravitate defertur in somnum: sic aquae huius sulphurea vis habet quoddam acrius ex aëre noxio virus, quod mentem aut in furorem movet, aut sopore opprimit. Hoc habet mali et Lyncestius amnis:

*Quem quicumque parum moderato gutture traxit,  
Haud aliter titubat, quam si mera vina bibisset,*

XXI. In quosdam specus qui despexere, moriuntur: tam velox malum est, ut transvolantes aves deiciat: talis est aër, talis locus, ex quo letalis aqua destillat. Quod si remissior fuerit aëris et loci pestis, ipsa quoque temperatior noxa, nihil amplius quam tentat nervos, velut ebrietate torpentes. Nec miror, si locus atque aër quas inficit, similesque regionibus reddit, per quas, et ex quibus veniunt. Pabuli sapor apparet in lacte, et vini vis existit etiam in aceto. nulla res est, quae non eius a quo nascitur, notas reddat.

XXII. Aliud est etiam aquarum genus, quod nobis placet coepisse cum mundo. Sive ille aeternus est, hoc quoque fuit semper: sive initium aliquod est illi, hoc quoque cum toto dispositum est. Quid sit hoc, quaeris? Oceanum, et quodcunque ex illo mare ter-

ras interluit. Iudicant quidam flumina quoque, quorum inenarrabilis natura est, cum ipso mundo traxisse principia, ut Istrum, ut Nilum, vastos amnes, magisque insignes, quam ut dici possit; eandem illis originem, quam ceteris esse.

XXIII. Haec est ergo aquarum divisio, ut quibusdam videtur. Post illam coelestes, quas ex superioribus nubila eiciunt. Ex terrenis aliae sunt, ut ita dicam, supernatantes, quae in summa humo repunt: aliae abditae, quarum reddita est ratio.

XXIV. Quare quaedam aquae caleant, quaedam etiam ferveant in tantum, ut non possint esse usui, nisi aut in aperto evanuerent, aut mixtura frigidae intepuerent, plures causae redduntur. Empedocles existimat ignibus, quos multis locis terra opertos tegit, aquam calefcere, si subiecti sunt solo, per quod aquis transcurfus est. Facere solemus dracones et miliaria et complures formas, in quibus aere tenui fistulas struimus, per declive circumdatas: ut saepe eundem ignem ambiens aqua per tantum fluat spatii, quantum efficiendo calori sat est. Frigida itaque intrat, effluit calida. Idem sub terra Empedocles existimat fieri: quem non falli credent ii, quibus balnearia sine igne calefiunt. Spiritus in illa fervens loco aestuanti infunditur. Hic pertuso lapsus, non aliter quam igne subdito, parietes et vasa balnei calefacit. Omnis denique frigida transitu mutatur in calidam: nec trahit saporem evaporatio, quia clausa perlabitur. Quidam existimant, per loca sulphure plena exeuntes vel introeuntes aquas, calorem beneficio materiae, per quam fluunt, trahere: quod ipso odore gustuque



testantur. Reddunt enim qualitatem eius, qua caluerunt, materiae. Quod ne accidere mireris, vivae calci aquam infunde, fervebit.

XXV. Quaedam aquae mortiferae sunt, nec odore notabiles, nec sapore. Circa Nonacrin in Arcadia Styx appellata ab incolis, advenas fallit: quia non facie, non odore suspecta est: qualia sunt magnorum artificum venena, quae deprehendi nisi morte non possunt. Haec autem, de qua paulo ante retuli, aqua, summa celeritate corrumpit: nec remedio locus est, quia protinus hausta duratur: nec aliter quam gypsum sub humore constringitur, et alligat viscera. Est autem noxia aqua in Thessalia circa Tempe: quam et ferae et pecus omne devitat: per ferrum et aes exit: tanta vis illi inest, etiam dura molliendi: nec arbuta quidem ulla alit, et herbas necat. Quibusdam fluminibus vis inest mira. Alia enim sunt, quae pota inficiunt greges ovium: intraque breve tempus, quae fuere nigrae, albam ferunt lanam: quae albae venerant, nigrae abeunt. Hoc etiam in Boeoria amnes duo efficiunt: quorum alteri ab effectu Melas nomen est: uterque ex eodem lacu exeunt, diversa facturi. In Macedonia quoque, ut ait Theophrastus, est flumen, ad quod qui facere albas oves volunt, adducunt. Quod ut diutius potavere, non aliter quam infecta mutantur. At si illis lana opus fuerit pulla, paratus gratuitus infector est: ad Ceronem eundem gregem appellant. Auctores novos habeo, esse in Galatia flumen, quod idem in omnibus efficiat: esse in Cappadocia, quo poto equis, nec ulli praeterea animali, color mutatur, et spargitur albo cutis. Quos-

dam lacus esse, qui nandi imperitos ferant, notum est. Erat in Sicilia, est adhuc in Syria stagnum, in quo natant lateres, et mergi proiecta non possunt, licet gravia sint. Huius rei palam causa est. quamcunque vis rem expende, et contra aquam statue, dummodo utriusque par sit modus: si aqua gravior est, levio rem, quam ipsa est, feret, et tanto supra se extollet, quanto erit levior: graviora descendant. At si aquae, et eius rei quam contra pensabis, par pondus erit: nec pessum ibit, nec exstabit, sed aequabitur aquae: et natabit quidem, sed paene merfa, ac nulla eminens parte. Hoc est cur quaedam tigna supra aquam, paene tota efferantur: quaedam ad medium submersa sint, quaedam ad aequilibrium aquae descendant. Namque cum utriusque pondus par est, neutraque res alteri cedit, graviora descendant, leviora gestantur. Grave autem et leve est, non aestimatione nostra, sed comparatione eius quo vehi debet. Itaque ubi aqua gravior est hominis corpore, aut saxi, non finit id quo non vincitur, mergi. Sic evenit, ut in quibusdam stagnis ne lapides quidem pessum eant. de solidis et duris loquor. Sunt enim multi pumicosi et leves, ex quibus quae constant insulae, in Lydia natant. Theophrastus est auctor. Ipse ad Cutilias natantem insulam vidi. Alia in Vadimonis lacu vehitur, alia in lacu Statoniensi. Cutiliarum insula et arbores habet, et herbas nutrit, tamen aqua sustinetur: et in hanc atque illam partem non tantum vento impellitur, sed et aura. Nec unquam illi per diem et noctem in uno loco statio est: adeo movetur levi flatu. Huic duplex causa est. Aquae gravitas medicatae, et

ob hoc ponderosae; et ipsius insulae materia vectabilis, quae non est corporis solidi, quamvis arbores alat. Fortasse enim leves truncos, frondesque in lacu sparsas, pinguis humor apprehendit, ac vinxit. Itaque etiamsi quae in illa saxa sunt, inuenies exesa ex fistulosa: qualia sunt quae duratus humor efficit, utique circa medicorum fontium rivos: quae ubi purgamenta aquarum coaluerunt, ex spuma solidantur. Necessario leve est, quod ex ventoso inanique concretum est. Quorundam causa non potest reddi, quare aqua Nilotica foecundiores feminas faciat, adeo ut quarundam viscera longa sterilitate praeclusa, ad conceptum relaxaverit: quare quaedam in Lycia aquae conceptum feminarum custodiant, quas solent petere, quibus parum tenax vulva est. Quod ad me attinet, pono ista inter temere vulgata. Creditum est, quasdam aquas scabiem afferre corporibus, quasdam vitiliginem, et foedam ex albo varietatem, siue infusa siue pota sit. quod vitium dicunt habere aquam ex rore collectam. Quis non gravissimas esse aquas credat, quae in crystallum coeunt? Contra autem est. tenuissimis enim hoc evenit, quas frigus ob ipsam tenuitatem facillime gelat. Unde autem fiat eiusmodi lapis, apud Graecos ex ipso nomine apparet: κρύσταλλον enim appellant aequae hunc perlucidum lapidem, quam illam glaciem, ex qua fieri lapis creditur. Aqua enim coelestis minimum in se terreni habens, cum induruit, longioris frigoris pertinacia spissatur magis ac magis: donec omni aëre excluso in se tota compressa est, et humor qui fuerat, lapis effectus est.

XXVI. Aestate quaedam flumina augentur, ut Nilus : cuius alias ratio reddetur. Theophrastus est auctor, in Ponto quoque quosdam amnes crescere tempore aestivo : quatuor autem esse iudicant causas. Aut quia tunc maxime in humorem mutabilis terra est : aut quia maiores in remoto imbres sunt, quorum aqua per secretos cuniculos reddita, tacite suffunditur. Tertia, si crebrioribus ventis ostium caeditur, et reverberatus fluctu amnis restitit : qui crescere videtur, quia non effunditur. Quarta ratio est siderum. Haec enim quibusdam mensibus magis urgent, et exhauriunt flumina : cum longius recesserunt, minus consumunt atque trahunt. Itaque quod impendio solebat, id incremento accedit. Quedam flumina palam in aliquem specum decidunt, et sic ex oculis auferuntur : quaedam consumuntur paulatim, et intercidunt : eadem ex intervallo revertuntur, recipiuntque et nomen et cursum. Causa manifesta est, sub terra vacat locus. Omnis autem humor natura ad inferius, et ad inane defertur. Illo itaque recepta flumina cursus egere secreto : sed cum primum aliquid solidi, quod obstaret, occurrit, perrupta parte, quae minus ad exitum repugnabat, repetiere cursum suum.

*Sic ubi terreno Lycus est epotus hiatu,  
Exsistit procul hinc, alioque renascitur ore.  
Sic modo combibitur, tacito modo gurgite lapsus,  
Redditur Argolicis ingens Erasinus in undis.*

Idem et in Oriente Tigris facit : absorbetur, et desideratus diu, tandem longe remoto loco, non tamen

dubius an in idem sit, emergit. Quidam fontes certo tempore purgamenta eieciunt: ut Arethusa in Sicilia, quinta quaque aestate per Olympia. Inde opinio est, Alphaeon ex Achaia eo usque penetrare, et agere sub mare cursum, nec ante quam in Syracusano litore emergere. Ideoque iis diebus quibus Olympia sunt, victimarum stercus secundo traditum flumini illic redundare. Hoc et a te traditum est in poemate, Lucili carissime, et a Virgilio qui alloquitur Arethusam:

*Sic tibi cum fluctus subter labere Sicanos,  
Doris amara suam non intermisceat undam.*

Est in Chersoneso Rhodiorum fons, qui post magnum intervallum temporis, foeda quaedam turbidus ex intimo fundat, donec liberatus eliquatusque est. Hoc quibusdam locis fontes faciunt, ut non tantum lutum, sed folia, testasque, et quidquid putre iacuit, expellant: ubique autem facit mare: cui haec natura est, ut omne immundum stercoreosumque litoribus impingat. Quaedam vero partes maris id certis temporibus faciunt: ut circa Messanam et Mylas fimo quiddam simile, turbulentum in litus mare profert, fervetque et aestuat, non sine odore foedo. Unde illic stabulare Solis boves, fabula est. Sed difficilis ratio est quorundam: utique ubi tempus eius rei, de qua quaeritur, inobservatum et incertum est. Itaque proxima quidem inveniri et vicina non potest causa, ceterum publica est illa. Omnis aquarum stantium clausurarumque natura se purgat. Nam in his quibus cursus est, non possunt vitia consistere, quae secunda



vis defert et exportat. Illae quae non emittunt quidquid infedit, magis minusve aestuant. Mare vero cadavera, stramentaue, et naufragorum reliquiis similia, ex intimo trahit, nec tantum tempestate fluctuque, sed tranquillum quoque placidumque purgatur.

XXVII. Sed monet me locus, ut quaeram, cum fatalis dies diluvii venerit, quemadmodum magna pars terrarum undis obruatur. Utrum Oceani viribus fiat, et externum in nos pelagus exsurgat: an crebri sine intermissione imbres, et elisa aestate hiems pertinax, immensam vim aquarum ruptis nubibus deiiciat. An flumina tellus largius fundat, aperiatque fontes novos: aut non sit una tanto malo causa, sed omnis ratio consentiat, et simul imbres cadant, flumina incrementum, maria sedibus suis excita percurrant, et omnia uno agmine ad exitium humani generis incumbant. Ita est. Nihil difficile est naturae, utique ubi in finem sui properat. Ad originem rerum parce utitur viribus, dispensatque se incrementis fallentibus: subito ad ruinam toto impetu venit. Quam longo tempore opus est, ut conceptus ad puerperium perducatur infans? quantis laboribus tener educatur? quam diligenti nutrimento obnoxium novissime corpus adolescit? at quam nullo negotio solvit? Urbes constituit aetas: hora dissolvit. Momento fit cinis: diu silva. Magna tutela stant ac vigent omnia: cito ac repente diffiliunt. Quidquid ex hoc statu rerum natura flexerit, in exitium mortalium fatis. Ergo cum affuerit illa necessitas temporis, multa simul fata causas movent: nec sine concussione mundi tanta mutatio est, ut quidam putant, inter quos

Fabianus est. Primo immodici cadunt imbres, et sine ullis solibus triste nubilo coelum est; nebulaeque continua, et ex humido spissa caligine, nunquam exsiccantibus ventis. Inde vitium satis, et segetum sine fruge surgentium marcor. Tunc corruptis quae feruntur manu, palustris omnibus campis herba succrescit: mox iniuriam et validiora sensere. Solutis quippe radicibus, arbusa procumbunt et vitis; atque omne virgultum non tenetur solo, quod molle fluidumque est: iam nec gramina aut pabula laeta aquis sustinet, fame laboratur, et manus ad antiqua alimenta porrigitur; quare ilex et quercus excutitur, et quaecunque in his arduis arbor commissa astricta lapidum stetit. Labant ac madent tecta, et in imum usque receptis aquis fundamenta desidunt, ac tota humus stagnat, frustra titubantium fulcra tentantur. Omne enim fundamentum in lubrico figitur, et lutosa humo nihil stabile est. Postquam magis magisque nimbi ingruunt, et congestae secus tabuerunt nives, devolutus torrens altissimis montibus rapit silvas male haerentes, et saxa revolutis remissa compagibus rotat. Abluit villas, et intermixtos ovium greges devehit; vulsisque minoribus tectis, quae in transitu abduxit, tandem in maiora violentus oberrat. Urbes, et implicitos trahit moenibus suis populos, ruinam an naufragium querantur, incertos: adeo simul, et quod opprimeret, et quod mergeret, venit. Auctus deinde processu aliquo in se torrentibus raptis plana passim populatur. Novissime ruina magna gentium clarus onustusque diffunditur. Flumina vero suapte natura vasta, et tempesta-

tibus rapta, alveos reliquerunt. Quid tu esse Rhodanum, quid putas Rhenum, atque Danubium, quibus torrens etiam in canali suo cursus est, cum superfusi novas sibi fecere ripas, ac scissa humo simul excessere alveo? Quanta cum praecipitatione volvuntur, ubi per campestria fluens Rhenus, ne spatio quidem languidus, sed latissime velut per angustum aquas implet? Cumque Danubius non iam radices nec media montium stringit: sed iuga ipsa sollicitat, ferens secum madefacta montium latera, rupestque deiectas, et magnarum promontoria regionum, quae fundamentis laborantibus a continente recesserunt. Deinde non inveniens exitum (omnia enim sibi ipse praecluserat) in orbem redit, ingentemque terrarum ambitum atque urbium uno vortice involvit. Interim permanent imbres, fit coelum gravius, ac sic diu malum ex malo colligit. Quod olim fuerat nubilum, nox est: et quidem horrida et terribilis, intercussu luminis diri. crebra enim micant fulmina, procellae quatiant mare: tunc primum auctum fluminum accessu, et sibi angustum, iam promovet litus: non continetur suis finibus, sed prohibent exire torrentes, aguntque fluctus retro: pars tamen maior, ut maligno ostio re-tenta, restagnat, et agros in formam unius lacus redigit. Iam omnia, quae prospici possunt, aquis obfidentur. Omnis tumultus in profundo latet, et immensa ubique altitudo est. tantum in summis montium iugis vada sunt. In ea excelsissima cum liberis coniugibusque fugere, actis ante se gregibus: diremtum inter miseros commercium ac transitus: quoniam quidquid submissius erat, id unda complevit.

Editissimis quibusque adhaerebant reliquiae generis humani : quibus in extrema perductis, hoc unum solatio fuit, quod transferat in stuporem metus. non vacabat timere mirantibus : ne dolor quidem habebat locum. Quippe vim suam perdit in eo, qui ultra sensum mali miser est. Ergo insularum modo eminent montes, et sparsas Cycladas augent, ut ait ille poëtarum ingeniosissimus egregie, sicut illud pro magnitudine rei dixit :

*Omnia pontus erat : detrant quoque litora ponto.*

nisi tantum impetum ingenii et materiae ad pueriles ineptias reduxisset.

*Nat lupus inter oves, fulvos vehit unda leones.*

Non est res satis sobria, lascivire devorato orbe terrarum. Dixit ingentia, et tantae confusionis imaginem cepit, cum dixit :

*Exspatiata ruunt per apertos flumina campos.*

—— *Pressaeque labant sub gurgite turres.*

Magnifice hoc, si non curavit, quid oves et lupi faciant. Natari autem in diluvio et in illa rapina potest? aut non eodem impetu pecus omne, quo raptum erat,mersum est? Concepisti imaginem quantum debebas, obrutis omnibus terris, coelo ipso in terram ruente. Perfer. Scies quid deceat, si cogitaveris orbem terrarum natare. Nunc ad propositum revertamur.

XXVIII. Sunt qui existiment, immodicis imbris vexari terras posse, non obrui. Magno impetu mag-

na ferienda sunt. Faciet pluvia segetes malas, fructum grando decutiet, intumescunt rivis flumina : sed resident. Quibusdam placet moveri mare, et illinc causam tantae cladis arcessi. Non potest torrentium, aut imbrium, aut fluminum iniuria fieri tam grande naufragium. Ubi instat illa perniciēs, mutarique genus humanum placuit, fluere assiduos imbres, et non esse modum pluviis concesserim : suppressis aquilonibus, et flatu sicciore : austris nubes et imbres et amnes abundare.

—— *Sed adhuc in damna profectum est.*

*Sternuntur segetes, & deplorata colonis*

*Vota iacent, longique perit labor irritus anni.*

Non laedi debent terrae, sed abscondi. Denique cum per ista prolusum est, crescunt maria, sed super solitum, et fluctum ultra extremum tempestatis maximae vestigium mittunt. Deinde a tergo ventis surgentibus, ingens aequor evolvunt; quod longe a conspectu interioris litoris frangitur. Deinde ubi litus bis terque prolatus est, et pelagus in alieno constitit, velut admoto malo cominus procurrit aestus ex imo recessu maris. Nam ut aëris, ut aetheris, sic huius elementi larga materia est, multoque in abdito plenior. Haec fatis mota, non aestu, (nam aestus fati ministerium est) attollit vasto sinu fretum, agitque ante se. Deinde in miram altitudinem erigitur : et illis tutis hominum receptaculis superest. Nec id aquis arduum est, quoniam aequo terris fastigio ascenderet. Si quis excelsa perlibret, maria paria sunt. Nam par undique sibi ipsa tellus est. Cava et plana



undique inferiora sunt. Sed istis adeo in rotundum orbis aequatus est, in parte autem eius et maria sunt, quae in unius aequalitatem pilae coeunt. Sed quemadmodum campos intuentem, quae paulatim devexa sunt, fallunt: sic non intelligimus curvaturas maris, et videtur planum quidquid apparet. at illud aequale terris est. Ideoque ut effluat, non magna mole se tollet: dum satis est illi, ut supra paria veniat, leviter exsurgere: nec a litore ubi inferius est, sed a medio, ubi ille cumulus est, defluit. Ergo ut solet aestus aequinoctialis, sub ipsum lunae solisque coitum, omnibus aliis maior undare: sic hic qui ad occupandas terras mittitur, solitis maximisque violentior, plus aquarum trahit: nec antequam supra cacumina eorum, quos perfusus est, montium crevit, devolvitur. Per centena millia quibusdam locis aestus excurrit innoxius, et ordinem servat. Ad mensuram enim crescit, iterumque decrescit. At illo tempore solutus legibus, sine modo fertur. Qua ratione, inquis? Eadem, qua conflagratio futura est. Utrumque fit, cum Deo visum ordiri meliora, vetera finire. Aqua et ignis terrenis dominantur. Ex his ortus, et ex his interitus est. Ergo quandoque placere res novae mundo, sic in nos mare emittitur desuper, ut fervor ignis, cum aliud genus exitii placuit.

XXIX. Quidam existimant terram quoque conculci, et dirupto solo nova fluminum capita detegere, quae amplius ut e pleno profundant. Berofus, qui Belum interpretatus est, ait cursu ista siderum fieri: et adeo quidem id affirmat, ut conflagrationi, atque diluvio, tempus assignet: arsurum enim terrena con-

tendit, quando omnia sidera, quae nunc diversos agunt cursus, in Cancrum convenerint; sic sub eodem posita vestigio, ut recta linea exire per orbes omnium possit: inundationem futuram, cum eadem siderum turba in Capricornum convenerit. Illic solstitium, hic bruma conficitur. Magnae potentiae signa: quando in ipsa mutatione anni momenta sunt. Et istas ego receperim causas; (neque enim ex uno est tanta perniciēs) et illam quae in conflagratione nostris placet, huc quoque transferendam puto: sive anima est mundus, sive corpus: natura gubernante, ut arbores, ut fata, ab initio eius usque ad exitum quidquid facere, quidquid pati debeat, inclusum est: ut in semine omnis futuri ratio hominis comprehensa est. Et legem barbae et canorum nondum natus infans habet. totius enim corporis, et sequentis aetatis in parvo occultoque lineamenta sunt. Sic origo mundi, non minus solem et lunam, et vices siderum, et animalium ortus, quam quibus mutarentur terrena, continuit. In his fuit inundatio, quae non secus quam hiems, quam aestas, legē mundi venit. Itaque non pluvia istud fiet, sed pluvia quoque: non incurſu maris, sed maris quoque incurſu: non terrae motu, sed terrae quoque motu. Omnia adiuvabunt naturam, ut naturae constituta peragantur. Maximam tamen causam, ad se inundandam, terra ipsa praestabit: quam diximus esse mutabilem, et solvi in humorem. Ergo quandoque erit terminus rebus humanis, cum partes eius interire debuerint, abolerive funditus totae, ut de integro totae, rudes innoxiaeque generentur: nec superſit in deteriora magister: plus hu-

moris, quam semper fuit, fiet. Nunc enim elementa  
 ad id, quod debetur, pensa sunt. Aliquid oportet  
 alteri accedat, ut quae libramento stant, inaequalitas  
 turbet. Accedet humori. Nunc enim habet quo am-  
 biat terras, non quo obruat. Quidquid illi acceffe-  
 rit, necesse est in alienum locum exundet. Undare  
 ergo terra debet, ut validiori infirma succumbat. In-  
 cipiet ergo putrescere, dehinc laxata ire in humo-  
 rem, et assidua tabe defluere. Tunc exsiliunt sub  
 montibus flumina, ipsosque impetu quatiant : inde  
 aura tacita manabunt. Solum omne aquas reddet,  
 summi scaturient montes : quemadmodum in mor-  
 bum transeunt sana, et ulceri vicina consentiunt : ut  
 quaeque proxima terris fluentibus fuerint, eluentur,  
 stillabunt, et deinde current, et hiant pluribus locis  
 saxo, per fretum salient, et maria inter se compo-  
 nent. Nihil erunt Hadriatici, nihil Siculi aequoris  
 fauces, nihil Charybdis, nihil Scylla. Omnes novum  
 mare fabulas obruet, et hic qui terras cingit Ocea-  
 nus extremas, veniet in medium. Quid ergo est ? ni-  
 hilominus tenebit alienos menses hiems, aestas pro-  
 hibebitur, et quodcunque terras fidus exsiccat, com-  
 presso ardore cessabit. Peribunt tot nomina, Caspium  
 et Rubrum mare, Ambracii et Cretici sinus, Propon-  
 tis et Pontus. Peribit omne discrimen. Confundetur  
 quidquid in suas partes natura digessit. Non muri  
 quenquam, non turres tuebuntur. Non proderunt  
 templa supplicibus, nec urbium summa : quippe fu-  
 gientes unda praeveniet, ex ex ipsis arcibus deferet.  
 Alia ab occasu, alia ab oriente concurrent : unus hu-  
 manum genus condet dies. Quidquid tam longa for-

tunae indulgentia excoluit, quidquid supra ceteros extulit, nobilia pariter atque adornata, magnarumque gentium regna pessumdabit.

XXX. Sunt omnia, ut dixi, facilia naturae: utique quae a primo facere constituit; ad quae non subito, sed ex denuntiato venit. Iam autem a primo die mundi, cum in hunc habitum ex informi unitate discederet, quando mergerentur terrena, decretum est: et ne sit quandoque velut in novo opere, dura molitio, olim ad haec maria se exercent. Non vides, ut fluctus in litora, tanquam exiturus, incurrat? Non vides, ut aestus fines suos transeat, et in possessionem terrarum mare inducat? Non vides, ut illi perpetua cum claustris suis pugna sit? Quis porro istinc, unde tantum tumultum vides, metus est e mari, et magno impetu erumpentibus fluviis? Ubi non humorem natura disposuit, ut undique nos, cum voluisset, aggredi posset? Mentior, nisi eruentibus terram humor occurrit, et quoties nos avaritia aut defodit, aut aliqua causa penetrare altius cogit, eruendi finis unda est. Adiice nunc, quod immanes sunt in abdito lacus, et multum maris conditi, multum fluminum per operta labentium. Undique ergo erunt causae diluvio, cum aliae aquae subinfluunt terras, aliae circumfluunt, quae diu coërcitae vincent, et amnes omnibus iungent, paludibus stagna. Omnium tunc mare ora fontium implebit, et maiore hiatu solvet. Quemadmodum corpora nostra ad egestum venter exhaurit, quemadmodum eunt in sudorem vires: ita tellus liquefiet, et aliis causis quiescentibus, intra se, quo mergatur, inveniet: sic magna omnia coitura

crediderim. Nec erit longa mora exitii. Tentatur divelliturque concordia, cum semel aliquid ex hac idonea diligentia remiserit mundus: statim undique ex aperto superne, ex abdito ab imo aquarum fiet irruptio. Nihil est tam violentum et incontineus sui, tam contumax, infestumque retinentibus, quam magna vis undae: utetur libertate permissa, et iu-bente natura, quae scindit circuitque, complebit. Ut ignis diversis locis ortus, cito miscet incendium, flammis coire properantibus: sic momento redundan-tia maria se committent. Nec ea semper licentia undis erit: sed peracto exitio generis humani, extinctisque pariter feris, in quarum homines ingenia transferant, iterum aquas terra sorbebit: natura pelagus stare, aut intra terminos suos furere coget: et reiectus e nostris sedibus, in sua secreta pelletur Oceanus: et antiquus ordo revocabitur. Omne ex integro animal generabitur, dabiturque terris homo inscius scele-rum, et melioribus auspiciis natus. Sed illis quoque innocentia non durabit, nisi dum novi sunt. Cito nequitia subrepat: virtus difficilis inventu est, recto-rem ducemque desiderat. Etiam sine magistro vitia discuntur.

---



L. ANNAEI SENECAE  
 AD LUCILIUM  
 NATURALIUM QUAESTIONUM  
 LIBER IV.  
 IN QUO DE NIVE, GRANDINE, ET  
 PLUVIA AGITUR.

---

ARGUMENTUM.

*In Praefatione gratulatur Lucilio de otiosa Siciliae procuratione, quae Musis & literis eius spatium daret. Monet praeterea, ne adulatoribus praebeat latus. Laudes deinde Gallionis fratris interiectae, & Siciliae adiectae.*

*Cap. I. Statim ab origine Nili incipit, & multa de Nilo docta & amoena interspargit. Inde ad grandinem, nivem, glaciem, pluviam abscedit: & occasione tam bella & oblata, adversus nivatas & glaciatas potiones, ac Romanam luxuriam litigare incipit, nec litigium ante librum finit.*

## P R A E F A T I O.

**D**ELECTAT te, quemadmodum scribis, Lucili virorum optime, Sicilia, et officium procurationis otiosae. Delectabit, si continere id intra fines suos volueris, nec efficere imperium, quod est procuratio. Facturum te hoc, non dubito. Scio quam sis ambitioni alienus, quam familiaris otio et literis. Turbam rerum hominumque desiderant, qui se pati nesciunt. Tibi tecum optime convenit. Nec mirum paucis istud contingere: imperiosi nobis ipsis et molesti sumus: modo amore nostri, modo taedio laboramus: infelicem animum nunc superbia inflamus, nunc cupiditate distendimus: alias voluptate laxamus, alias sollicitudine exurimus. Quod est miserrimum, nunquam sumus singuli. Necessè est itaque assidua sit, in tam magno vitiorum contubernio, rixa. Fac ergo, mi Lucili, quod facere consuesti. A turba, quantum potes, te separa; nec adulatoribus latus praebeas, arifices sunt ad captandos superiores. Par illis, etiam si bene caveris, non eris. Mihi crede, capieris, si proditori ipse te trades. Habent hoc in se naturale blanditiae: etiam cum reiiciuntur, placent: saepe exclusae, novissime recipiuntur. Hoc enim ipsum imputant, quod repelluntur, et subigi ne contumelia quidem possunt. Incredibile est, quod dicturus sum, sed tamen verum. Ea maxime quisque patet, qua petitur. Fortasse enim ideo, quia patet, petitur. Sic ergo formare, ut scias non posse te consequi, ut sis impenetrabilis. cum omnia caveris, per orna-

menta feriet. Alius adulatione clam utetur, parce : alius ex aperto, palam, rusticitate simulata, quasi simplicitas illa, non ars sit. Plancus artifex ante Velleium maximus, aiebat non esse occulte, nec ex dissimulato blandiendum. Perit, inquit, procari, si latet. Plurimum adulator cum deprehensus est, proficit : plus etiamnum si obiurgatus est, si erubuit. Futuros multos in persona tua Plancos cogita : et hoc non esse remedium tanti mali, nolle laudari. Crispus Passienus, quo ego nil cognovi subtilius in omnibus rebus, maxime in distinguendis et curandis vitiis, saepe dicebat, adulationi nos opponere, non claudere ostium. Et quidem sic, quemadmodum opponi amicae solet. Quae si impulit, grata est : gratior, si effregit. Demetrium egregium virum memini dicere cuidam libertino potenti, facilem sibi esse ad divitias viam, quo die poenituisset bonae mentis. Nec invidebo, inquit, vobis hanc artem, sed docebo eos quibus quaesito opus est, quemadmodum non dubiam fortunam maris, non emendi vendendique aleam subeant, non incertam fidem ruris, incertiore fori tentent, quemadmodum non solum facili, sed etiam hilari via pecuniam faciant, gaudentesque dissipolient. Te, inquit, longiorem Fido Annaeo iurabo, et Apollonio Pyeta, quamvis staturam habeas Threcis cum Threce compositi. Hominem quidem non esse ullum liberaliorem, non mentiar, cum possis videri omnibus donasse, quidquid dereliquisti. Ita est, mi Iunior, quo apertior est adulatio, quo improbior, quo magis frontem suam perfricuit, cecidit alienam, hoc citius expugnat. Eo enim iam demen-

tiae venimus, ut qui parce adulatur, pro maligno sit. Solebam tibi dicere, Gallionem fratrem meum (quem nemo non parum amat, etiam qui amare plus non potest) alia vitia non nosse, hoc etiam odisse. ab omni illum parte tentasti. Ingenium suspicere coepisti, omnium maximum et dignissimum, quod consecrari mallet, quam conteri: pedes abstulit. Frugalitatem laudare coepisti, qua sic a nummis resiliuit, ut illos habere nec damnare videatur: prima statim verba praecidit. Coepisti mirari comitatem et incompositam suavitatem: quae illos quoque, quos transit, abducit, gratuitum etiam in obvios meritum. Nemo enim mortalium uni tam dulcis est, quam hic omnibus: cum interim tanta naturalis boni vis est, uti artem simulationemque non redoleat. Nemo non imputari sibi bonitatem publicam patitur. Hoc quoque loco blanditiis tuis restitit, ut exclamares invenisse te inexpugnabilem virum adversus insidias, quas nemo non in sinum recipit. Eo quidem magis hanc eius prudentiam, et in evitando inevitabili malo pertinaciam te suspicere confessus es, quia speraveras posse apertis auribus recipi, quamvis blanda diceres, quia vera dicebas. Sed eo magis intellexit obstandum. Semper enim falsis a vero petitur veritas. Nolo tamen tibi displiceas, quasi male egeris mimum, et quasi ille aliquid iocorum aut doli suspicatus sit. Non deprehendit te, sed repulit. Ad hoc exemplar componere. Cum quis ad te adulator accesserit, dicito: Vis tu ista verba, quae iam ab alio magistratu ad alium cum lictoribus transeunt, ferre ad aliquem, qui paria facturus, vult quidquid dixeris, audire?

Ego nec decipere volo, nec decipi possum. Laudari me a vobis, nisi laudaretis etiam malos, vellem. Quid autem necesse est in hoc descendere, ut te petere cominus possint? Longum inter vos intervallum sit. Cum cupieris bene laudari, quare hoc ulli debeas? Ipse te lauda. dic: Liberalibus me studiis tradidi, quanquam paupertas alia suaderet, et ingenium eo abduceret, ubi praesens studii pretium est. Ad gratuita carmina deflexi me, et ad salutare philosophiae studium contuli. Ostendi in omne pectus cadere virtutem: et eluctatus natalium angustias, nec forte me, sed animo mensus, par maximis steri. Non mihi inimicitia Gaetulici Caii fidem eripuit, non in aliorum personam infeliciter amatorum, Messala et Narcissus, diu publici hostes, antequam sui, propositum meum potuerunt evertere. Cervicem pro fide opposui. Nul- lum verbum mihi, quod non salva conscientia pro- cederet, excussum est. Pro amicis omnia timui, pro me nihil: nisi ne parum bonus amicus fuisset. Non mihi muliebres fluxere lacrimae, non e manibus ul- lius supplex pependi. Nihil indecorum nec bono, nec viro feci. Periculis meis maior, paratus ire in ea quae minabantur, egi gratias fortunae, quod ex- periri voluisset, quanti aestimarem fidem. Non de- bebat mihi parvo res tanta constare. Nec examinavit me quidem diu: neque enim paria pendebant, utrum fatius esset me perire pro fide, an fidem pro me. Non praecipiti impetu in ultimum consilium, quo me eri- perem furori potentium, misi. Videbam apud Caium tormenta, videbam ignes. Sciebam olim sub illo in eum statum res humanas decidisse, ut inter miseri-



cordiae opera haberetur, occidi. Non tamen ferro incubui, nec in mare aperto ore defilui, ne viderer pro fide tantum mori posse. Adice nunc invictum muneribus animum, et in tanto avaritiae certamine nunquam suppositam manum lucro. Adice nunc victus parsimoniam, sermonis modestiam, adversus minores humanitatem, adversus maiores reverentiam. Post hoc ipse te consule, verane an falsa memoraveris. Si vera sunt, coram magno teste lavatus es: si falsa, sine teste derisus es. Possum et ipse nunc videri te aut captare, aut experiri. Utrum libet crede, et omnes timere a me incipe. Virgilianum illud excute:

*Nusquam tuta fides.*

Aut Ovidianum,

—— *Qua terra patet, fera regnat Erynnis.*

*In facinus iurasse putes.* ——

Aut illud Menandri: (quis enim non in hoc magnitudinem ingenii sui concitavit, detestatus consensum humani generis, tendentis ad vitia?) Omnes, ait, malos vivere: et in scenam velut rusticus poeta profiluit. Non senem excipit, non puerum, non feminam, non virum: et adiicit, non singulos peccare, nec paucos, sed iam scelus esse contextum. Fugendum ergo, et in se redeundum est, immo etiam a se recedendum. Hoc tibi, etsi dividimur mari, praestare tentabo, ut dubium viae, iniecta manu, ad meliora perducam. Et ne solitudinem sentias, hinc tecum miscebo sermones. Erimus una, qua parte optimi sumus: dabimus invicem consilia, non ex vultu audientis pendentia. Longe te ab ista provincia abdu-

cam, ne forte magnam historiis esse fidem credas, et placere tibi incipias, quotiens cogitaveris. Hanc ego habeo sub meo iure provinciam, quae maximarum urbium exercitus et sustinuit et fregit, cum inter Carthaginem et Romam ingentis belli pretium iacuit, cum quatuor Romanorum principum, id est, totius imperii vires contractas in unum locum vidit, altamque Pompeii fortunam erexit, Caesaris fatigavit, Lepidi transfudit, omniumque cepit: quae illi ingenti spectaculo interfuit, ex quo liquere mortalibus posset, quam velox foret ad imum lapsus ex summo, quamque diversa via magnam potentiam fortuna destrueret. Uno enim tempore vidit Pompeium Lepidumque, ex maximo fastigio aliter ad extrema deiectos, cum Pompeius alienum exercitum fugeret, Lepidus suum.

## C A P U T I.

**I**TAQUE ut te tota mente abducam, quamvis multa habeat Sicilia in se, circaque se mirabilia, omnes interim provinciae tuae quaestiones praeteribo, et in diversum cogitationes tuas abstraham. Quaeram enim tecum id quod libro superiore distuli. Quid ita Nilus aestivis mensibus abundet. Cui Danubium similem natura philosophi tradiderunt, quod et fontis ignoti, et aestate quam hieme maior sit. Utrumque apparuit falsum. Nam et caput eius in Germania esse comperimus: et aestate quidem incipit crescere, sed adhuc manente intra mensuram suam Nilo, primis calori-  
bus, cum sol vehementior inter extrema veris ni-

ves emollit, quas ante consumit, quam intumescere Nilus incipiat. Reliquo vero aestatis minuitur, et ad hibernam magnitudinem redit, atque ex ea dimittitur.

II. At Nilus ante exortum Caniculae augetur mediis aestibus, ultra aequinoctium. Hunc nobilissimum amnem natura extulit ante humani generis oculos, et ita disposuit, ut eo tempore inundare Aegyptum, quo maxime uista fervoribus terra undam altius traheret, tantum hausura, quantum siccitati annuae sufficere possit. Nam in ea parte, quae in Aethiopiam vergit, aut nulli imbres sunt, aut rari, et qui insuetam aquis coelestibus terram non adiuvent. Unam, ut scis, Aegyptus in hoc spem suam habet. Proinde aut sterilis annus, aut fertilis est, prout ille magnus influxit, aut parcior. Nemo aratorum adspicit coelum. Quare non cum poëta meo iocor, et illi Ovidium suum impingo? qui ait:

——— *Nec pluvio supplicat herba Iovi.*

Unde crescere incipiat si comprehendi posset, causae quoque incrementi invenirentur. Nunc vero magnas solitudines pervagatus, et in paludes diffusus, gentibus sparsus, circa Philas primum ex vago et errante colligitur. Philae insula est aspera et undique praerupta: duobus in unum coituris amnibus cingitur, qui Nilo mutantur, et eius nomen ferunt. Urbem totam complectitur. Hanc Nilus magnus magis quam violentus, egressus Aethiopiam arenasque, per quas iter ad commercia Indici maris est, praelabitur. Excipiunt eum cataractae, nobilis insigni spectaculo lo-

cus. Ibi per arduas excisasque pluribus locis rupes Nilus insurgit, et vires suas concitat. Frangitur enim occurrentibus faxis, et per angusta eluctatus, ubicunque vincit, aut vincitur, fluctuat: et illic excitatis primum aquis quas sine tumultu leni alveo duxerat, violentus, et torrens per malignos transitus profilit, dissimilis sibi. Quippe ad id lutosus et turbidus fluit. At ubi scopulos verberavit, spumat: et illi non ex natura sua, sed ex iniuria loci color est. Tandemque eluctatus obstantia, in vastam altitudinem subito destitutus cadit, cum ingenti circumiacentium regionum strepitu. Quem perferre gens ibi a Persis collocata non potuit, obtusis assiduo fragore auribus, et ob hoc sedibus ad quietiora translatis. Inter miracula fluminis incredibilem incolarum audaciam accepi. Bini parvula navigia conscendunt, quorum alter navem regit, alter exhaurit. Deinde multum inter rapidam insaniam Nili, et reciprocos fluctus volutati, tandem tenuissimos canales tenent, per quos angusta rupium effugiunt: et cum toto flumine effusi, navigium ruens manu temperant, magnoque spectantium metu in caput nixi, cum iam adploraveris, mersosque atque obrutos tanta mole credideris, longe ab eo, in quem ceciderant, loco navigant, tormenti modo missi. Nec mergit cadens unda, sed planis aquis tradit. Primum incrementum Nili circa insulam quam modo retuli, Philas, noscitur. Exiguo ab hac spatio petra dividitur, ἀβρων Graeci vocant: nec illam ulli, nisi antistites calcant: illa primum saxa auctum fluminis sentiunt. Post magnum deinde spatium duo eminent scopuli; Nili venas vocant inco-

lae; ex quibus magna vis funditur, non tamen quantal operire posset Aegyptum. In haec ora stipem sacerdotcs, et aurea dona praefecti, cum solenne venit sacrum, iaciunt. Hinc iam manifestus novarum virium Nilus, alto ac profundo alveo fertur, ne in latitudinem excedat obiectu montium pressus. Circa Memphim demum liber, et per campestria vagus, in plura scinditur flumina, manumque canalibus factis, ut sit modus in derivantium potestate, per totam discurrit Aegyptum. Initio diducitur, deinde continuatis aquis in faciem lati ac turbidi maris stagnat: cursum illi violentiamque eripit latitudo regionum, in quas extenditur, dextra laevaque totam amplexus Aegyptum. Quantum crevit Nilus, tantum spei in annum est. Nec computatio fallit agricolam: adeo ad mensuram fluminis respondet, quam fertilem facit Nilus. Is arenoso et sitienti solo et aquam inducit et terram. Nam cum turbulentus fluat, omnem in siccis atque hiantibus locis faecem relinquit: et quidquid pingue secum tulit, arenis locis allinit: iuvatque agros duabus ex causis, et quod inundat, et quod oblimiat. Ita quidquid non adiit, sterile ac squalidum iacet. Si crevit super debitum, nocuit. Mira aequa natura fluminis, quod cum ceteri amnes abluant terras et eviscerent, Nilus tanto ceteris maior, adeo nihil exedit, nec abradit, ut contra adiiciat vires, minimumque in eo sit quod solum temperet. Illato enim limo, arenas saturat ac iungit. Debetque illi Aegyptus non tantum fertilitatem terrarum, sed ipsas. Illa facies pulcherrima est, cum iam se in agros Nilus ingessit. Latent campi, opertaeque sunt valles:



oppida insularum modo exstant. Nullum in mediterraneis, nisi per navigia commercium est. Maiorque est laetitia gentibus, quo minus terrarum suarum vident. Sic quoque cum se ripis continet Nilus, per septena ostia in mare emittitur: quodcunque elegeris ex his, mare est. Multos nihilominus ignobiles ramos in aliud atque aliud litus porrigit. Ceterum belluas, marinis vel magnitudine vel noxa pares, educat. Et ex eo quantus sit, aestimari potest, quod ingentia animalia, et pabulo sufficienti, et ad vagandum loco, continet. Balbillus virorum optimus, in omni literarum genere rarissimus, auctor est, cum ipse praefectus obtineret Aegyptum, Heracleotico ostio Nili, quod est maximum, spectaculo sibi fuisse delphinorum a mari occurrentium, et crocodilorum a flumine adversum agmen agentium, velut pro partibus proelium. Crocodilos ab animalibus placidis morsuque innoxiiis victos. His superior pars corporis dura et impenetrabilis est etiam maiorum animalium dentibus; at inferior, mollis ac tenera: hanc delphini spinis, quas dorso eminentes gerunt, submersi vulnerabant, et in adversum enixi dividebant. Recisis hoc modo pluribus, ceteri velut acie versa refugerunt. Fugax animal audaci, audacissimum timido. Nec illos Tentyritae generis aut sanguinis proprietate superant, sed contemptu et temeritate. Ultro enim insequuntur, fugientesque iniecto trahunt laqueo: plerique pereunt, quibus minus praesens animus ad persequendum fuit. Nilum aliquando marinam aquam detulisse, Theophrastus est auctor. Biennio continuo, regnante Cleopatra, non ascendisse, decimo regni

anno et undecimo, constat. Significatam aiunt duobus rerum potentibus defectionem. Antonii enim Cleopatraeque defecit imperium. Per novem annos non ascendisse Nilum superioribus seculis, Callimachus est auctor. Sed nunc ad inspiciendas causas, propter quas aestate Nilus crescat, accedam, et ab antiquissimis incipiam. Anaxagoras ait, ex Aethiopiae iugis solutas nives ad Nilum usque decurrere. In eadem opinione omnis vetustas fuit. Hoc Aeschylus, Sophocles, Euripides, tradunt. Sed falsum esse, argumentis plurimis patet. Primo Aethiopiam ferventissimam esse, indicat hominum adustus color, et Troglodytae, quibus subterraneae domus sunt. Saxa velut igni fervere, non tantum medio, sed inclinato quoque die: ardens pulvis, nec humani vestigii patiens: argentum replumbatur: signorum coagumenta solvuntur: nullum materiae superadornatae manet operimentum. Auster quoque, qui ex illo tractu venit, ventorum calidissimus est. Nullum ex his animalibus quae latent bruma, unquam reconditur. Etiam per hiemem in summo et aperto serpens est. Alexandria quoque, quae longe ab huiusmodi immodicis caloribus est posita, nives non cadunt: superiora etiam pluvia carent. Quemadmodum ergo regio tantis subiecta fervoribus duraturas per totam aestatem nives recipit? Quas sane aliqui montes illic quoque excipiant: nunquam tamen magis quam Alpes, quam Thraciae iuga aut Caucasus. Atqui horum montium flumina vere et prima aestate intumescunt, deinde hibernis minora sunt. Quippe vernis temporibus imbres nivem diluunt: reliquias eius primus calor dissi-

pat. Nec Rhenus, nec Rhodanus, nec Ister, nec Caystrus subiacent malo : aestate proveniunt. Altissimae sunt et in illis Septemtrionalibus iugis nives. Phasis quoque per id tempus et Borysthenes cresceret, si nives flumina possent contra aestatem magna producere. Praeterea si haec causa atrolleret Nilum, aestate prima plenissimus flueret. Tunc enim maximae et integrae adhuc nives, ex molliissimoque tabes est. Nilus autem per menses quatuor liquitur, et illi aequalis accessio est. Si Thaleti credis, Etesiae discedenti Nilo resistunt, et cursus eius acto contra ostia mari sustinent : ita reverberatus in se recurrit : nec crescit, sed exitu prohibitus resistit, et quacunque mox pergit, inconcessus erumpit. Euthymenes Massiliensis testimonium dicit : Navigavi, inquit, Atlanticum mare. Inde Nilus fluit maior, quamdiu Etesiae tempus observant : tunc enim eiicitur mare instantibus ventis. Cum resederint, et pelagus conquiescit : minorque discedenti inde vis Nilo est. Ceterum dulcis maris sapor est, et similes Niloticis belluae. Quare ergo, si Nilum Etesiae provocant, et ante illos incipit incrementum eius, et post eos durat ? Praeterea non fit maior, quo illi flavere vehementius ? Nec remittitur incitaturque, prout illis impetus fuit : quod fieret, si illorum viribus cresceret. Quid, quod Etesiae litus Aegyptium verberant, et contra illos Nilus descendit, inde venturus, unde illi, si origo ab illis esset ? Praeterea ex mari purus et caeruleus efflueret, non ut nunc turbidus venit. Adde, quod testimonium eius testium turba coarguitur. Tunc erat mendacio locus, cum ignota essent externa. Licebat illis fabulas

mittere. Nunc vero tota exteri maris ora mercatorum navibus stringitur : quorum nemo narrat nunc caeruleum Nilum, aut mare saporis alterius. quod et natura credi verat : quia dulcissimum quodque et levissimum sol trahit. Praeterea quare hieme non crescit? et tunc potest ventis concitari mare, aliquando quidem maioribus. Nam Etesiae temperati sunt. Quod si e mari ferretur Atlantico, semel oppleret Aegyptum. At nunc per gradus crescit. Oenopides Chius ait, hieme calorem sub terris contineri : ideo et specus calidos esse, et tepidiorem puteis aquam : itaque venas interno calore ficcari. Sed in aliis terris augentur imbribus flumina. Nilum, quia nullo imbre adiuvetur, tenuari, deinde crescere per aestatem : quo tempore frigent interiora terrarum, et redit rigor fontibus. Quod si verum esset, aestate flumina crescerent, omnesque putei aestate abundarent. Deinde non calorem hieme sub terris esse maiorem. Aqua et specus et putei tepent : quia aëra rigentem extrinsecus non recipiunt. Ita non calorem habent, sed frigus excludunt. Ex eadem causa aestate refrigerant : quia illo remotus seductusque aër calefactus non pervenit. Diogenes Apolloniates ait : Sol humorem ad se rapit : hunc exsiccata tellus tum ex mari ducit, tum ex ceteris aquis. Fieri autem non potest, ut una sicca sit tellus, alia abundet. Sunt enim perforata omnia, et in itinera pervia. Sicca ab humidis sumunt aliquando. Nisi aliquid terra acciperet, exaruiisset. Ergo undas sol trahit : sed ex his quae premunt, maxime haec meridiana sunt. Terra cum exaruit, plus ad se humoris adducit. ut in lu-

cernis oleum illo fluit, ubi exuritur: sic aqua illo incumbit, quo vis caloris et terrae aestuantis arcessit. Unde ergo trahitur? ex illis scilicet partibus semper hibernis, Septemtrionalibus, unde exundat. Ob hoc Pontus in infernum mare assidue fluit rapidus, non ut cetera maria, alternatis ultro citro aestibus, in unam partem semper pronus et torrens. Quod nisi faceret, hisque itineribus, quod cuique deest, redderetur, quod cuique superest, emitteretur; iam aut siccata essent omnia, aut inundata. Interrogare Diogenem libet, quare, cum pontus et amnes cuncti invicem commeent, non omnibus locis aestate maiora sunt flumina? Aegyptum sol magis percoquit. Itaque Nilus magis crescit. Sed in ceteris quoque terris aliqua fluminibus fit adiectio. Deinde quare ulla pars terrae sine humore est, cum omnis ad se ex aliis regionibus trahit: eoque magis, quo calidior est? Deinde quare Nilus dulcis est, si illi e mari unda est? Nec enim ulli fluminum dulcior gustus.

III. Grandinem hoc modo fieri, si tibi affirmavero, quo apud nos glacies fit, gelata nube tota, nimis audacem rem fecero. Itaque ex his me testibus numeram secundae notae, qui vidisse quidem se negant, sed audisse. Aut quod historici faciunt, et ipse faciam. Illi cum multa mentiti sunt ad arbitrium suum, unam aliquam rem nolunt spondere: sed adiiciunt, Penes auctores fides erit. Ergo si mihi parum credis, Posidonius tibi auctoritatem promittet, tam in illo quod praeteriit, quam in hoc quod secuturum est. Grandinem enim fieri ex nube aquosa, etiam in humorem versa, sic affirmabit, tanquam interfuerit.



Quare autem rotunda sit grando, etiam sine magistro scire potes, cum adnotaveris, stillicidium omne conglomerari. Quod et in speculis apparet, quae humorem halitu colligunt, et in poculis sparsis, aliaque omni laevitate: nam et in herbarum vel arborum foliis, si quae guttae adhaeserunt, in rotundum iacent.

*Quid magis est saxo durum? quid mollius unda?*

*Dura tamen molli saxa cavantur aqua.*

aut, ut alius poëta ait:

*Stillicidii casus lapidem cavat.*

et haec ipsa excavatio rotunda fit. Ex quo apparet, illud huic quoque simile esse quod cavat. Locum enim sibi ad formam et habitum suum exsculpi. Praeterea potest, etiamsi non fuerit grando talis, cum defertur, corrotundari, et toties per spatium aëris densi devoluta aequabiliter atque in orbem teri. Quod nix pati non potest: quia non est tam solida, immo quia tam fusa est, et non per magnam altitudinem cadit, sed circa terras initium eius est. Ita non longius illi per aëra, sed ex proximo lapsus est. Quare non et ego idem mihi permittam, quod Anaxagoras, cum inter nullos magis quam inter philosophos esse debeat aequa libertas? Grando nihil aliud est quam suspensa glacies. Nix, in pruina pendens congelatio. Illud enim iam diximus, quod inter aquam et rorem interest, hoc inter pruina et glaciem, nec non inter nivem et grandinem interesse.

IV. Poteram me, peracta quaestione, dimittere:

sed bene emensum dabo : et quoniam coepi tibi molestus esse, quidquid in hoc loco quaeritur, dicam. Quaeritur autem, quare hieme ningat, non grandinet: et vere, iam frigore infracto, grando cadat. Nam ut fallar tibi, verum mihi quidem persuadetur, qui me usque ad mendacia haec leviora, in quibus os praecidi, non oculi erui solent, credulum praesto. Hieme aër riget: et ideo nondum in aquam vertitur, sed in nivem, cui aër proprior est. Cum ver coepit, maior inclinatio aëris sequitur, et calidiore coelo maiora fiunt stillicidia. Ideo, ut ait Virgilius noster,

—— cum ruit imbriferum ver,

vehementior immutatio est aëris, undique patefacti et solventis se, ipso tempore adiuvante. Ob hoc nimbi graves magis vastique quam pertinaces deferuntur. Bruma lentas pluvias habet et tenues: quales saepe solent intervenire, cum pluvia rara et minuta, nivem quoque admixtam habet. Dicimus nivalem diem, cum altum frigus, et triste coelum est. Praeterea Aquilone flante, et suum coelum habente, minutae pluviae sunt: Austro imber improbior est, et guttae pleniores sunt.

V. Rem a nostris positam nec dicere audeo, quia infirma videtur; nec praeterire. Quid enim mali est, aliquid et faciliori iudici scribere? Immo si omnia argumenta ad obrussam coeperimus exigere, silentium indicetur. Pauca enim admodum sunt sine adversario. Cetera etiam si vincunt, litigant. Aiunt, quidquid circa Scythiam et Pontum et Septemtrionalem plagam glaciatum et adstrictum est, vere relaxari. tunc

flumina gelata discedere, tunc obrutos montes nivem solvere. Credibile est ergo, frigidos spiritus inde fieri, et verno coelo remisceri. Illud quoque adiciunt, quod nec sum expertus, nec experiri cogito. Tu quoque, censeo, si volueris verum exquirere, nivem ita cave experiaris. Minus algere aiunt pedes eorum, qui fixam et duram nivem calcant, quam eorum qui teneram et labefactam. Ergo, si non mentiuntur, quidquid ex illis Septemtrionalibus locis, iam disturbata nive, et glacie frangente se fertur, id meridianae partis repentem iam humidumque aëra alligat, et perstringit. Itaque cum pluvia futura erat, grando fit, iniuria frigoris.

VI. Non tempero mihi, quo minus omnes nostrorum ineptias proferam. Quosdam peritos observandarum nubium esse affirmant, et praedicere, cum grando futura sit: et hoc intelligere usu ipso potuisse, cum colorem nubium notassent, quam grando toties insequabatur. Illud incredibile, Cleonis fuisse publice praepositos χαλαζοφύλακας, speculatores futurae grandinis. Hi cum signum dedissent, adesse iam grandinem, quid exspectas? ut homines ad penulas discurrerent, aut ad scortas? Immo pro se quisque alius agnum immolabat, alius pullum. Protinus autem illae nubes alio declinabant, cum aliquid gustassent sanguinis. Hoc rides. Accipe, quod rideas magis. Si quis nec agnum nec pullum habebat, quod sine damno fieri poterat, manus sibi afferebat. Et ne tu avidas aut crudeles existimes nubes, digitum suum bene acuto graphio pungebat, et hoc sanguine litabat. Nec minus ab huius agello grando se avertebat,

quam ab illo, in quo maioribus hostiis exorata erat.

VII. Rationem huius rei quidam quaerunt. Alteri, ut homines sapientissimos decet, negant posse fieri, ut cum grandine aliquis paciscatur, et tempestates munusculis redimat, quamvis munera etiam deos vincant. Alteri suspicari ipsos aiunt, esse in ipso sanguine vim quandam potentem avertendae nubis, ac repellendae. Sed quomodo in tam exiguo sanguine potest esse vis tanta, ut in altum penetret, et eam sentiant nubes? Quanto expeditius erat dicere, Mendacium et fabula est? At Cleonis iudicia reddebant in illos, quibus delegata erat cura providendae tempestatis: quod negligentia eorum vineae vapulassent, aut segetes procidissent. Et apud nos in duodecim tabulis cavetur, ne quis alienos fructus excantassit. Rudis adhuc antiquitas credebatur et attrahi imbres cantibus, et repelli: quorum nihil posse fieri, tam palam est, ut huius rei causa nullius philosophi schola intranda sit.

VIII. Unam rem adhuc adiiciam, et favere ac plaudere te iuvabit. Aiunt nivem in ea parte aëris fieri, quae prope terras est. Hanc enim plus habere caloris ex tribus causis. Una, quod omnis terrarum evaporatio, cum multum intra se fervidi aridique habeat, hoc est calidior, quo recentior. Altera, quod radii solis a terra resiliunt, et in se recurrunt. Horum duplicatio proxima quaeque a terris calefacit. Quae ideo plus habent teporis, quia solem bis sentiunt. Tertia causa est, quod magis superiora perflantur. at quaecunque depressa sunt, minus ventis verberantur.

IX. Accedit his ratio Democriti. Omne corpus quo solidius est, hoc calorem citius concipit, et diutius servat. Itaque si in sole posueris aeneum vas et vitreum et argenteum, aeneo citius calor accedet, diutius haerebit. Adice deinde, quare hoc existimet fieri. His, inquit, corporibus, quae duriora, et pressiora densioraque sunt, necesse est minora foramina esse, et tenuiorem in singulis spiritum. Sequitur ut quemadmodum minora balnearia et minora miliaria citius calefiunt, sic haec foramina occulta et oculos effugientia, et celerius fervorem sentiant, et propter easdem angustias quidquid receperunt, tardius reddant.

X. Haec longe praeparata ad id perducunt, de quo nunc quaeritur. Omnis aër quo propior est terris, hoc crassior. Quemadmodum in aqua et in omni humore faex ima est: ita in aëre spississima quaeque desidunt. Iam autem probatum est, omnia quo crassioris solidiorisque materiae sunt, hoc fidelius custodire calorem receptum: sed quo editior est aër, et quo longius a terrarum colluvie recessit, hoc sincerior puriorque est. Itaque solem non retinet, sed velut per inane transmittit: ideo minus calefit.

XI. Contra autem quidam aiunt, cacumina montium hoc calidiora esse debere, quo soli propiora sunt. Qui mihi videntur errare, quod Apenninum, et Alpes, et alios notos ob eximiam altitudinem montes in tantum putant crescere, ut illorum magnitudo sentire solis viciniam possit. Excelsa sunt ista, quamdiu nobis comparantur; at vero ubi universum respexeris, manifesta est omnium humilitas. Inter se



vincuntur, et vincunt. Ceterum in tantum nihil attollitur, ut collatione totius nulla sit vel maximis portio : quod nisi esset, non diceremus, totum orbem terrarum pilam esse. Pilae proprietas est, cum aequalitate quadam rotunditas : aequalitatem autem hanc accipe, quam vides in lusoria pila. Non multum illi commissurae et rimae earum nocent, quo minus par sibi ab omni parte dicatur. quomodo in hac pila, nihil illa intervalla officiant ad speciem rotundi, sic nec in universo quidem orbe terrarum editi montes, quorum altitudo totius mundi collatione consumitur. Qui dicit altiorem montem, quia solem propius excipiat, magis calere debere : idem dicere potest, longiorem hominem citius quam pusillum debere calefieri, et citius caput eius quam pedes. At quisquis mundum mensura sua aestimaverit, et terram cogitaverit tenere puncti locum, intelliget nihil in illa posse ita eminere, ut coelestia magis sentiat, velut in propinquum illis accesserit. Montes isti quos suspicimus, et vertices aeterna nive obseffi, nihilominus in imo sunt. et propius quidem soli est mons, quam campus aut vallis ; sed sic, quo modo est pilus pilo crassior. Isto enim modo, et arbor alia magis quam alia dicetur vicina coelo : quod falsum est : quia inter pusilla non potest esse magnum discrimen, nisi dum inter se comparantur. Ubi ad collationem immensi corporis ventum est, nihil interest quanto alterum altero sit maius : quia etiam si magno discrimine, tamen minima vincuntur.

XII. Sed ut ad propositum revertar, propter has quas retuli causas, plerisque placuit, in ea parte

aëris nivem concipi, quae vicina terris est: et ideo minus alligari, quia minore frigore coit. Nam vicinus aër et plus habet frigoris, quam ut in aquam et imbrem transeat, et minus quam ut duretur in grandinem. Hoc medio frigore non nimis intento nives sunt coactis aquis.

XIII. Quid istas, inquis, ineptias, quibus nec literatior sit quisquam, nec melior, tam operose persequeris? Quomodo fiant nives, dicis: cum multo magis ad nos dici a te pertineat, quare emendae non sint nives. Iubes me cum luxuria litigare. Quotidianum istud et sine effectu iurgium est. Litigemus tamen: etiamsi superior futura est, pugnantes ac reluctantes vincat. Quid porro? Hanc ipsam inspectionem naturae nihil iudicas ad id, quod vis, conferre? Cum quaerimus, quomodo nix fiat, et dicimus illam pruinae similem habere naturam, plus illi spiritus quam aquae inesse, non putas exprobari illis; cum emere aquam turpe sit, si nec aquam quidem emunt? Nos vero quaeramus potius, quomodo fiant nives, quam quomodo serventur: quoniam non contenti vina diffundere veterana, et per sapes aetatesque disponere, invenimus quomodo stiparemus nivem, ut ea aestatem evinceret, et contra anni fervorem defenderetur loci frigore. Quid hac diligentia consecuti sumus? Nempe ut gratuitam mercemur aquam. Nobis dolet, quod spiritum, quod solem emere non possumus, quocumque hic aër etiam delicatis divitibusque ex facili nec emtus venit. O quam nobis male est, quod quidquam a rerum natura in medio relictum est! Hoc quod illa fluere et patere omnibus voluit,

cuius haustum vitae publicum fecit ; hoc quod tam homini , quam feris avibusque , et inertissimis animalibus , in usum large ac beate profudit , contra se ingeniosa luxuria redegit ad pretium. Adeo nihil potest illi placere , nisi carum. Unum hoc erat , quod divites in aequum turbae deduceret , quo non possent antecedere pauperrimum. Illi cui divitiae molestae sunt , excogitatum est , quemadmodum etiam aqua caperet luxuriam. Unde ad hoc perventum sit , ut nulla nobis aqua satis frigida videretur quae flueret , dicam. Quamdiu sanus et salubris cibi capax stomachus est , impleturque , non premitur , naturalibus fomentis contentus est. Ubi quotidianis cruditatibus non temporis aestus , sed suos sentit , ubi ebrietas continua visceribus infedit , et praecordia bile , in quam vertitur , torret , aliquid necessario quaeritur , quo aestus ille frangatur , qui ipsis aquis incalescit , remediis incitat vitium. Itaque non aestate tantum , sed et media hieme nivem hac causa bibunt. Quae huius rei causa est , nisi intestinum malum , et luxu corrupta praecordia , quibus nullum intervallum unquam quo interquiescerent , datum est , sed prandia coenis usque in lucem perductis ingesta sunt , et distentos copia ferculorum ac varietate comeffatio altius merfit ? Deinde nunquam intermissa intemperantia , quidquid ante decoxerat , efferavit , et in desiderium semper novi rigoris accendit. Itaque quamvis coenationem velis ac specularibus muniant , et igne multo doment hiemem , nihilominus stomachus ille solutus , et aestu suo languidus , quaerit aliquid quo erigatur. Nam sicut animo relictos stu-

pentefque frigida spargimus, ut ad sensum sui redeant: ita viscera istorum vitiis torpentia nihil sentiunt, nisi frigore illa vehementiore perusseris. Inde est, inquam, quod nec nive quidem contenti sunt, sed glaciem, velut certior illi ex solido rigor sit, exquirunt, ac saepe reperitis aquis diluunt: quae non e summo tollitur, sed ut vim maiorem habeat, et pertinacius frigus, ex abdito effoditur. Itaque ne unum quidem est pretium: sed habet institores aqua, et annonam, pro pudor! variam. Unguentarios Lacedaemonii urbe expulerunt, et propere cedere finibus suis iusserunt, quia oleum disperderent. Quid illi fecissent, si vidissent reponendae nivis officinas, et tot iumenta portandae aquae deservientia, cuius colorem saporemque paleis, quibus custodiunt, inquinant? At dii boni, quam facile est extinguere sitim sanam! Sed quid sentire possunt emortuae fauces, et occallatae cibus ardentibus? Quemadmodum nihil illis satis frigidum, sic nihil satis calidum est. Sed ardentes boletos, et raptim condimento suomersatos, demittunt paene fumantes, quos deinde restinguant nivatis potionibus. Videbis, inquam, quosdam graciles, et palliolo focalique circumdatos, palientes et aegros, non forbere solum nivem, sed etiam esse, et frustra eius in scyphos suos deiicere, ne inter ipsam bibendi moram tepefiant. Sitim istam esse putas? Febris est: et quidem eo acrior, quod non tactu venarum, nec in cutem effuso calore deprehenditur. Sed cor ipsum excoquit luxuria invictum malum, et ex molli fluidoque durum atque patiens. Non intelligis, omnia consuetudine vim suam per-

dere? Itaque nix ista, in qua etiamnum natatis, eo pervenit usu, et quotidiana stomachi servitute, ut aquae locum obtineat. Aliquid adhuc quaerite illi frigidius, quia pro nihilo est familiaris rigor.

---



L. ANNAEI SENECAE

## AD LUCILIUM

NATURALIUM QUAESTIONUM

LIBER V.

IN QUO DE VENTIS ET AERIS  
MOTU AGITUR.

## A R G U M E N T U M.

*Differt, quid ventus. Democritum refellit, qui censet ventum esse, cum multae & confertae atomi in angusto inani ita se comprimunt, ut superfundantur. Igitur ventum fieri potius, partim aëre a sole extenuato ac diffuso, partim, quia aër animal est, & vim se movendi ac flabellandi habet. Tota deinde doctrina ventorum, tam communium XII, quam provincialium. Declinat denique sub finem suo more in hominum mores, qui ventis ad custodiendam coeli terrarumque temperiem, ad prudentiam comparandam & noscenda transmarina a Deo datis, ad bella, ambitionem, & avaritiam abutimur. Unde in incerto ponit, an nasci magis ventos, quam non nasci, profuerit: quod de Iulio Caesare Livius olim dixit.*

## CAPUT I.

**V**ENTUS est fluens aër. Quidam ita definierunt : Ventus est aër fluens in unam partem. Haec definitio videtur diligentior : quia nunquam aër tam immobilis est , ut non in aliqua sit agitatione. Sic tranquillum mare dicitur , cum leviter commovetur , nec in unam partem inclinatur. Itaque si legeris ,

*Cum placidum ventis staret mare :*

scito illud non stare , sed succuti leviter : et dici tranquillum , quia nec huc nec illo impetum capiat. Idem et de aëre iudicandum est , non esse unquam immobilem , etiamsi quietus sit. Quod ex hoc intelligas licet. Cum sol in aliquem clausum locum infusus est , videmus corpuscula minima in adversum ferri , alia sursum , alia deorsum , varie concursantia. Ergo parum diligenter comprehendet quod vult , qui dixerit , Fluctus est maris agitatio : quia tranquillum quoque agitur. At ille abunde sibi caverit , cuius haec definitio fuerit : Fluctus est maris in unam partem agitatio. Sic in hac quoque re , de qua cum maxime quaerimus , non circumscribetur , qui ita se gesserit , ut dicat : Ventus est fluens aër in unam partem : aut , Ventus aër est fluens impetu , aut vis aëris in unam partem euntis , aut cursus aëris aliquo concitior. Scio quid responderi pro definitione altera possit. Quid necesse est adiacere te , in unam partem fluens aër ? Utique enim quod fluit , in unam partem fluit. Nemo aquam fluere dicit , si tantum intra se

movetur, sed si aliquo fertur. Potest ergo aliquid moveri, et non fluere: at e contrario non potest fluere, nisi in unam partem. Sed si haec brevis satisfacta a calumnia tuta est, hac utamur: si aliquis circumspiciat, verbo non parcat, cuius adiectio cavillationem omnem poterit excludere. Nunc ad ipsam rem accedamus, quoniam satis de formula disputatum est.

II. Democritus ait, cum in angusto inani multa sunt corpuscula, quae ille atomos vocat, sequi ventum. At contra, quietum et placidum aëris statum esse, cum in multo inani pauca sunt corpuscula. Nam quemadmodum in foro aut vico quamdiu paucitas est, sine tumultu ambulatur: ubi turba in angustum concurrit, aliorum in alios incidentium rixa fit: sic in hoc quo circumdati sumus spatio, cum exiguum locum multa corpora impleverint, necesse est alia aliis incidunt, et impellantur ac repellantur, implenturque et comprimantur, ex quibus nascitur ventus, cum illa quae colluctabantur, incubuere, et diu fluctuata ac dubia inclinavere se. At ubi in magna laxitate corpora pauca versantur, nec arietare possunt, nec impelli.

III. Hoc falsum esse, vel ex eo colligas licet, quod tunc interim minime ventus est, cum aër nubilo gravis est. Atqui tunc plurima corpora se in angustum contulere: et inde ipsissimarum nubium gravitas est. Adice nunc, quod circa flumina et lacus frequens nebula est, arctatis congestisque corporibus, nec tamen ventus est. Interdum vero tanta caligo offunditur, ut conspectum in vicino stantium

eripiat : quod non eveniret , nisi in parvum locum corpora se multa compellerent. Atqui nullum tempus magis , quam nebulosum , caret vento. Adiice nunc , quod e contrario venit , ut sol matutinum aëra spissum et humidum ortu suo tenuet. Tunc surgit aura , cum datum est laxamentum corporibus , et stipatio illorum , ac turba resoluta est.

IV. Quomodo , inquis , ergo venti fiunt , quos non negas fieri ? Non uno modo. Alias enim terra ipsa magnam vim aëris eiicit , et ex abdito spirat : alias cum magna et continua ex imo evaporatio in altum agit quae emiserat , immutatio ipsa halitus mixti in ventum vertitur. Illud enim nec ut credam , mihi persuaderi potest , nec ut taceam : quomodo in nostris corporibus ex cibo fit inflatio , quae non sine magna narium iniuria emittitur , et ventrem interdum cum sono exonerat , interdum secretius : sic putant et hanc magnam rerum naturam alimenta mutantem emittere spiritum. Bene nobiscum agitur , quod semper concoquit : alioquin immundius aliquid timeremus. Numquid ergo hoc verius est , dicere , multa ex omni parte terrarum et assidua ferri corpuscula : quae , cum coacervata sunt , deinde extenuari sole coeperint , quia omne quod in angusto dilatatur , spatium maius desiderat , ventus existit ?

V. Quid ergo ? hanc solam esse causam venti existimas , aquarum terrarumque evaporationes ? Ex his gravitatem aëris fieri , deinde solvi impetu , cum quae densa steterant , ut est necesse , extenuata nituntur in ampliorem locum ? Ego vero et hanc iudico. Ceterum illa est longe verior causa , valentior-

que, habere aëra naturalem vim movendi se: nec aliunde concipere, sed inesse illi ut aliarum rerum, ita huius potentiam. An hoc existimas, nobis quidem das vires esse, quibus nos moveremus, aëra autem inertem, inagitabilem relictum esse? cum aqua motum suum habeat, etiam ventis quiescentibus: nec enim aliter animalia edere posset. Muscum quoque innasci aquis, et herbosa quaedam videmus, summo innatantia.

VI. Est ergo aliquid in aqua vitale. De aqua dico? Ignis qui omnia consumit, quaedam etiam creat: et quod videri non potest simile veri, sed tamen verum est, animalia igne generantur. Habet ergo aliquam vim talem aër, et ideo modo spissat se, modo expandit et purgat: alias contrahit, alias diducit, ac differt. Hoc ergo interest inter aëra et ventum, quod inter lacum et flumen. Aliquando per se ipse sol causa venti est, fundens rigentem aëra, et ex denso coactoque explicans.

VII. In universum de ventis diximus: nunc viritim incipiemus illos excutere. Fortasse apparebit quemadmodum fiant, si apparuerit, quando et unde procedant. Primum ergo antelucanos flatus inspiciamus, qui aut ex fluminibus, aut ex convallibus, aut ex aliquo sinu feruntur. Nullus ex his pertinax est, sed cadit fortiore iam sole: nec fertur ultra terrarum adspectum. Hoc ventorum genus incipit vere, nec ultra aestatem durat. Et inde maxime venit, ubi aquarum plurimum et montium est. Plana licet abundant aquis, tamen carent aura: hac dico, quae pro vento valet.



VIII. Quomodo ergo talis flatus concipitur, quem Graeci ἐγκολπίαν vocant? Quidquid ex se paludes et flumina emittunt (id autem et multum est, et affliduum) per diem solis alimentum est: nocte non exhauritur, sed montibus inclusum, in unam regionem colligitur. Cum illam implevit, et iam se non capit, sed exprimitur aliquo, et in unam partem procedit: hic ventus est. Itaque eo incumbit, quo liberior exitus invitat, et loci laxitas, in quam coacervata incurrant. Huius rei argumentum est, quod prima noctis parte non spirat. Incipit enim fieri tunc illa collectio, quae circa lucem iam plena est, et onerata quaerit quo defluat: et eo potissimum exit, ubi plurimum vacui est, et magna ac patens area. Adicit autem ei stimulos ortus solis, feriens gelidum aëra. Nam etiam antequam appareat, lumine ipso valet: et nondum quidem aëra radiis impellit, iam tamen laceffit et irritat, luce praemissa. Nam cum ipse processit, alia superius rapiuntur, alia diffunduntur tempore. Ideo non ultra matutinum illis datur flare. omnis illorum vis conspectu solis exstinguitur: etiamsi violentiores flavere, circa medium tamen diem relanguescunt: nec unquam usque in meridiem aura producitur. Alia autem imbecillior ac brevior est, prout valentioribus minoribusve collecta causis est.

IX. Quare tamen tales venti vere et aestate validiores sunt? Levissimi enim cetera parte anni, nec qui vela impleant, surgunt. Quia ver aquosius est, et ex plurimis aquis, locisve ob humidam coeli naturam saturis et redundantibus, maior evaporatio est. At quare aestate profunditur? Quia post occasum

folis remanet diurnus calor, et magna noctis parte perdurat: qui evocat exeuntia, ac vehementius trahit, quidquid ex his sponte reddi solet: deinde non tantum habet virium, ut quod evocavit, absumat. Ob hoc diutius corpuscula emanare solita, et efflari, terra ex se atque humor emittit. Facit autem ventum sol ortus, non calore tantum, sed etiam ictu. Lux enim (ut dixi) quae solem antecedit, nondum aëra calefacit, sed percutit tantum: percussus autem in latus cedit. Quanquam ego ne illud quidem concesserim, lucem ipsam sine calore esse, cum ex calore fiat. Non habet forsitan tantum teporis, quantum actu appareat. Opus tamen suum facit, et densa diducit ac tenuat. Praeterea loca, quae aliqua iniquitate naturae ita clausa sunt, ut solem accipere non possint, illa quoque nubila et tristi luce calefiunt, et per diem minus quam noctibus rigent. Etiamnum natura calor omnis abigit nebulas, et a se repellit. Ergo sol quoque idem facit. Et ideo quibusdam videtur, inde flatus esse, unde sol. Hoc falsum esse ex eo apparet, quod aura in omnem partem vehit, et contra ortum plenis velis navigatur. Quod non eveniret, si semper ventus ferretur a sole.

X. Etesia quoque, qui in argumentum a quibusdam advocantur, non nimis propositum adiuvant. Dicam primum quid illis placeat: deinde, cur displiceat mihi. Etesia, inquiunt, hieme non sunt: quia brevissimis diebus sol desinit, priusquam frigus evincatur. Itaque nives et ponuntur et durantur. Aestate incipiunt flare, cum et longius extenditur dies, et recti in nos radii diriguntur. Veri ergo simile est,

concussas calore magno nives plus humidi efflare. Item terras exoneratas nive, reiectasque spirare liberius. Itaque plura ex Septemtrionali parte coeli corpora exire, et in haec loca quae submissiora ac tepidiora sunt, deferri. Sic imperum Etesias sumere: et ob hoc a solstitio illis initium est, ultraque ortum Caniculae non valent: quia iam multum e frigida coeli parte in hanc egestum est. At sol mutato cursu in nostram rectior tenditur: et alteram partem aëris attrahit, aliam vero impellit. Sic ille Etesiarum flatus aestatem frangit: et a mensum ferventissimorum gravitate defendit.

XI. Nunc, quod promisi, dicendum est, quare Etesiae illos non adiuvent, nec quidquam huic conferant causae. Dicimus autem luce auram incitari, tandem subsidere, cum illam sol attigit. Atqui Etesiae ob hoc somniculosi a nautis, et delicati vocantur, quod (ut ait Gallio) mane nesciunt surgere: eo tempore incipiunt prodire, quo ne pertinax quidem aura est. quod non accideret, si ut auras, ita illos sol comminueret. Adiice nunc, quod si causa illis flatus est, spatium diei ac longitudo, etiam ante solstitium flarent, cum longissimi dies sunt, et cum maxime nives tabescunt. Iulio enim mense iam dispoliata sunt omnia, aut certe admodum pauca iacent adhuc sub nive.

XII. Sunt quaedam genera ventorum, quae ruptae nubes et in prouum solutae emittunt. Hos Graeci ventos *ἐκνεφίας* vocant. Qui hoc (ut puto) modo fiunt. Cum magna inaequalitas ac dissimilitudo corporum, quae vapor terrenus emittit, in sublime eat, et alia

ex his corporibus sicca sint, alia humida: ex tanta discordia corporum inter se pugnantium, cum in unum conglobata sunt, verisimile est quasdam cavas effici nubes, et intervalla inter illas relinqui fistulosa, et in modum tibiae angusta. His intervallis tenuis includitur spiritus: qui maius desiderat spatium, cum everberatus cursu parum libero incaluit: et ob hoc amplior fit, scinditque cingentia, et erumpit in ventum: qui fere procellosus est, quia superne demittitur, et in nos cadit vehemens et acer: quod non fusus, nec per apertum venit, sed laborat, et iter sibi vi ac pugna parat. Hic fere brevis flatus est. Quia receptacula nubium per quae ferebatur, ac munimenta perrumpit; ideo tumultuosus venit aliquando, non sine igne ac sono coeli. Hi venti multo maiores diuturnioresque sunt, si alios quoque flatus ex eadem causa ruentes in se abstulere, et in unum confluxere plures: sicut torrentes modicae magnitudinis eunt, quamdiu separatis suis cursus est: cum vero plures in se aquas convertere, fluminum iustorum ac perennium magnitudinem excedunt. Idem credibile est fieri et in procellis, ut sint breves quamdiu singulae sunt: ubi vero sociavere vires, et ex pluribus coeli partibus elisus spiritus eodem se contulit, et impetus illis accedit, et mora.

XIII. Facit ergo ventum resoluta nubes: quae pluribus modis solvitur. Nonnunquam conglobationem illam spiritus rumpit, inclusi et in exitum nitentis luctatio: nonnunquam calor, quem modo sol fecit, modo ipsa arietatio magnorum inter se corporum, et attritus. Hoc loco, si tibi videtur, quaeri potest,

cur turbo fiat. Evenire in fluminibus solet, ut, quam diu sine impedimento feruntur, simplex et rectum illis iter sit: ubi incurrere in aliquod saxum ad latus ripae prominens, retorqueantur, et in orbem aquas sine exitu flectant, ita ut circumlatae in se sorbeantur, et vorticem efficiant. Sic ventus, quamdiu nihil obstitit, vires suas effundit. Ubi aliquo promontorio reperiçus est, aut vi locorum coeuntium in canalem devexum tenuemque collectus: saepius in se volutatur, similemque illis, quas diximus converti, aquis facit vorticem. Hic ventus circumactus, et eundem ambiens locum, et se ipsa vertigine concitans, turbo est. Qui si pugnacior est, ac diutius volutatur, inflammatur, et efficit quem *πρῆστιρα* Graeci vocant. Hic est igneus turbo. Hi fere omnia pericula venti erupti de nubibus produnt, quibus armamenta rapiantur, et totae naves in sublime tollantur. Etiamnum quidam venti diversos ex se generant, et impulsam aëra in alias quoque partes, quam in quas inclinavere, dispergunt. Illud quoque dicant, quod mihi occurrit, quemadmodum stillicidia, quamvis iam inclinent se et labantur, nondum tamen effecere lapsum, sed ubi plura coiere et turba vires dedit, tunc fluere et ire dicuntur: sic quamdiu leves sunt aëris motus, agitati pluribus locis, nondum ventus est; tunc esse incipit, cum omnes illos miscuit, et in unum impetum contulit. Spiritum a vento modus separat. vehementior enim spiritus ventus est; invicem spiritus leviter fluens aër.

XIV. Repetam nunc quod in primò dixeram,



edi e specu ventos, recessuque interiore terrarum.  
Non tota solido contextu terra in unum usque fundatur, sed multis partibus cava,

—— & caecis *suspensa latebris.*

alicubi habet inania sine humore. Ibi etiam si nulla lux discrimen aëris monstrat, dicam tamen nubes nebulaeque in obscuro consistere. Nam ne hae quidem supra terras, quia videntur, sunt: sed quia sunt, videntur. Illic quoque nihilominus ob id sunt, quod non videntur. Flumina illic scias licet, nostris paria, sublabi: alia leviter ducta, alia in confragosis locis praecipitando sonantia. Quid ergo? non illud aequè dabis, esse aliquos et sub terra lacus, et quasdam aquas sine exitu stagnare? Quae si ita sunt, necesse est et illud, aëra onerari, oneratumque incumbere, et ventum propulsu suo concitare. Ex illis ergo subterraneis nubibus sciemus nutriri inter obscura flatus, cum tantum virium fecerint, quanto aut terrae obstantia auferant, aut aliquod apertum ad hos efflatus iter occupent, et per hanc cavernam in nostras sedes efferantur. Illud vero manifestum est, magnam esse sub terris vim sulphuris, et aliorum non minus ignem alentium. Per haec loca cum se, exitum quaerens, spiritus tor sit, accendat flammam ipso affricu necesse est. Deinde flammis latius fufis, etiam si quid ignavi aëris erat, extenuatum moveri, et viam cum fremitu vasto atque impetu quaerere. Sed hoc diligentius persequar, cum quaeram de motibus terrae.

XV. Nunc mihi permittite narrare fabulam. Ascle-

piodotus auctor est, demissos quam plurimos a Philippo in metallum antiquum olim destitutum, ut explorarent quae ubertas eius esset, qui status, an aliquid futuris reliquisset vetus avaritia: descendisse illos cum multo lumine, et multos duraturo dies: deinde longa via fatigatos, vidisse flumina ingentia, et conceptus aquarum inertium vastos, pares nostris, nec compressos quidem terra supereminente, sed liberae laxitatis, non sine horrore visos. Cum magna haec legi voluptate. intellexi enim seculum nostrum, non novis vitiis, sed iam inde antiquitus traditis laborare: nec nostra aetate primum avaritiam, venas terrarum lapidumque rimatam, in tenebris male abstrusa quaesisse. Illi quoque maiores nostri, quos celebramus laudibus, quibus dissimiles querimur nos esse, spe ducti, montes ceciderunt, et supra lucrum sub ruina steterunt. Ante Philipppum Macedonem reges fuere, qui pecuniam in altissimis usque latebris sequerentur, et relicto spiritu libero, in illos se demitterent specus, in quos nullum noctium dierumque perveniret discrimen, et a tergo lucem relinquerent. Quae tanta spes fuit? Quae tanta necessitas hominem ad sidera erectum incurvavit, et defodit, et in fundum telluris intimae merfit, ut erueret aurum, non minore periculo quaerendum, quam possidendum? Propter hoc cuniculos egit, et circa praedam lutulentam incertamque reptavit, oblitus dierum, oblitus naturae melioris, a qua se avertit. Nulli ergo mortuo terra tam gravis est, quam istis supra quos avaritia urgens terrarum pondus iniecit, quibus abstulit coelum, quos in imo,

ubi illud malum virus latitat, infodit. Illo descendere ausi sunt, ubi novam rerum positionem, terrarumque pendentium habitus, ventosque per coelum inane experirentur, et aquarum in illis fluentium horridos fontes, et altam perpetuamque noctem. Deinde cum ista fecerint, inferos metuunt.

XVI. Sed ut ad id, de quo agitur, revertar, venti quatuor sunt, in ortum, occasum, meridiem, septentrionemque divisi. Ceteri, quos variis nominibus appellamus, his applicantur.

*Eurus ad auroram Nabathaeaque regna recessit,  
Persidaeque, et radiis iuga subdita matutinis.  
Vesper et occiduo quae litora sole tepefcunt,  
Proxima sunt Zephyro. Scythiam septemque triones  
Horrifer invasit Boreas. contraria tellus  
Nubibus assiduus, pluvioque madescit ab Austro.*

Vel, si brevius illos complecti mavis, in unam tempestatem (quod fieri nullo modo potest) congregentur.

*Una Eurusque Notusque ruunt, creberque procellis  
Africus: - - -*

et qui locum in illa rixa non habuit, Aquilo. Quidam illos duodecim faciunt. Quatuor enim coeli partes in ternas dividunt, et singulis ventis binos suffectos dant. Hac arte Varro, vir diligens, illos ordinat: nec sine causa. Non enim eodem semper loco sol oritur, aut occidit. Sed alius est ortus occasusque aequinoctialis (bis autem aequinoctium est:) alius solstitialis, alius hibernus. Qui surgit ab oriente,

te aequinoctiali, subsolanus apud nos dicitur: Graeci illum ἀφηνιότην vocant. Ab oriente hiberno Eurus exit: quem nostri vocavere Vulturum. Et Livius hoc illum nomine appellat, in illa pugna Romanis parum prospera, in qua Hannibal et contra solem orientem exercitum nostrum, et contra ventum constituit: cum venti adiutorio ac fulgoris praestringentis oculos hostium vicit. Varro quoque hoc nomen usurpat. Sed et Eurus iam civitate donatus est, et nostro sermoni non tanquam alienus intervenit. Ab oriente solstitiali excitatum, Graeci *Καινταν* appellant: apud nos sine nomine est. Aequinoctialis occidens Favonium mittit: quem Zephyrum esse dicent tibi, etiam qui Graece nesciunt loqui. A solstitiali occidente Corus venit, qui apud quosdam Argestes dicitur. Mihi non videtur: quia Cori violenta vis est, et in unam partem rapax; Argestes fere mollis est, et tam euntibus communis, quam redeuntibus. Ab occidente hiberno Africus furibundus et ruens, apud Graecos ἀΐϙ dicitur. A septemtrionali latere summus est Aquilo, medius Septentrio, imus Thrascias. Huic deest apud nos vocabulum. A meridiano axe Euronotus est. deinde Norus, Latine Auster. deinde Libonotus, qui apud nos sine nomine est.

XVII. Placet autem duodecim ventos esse: non quia ubique tot sint (quosdam enim inclinatio terrarum excludit) sed quoniam plures nusquam sunt. Sic casus sex dicimus: non quia omne nomen sex recipit, sed quia nullum plures quam sex. Qui duodecim ventos esse dixerunt, hoc secuti sunt, totidem

ventorum esse, quod coeli discrimina. Coelum enim dividitur in circulos quinque, qui per mundi cardines eunt. Est septentrionalis, est solstitialis, est aequinoctialis, est brumalis, est contrarius septentrionali. His sextus accedit, qui superiorem partem mundi ab inferiore secernit. Ut scis enim, dimidia pars mundi semper supra, dimidia infra est. Hanc lineam, quae inter aperta et occulta est, Graeci *ὀρίζοντα* vocant: nostri finitorem dixerunt, alii finientem. Adiciendus est ad hunc meridianus circulus, qui horizonta rectis angulis secat. Ex his quidam circuli in transversa currunt, et alios interventu suo scindunt. Neesse autem est, tot aëris discrimina esse, quot partes. Ergo horizon sive finiens circulus, quinque illos orbes, quos modo dixi fieri, secat, et efficit decem partes, quinque ab ortu, quinque ab occasu. Meridianus circulus, qui in horizonta incurrit, regiones duas adiicit. Sic duodecim aër discrimina accipit, et totidem facit ventos. Quidam sunt quorundam locorum proprii, qui non transmittunt, sed in proximum ferunt. Non est illis a latere universi mundi impetus. Atabulus Apuliam infestat, Calabriam Iapyx, Athenas Sciron, Pamphyliam Cataegis, Galliam Circius: cui aedificia quassanti, tamen incolae gratias agunt, tanquam salubritatem coeli sui debeant ei. Divus certe Augustus templum illi, cum in Gallia moraretur, et vovit et fecit. Infinitum est, si singulos velim persequi. Nulla enim propemodum regio est, quae non habeat aliquem flatum ex se nascentem, et circa se cadentem.

XVIII. Inter cetera itaque Providentiae opera,



hoc quoque aliquis, ut dignum admiratione suspexit. Non enim ex una causa ventos, aut invenit, aut per diversa disposuit: sed primum ut aëra non finirent pigrescere, sed assidua vexatione utilem redderent, vitalemque tracturis. Deinde ut imbres terris subministrarent, iidemque nimios compescerent. Nam modo adducunt nubes, modo diducunt, ut per totum orbem pluviae dividi possent. In Italiam Auster impellit, Aquilo in Africam reiicit: Etesiae non patiuntur apud nos nubes consistere. Iidem totam Indiam et Aethiopiam continuis per id tempus aquis irrigant. Quid, quod fruges percipi non possunt, nisi flatu supervacua admixta servandis ventilarentur, nisi esset quod segetem excitaret, et latentem frugem, ruptis velamentis suis, quae folliculos agricolae vocant, adaperiret? Quid, quod omnibus inter se populis commercium dedit, et gentes dissipatas locis miscuit? Ingens naturae beneficium, si illud in iniuriam suam non vertat hominum furor. Nunc quod de Caesare olim maiore vulgo dictatum est, et a Tito Livio positum, in incerto esse, utrum illum magis nasci reipublicae profuerit, an non nasci; dici etiam de ventis potest: adeo quidquid ex illis utile et necessarium est, non potest his repensari, quae in perniciem suam generis humani dementia excogitat. Sed non ideo non sunt ista natura sua bona, si vitio male utentium nocent. Nimirum in hoc Providentia, ac dispositor ille mundi Deus, aëra ventis exercendum dedit, et illos ab omni parte, ne quid esset situ squalidum, effudit: non ut nos classes partem freti occupaturas compleveremus milite armato, et hostem in mari aut post mare

inquireremus. Quae nos dementia exagitat, et in mutuum compellit exitium? Vela ventis damus bellum petitori, et periclitamur periculi causa. Incertam fortunam experimur: vim tempestatum nulla ope humana superabilem, mortem sine spe sepulturae. Non erat tanti, si ad pacem per ista veheremur. Nunc autem cum evaserimus tot scopulos latentes, et insidias vadosi maris; cum effugerimus procellosos desuper montes, in quos praeceps navigantes ventus impingit; cum involutos nubilo dies, et nimbis ac tonitruis horrendas noctes, cum turbinibus divulsa navigia: quis erit huius laboris ac metus fructus? quis nos fessos tot malis portus excipiet? Bellum scilicet, et obvius in litore hostis, et trucidandae gentes tracturae magna ex parte victorem, et antiquarum urbium flamma. Quid in arma cogimus populos? quid exercitus scribimus, directuros aciem in mediis fluctibus? quid maria inquietamus? Parum videlicet ad mortes nostras terra late patet. Nimis delicate fortuna nos tractat: nimis dura dedit nobis corpora, felicem valetudinem. Non depopulatur nos casus incurrens: emetiri cuique annos suos ex commodo licet, et ad senectutem decurrere. Itaque eamus in pelagus, et vocemus in nos fata cessantia. Miseri, quid quaeritis? mortem, quae ubique superest? Petet illa vos et ex lectulo; sed utique innocentes petat: occupabit vos in vestra domo; sed occupet nullum molientes malum. Hoc vero quid aliud quis dixerit, quam insaniam, circumferre pericula, et ruere in ignotos, iratum sine iniuria occurrentia devastantem, ac ferarum more occidere, quem non oderis? Illis tamen in ul-

tionem, aut ex fame morsus est: nos sine ulla par-  
monia nostri alienique sanguinis, movemus maria,  
et navigia deducimus, salutem committimus flucti-  
bus, secundos optamus ventos, quorum felicitas est  
ad bella perferri. Quousque nos malos mala nostra  
rapuere? Parum est, intra orbem suum furere. Sic  
Persarum rex stolidissimus in Graeciam traicit, quam  
exercitus non vicit, cum impleverit. Sic Alexander  
ulterior Bactris et Indis volet quaerere, quid sit ultra  
magnum mare, et indignabitur aliquid esse ultimum  
sibi. Sic Parthis avaritia Crassum dabit. Non horrebit  
revocantis diras tribuni, non tempestates longissimi  
maris, non circa Euphratem praesaga fulmina, et  
deos resistentes. Per hominum deorumque iras ad au-  
rum ibitur. Ergo non immerito quis dixerit, rerum  
naturam melius acturam fuisse nobiscum, si ventos  
flare vetuisset, et inhibito discursu furentium, in sua  
quemque terra stare iussisset. Si nihil aliud, certe suo  
quisque tantum ac suorum malo nasceretur. Nunc pa-  
rum vi domestica, externis quoque laborandum est.  
Nulla terra tam longe remota est, quae non mittere  
aliquo suum malum possit. Unde scio an nunc aliquis  
magnae gentis in abdito dominus, fortunae indulgen-  
tia tumens, non contineat intra terminos arma, an  
paret classes ignota moliens? Unde scio, hic mihi, an  
ille ventus bellum invehet? Magna pars erat pacis  
humanae, maria praeccludi. Non tamen (ut paulo ante  
dicebam) queri possumus de auctore nostri Deo, si  
beneficia eius corrumpimus, et ut essent contraria,  
efficimus. Dedit ille ventos ad custodiendam coeli  
terrarumque temperiem, ad evocandas suppresmen-

dasque aquas, ad alendos fatorum atque arborum fructus: quos ad maturitatem, cum aliis causis adducit ipsa iactatio, attrahens cibum in summa, et ne torpeant, movens. Dedit ventos ad ulteriora noscenda. fuisset enim imperitum animal, et sine magna experientia rerum homo, si circumscriberetur natalis soli sine. Dedit ventos, ut commoda cuiusque regionis fierent communia: non ut legiones equitemque gestarent, nec ut pernicioſa gentibus arma transveherent. Si beneficia naturae utentium pravitate perpendimus, nihil non nostro malo accepimus. Cui videre expedit? cui loqui? Cui non vita tormentum est? Nihil invenies tam manifestae utilitatis, quod non in contrarium transferat culpa. Sic ventos quoque natura bono futuros invenerat: ipsi illos contrarios fecimus. Omnes in aliquod nos malum ducunt. Non eadem est his et illis causa solvendi: sed iusta nulli. diversis enim irritamentis ad tentandum iter impellimur. Utique alicui vitio navigatur. Egrege Plato dicit, qui nobis circa exitum iam testium loco dandus est: minima esse quae homines emant vita. Immo, Lucili carissime, si bene furorem illorum aestimaveris, id est, nostrum (in eadem enim turba volutamur) magis ridebis, cum cogitaveris, vita parari ea, in quibus vita consumitur.

L. ANNAEI SENECAE  
 AD LUCILIUM  
 NATURALIUM QUAESTIONUM  
 LIBER VI.  
 IN QUO DE TERRAE MOTU  
 AGITUR.

---

ARGUMENTUM.

*Naturam & causas terrae motus doctè & explicate enarrat. Ipso iam sene sub Imperio Neronis, Pompeii celebre Campaniae oppidum terrae motu defecit; in iuventute eius & Imperio Tiberii, XII urbes Asiae perditae. Non metuendus tamen terrae motus; quia magnificum a tam magna causa perire. In causas deinde terrae motus inquirat. Thales terram, ceu navigium, aqua ferri & fluctuari, alii aquarum sub terra latentium fluctu agitari crediderunt. Hac occasione ad quaestionem famosam digreditur, de Origine Nili. Aristoteles, Theophrastus, Callisthenes (aeternum Alexandri crimen, a quo iniuriose necatus) spiritum terrae motorem faciunt: quibus noster accedit. Ex motu Campano pestilentia orta, quae ovium ibi greges exanimavit: quidam etiam terrore lymph-*



*tici erravere. Denique in mores relapsus, non terrae motus, non fluctus, non arma metuenda docet; quia rem pusillam, hominis vitam tantum petunt, quam auriculae dolor, aut pes leviter offensus, auferre potest.*

## CAPUT I.

POMPEIOS, celebrem Campaniae urbem, in quam ab altera parte Surrentinum Sabianumque litus, ab altera Herculanense conveniunt, <sup>et</sup> mareque ex <sup>et</sup> aperto reductum amoeno sinu cingunt, <sup>con</sup> defuisse terrae motu, vexatis quaecunque adiacebant regionibus, Lucili virorum optime, audivimus: et quidem diebus <sup>5</sup> hibernis / quos vacare a tali periculo maiores <sup>1</sup> nostri solebant promittere. Nonis Febr fuit motus <sup>maris</sup> hic, Regulo et Virginio Consulibus, qui Campaniam nunquam securam huius mali, indemnem tamen, et totiens defunctam metu, magna strage vastavit. <sup>nam</sup> Na et Herculanensis oppidi pars ruit, dubieque stant etiam quae relicta sunt, <sup>e</sup> Et Nucerinorum colonia, ut sine clade, ita non sine querela est; Neapolis quoque privatim multa, publice nihil amisit, leviter ingenti malo perstricta, Villae vero <sup>10</sup> praeruptae passim sine iniuria tremuere. <sup>12</sup> Adiiciunt his sexcentarum ovium gregem exanimatum, et divisas statuas, <sup>15</sup> motae post hoc mentis aliquos atque impotes sui errasse. <sup>16</sup> Quorum ut causas excutiamus, et propositi operis contextus exigit, et ipse in hoc tempus congruens casus. Quaerenda sunt trepidis solatia, et demendus ingens timor. <sup>18</sup> Quid enim cuiquam satis

tutum videri potest, si mundus ipse concutitur, et partes eius solidissimae labant? *si*, quod unum immobile est in illo fixumque, ut cuncta in se intenta sustineat, fluctuat; si quod proprium habet terra, perdidit, stare: ubi tandem resident metus nostri? Quod corpora receptaculum invenient? quo sollicita confugient, si ab imo metus nascitur, et funditus trahitur? Consternatio omnium est; ubi tecta crepuerunt, et ruina signum dedit. tunc praeceps quisque se proripit, et penates suos deserit, ac se publico credit. Quam latebram prospicimus, quod auxilium, si orbis ipse ruinas agitat? si hoc, quod nos tuetur ac sustinet, supra quod urbes sitae sunt, quod fundamentum quidam orbis esse dixerunt, discedit ac titubat? Quid tibi esse non dico auxilii, sed solatii potest, ubi timor fugam perdidit? Quid est, inquam, satis munitum, quid ad tutelam alterius ac sui firmitum? Hostem muro repellam; praeruptae altitudinis castella vel magnos exercitus difficultate aditus morabuntur, et tempestate nos vindicant portus, nimborum vim effusam, et sine fine cadentes aquas tecta propellunt; fugientes non sequitur incendium; adversus tonitruum et minas coeli, subterraneae domus, et defossi in altum specus, remedia sunt. Ignis ille coelestis non transverberat terram, sed exiguo eius obiectu retunditur. In pestilentia mutare sedes licet. Nullum malum sine effugio est. Nunquam fulmina populos perusserunt; Pestilens caelum exhaustit urbes, non abstulit. Hoc malum latissime patet, inevitabile, avidum, publice noxium. Non enim domos solum, aut familias, aut urbes singulas haurit; sed

gentes totas, regionesque subvertit, et modo ruinis operit, modo in altam voraginem condit, ac ne id quidem relinquit, ex quo appareat, quod non est, saltem fuisse, sed supra nobilissimas urbes, sine ullo vestigio prioris habitus, solum extenditur. Nec desunt, qui hoc genus mortis magis timeant, quo in abruptum cum sedibus suis eunt, et e vivorum numero vivi auferuntur, tanquam non omne fatum ad eundem terminum veniat. Hoc habet inter cetera iustitiae suae natura praecipuum, quod cum ad exitum ventum est, omnes in aequo sumus. Nihil itaque interest, utrum me lapis unus elidat, an monte toto premar: utrum supra me domus unius onus veniat, et sub exiguo eius tumulo ac ~~complanatione~~ expirem, an totus caput meum terrarum orbis abscondat; in luce hunc et in aperto spiritum reddam, an in vasto terrarum dehiscantium sinu, solus in illud profundum, an cum magno comitatu populorum condentium ferar. Nihil interest mea, quantus circa mortem meam tumultus sit, ipsa ubique tantundem est. Proinde magnum sumamus animum adversus istam cladem, quae nec evitari, nec provideri potest. Desinamus audire istos, qui Campaniae renuntiaverunt, quique post hunc casum emigraverunt, negantque unquam ipsam regionem accessuros: quis enim illis promittet melioribus fundamentis hoc aut illud solum stare? Omnia eiusdem fortis sunt, et si nondum mota, tamen mobilia: hunc fortasse in quo securius consistis locum, haec nox, aut hic ante noctem dies scindet. Unde scis an melior eorum locorum conditio sit, in quibus iam vires suas fortuna

consumsit, et quae in futurum ruina sua fulta sunt? Erramus enim, si ullam terrarum partem exceptam immunemque ab hoc periculo credimus. Omnes sub eadem iacent lege. Nihil ita, ut immobile esset, natura concepit. Alia temporibus aliis cadunt. Et quemadmodum in urbibus magnis, nunc haec domus, nunc illa suspenditur, ita in hoc orbe terrarum nunc haec pars facit vitium, nunc illa. Tyros aliquando infamis ruinis fuit, Asia duodecim urbes simul perdidit: Anno priore Achaiam et Macedoniam, quaecunque est ista vis mali, quae incurrit, nunc Campaniam laesit. Circuit fatum, et si quid diu praeterit, repetit. Quaedam rarius sollicitat, saepius quaedam. Nihil immune esse et innoxium finit. Non homines tantum, qui brevis et caduca res nascimur, urbes oraeque terrarum et litora, et ipsum mare in servitutem fati venit. Quo ergo nobis permansura promittimus bona fortunae, et felicitatem, cuius ex omnibus rebus humanis velocissima est levitas, habituram in aliquo pondus ac moram credimus? Perpetua sibi omnia promittentibus in mentem non venit, idipsum, supra quod stamus, stabile non esse. Neque enim Campaniae istud aut Achaiæ, sed omnis soli vitium est, male cohaerere, et ex causis pluribus resolvi; et summa manere, partibus ruere.

II. Quid ago? Solatium adversus pericula dare promiseram: ecce undique timenda denuntio. Nego quidquam esse quietis aeternae: quod et perire non possit, et perdere. Ego vero hoc ipsum solatii loco pono, et quidem valentissimi: quandoquidem sine remedio timor stultus est. ratio terrorem prudentibus

*nostama*

*et per.*

excutit : imperitis fit magna ex desperatione securitas. Hoc itaque generi humano dictum puta, quod illis subita captivitate inter ignes et hostem stupentibus dictum est,

*Una salus victis, nullam sperare salutem.*

Si vultis nihil timere, cogitate omnia esse timenda : circumspicite quam levibus causis discutiamur. Non cibus nobis, non humor, non vigilia, non somnus, sine mensura quadam salubria sunt. Iam intelligitis nugatoria nos esse corpuscula, et imbecilla, fluida, non magna molitione perdenda. Sine dubio id unum periculi satis esset, quod tremunt terrae, quod subito dissipantur, ac superposita diducunt. Magni se aestimat, qui fulmina et motus terrarum hiatulque formidat : vult ille imbecillitatis suae sibi conscius timere pituitam ? ita videlicet nati sumus, tam felicia sortiti membra, et in hanc magnitudinem crevimus, et ob hoc nisi mundi partibus motis, nisi coelum intonuerit, nisi terra subsederit, perire non possumus. Unguiculi nos, et ne totius quidem dolor, sed aliqua a latere eius scissura conficit : et ego timeam terras trementes, quem crassior saliva suffocat ? Ego extimescam emotum sedibus suis mare, et ne aestus, maiore quam solet cursu, plus aquarum trahens superveniat ; cum quosdam strangulaverit potio, male lapsa per fauces. Quam stultum est, mare horrere : cum scias, stillicidio perire te posse ? Nullum est maius solatium mortis, quam ipsa mortalitas. nullum autem omnium istorum quae extrinsecus terrent, quam quod innumerabilia pericula in ipso sinu sunt.



Quid enim dementius, quam ad tonitrua succidere; et sub terram correpere fulminum metu? Quid stultius, quam timere nutationem aut subitos montium lapsus, irruptiones maris extra litus eiectioni, cum mors ubique praesto sit, et undique occurrat; nihilque sit tam exiguum, quod non in perniciem generis humani satis valeat? Adeo non debent nos ista confundere, tanquam plus in se mali habeant, quam vulgaris mors: ut contra, cum sit necessarium e vita exire, et aliquando emittere animam, maiore perire ratione iuvet. Neceffe est mori ubicunque, quandoque. Stet licet ista humus, et se teneat suis finibus, nec ulla iactetur iniuria: supra me quandoque erit. Interest ergo, illam ego mihi, an ipsa se mihi imponat? Diducitur ingenti potentia nescio cuius mali: rumpitur, et me in immensam altitudinem abducit. Quid porro? Mors levior in plano est? Quid habeo quod querar, si rerum natura non vult me iacere in ignobili loco? si mihi iniicit sui partem? Egregie Vagellius meus in illo inclyto carmine:

*Si cadendum est, inquit, mihi, coelo cecidisse velim.* Idem licet dicere. Si cadendum est, cadam orbe concusso: non quia fas est optare publicam cladem, sed quia ingens mortis solatium est, terram quandoque videre mortalem.

III. Illud quoque proderit praesumere animo, nihil horum deos facere; nec ira numinum, aut coelum concuti, aut terram. Suas ista causas habent: nec ex imperio saeviunt, sed ex quibusdam vitiis, ut corpora nostra, turbantur: et tunc, cum facere videntur iniuriam, accipiunt. Nobis autem ignoran-

tibus verum, omnia terribilia sunt, utpote quorum metum raritas auget. Levius accidunt familiaria: ex insolito formido est maior. Quare autem quidquam nobis insolitum est? quia naturam oculis, non ratione comprehendimus: nec cogitamus, quid illa facere possit, sed tantum quid fecerit. Damus itaque huius negligentiae poenas, tanquam novis territi: cum illa non sint nova, sed insolita. Quid ergo? Non religionem incutit mentibus, et quidem publice, sive deficere sol visus est, sive luna, cuius obscuratio frequentior, aut parte sui, aut tota, delituit? longeque magis illae actae in transversum faces, et coeli magna pars ardens, et crinita sidera, et plures solis orbes, et stellae per diem visae, subitique transcursum ignium, multam post se lucem trahentium? Nihil horum sine timore miramur: et cum timendi sit causa, nescire; non est tanti scire, ne timeas. Quanto satius est, causas inquirere, et quidem toto in hoc intentum animo? Neque enim illo quidquam inveniri dignius potest, cui se non tantum commodet, sed impendat.

IV. Quaeramus ergo, quid sit quod terram ab infimo moveat, quid tanti molem ponderis impellat, quid sit illa valentius, quid tantum onus vi sua labefactet: cur modo tremat, modo luxata subsidat, nunc in partes divisa discedat: et alias intervallum ruinae suae diu servet, alias cito comprimat: nunc amnes magnitudinis notae convertat introrsus, nunc novos exprimat: aperiat aliquando aquarum calentium venas, aliquando refrigeret: ignesque nonnunquam per aliquod ignotum antea montis aut ru-

pis foramen emittat, aliquando notos et per secula nobiles comprimat. Mille miracula movet, faciemque mutat locis, et defert montes, subrigit plana, valles extuberat, novas in profundo insulas erigit. Haec ex quibus causis accidant, digna res est excuti. Quod, inquis, erit pretium operae? quo nullum maius est, nosse naturam. Neque enim quidquam habet in se huius materiae tractatio pulchrius, cum multa habeat futura usui, quam quod hominem magnificentia sui detinet; nec mercede, sed miraculo colitur. Inspiciamus ergo quid sit, propter quod accidant haec: quorum est adeo mihi dulcis inspectatio, ut quamvis aliquando de motu terrarum volumen iuvenis ediderim, tamen tentare me voluerim, et experiri, an aetas aliquid nobis aut ad scientiam, aut certe ad diligentiam adiecerit.

V. Causam, qua terra concutitur, alii in aqua esse, alii in ignibus, alii in ipsa terra, alii in spiritu putavere: alii in pluribus, alii in omnibus his. Quidam liquere ipsis aliquam ex istis causam esse dixerunt; sed non liquere, quae esset. Nunc singula persequamur. Illud ante omnia mihi dicendum est, opiniones veteres parum exactas esse, et rudes. Circa verum adhuc errabatur. Nova omnia erant primo tentantibus, post eadem illa limata sunt: et si quid inventum est, illis nihilominus referri debet acceptum. Magni animi res fuit, rerum naturae latebras dimovere, nec contentum exteriori eius conspectu, introspicere, et in deorum secreta descendere. Plurimum ad inveniendum contulit, qui speravit posse reperiri. Cum excusatione itaque veteres

audiendi sunt. Nulla res consummata est, dum incipit. Nec in hac tantum re omnium maxima atque involutissima, in qua etiam cum multum actum erit, omnis tamen aetas quod agat, inveniet; sed in omni alio negotio, longe semper a perfecto fuere principia.

VI. In aqua causam esse, nec ab uno dictum est, nec uno modo. Thales Milesius totam terram subiecto iudicat humore portari et innatare: sive illud oceanum vocas, sive magnum mare, sive alterius naturae simplicem adhuc aquam et humidum elementum. Hac, inquit, unda sustinetur orbis, velut aliquod grande navigium et grave his aquis quas premit. Supervacuum est reddere causas, propter quas existimat, gravissimam partem mundi non posse spiritu tam tenui fugacique gestari: non enim nunc de situ terrarum, sed de motu agitur. Illud argumenti loco ponit, aquas esse in causa, quibus hic orbis agitur, quod in omni maiore motu erumpunt fere novi fontes: sicut in navigiis quoque evenit, ut si inclinata sunt, et abiere in latus, aquam forbeant; quae in omni onere eorum quae vehit, si immodice depressa sunt, aut superfunditur, aut certe dextra sinistraque solito magis surgit. Hanc opinionem falsam esse, non est diu colligendum. Nam si terram aqua sustineret, tota aliquando concuteretur, semper moveretur: nec agitari illam miraremur, sed manere. Tum tota concuteretur, non ex parte: nunquam enim navis dimidia iactatur. nunc vero non terrarum universarum, sed ex parte motus est. Quomodo ergo fieri potest, ut quod totum vehitur, totum non agitur, si id quo vehitur, agi-

tatum est? At quare aquae erumpunt? Primum omnium saepe tremuit terra, et nihil humoris novi fluxit. Deinde si ex hac causa unda prorumperet, a lateribus terrae circumfunderetur: sicut in fluminibus ac mari videmus accidere, ut incrementum aquarum, quotiens navigia desidunt, in lateribus maxime appareat. Ad ultimum non tam exigua fieret quam dicit eruptio, nec velut per rimam sentina subreperet, sed fieret ingens inundatio, ut ex infinito liquore, et ferente universa.

VII. Quidam motum terrarum aquae imputavere: sed non ex eadem causa. Per omnem, inquiunt, terram, multa aquarum genera decurrunt. Alicubi perpetui amnes, quorum navigabilis etiam sine adiutorio imbrium magnitudo est. Hinc Nilus per aestatem ingentes aquas invehit: hinc qui medius inter pacata et hostilia fluit, Danubius ac Rhenus, alter Sarmaticos impetus cohibens, et Europam Asiamque determinans, alter Germanos, avidam gentem belli, repellens. Adiace nunc patentissimos lacus, et stagna populis inter se ignotis circumdata, et ineluctabiles navigio paludes, nec ipsis quidem inter se pervias, quibus incoluntur. Deinde tot fontes, tot capita fluminum, subitos, et ex occulto amnes vomentia. Tot deinde ad tempus collectos torrentium impetus: quorum vires quam repentinae, tam breves. Omnis haec aquarum, etiam intra terram, natura faciesque est. Illic quoque aliae vasto cursu deferuntur, et in praecipua volutae cadunt: aliae languidiores in vadis refunduntur, et leniter ac quiete fluunt. quis autem neget, vastis illas receptaculis concipi, et cessare mul-



ris inertes locis? Non est diu probandum, ibi multas aquas esse, ubi omnes sunt. Neque enim sufficeret tellus ad tot flumina edenda, nisi ex reposito multoque funderet. Si hoc verum est, necesse est aliquando illic amnis excrescat, et relictis ripis violentus in obstantia incurrat. Sic fiet motus alicuius partis, in quam flumen impetum dedit, et quam donec decrescat verberabit. Potest fieri, ut aliquam regionem rivus affluens exedat, ac secum trahat aliquam molem: qua lapsa, superposita quatiantur. Iam vero nimis oculis permittit, nec ultra illos scit producere animum, qui non credit esse in abscondito terrae sinus maris vasti. Nec enim video, quid prohibeat vel obstet, quo minus illic habeatur aliquod etiam in abscondito litus, et per occultos aditus receptum mare, quod illic quoque tantundem loci tenet, aut fortassis hoc amplius, quod superiora cum tot animalibus erant dividenda: abstrusa enim, et sine possessore deserta, liberius undis vacant. Quas quis vetat illic fluctuare, et ventis, quos omne intervallum terrarum, et omnis aër creat, impelli? Potest ergo maior solito exorta tempestas aliquam partem terrarum impulsam vehementius movere. Nam apud nos quoque multa, quae procul a mari fuerant, subito eius accessu vapulavere; et villas in conspectu collocatas, fluctus, qui longe audiebatur, invasit. Illic quoque potest accedere pelagus infernum: quorum neutrum fit sine motu superstantium.

VIII. Non quidem existimo diu te haesitaturum, an credas esse subterraneos amnes et mare absconditum. Unde enim ista prorumpunt, unde ad nos ve-

niunt, nisi quod origo humoris inclusa est? Age, cum vides interruptum Tigrim in medio itineris sicari, et non universum averti, sed paulatim, non apparentibus damnis, minui primum, deinde consumi: quo illum putas abire nisi in obscura terrarum; utique cum videas emergere iterum, non minorem eo qui prior fluxerat? Quid cum vides Alpheum, celebratum poëtis, in Achaia mergi, et in Sicilia rursus transiecto mari effundere amoenissimum fontem Arethusam? Nescis autem, inter opiniones, quibus narratur Nili aestiva inundatio, et hanc esse, a terra illum erumpere, et augeri non supernis aquis, sed ex intimo redditus? Ego quidem centuriones duos, quos Nero Caesar, ut aliarum virtutum, ita veritatis in primis amantissimus, ad investigandum caput Nili miserat, audiivi narrantes, longum illos iter peregrisse, cum a Rege Aethiopiae instructi auxilio, commendatique proximis regibus, penetraissent. Ad ulteriora quidem, aiebant, pervenimus, ad immensas paludes, quarum exitum nec incolae noverant, nec sperare quisquam potest, ita implicitae aquis herbae sunt, et aquae nec pediti eluctabiles, nec navigio, quod nisi parvum et unius capax, limosa et obsita palus non ferat. Ibi, inquit, vidimus duas petras, ex quibus ingens vis fluminis excidebat. Sed sive caput illa, sive accessio est Nili, sive tunc nascitur, sive in terras ex priore recepta cursu redit: nonne tu credis, illam, quidquid est, ex magno terrarum lacu ascendere? Habeant enim oportet pluribus locis sparsum humorem, et in imo coactum, ut eructare tanto impetu possint.

IX. Ignem causam motus quidam, et quidem non eandem iudicant. Inprimis Anaxagoras, qui existimat, simili paene ex causa et aëra concuti, et terram: cum in inferiore parte spiritus crassum aëra, et in nubes coactum, eadem vi qua apud nos quoque nubila frangi solent, rumpit; et ignis ex hoc collisione nubium, cursuque elisi aëris, emicuit. Hic ipse in obvia incurrit, exitum quaerens, ac divellit repugnantia: donec per angusta aut nactus est viam exeundi ad coelum, aut vi atque iniuria fecit. Alii in igne causam quidem esse, sed non ob hoc, iudicant: sed quia pluribus obrutus locis ardeat, et proxima quaeque consumat. Quae si quando exesa ceciderint, tunc sequi motum earum partium, quae subiectis adminiculis destitutae labant, donec corrumpere: nullo occurrente, quod onus exciperet. Tunc chasmata, tunc hiatus vasti aperiuntur: aut cum diu dubitaverunt, super ea se, quae supersunt stantque, componunt. Hoc apud nos quoque videmus accidere, quotiens incendio pars civitatis laborat: cum exustae trabes sunt, aut corrupta quae superioribus firmamentum dabant; tunc diu agitata fastigia concidunt, et tam diu differuntur atque incerta sunt, donec in solido refederunt.

X. Anaximenes ait, terram ipsam sibi esse causam motus, nec extrinsecus incurrere quod illam impellat: sed intra ipsam et ex ipsa quasdam partes eius decidere, quas aut humor solverit, aut ignis exederit, aut spiritus violentia excusserit. Sed his quoque cessantibus non deesse, propter quod aliquid abscedat aut revellatur. Nam primum omnia vetustate la-

buntur, nec quidquam tutum a senectute est. Haec solida quoque et magni roboris carpit. Itaque quemadmodum in aedificiis veteribus quaedam non percussa tamen decidunt, cum plus ponderis habuere quam virium: ita in hoc universo terrae corpore evenit, ut partes eius vetustate solvantur, solutae cadant, et tremorem superioribus afferant: primum dum abscedunt (nihil enim utique magnum sine motu eius, cui haesit, abscinditur) deinde cum deciderunt, solido exceptae resiliant, pilae more; quae cum cecidit exsultat, ac saepius pellitur, totiens a solo in novum impetum missa. Si vero in stagnantibus aquis delata sunt, hic ipse casus vicina concutit fluctu, quem subitum vastumque illisum ex alto pondus eiicit.

XI. Quidam ignibus quidem assignant hunc tremorem, sed aliter. Nam cum pluribus locis ferveant, necesse est ingentem vaporem sine exitu volvant, qui vi sua spiritum intendit: et si acrius insitit, opposita diffundit: si vero remissior fuit, nihil amplius quam movet. Videmus aquam spumare, igne subiecto. Quod in hac aqua facit inclusa et angusta, multo magis illum facere credamus, cum violentus ac vastus ingentes aquas excitat. Tunc ille vaporatone inundantium aquarum, quidquid pulsaverit, agit.

XII. Spiritum esse qui moveat, et plurimis et maximis auctoribus placet. Archelaus antiquitatis diligens, ait ita: Venti in concava terrarum deferuntur: deinde ubi iam omnia spatia plena sunt, et in quantum aer potuit, densatus est, is qui supervenit spiritus, priorem premit et elidit, ac frequentibus

plagis primo cogit, deinde perturbat. Tunc ille quaerens locum, omnes angustias dimovet, et claustra sua conatur effringere. Sic evenit, ut terrae, spiritu luctante, et fugam quaerente, moveantur. Itaque cum terrae motus futurus est, praecedit aëris tranquillitas et quies: videlicet, quia vis spiritus, quae concitare ventos solet, in inferna sede detinetur. Nunc quoque cum hic motus in Campania fuit, quamvis hiberno tempore, et inquieto, per superiores dies aër stetit. Quid ergo? Nunquam flante vento terra concussa est? Admodum raro duo flavere simul venti. Fieri tamen et potest, et solet. quod si recipimus, et constat duos ventos rem simul gerere: quidni accidere possit, ut alter superiorem aëra agitet, alter inferum?

XIII. In hac sententia licet ponas Aristotelem, et discipulum eius Theophrastum, non, ut Graecis visum est, divini, tamen et dulcis eloquii virum, et nitidi sine labore. Quid utrique placeat, exponam. Semper aliqua evaporatio est e terra, quae modo arida est, modo humido mixta. Haec ab infimo edita, et in quantum potuit, elata, cum ulteriorem locum in quem exeat non habet, retro fertur, atque in se revolvitur: dumque rixa spiritus reciprocantis iactat obstantia, et sive interclusus, sive per angusta enisus est, motum ac tumultum ciet. Straton ex eadem schola est, qui hanc partem philosophiae maxime coluit, et rerum naturae inquisitor fuit. Huius tale decretum est: Frigidum et calidum semper in contraria abeunt, et una esse non possunt: eo frigidum confluit, unde vis calida discessit: et invicem



ibi calidum est, unde frigus expulsum est. Hoc quod dico verum est: sed utrumque in contrarium agi, ex hoc tibi appareat. Hiberno tempore, cum supra terram frigus est, calent putei, nec minus specus, atque omnes sub terra recessus: quia eo se calor contulit, superiora possidenti frigori cedens: qui cum in inferiora pervenit, et eo se quantum poterat ingessit, quo densior, hoc validior est: huic alius supervenit, cui necessario congregatus ille iam et in angustum pressus, loco cedit. Idem e contrario evenit, cum vis maior frigidi illata in cavernis est. Quidquid illic calidi latet, frigori cedens abit in angustum, et magno impetu agitur: quia non patitur utriusque natura concordiam, nec in uno moram. Fugiens ergo, et omni modo cupiens excedere, proxima quaeque remolitur ac iactat. Ideoque antequam terra moveatur, solet mugitus audiri, ventis in abdito tumultuantibus. nec enim aliter posset, ut ait noster Virgilius:

*Sub pedibus mugire solum, & iuga celsa moveri:*

nisi hoc esset ventorum opus. Vices deinde huius pugnae sunt: desinit calidi congregatio, ac rursus eruptio. Tunc frigida compescuntur et succedunt, mox futura potentiora. Dum ergo alterna vis cursat, et ultro citroque spiritus comseat, concutitur.

XIV. Sunt qui existiment, spiritu quidem, et nulla alia ratione tremere terram, sed ex alia causa, quam Aristoteli placuit. Quid sit quod ab his dicatur, audi. Corpus nostrum et sanguine irrigatur, et spiritu, qui per sua itinera discurret. Habemus autem quaedam

angustiora animae receptacula, per quae nihil amplius quam meat : quaedam patentiora, in quibus colligitur, et unde dividitur in partes. Sic hoc totum terrarum omnium corpus, et aquis, quae vicem sanguinis tenent, et ventis, quos nihil aliud quisquam animam vocaverit, pervium est. Haec duo alicubi concurrunt, alicubi consistunt. Sed quemadmodum in corpore nostro, dum bona valetudo est, venarum quoque imperturbata mobilitas modum servat ; ubi aliquid adversi est, micat crebrius, et suspiria atque anhelitus, laborantis ac fessi signa sunt : ita terrae quoque, dum illis positio naturalis est, inconcussae manent. Cum aliquid peccatur, tunc velut aegri corporis motus est, spiritu illo qui modestius perfluebat, isto vehementius, et quassante venas suas : nec, ut illi paulo ante dicebant, quibus animal placet esse terram. nam si hoc est quemadmodum animal, tota vexationem sentiet. Neque enim in nobis febris alias partes moderatius impellit, sed per omnes pari aequalitate discurrit. Vide ergo, numquid intret in illam spiritus ex circumfuso aëre : qui quamdiu habet exitum, sine iniuria labitur : si offendit aliquid, et incidit quod viam claudat, tunc oneratur primo infundente se a tergo aëre. Deinde per aliquam rimam maligne fugit, et hoc acrius fertur, quo angustius. Id sine pugna non potest fieri, nec pugna sine motu. At si nec rimam quidem per quam effluat invenit, conglobatus ille furit, et huc atque illo circumagitur, aliaque deiecit, alia intercidit : cum tenuissimus, idemque fortissimus, et irrepit quamvis in obstructa, et quidquid intravit, vi sua

diducat et dissipet; tunc terra iactatur. Aut enim data vento locum discedit; aut cum dedit, in ipsam, qua illum emisit, cavernam fundamento spoliata confidit.

XV. Quidam ita existimant. Terra multis locis perforata est, nec tantum primos illos aditus habet, quos velut spiramenta ab initio sui recepit, sed multos illic casus imposuit. Alicubi diduxit, quidquid superne terreni erat, aqua: alia torrentes exedere, illa aestibus magnis dirupta patuere. Per haec intervalla intrat spiritus: quem si inclusit mare, et altius adegit, nec fluctus retro abire permisit, tunc ille exitu simul redituque praecluso, volutatur. Et quia in rectum non potest tendere, quod illi naturale est, in sublime se intendit, et terram prementem diverberat.

XVI. Etiamnum dicendum est, quod plerisque auctoribus placet, et in quod fortasse fiet discessio. Non esse terram sine spiritu, palam est. Non tantum illo dico, quo se tenet, ac partes sui iungit, qui inest etiam faxis mortuisque corporibus: sed illo dico vitali, et vegeto, et alente omnia. Hunc nisi haberet, quomodo tot arbutis spiritum infunderet, non aliunde viventibus, et tot satis? Quemadmodum tam diversas radices, aliter atque aliter in se mersas foveret, quasdam summa receptas parte, quasdam altius tractas, nisi multum haberet animae, tam multa, tam varia generantis, et haustu atque alimento suo educantis? Levibus adhuc argumentis ago. Totum hoc coelum, quod igneus aether, mundi summa pars, claudit, omnes hae stellae, quarum iniri non potest numerus, omnis hic coelestium coetus, et (ut alia

praeteream) hic tam prope a nobis agens cursum sol, omni terrarum ambitu non semel maior, alimentum ex terreno trahunt, et inter se partiuntur: nec ullo alio scilicet, quam halitu terrarum sustinentur. Hoc illis alimentum, hic pastus est. Non posset autem tam multa, tantaque, et seipsa maiora, terra nutrire, nisi plena esset animae, quam per diem et noctem ab omnibus partibus suis fundit. Fieri enim non potest, ut non multum illi supersit, ex qua tantum petitur ac sumitur: et ad tempus quidem, quod exeat, nascitur. Nec enim esset perennis illi copia suffecturi in tot coelestia spiritus, nisi invicem ista excurrerent, et in aliud alia solverentur. Sed tamen necesse est abundet ac plena sit, et ex condito proferat. Non est ergo dubium, quin multum spiritus interlateat, et caeca sub terra spatia aër latus obtineat. Quod si verum est, necesse est id saepe moveatur, quod re mobilissima plenum est. Nunquid enim dubium esse potest cuiquam, quin nihil sit tam inquietum quam aër, et tam versabile et agitatione gaudens?

XVII. Sequitur ergo, ut naturam suam exerceat, et quod semper moveri vult, aliquando et alia moveat. Id quando fit? Quando illi cursus interdictus est. Nam quamdiu non impeditur, placide fluit: cum offenditur et retinetur, insanit, et moras suas abruptit, non aliter, quam ille

—— Pontem indignatus Araxes.

Quamdiu illi facilis et liber est alveus, primas quasque aquas explicat. Ubi saxa manu vel casu illata pressere venientem, tunc impetum mora quaerit: et

quo plura opposita sunt, plus invenit virium. Omnis enim illa unda quae a tergo supervenit, et in se crescit, cum onus suum sustinere non potuit, vim ruina parat, et prona cum ipsis quae obiacebant fugit. Idem spiritu fit: qui quo valentior agiliorque est, citius rapitur, et vehementius septus omnes disturbat. Ex quo motus fit scilicet eius partis, sub qua pugnatum est. Quod dicitur, verum esse ex illo probatur: saepe enim cum terrae motus fuit, si modo pars eius aliqua dirupta est, inde ventus per multos dies fluxit: ut traditur factum eo terraemotu, quo Chalcis laboravit: quod apud Asclepiodotum invenies, auditorem Posidonii, in ipsis quaestionum naturalium causis. Invenies et apud alios auctores, hiasse uno loco terram, et inde non exiguo tempore spirasse ventum: qui scilicet illud iter ipse sibi fecerat, per quod ferebatur.

XVIII. Maxima ergo causa est, propter quam terra moveatur, spiritus natura citus, et locum e loco mutans. Hic quamdiu non impellitur, et in vacanti spatio latet, iacet innoxius, nec circumiectis molestus est. Ubi illum extrinsecus superveniens causa sollicitat, compellitque et in arctum agit, scilicet adhuc cedit tantum, et vagatur. Ubi erepta discedendi facultas est, et undique obsistitur, tunc

—— magno cum murmure montis

*Circum claustra fremit,* ——

quae diu pulsata convellit ac iactat: eo acrior, quo cum valentiore mora luctatus est. Deinde cum circa perlustravit omne quo tenebatur, nec potuit evadere,



inde quo maxime impactus est, resilit : et aut per occulta dividitur, ipso terraemotu raritate facta, aut per novum vulnus emicuit. Ita eius vis tanta non potest cohiberi, nec ventum tenet ulla compages : solvit enim quodcunque vinculum, et omne onus fert secum, infususque per minima laxamentum sibi parat, indomita naturae potentia liber, utique concitatus, sibi ius suum vindicat. Spiritus vero invicta res est : nihil enim erit quod

*Luctantes ventos, tempestatesque sonoras  
Imperio premat, ac vinclis & carcere fraenet.*

Sine dubio poëtae hunc voluerant videri carcerem ; in quo sub terra clausi laterent. Sed hoc non intellexerunt, nec id quod clausum est, esse adhuc ventum : nec id quod ventus est, posse iam claudi. Nam quod in clauso est, quiescit, et aëris statio est. omnis in fuga ventus est. Etiamnum et illud accedit his argumentis, per quod appareat, motum effici spiritu, quod corpora quoque nostra non aliter tremunt, quam si spiritum aliqua causa conturbat : cum timore contractus est, cum senectute languescit, et venis torpentibus marcet, cum frigore inhibetur, aut sub accessionem cursu suo deiicitur. Nam quamdiu sine iniuria perfluit, et ex more procedit, nullus est tremor corpori. cum aliquid occurrit quod inhibeat eius officium, tunc parum potens perferendis his quae suo vigore tenebat, deficiens concutit, quidquid integer tulerat.

XIX. Metrodorum Chium necesse est audiamus, quod vult sententiae loco dicentem. Non enim per-

mitto mihi nec eas quidem opiniones praeterire, quas improbo: cum satius sit omnium copiam fieri, et quae improbamus, damnare potius, quam praeterire. Quid ergo dicit? Quomodo in dolio cantantis vox, per totum cum quadam discussione percurrit ac resonat, et tam leviter mota, tamen circuit, non sine tactu eius tumultuque, quo inclusa est: sic speluncarum sub terra pendentium vastitas habet aëra suum; quem simul alius superne incidens percussit, agitat non aliter, quam illa de quibus paulo ante retuli, inania indito clamore sonuerunt.

XX. Veniamus nunc ad eos, qui omnia ista quae retuli, in causa esse dixerunt, aut ex his plura. Democritus plura putat. Ait enim, motum aliquando spiritu fieri, aliquando aqua, aliquando utroque: et id hoc modo prosequitur. Aliqua pars terrae concava est, et in hanc aquae magna vis confluit. Ex hac est aliquid tenue, et ceteris liquidius. Hoc cum superveniente gravitate reiectum est, terris illiditur, et illas movet. Nec enim fluctuari potest sine motu eius, in quod impingitur. Etiamnum quod modo de spiritu dicebamus, de aqua quoque dicendum est. Ubi in unum locum congesta est, et capere se desit, aliquo incumbit, et primo viam pondere aperit, deinde impetu. Nec enim exire nisi per devexum potest, diu inclusa; nec in directum cadere moderate, aut sine concussione eorum, per quae et in quae cadit. Si vero cum iam rapi coeperit, aliquo loco substitit, et illa vis fluminis in se revoluta est, in occurrentem terram repellitur, et illam, qua parte maxime pendet, exagitat. Praeterea aliquando madefacta tellus, li-

quore penitus accepto alius fidit, et fundus ipse vi-  
 tiatur: tunc ea pars premitur, in quam maxime aqua-  
 rum vergentium pondus inclinat. Spiritus vero non-  
 nunquam impellit undas; et si vehementius institit,  
 eam scilicet terrae partem movet, in quam coëctas  
 aquas intulit. Nonnunquam in terrena itinera con-  
 iectus, et exitum quaerens, movet omnia: terra  
 autem penetrabilis ventis est, et spiritus subtilior  
 est, quam ut possit excludi; et vehementior, quam  
 ut sustineri concitatus ac rapidus. Omnes istas esse  
posse causas Epicurus ait, pluresque alias tentat, et  
 alios, qui aliquid unum ex istis esse affirmaverunt, *illos*  
 corripit; cum sit arduum, de his quae coniectura se- *h L a*  
 quenda sunt, aliquid certi promittere. 'Ergo', ut ait,  
 potest terram movere aqua, si partes aliquas eluit, et  
 abscidit, quibus desit posse extenuatis sustineri, quod *dro*  
 integris ferebatur. Potest terram movere impressio *h*  
 spiritus: Fortasse enim aër extrinsecus alio intrante *h*  
 aëre agitur, Fortasse aliqua parte subito decidente *h*  
 percutitur, et inde motum capit. Fortasse aliqua *h*  
 parte terrae velut columnis quibusdam ac pilis susti- *h*  
 netur, quibus vitiatis ac recedentibus, tremit pondus *h*  
 impositum. Fortasse calida vis spiritus in ignem ver- *h*  
 sa, et fulmini similis, cum magna strage obstantium *h*  
 fertur. Fortasse palustres et iacentes aquas aliquis fla- *h*  
 tus impellit, et inde aut ictus terram quatit, aut spi- *h*  
 ritus agitatio, ipso motu crescens, et se incitans, ab *h*  
 imo in summa usque perfertur, nullam tamen illi *h*  
 placet causam motus esse maiorem, quam spiritum.

XXI. Nobis quoque placet, hunc spiritum esse,  
 qui tanta possit conari, quo nihil est in rerum na-

tura potentius, nihil acrius, sine quo nec illa quidem,  
 quae vehementissima sunt, valent. Ignem spiritus  
 concitat; aquae, si ventum detrahas, inertes sunt.  
 Tunc demum impetum sumunt, cum illas agit flatus.  
 qui potest dissipare magna spatia terrarum, et novos  
 montes subiectos extollere, et insulas non ante visas,  
 in medio mari ponere. Theren, et Therasiam, et  
 hanc nostrae aetatis insulam, spectantibus nobis in  
 Aegaeo mari enatam, quis dubitat, quin in lucem  
 spiritus vexerit? Duo genera sunt (ut Posidonio pla-  
 cet) quibus movetur terra. Utrique nomen est pro-  
 prium: Altera succussio est, cum terra quatitur, et  
 sursum ac deorsum movetur, altera inclinatio, qua  
 in latera nutat navigii more. Ego et tertium illud  
 existimo, quod nostro vocabulo signatum est; non  
 enim sine causa tremorem terrae dixere maiores, qui  
 utrique dissimilis est: nam nec succutiuntur tunc om-  
 nia, nec inclinantur, nec vibrantur. Res minime in  
 huiusmodi casu noxia, sicut longe perniciosior est in-  
 clinatio concussione. Nam nisi celeriter et ex altera  
 parte properabit motus, qui inclinata restituat, ruina  
 necessario sequitur. Cum dissimiles ii motus inter se  
 sint, causae eorum diversae sunt.

XXII. Prius ergo de motu quatiente dicamus. Si  
 quando magna onera per vices vehiculorum plurium  
 tracta sunt, et rotae maiore nisu in salebras incide-  
 runt, terram concuti senties. Asclepiodotus tradit,  
 cum petra e latere montis abrupta cecidisset, aedifi-  
 cia vicina tremore collapsa. Idem sub terris fieri po-  
 test, ut ex his quae impendent rupibus aliqua resolu-  
 ta, magno pondere ac sono in subiacentem cavernam

cadat, eo vehementius, quo aut plus ponderis venit, aut altius. Et sic commovetur omne tectum cavatae vallis. Nec tantum pondere suo abscindi saxa credibile est, sed cum flumina supra ferantur, assiduus humor commissuras lapidis extenuat, et quotidie his ad quae religatus est aufert, et illam (ut ita dicam) cutem qua continetur, abradit. Deinde longa per aevum diminutio usque eo infirmat illa, quae quotidie attrivit, ut desinant esse oneri ferendo. Tunc saxa vasti ponderis decidunt, tunc illa praecipitata rupes, quidquid ab imo repercussit, non passura consistere,

—— *sonitu venit, & ruere omnia visa repente :*

ut ait Virgilius noster. Huius motus succutientis terras haec erit causa. Ad alteram transeo.

XXIII. Rara terrae natura est, multumque habens vacui. per has raritates spiritus fertur : qui ubi maior influxit, nec emittitur, concutit terram. Haec placet et aliis, ut paulo ante retuli, causa : si quid apud te profectura testium turba est. Hanc etiam Callisthenes probat non contemptus vir. Fuit enim illi nobile ingenium, et furibundi regis impatiens. Hoc est Alexandri crimen aeternum, quod nulla virtus, nulla bellorum felicitas redimet. Nam quotiens quis dixerit, Occidit Persarum multa millia : opponetur, Et Callisthenem. Quotiens dictum erit, Occidit Darium, penes quem tunc magnum regnum erat ; opponetur, Et Callisthenem. Quotiens dictum erit, Omnia Oceano tenuis vicit, ipsum quoque tentavit novis classibus, et imperium ex angulo Thraciae usque ad Orientis terminos protulit : dice-



tur, Sed Callisthenem occidit. Omnia licet antiqua ducum regumque exempla transierit, ex his quae fecit, nihil tam magnum erit, quam scelus Callisthenis. Hic Callisthenes in libris, quibus describit quemadmodum Helice Burisque merfae sunt, quis illas casus in mare, vel in illas mare immiserit, dicit id quod in priore parte dictum est. Spiritus intrat terram per occulta foramina, quemadmodum ubique, ita et sub mari. Deinde cum est obstructus ille trames, per quem descenderat, reditum autem illi a tergo resistens aqua abstulit, huc et illuc fertur, et sibi ipse occurrens terram labefactat. Ideo frequentissime mari opposita vexantur, et inde Neptuno haec assignata est movendi potentia. Quisquis primas literas Graecas didicit, scit illum apud Homerum ἐννοσίγαιον vocari.

XXIV. Spiritum esse huius mali causam, et ipse consentio: de illo disputabo, quomodo intret hic spiritus: utrum per tenuia foramina, nec oculis comprehensibilia; an per maiora ac patentiora: et utrum ab imo, an etiam per summa terrarum. Hoc incredibile est. Nam in nostris quoque corporibus cutis spiritum respuit: nec est illi introitus, nisi per quem trahitur: nec consistere quidem a nobis receptus potest, nisi in laxiore corporis parte. Non enim inter nervos pulpasve, sed in visceribus et patulo interioris partis recessu commoratur. Idem de terra suspicari licet, vel ex hoc, quod motus non in summo terrae, circave summa est, sed subter et ab imo. Huius indicium est, quod altitudinis profundae maria iactantur, motis scilicet his, supra quae fusa

sunt. Ergo verisimile est, terram ex alto moveri, et illic spiritum in cavernis ingentibus concipi. Immo, inquit, ceu cum frigore inhorruimus, tremor sequitur, sic terras quoque spiritus extrinsecus accidens quassat. Quod nullo modo potest fieri. Algere enim debet, ut idem illi accidat, quod nobis, quos externa causa in horrorem agit. Accidere autem terrae simile quiddam nostrae affectionis, sed non ex simili causa, concesserim. Illam interior et altior iniuria debet impellere: cuius rei argumentum vel maximum hoc potest esse, quod cum vehementi motu adaperitum ingenti ruina solum est, totas nonnunquam urbes et recipit hiatus ille, et abscondit. Thucydides ait, circa Peloponnesiaci belli tempus, Atalantam insulam aut totam, aut certe maxima ex parte superfusam. Idem Sidoni accidisse, Posidonio crede. Nec ad hoc testibus opus est. Meminimus enim, tetrīs interno motu divulsis, loca disiecta, et campos interisse. Quod iam dicam, quemadmodum existimem, fieri.

XXV. Cum spiritus magnum et vacuum terrarum locum penitus opplevit, coepitque rixari, et de exitu cogitare; latera ipsa intra quae latet, saepius percutit, supra quae urbes interdum sitae sunt: haec nonnunquam adeo concutiuntur, ut aedificia superposita procumbant: nonnunquam in tantum, ut parietes quibus fertur omne tegimen cavi, decendant in illum subtervacantem locum, totaeque urbes in immensam altitudinem vergant. Si velis credere, aiunt aliquando Ossam Olympe cohaesisse, deinde terrarum motu recessisse, et scissam unius magnitu-

dinem montis in duas partes. tunc effugisse Peneum , qui paludes quibus laborabat Theffalia , siccavit , abductis in se quae sine exitu stagnaverant aquis. Ladon flumen inter Helim et Megalenopolin medius est , quem terrarum motus effudit. Per hoc quid probo ? In laxos specus ( quid enim aliud appellem loca vacua sub terris ? ) spiritum convenire. Quod nisi esset , magna terrarum spatia commoverentur , et una multa titubarent. Nunc exiguae partes laborant , nec unquam per ducenta milliaria motus extenditur. Ecce hic qui implevit fabulis orbem , non transcendit Campaniam. Quid dicam , cum Chalcis tremuit , Thebas stetisse ? cum laboravit Aegium , tam propinquas illi Patras de motu solum audisse ? Illa vasta concussio , quae duas suppressit urbes Helicen et Burin , citra Aegium constitit. Apparet ergo , in tantum spatium motum protendere , quantum illa sub terris vacantis loci inanitas pateat.

XXVI. Poteram ad hoc probandum abuti auctoritate magnorum virorum , qui Aegyptum nunquam tremuisse tradunt. Rationem autem huius rei hanc reddunt , quod ex limo tota concreverit. Tantum enim ( si Homero fides est ) aberat a continenti Pharos , quantum navis diurno cursu metiri plenis lata velis potest : sed continenti admota est. Turbidus enim defluens Nilus , multumque secum limum trahens , et eum subinde apponens prioribus terris , Aegyptum annuo incremento semper ultra tulit. Inde pinguis et limosi soli est , nec ulla intervalla in se habet , sed crevit in solidum arefcente limo : cuius pressa erat et sedens structura , cum partes glutina-

rentur, nec quidquam inane intervenire poterat, cum solido liquidum ac molle semper accederet. Sed movetur et Aegyptus et Delos, quam Virgilius stare iussit :

*Immotamque colli dedit, & contemnere ventos.*

Hanc philosophi quoque, credula natio, dixerunt non moveri, auctore Pindaro. Thucydides ait, antea quidem immotam fuisse, sed circa Peloponnesiacum bellum tremuisse. Callisthenes et alio tempore ait hoc accidisse : Inter multa, inquit, prodigia, quibus denuntiata est duarum urbium Helices et Buris everfio, fuere maxime notabilia columna ignis immenti, et Delos agitata. Quam ideo stabilem videri vult, quia mari imposita, habeat concavas rupes et saxa pervia, quae dent deprehenso aëri reditum. Ob hoc etiam insulas esse certioris soli, urbesque eo tutiores, quo propius ad mare accesserunt. Falsa haec esse, Pompeii et Herculaneum sensere. Adice nunc, quod omnis ora maris obnoxia est motibus. Sic Paphos non semel corruit : sic nobilis et huic iam familiaris malo Nicopolis. Cyprum ambit altum mare, et agitur Tyros et ipsa tam movetur, quam diluitur. Hae fere causae redduntur, propter quas tremit terra.

XXVII. Quaedam tamen propria in hoc Campano motu accidisse narrantur, quorum ratio reddenda est. Aiunt enim sexcentarum ovium gregem exanimatum in Pompeiana regione. Non est quare hoc putes ovibus illis timore accidisse. Diximus solere post magnos terrarum motus pestilentiam fieri. Nec id mirum est : multa enim mortifera in alto latent

At aër ipse, qui vel terrarum culpa vel pigritia, et aeterna nocte torpescit, gravis haurientibus est: vel corruptus internorum ignium vitio, cum est longo situ emissus, purum hunc liquidumque maculat ac polluit, insuetumque ducentibus spiritum, affert nova genera morborum. Quid, quod aquae quoque inutiles pestilentesque in abdito latent, ut quas nunquam usus exerceat, nunquam aura liberior everberet? Crassae itaque, et gravi caligine sempiternaque tectae, nihil nisi pestiferum in se et corporibus nostris contrarium habent. Aër quoque qui admixtus est illis, quique inter illas paludes iacet, cum emerfit, late vitium suum spargit, et haurientes necat. Facilius autem pecora sentiunt, in quae pestilentia incurere solet quo avidiora sunt: aperto coelo plurimum utuntur, et aquis, quarum maxima in pestilentia culpa est. Oves vero mollioris naturae, quo propiora terris ferunt capita, correptas esse non miror, cum afflatus diri aëris circa ipsam humum exceperint. Nocuisset ille et hominibus, si maior exiisset: sed illum copia aëris sinceri exstinxit, antequam ut ab homine posset trahi, surgeret.

XXVIII. Multa autem terras habere mortifera, vel ex hoc intellige, quod tot venena nascuntur, non manu sparsa, sed sponte: solo scilicet habente, ut boni, ita mali semina. Quid, quod pluribus Italiae locis per quaedam foramina pestilens exhalatur vapor, quem non homini ducere, non ferae tutum est? Aves quoque si in illum inciderint, antequam coelo meliore leniatur, in ipso volatu cadunt, liventque corpora, et non aliter quam per vim elisae fau-



ces tument. Hic spiritus quamdiu terris continetur, tenui foramine fluens, non plus potentiae habet, quam ut despectantia et ultro sibi illata conficiat. Ubi per secula conditis tenebris ac tristitia loci crevit in vitium, ipsa ingravescit mora; peior, quo segnior. Cum autem exitum nactus est, aeternum illud umbrosi frigoris malum, et infernam noctem solvit, ac regionis nostrae aëra infuscat. Vincuntur enim meliora peioribus. Tunc etiam ille spiritus purior transit in noxium. Inde subitae continuaequae mortes, et monstrosa genera morborum, ut ex novis orta causis. Brevis aut longa clades est, prout vitia valuerunt. Nec prius pestilentia desinit, quam spiritum illum gravem exercuit laxitas coeli, ventorumque iactatio.

XXIX. Nam quod aliquot insanis attonitisque similes discurrere fecit metus, qui excutit mentes, ubi privatus ac modicus est: quid ubi publice terret, ubi cadunt urbes, populi opprimuntur, terra concutitur; quid mirum est, animos inter dolorem et metum destitutos aberrasse? Non est facile, inter magna mala consipere. Itaque lenissima fere ingenia in tantum venire formidinis, ut sibi exciderent. Nemo quidem sine aliqua iactura sanitatis expavit; similisque furenti, quisquis timeret: sed alios cito timor sibi reddit, alios vehementius perturbat, et in dementiam transfert. Inde inter bella erravere lymphatici: nec usquam plura exempla vaticinantium invenies, quam ubi formido mentes religione mixta percussit. Statuam divisam non miror, cum dixerim montes a montibus recessisse, et ipsum diruptum esse ab imo solum.

*Haec loca, vi quondam & vasta convulsa ruina;  
 (Tantum aevi longinqua valet mutare vetustas)  
 Dissiluisse ferunt, cum protinus utraque tellus  
 Una foret, venit medio vi pontus, & undis  
 Hesperium Siculo latus abscidit, arvaeque & urbes  
 Litore diductas, angusto interluit aestu.*

Vides totas regiones a suis sedibus revelli, et trans mare iacere, quod in confinio fuerat: vides et urbium fieri gentiumque discidium, cum pars naturae concitata est de se, vel aliquod mare ingens spiritus impegit, quorum mira, ut ex toto, vis est. Quamvis enim parte saeviat, mundi tamen viribus saevit. Sic et Hispanias a contextu Africae, mare eripuit. Sic hac inundatione, quam poëtarum maximi celebrant, ab Italia Sicilia resecta est. Aliquando autem plus impetus habent, quae ex infimo veniunt. Acriora enim sunt, in quibus nisus est per angusta. Quantas res ii terrarum tremores, quamque mira spectacula ediderint, fatis dictum est.

XXX. Cur ergo aliquis ad hoc stupet, quod aëni statuae, ne solidum quidem, sed concavum ac tenue, disruptum est; cum fortasse in illud se spiritus, quaerens fugam, incluserit? Illud vero quis nescit? Diductis aedificia angulis vidimus moveri, iterumque componi. Quaedam vero parum aptata positu suo, et a fabris negligentius solutiusque composita, terrae motus saepius agitata compegit. Quod si totos parietes et totas findit domos, et latera magnarum turrium, quae solida sunt, scindit, et pilas operibus subditas dissipat; quid est, quare quisquam dignum

adnotari putet, sectam esse aequaliter ab imo ad caput in partes duas statuam? Quare tamen per plures dies motus fuit? Non desit enim assidue tremere Campania, clementius quidem, sed ingenti damno, quia pressa et quassa quatiebat: quibus ad cadendum male stantibus, non erat impelli, sed agitari. Nondum videlicet spiritus omnis exierat, sed adhuc omissa parte maiore oberrabat.

XXXI. Inter argumenta quibus probatur, spiritu ista fieri, non est quod dubites et hoc ponere. Cum maximus editus tremor est, quo in urbes terrasque saevitum est, non potest par illi subsequi alius, sed post maximum leves motus sunt, quia vehementius exitum ventis luctantibus fecit. Reliquiae deinde residui spiritus non idem possunt, nec illis pugna est: cum iam viam invenerint, sequanturque ea qua prima vis ac maxima evasit. Hoc quoque dignum memoria iudico, ab eruditissimo et gravissimo viro cognitum: forte enim cum hoc evenit, lavabatur. vidisse se affirmabat in balneo tessellas, quibus solum erat stratum, alteram ab altera separari, iterumque committi: et aquam modo recipi in commissuras, pavimento recedente; modo, compresso, bullire et elidi. Eundem audiavi narrantem, vidisse se, molles materias mollius crebriusque tremere, quam natura duras.

XXXII. Haec, Lucili virorum optime, quantum ad ipsas causas. Illa nunc quae ad confirmationem animorum pertinent: quos magis refert nostra, fortiores fieri, quam doctiores. Sed alterum sine altero non fit. Non enim aliunde animo venit robur, quam

a bonis artius, quam a contemplatione naturae. Quem enim non hic ipse casus adversus omnes firmaverit et erexerit? Quid est enim cur ego hominem aut feram, quid est cur sagittam aut lanceam tremam? maiora me pericula expectant. Fluminibus et terris, et magnis naturae partibus petimur. Ingenti itaque animo mors provocanda est, siue nos aequo vastoque impetu aggreditur, siue quotidiano et vulgari exitu: nihil refert quam minax veniat, quantumque sit, quod in nos trahat: quod a nobis petit, minimum est. Hoc senectus a nobis ablatura est, hoc auriculae dolor, hoc in nobis humoris corrupti abundantia, hoc cibus parum obsequens stomacho, hoc pes leviter offensus. Pusilla res est hominis anima: sed ingens res est contemptus animae. Hanc qui contemserit, securus videbit maria turbari: etiamsi illa omnes excitaverint venti; etiamsi aestus, aliqua perturbatione mundi, totum in terras verterit oceanum. Securus adspiciet fulminantis coeli trucem et horridam faciem; frangatur licet coelum, et ignes suos in exitium omnium, in primis suum, misceat. Securus adspiciet ruptis compagibus dehiscens solum. Illa licet inferorum regna retegantur, stabit super illam voraginem intrepidus: et fortasse quo debet cadere, defiliet. Quid ad me, quam sint magna quibus pereor? Ipsum perire non est magnum. Proinde si volumus esse felices, si nec hominum, nec deorum, nec rerum timore vexari, si despiciere fortunam supervacua promittentem, leviam minitantem, si volumus tranquille degere, et ipsis diis de felicitate controversiam facere, anima in expedito est habenda. Sive il-

lam insidiae, five morbi petent, five hostium gladii,  
 five insularum cadentium fragor, five ipsarum ruina  
 terrarum, five vasta vis ignium, urbes agrosque pari  
 clade complexa, cum libet illi, eam accipiat. Quid  
 aliud debeo, quam exeuntem hortari, et cum bonis  
 omnibus emittere: Vade fortiter, vade feliciter.  
 Nihil dubitaveris reddere. Non de re, sed de tem-  
 pore est quaestio. Facis quod quandoque faciendum  
 est. Nec rogaveris, nec timueris, nec te velut in ali-  
 quod malum exiturum tuleris retro. Rerum natura  
 te, quae genuit, exspectat, et locus melior ac tutior.  
 Illic non tremunt terrae, nec inter se venti cum  
 magno nubium fragore concurrunt, non incendia re-  
 giones urbesque vastant, non naufragiorum totas  
 classes sorbentium metus est, non arma contrariis  
 disposita vexillis, et in mutuam perniciem multorum  
 millium par furor, non pestilentia, et ardentes pro-  
 miscue, communes populis cadentibus rogi. Istud  
 leve est: quid timemus? Grave est: potius semel in-  
 cidat, quam semper impendeat. Ego autem perire  
 timeam, cum terra ante me pereat, cum ista qua-  
 tiantur quae quatiunt, et in iniuriam nostram non sine  
 sua veniunt? Helicen Buringue totas mare accepit:  
 ego de uno corpusculo timeam? Supra oppida duo  
 navigatur: duo autem, quae novimus, quae in  
 nostram notitiam memoria literis servata perduxit.  
 Quam multa alia aliis locis mersa sunt? quot populos  
 aut terra in se, aut mare inclusit? Ego recusam mei  
 finem, cum sciam me sine fine non esse? immo cum  
 sciam omnia esse finita? Ego ultimum suspirium ti-  
 meam? Quantum potes itaque ipse te cohortare,



Lucili, contra metum mortis. Hic est qui nos humiles facit : hic est qui ipsam vitam, cui parcit, inquietat ac perdit. Hic omnia ista dilatat, terrarum motus, et fulmina. Quae omnia feres constanter, si cogitaveris nihil interesse inter exiguum tempus et longum. Horae sunt quas perdimus. Puta dies esse, puta menses, puta annos : perdimus illos, nempe perituros. Quid, oro te, refert, nunc perveniam ad illos? fluit tempus, et avidissimos sui deferit. Nec quod futurum est meum est, nec quod fuit. In puncto fugientis temporis pendeo : et magni est, modicum fuisse. Eleganter Laelius ille sapiens dicenti cuidam, Sexaginta annos habeo : Hos, inquit, dicis sexaginta, quos non habes? Ne ex hoc quidem intelligimus incomprehensibilis vitae conditionem et fortem temporis semper alieni, quod annos annumeramus amissos. Hoc affigamus animo, hoc nobis subinde dicamus : Moriendum est. Quando? Quid tua? Mors naturae lex est, mors tributum officiumque mortalium, malorumque omnium remedium est. Optabit illam, quisquis timet. Omnibus omissis, hoc unum, Lucili, meditare, ne mortis nomen reformides : effice illam tibi cogitatione multa familiarem : ut si ita tulerit, possis illi vel obviam exire.

---

L. ANNAEI SENECAE  
 AD LUCILIUM  
 NATURALIUM QUAESTIONUM  
 LIBER VII.  
 IN QUO AGITUR DE COMETIS.

---

ARGUMENTUM.

*Liber hic totus in Cometarum pertractatione consumitur, pleraque ab Aristotele mutuatus. Sententiam tamen eius, uti Democriti, Epigenis, Apollonii Myndii, Callisthenis, Artemidori, Ephori, immo Zenonis suam refellit: ac tandem in opinionem veterum Chaldaeorum discedit. Cometam verum sidus esse ex illis aeternis, ex altitudine aetheris ingenti in oculos mortalium submitti, deinde rursus recipi. Motus quidem Cometarum nondum satis certos & comprehensos esse, sed futurum olim auguratur tempus, quo posterum tam aperta maiores suos nescivisse mirentur. Quaedam etiam ex duobus aevi sui Cometis discit, quorum prior sub Claudio, alter sub Nerone effulsit. Denique solemnem more cum vitiis in rixam descendit. Non mirum ista & plura alia nesciri, cum nemo nisi libidini, ganeis, histrionibus & pantomimis studeat, vacuis & desertis philosophorum scholis.*

## C A P U T I.

**N**EMO usque eo tardus, et hebes, et demissus in terram est, ut ad divina non erigatur, ac tota mente confurgat: utique ubi novum aliquod e coelo miraculum fulsit. Nam quamdiu solita decurrunt, magnitudinem rerum consuetudo subducit. Itaenim compositi sumus, ut nos quotidiana, etiamsi admiratione digna sunt, transeant: contra minimarum quoque rerum, si insolitae prodierunt, spectaculum dulce fiat. Hic itaque coetus astrorum, quibus immensi corporis pulchritudo distinguitur, populum non convocat. At cum aliquid ex more mutatum est, omnium vultus in coelo est. Sol spectatorem, nisi cum deficit, non habet. Nemo observat lunam, nisi laborantem. Tunc urbes conclamant, tunc pro se quisque superstitione vana trepidat. Quāto illa maiora sunt, quod sol totidem (ut ita dicam) gradus, quot dies habet, et annum circuitu suo claudit: quod a solstitio statim inclinatur, et dat spatium noctibus: quod sidera abscondit: quod terras, cum tanto maior sit illis, non urit, sed calorem suum intensiōibus ac remissionibus temperando fovet: quod lunam nunquam implet, nisi adversam sibi, nec obscurat. Haec tamen non annotamus, quamdiu ordo servatur. Si quid turbatum est, aut praeter consuetudinem emicuit, spectamus, interrogamus, ostendimus. Adeo naturale est, magis nova, quam magna mirari. Idem in Cometis fit. Si rarus et insolitae figurae ignis apparuit, nemo non scire quid sit, cupit: et oblitus aliorum, de adventitio

quaerit ; ignarus , utrum debeat mirari , an timere. Non enim defunt qui terreant , qui significationes eius graves praedicent. Sciscitantur itaque , et cognoscere volunt , prodigium sit , an sidus. At mehercules non aliud quis aut magnificentius quaesierit , aut didicerit utilius , quam de stellarum siderumque natura : utrum flamma contracta , quod et visus noster affirmat , et ipsum ab aliis fluens lumen , et calor inde descendens : an non sint flammei orbes , sed solida quaedam terrenaque corpora , quae per igneos tractus labentia inde splendorem trahant , coloremque , non de suo clara. In qua opinione magni fuere viri , qui sidera crediderunt ex duro concreta , et ignem alienum pascentia. Nam per se , inquiunt , flamma diffugeret , nisi aliquid haberet quod teneret , et a quo teneretur , conglobatamque nec stabili inditam corpori , profecto iam mundus turbine suo dissipasset.

II. Ad haec investiganda proderit quaerere , num Cometae eius conditionis sint , cuius superiora. Videntur enim cum illis quaedam habere communia , ortus et occasus , ipsam quoque , quamvis spargantur et longius exeant , faciem. aequae enim ignei splendidaeque sunt. Itaque si omnia terrena sidera sunt , his quoque eadem fors erit. Si vero nihil aliud sunt quam purus ignis , manentque mensibus senis , nec illos conversio mundi solvit et velocitas : illa quoque possunt et tenui constare materia , nec hoc discuti assiduo coeli circumactu. Illo quoque pertinebit hoc excussisse , ut sciamus , utrum mundus terra stante circumbeat , an mundo stante terra vertatur. Fuerunt enim qui dicerent , nos esse , quos rerum natura nescientes ferat ,

nec coeli motu fieri ortus et occasus, sed ipsos oriri et occidere. Digna res est contemplatione, ut sciamus in quo rerum statu simus: pigerrimam fortiti, an velocissimam sedem: circa nos Deus omnia, an nos agat. Necessarium est autem, veteres ortus Cometarum habere collectos. Deprehendi enim propter raritatem eorum cursus adhuc non potest, nec explorari, an vices servant, et illos ad suum diem certus ordo producat. Nova haec coelestium observatio est, et nuper in Graeciam inuenta.

III. Democritus quoque, subtilissimus antiquorum omnium, suspicari ait se, plures stellas esse quae currant: sed nec numerum illarum posuit, nec nomina, nondum comprehensis quinque siderum cursibus. Eudoxus primus ab Aegypto hos motus in Graeciam transtulit. Hic tamen de Cometis nihil dicit. Ex quo apparet, ne apud Aegyptios quidem, quibus maior coeli cura fuit, hanc partem elaboratam. Conon postea diligens et ipse inquisitor, defectiones quidem solis servatas ab Aegyptiis collegit, nullam autem mentionem fecit Cometarum: non praetermissurus, si quid explorati apud illos comperisset. Duo certe, qui apud Chaldaeos studuisse se dicunt, Epigenes et Apollonius Myndius, peritissimus inspiciendorum naturalium, inter se dissident. Hic enim ait, Cometas in numero stellarum errantium poni a Chaldaeis, tenerique cursus eorum. Epigenes contra ait, Chaldaeos nihil de Cometis habere comprehensi, sed videri illos accendi turbine quodam aëris concitati et intorti.

IV. Primum ergo, si tibi videtur, opiniones



huius ponamus, ac refellamus. Huic videtur plurimum virium habere, ad omnes sublimium motus, stella Saturni. Haec cum proxima signa Marti premit, aut in Lunae viciniam transit, aut in Solis incidit radios, natura ventosa et frigida contrahit pluribus locis aëra, conglobatque. Deinde si radios Solis assumfit, tonat, fulguratque. Si Martem quoque consentientem habet, fulminat. Praeterea, inquit, aliam materiam habent fulmina, aliam fulgurationes. Aquarum enim et omnis humidi evaporatio, splendores tantum coeli citra ictum minaces movet: illa autem calidior ficciorque terrarum exhalatio, fulmina extundit. Trabes vero et faces, quae nullo alio inter se quam magnitudine distant, hoc modo fiunt. Cum humida terrenaque in se globus aliquis aëris clausit, quem turbine dicimus, quacunque fertur, praebet speciem ignis extenti. Quae tam diu durat, quamdiu mansit aëris illa complexio, humidi intra se terrenique multum vehens.

V. Ut a proximis mendaciis incipiam, falsum est, faces et trabes exprimi turbine. Turbo enim circa terras concipitur ac fertur. Ideoque arbuta radicitus vel lit, et quocunque incubuit, solum nudat: silvas interim et tecta corripens, inferior fere nubibus, utique nunquam altior. At contra trabes editior coeli pars ostentat. Ita nunquam nubibus obstiterunt. Praeterea turbo omni nube velocior rapitur, et in orbem vertitur. Super ista velociter desinit, et ipse se sua vi rumpit. Trabes autem non transcurrunt, nec praetervolant, ut faces, sed commorantur, et in eadem parte coeli collucent. Charimander quoque, in eo

libro quem de Cometis composuit, ait, Anaxagorae visum grande insolitumque coelo lumen magnitudine amplae trabis, et id per multos dies fulsisse. Talem effigiem ignis longi fuisse, Callisthenes tradit, antequam Burin et Helicen mare absconderet. Aristoteles ait, non trabem illam, sed Cometam fuisse: ceterum ob nimium ardorem non apparuisse sparsum ignem, sed procedente tempore, cum iam minus flagraret, redditam suam Cometae faciem. In quo igne multa quidem fuerunt digna quae notarentur: nihil tamen magis, quam quod ut ille fulsit in coelo, statim supra Burin et Helicen mare fuit. Numquid ergo Aristoteles non illam tantum, sed omnes trabes Cometae esse credebat? Hanc habet is differentiam, quod iis continuus ignis est, ceteris sparsus. Trabes enim flammam aequalem habent, nec ullo loco intermissam aut languidam, in ultimis vero partibus coactam; qualem fuisse illam, quam modo retuli, Callisthenes tradit.

VI. Duo, inquit Epigenes, Cometarum genera sunt. Alii ardorem undique effundunt, nec locum mutant: alii in unam partem ignem vagum in modum comae porrigunt, et stellas praetermeant: quales duo aetate nostra visi sunt. Illi priores criniti undique, etiam immoti, humiles fere sunt, et eisdem causis quibus trabes facesque conflantur, et ex intemperie aëris turbidi, multa secum arida humidaque terris exhalata versantis. Potest enim spiritus per angusta elisus accendere supra se positum aëra, plenum alimentis idoneis igni: deinde propellere ex nitido, ne ex aliqua causa refluat rursus, ac remittatur: deinde iterum proximo die ac sequentibus consurgere, et eundem locum in-

flammare. Videmus enim ventos per complures dies ad constitutum redire. Pluviae quoque, et alia tempestatum genera, ad praescriptum revertuntur. Ut breviter autem voluntatem eius exprimam, eadem fere ratione hos fieri Cometas existimat, qua fiunt ignes turbine eiekti. Hoc unum interest, quod illi turbines ex superiori parte in terras deprimuntur, hi de terra in superiora elevantur.

VII. Adversus haec multa dicuntur. Primum si ventus in causa esset, nunquam Cometes sine vento appareret. nunc autem et quietissimo aëre apparet. Deinde si vento fieret, cum vento caderet: et si vento inciperet, cresceret vento; eoque esset ardentior, quo ille incitator. His æccedit illud quoque. Ventus multas aëris partes impellit, Cometes in uno loco apparet: ventus in sublime non pervenit, Cometae autem visuntur supra quam ventis ire licet. Transít deinde ad illos, quos ait certiorē habere stellarum speciem, qui et procedunt, et signa praetereunt. Hos ait ex iisdem causis fieri, quibus illos, quos dixit humiliores. hoc tantum interesse, quod terrarum exhalationes multa secum arida ferentes, celsiorem petant partem, et in editiora coeli aquilone pellantur. Deinde si illos aquilo propelleret, ad meridiem semper agerentur, quo ventus hic nititur. Atqui varie concurrunt, alii in ortum, alii in occasum, omnes in flexum: quod iter non daret ventus. Deinde si aquilones illos impetus a terris in altum levaret, aliis ventis non orirentur Cometae. atqui oriuntur.

VIII. Illam nunc rationem eius (utraque enim utitur) refellamus. Quidquid humidi aridique terra

efflavit, cum in unum coit, ipsa discordia corporum, spiritum versat in turbinem. Tunc illa vis venti circumeuntis quidquid intra se comprehendit, cursu suo accendit, et levat in altum: ac tam diu manet splendor ignis expressi, quamdiu alimenta sufficiunt: quibus desinentibus, et ipse subsidit. Qui hoc dicit, non notat qualis sit turbinum cursus, et qualis Cometarum. Illorum rapidus ac violentus, et ipsis ventis citatior est: Cometarum lenis: et quod per diem et noctem quantum transierit, abscondat. Deinde turbinum motus vagus est et disiectus, et (ut Salustii utar verbis) verticosus: Cometarum autem compositus, et destinatum iter carpens. Num quis nostrum crederet, aut lunam, aut quinque sidera rapi vento, aut turbine rotari? Non, ut puto. Quare? quia non est illis perturbatus et impotens cursus. Ad Cometas idem transferamus. Non confuse nec tumultuose eunt, ut aliquis credat illos causis turbulentis et inconstantibus pelli. Deinde etiamsi vertex isti comprehendere terrena humidaque, et ex humili in altum exprimere possent: non tamen supra lunam efferrent. Omnis illis usque in nubilum vis est. Cometas autem immixtos stellis videmus per superiora labentes. Ergo verisimile non est, in tantum spatium perseverare turbinem: qui quo maior est, maturius corrumpitur.

IX. Utrumlibet itaque eligat: aut vis levis tam alte pervenire non poterit, aut magna et concitata citius ipsa se franget. Praeterea humiliores illi Cometae ob hoc (ut putant) non exeunt altius, quia plus terreni habent. Gravitas illos sua in proximo tenet. Atqui

neceſſe eſt, his Cometis diuturnioribus et celfioribus, plenior materia ſit. Neque enim diutius apparerent, niſi maioribus nutrimentis ſuſtinerentur. Dicebam modo, non poſſe diu verticem permanere, nec ſupra lunam, aut uſque in ſtellarum locum creſcere. Nempe efficit turbinem, plurium ventorum inter ipſos lucratio. Haec diu non poteſt eſſe. Nam cum vagus et incertus ſpiritus convolutatus eſt, noviffime uni vis omnium cedit. Nulla autem tempeſtas magna perdurat. Procellae quanto plus habent virium, tanto minus temporis. Venti cum ad ſummum venerunt, remittuntur omni violentia. Neceſſe eſt iſta concitatione in exitium ſui tendant. Nemo itaque turbinem toto die vidit, ne hora quidem. Mira velocitas eius, et mira brevitās eſt. Praeterea violentius celeriusque in terra circaque eam volvitur: quo celfior, eo ſolutilior, laxiorque eſt, et ob hoc diffunditur. Adice nunc, quod etiamſi in ſummum pertenderet, ubi ſideribus iter eſt, utique ab eo motu, qui univerſum trahit, ſolveretur. Quid enim eſt illa converſione mundi citatiſ? hac omnium ventorum in unum conieſta vis diſſiparetur, et terrae ſolida fortisque compages, nedum particula aëris torti.

X. Praeterea in alto manere non poteſt ignis turbine illatus, niſi ipſe quoque permaneret turbo. Quid porro tam incredibile eſt, quam in turbine longior mora? Utique motus motu contrario vincitur: habet enim ſuam locus ille vertiginem, quae rapit coelum,

*Sideraque alta trahit, celerique volumine torquet.*



Et ut det eis aliquam advectionem, quod fieri nullo modo potest: quid de his Cometis dicetur, qui seminis mensibus apparuerunt? Deinde duo debent esse motus eodem loco: alter ille divinus et assiduus, suum sine intermissione peragens opus: alter novus et recens, et turbine illatus. Necessesse est ergo alter alteri impedimento sit. Atqui lunaris illa orbita, ceterorumque supra lunam meantium motus irrevocabilis est: nec haesitat usquam, nec resistit, nec dat ullam nobis suspicionem obiectae sibi morae. Fidem non habet, turbinem, violentissimum et perturbatissimum tempestatis genus, in medios siderum ordines pervenire, et inter disposita ac tranquilla versari. Credamus ignem circumacto turbine accendi, et hunc expulsum in subline, praeberere nobis opinionem speciemque sideris longi. At puto tale esse debet, quale est id quod ignem efficit. Turbinis autem rotunda facies est. In eodem enim vestigio versatur, et columnae modo circumagentis se volvitur. Ergo ignem quoque qui inclusus est, similem esse illi oportet. Atqui longus est, et disiectus, minimeque similis in orbem coactus.

XI. Epigenem relinquamus, et aliorum opiniones persequamur. Quas antequam exponere incipiam, illud in primis praesumendum est, Cometam non in una parte coeli adspici, nec in signifero tantum orbe, sed tam in ortu quam in occasu, frequentissime tamen circa Septentrionem. Forma eis non est una. Quamvis enim Graeci discrimina fecerint eorum quibus in morem barbae flamma dependet, et eorum qui undique circa se velut comam spargunt, et eorum qui

bus fufus quidem eft ignis, fed in verticem tendens : tamen omnes ifti eiufdem notae funt, Cometaeque recte dicuntur. Quorum cum poft longum tempus appareant formae, inter fe eos comparare difficile eft. Illo ipfo tempore, quo apparent, inter fpectantes de habitu illorum non convenit : fed prout cuique acrior acies aut hebetior, ita dicit aut lucidiorem effe aut rubicundiorem, et crines aut in interiora deductos, aut in latera divifos. Sed five fint aliquae differentiae illorum, five non fint, eadem fiant ratione neceffe eft Cometae. Illud unum conftare debet, praeter folitum adfpectu novam fideris faciem, circa fe diffipatum ignem trahentis. Quibusdam antiquorum haec placet ratio. Cum ex ftellis errantibus altera fe alteri applicuit, confufo in unum duarum lumine, faciem longioris fideris reddi. Nec hoc tunc tantum evenit, cum ftella ftellam attigit, fed etiam cum appropinquavit. Intervallum enim, quod inter duas eft, illustratur ab utraque, inflammaturque, et longum ignem efficit.

XII. His illud respondebimus, certum effe numerum ftellarum mobilium. Solere autem eodem tempore et has apparere, et Cometen. Ex quo manifeftum fit, non illarum coitu fieri Cometen, fed proprium et fui iuris effe. Etiamnum frequenter ftella sub altioris ftellae veftigium venit : et Saturnus aliquando fupra Iovem eft, et Mars Venerem aut Mercurium recta linea defpicit : nec tamen propter hunc curfum, cum alter alterum fubit, Cometes fit : alioquin annis omnibus fieret : omnibus enim aliquae ftellae in eodem figno fimul funt. Si Cometam faceret

stella stellae superveniens, momento esse desineret. Summa enim velocitas transeuntium est. Ideo omnis siderum defectio brevis est: quia cito illas idem cursus, qui admovent, abstrahit. Videmus solem et lunam intra exiguum tempus, cum obscurari coeperint, liberari: quanto celerior debet fieri in stellis digressio, tanto minoribus? Atqui Cometae senis mensibus manent. quod non accideret, si duarum stellarum conventu gignerentur. Illae enim diu cohaerere non possunt, et necesse est illas lex celeritatis separet. Praeterea ista nobis vicina videntur, ceterum intervallis ingentibus dissident. Quomodo ergo potest altera stella usque ad alteram stellam ignem mittere, ita ut utraque iuncta videatur, cum sint ingenti regione diductae? Stellarum, inquit, duarum lumen miscetur, et praebet unius speciem. Nempe sic, quemadmodum rubicunda fit nubes solis incurfu, quemadmodum vespertina aut matutina flavescent, quemadmodum alterne arcus solis visitur. Haec omnia primum magna vi efficiuntur. Sol enim est, qui ista succendit. Stellarum non est eadem potentia. Deinde nihil horum, nisi infra lunam in terrarum vicinia nascitur. Superiora pura et sincera sunt, et coloris sui semper. Praeterea si quid tale accideret, non haberet moram, sed exstingueretur cito: sicut coronae, quae solem lunamve cingunt, intra brevissimum spatium exolescunt. Nec arcus quidem diu perseverat. Si quid esset tale, quo medium inter duas stellas spatium confunderetur, aequè cito dilaberetur. Utique non in tantum maneret, quantum morari Cometae solent. Stellaris intra Signiferum cursus est, hunc gyrum premunt:

at Cometae ubique cernuntur. Non magis certum est illis tempus quo appareant, quam locus ullus, ultra quem non exeant.

XIII. Adversus hoc ab Artemidoro illa dicuntur, non has tantum stellas quinque discurrere, sed solas observatas esse. Ceterum innumerabiles ferri per occultum, aut propter obscuritatem luminis nobis ignotas, aut propter circulorum positionem talem, ut tunc demum, cum ad extremam eorum venire, videntur. Ergo intercurrunt quaedam stellae, ut ait, nobis novae, quae lumen suum cum stantibus misceant, et maiorem quam stellis mos est, porrigant ignem. hoc ex his quae mentitur, levissimum est: tota eius narratio mundi, mendacium impudens est. Nam si illi credimus, summa coeli ora solidissima est, in modum testi durata, et alti crassique corporis, quod atomi congestae coacervataeque fecerunt. Huic proxima superficies est ignea, ita compacta, ut solvi vitarique non possit. Habet tamen spiramenta quaedam et quasi fenestras, per quas ex parte exteriori mundi influant ignes, non tam magni, ut interiora conturbent. Rursus ex mundo in exteriora labuntur. Itaque haec quae praeter consuetudinem apparent, influxerunt ex illa ultra mundum iacente materia. Solvere ista quid aliud est, quam manum exercere, et in ventum iactare brachia?

XIV. Velim tamen mihi dicat iste, qui mundo tam firma lacunaria imposuit, quid sit quare credamus illi tantam esse crassitudinem coeli. Quid fuit, quod illo tam solida corpora adduceret, et ibi detineret? Deinde quod tantae crassitudinis est, necesse est et magni

ponderis sit. Quomodo ergo in summo manent gravia? Quomodo illa moles non descendit, et se onere suo frangit? Fieri enim non potest, ut tanta vis ponderis, quantam ille substituit, pendeat, et levibus innixa sit. Nec illud quidem potest dici, extrinsecus aliqua esse retinacula, quibus cadere prohibeatur. Nec rursus de medio aliquid esse oppositi, quod imminens corpus excipiat ac fulciat. Illud etiamnum nemo dicere audebit, mundum ferri per immensum, et cadere quidem, sed non apparere an cadat: quia praecipitatio eius aeterna est, nihil habens novissimum, in quod incurrat. Hoc quidam de terra dixerunt, cum rationem nullam invenirent, propter quam pondus in aëre staret. Fertur, inquiunt, semper: sed non apparet an cadat, quia infinitum est in quod cadit. Quid est deinde quo probes, non quinque tantum stellas moveri, sed multas esse, et in multis mundi regionibus? Aut si hoc sine ullo probabili argumento licet respondere, quid est, quare non aliquis aut omnes stellas moveri, aut nullam dicat? Praeterea nihil te adiuvat ista stellarum passim euntium turba. Nam quo plures fuerint, saepius in alias incident: rari autem Cometae, et ob hoc mirabiles sunt. Quid, quod testimonium dicet contra te omnis aetas, quae talium stellarum exortus et annotavit, et posteris tradidit?

XV. Post mortem Demetrii Syriae regis, cuius Demetrius et Antiochus liberi fuere, paulo ante Achaicum bellum Cometes effulsit, non minor sole. Primo igneus ac rubicundus orbis fuit, clarumque lumen emittens, quanto vinceret noctem. Deinde



paulatim magnitudo eius districta est, et evanuit claritas. Novissime autem totus intercidit. Quot ergo coire stellas oportet, ut tantum corpus efficiant? Mille in unum licet congreges, nunquam hunc habitum solis aequabunt. Attalo regnante, initio Cometes apparuit modicus. Deinde sustulit se diffuditque, et usque in aequinoctialem circulum venit, ita ut illam plagam coeli, cui lactea nomen est, in immensum extentus aequaret. Quot ergo convenisse debent erraticae, ut tam longum coeli tractum occuparent igne continuo?

XVI. Contra argumentum dictum est: contra testes dicendum est. Nec magna molitione detrahenda est auctoritas Ephoro: historicus est. Quidam incredibilium relatu commendationem parant, et lectorem aliud acturum, si per quotidiana duceretur, miraculo excitant. Quidam creduli, quidam negligentes sunt: quibusdam mendacium obrepat, quibusdam placet. Illi non evitant, hi appetunt. Et hoc in commune de tota natione: quae approbari opus suum, et fieri popolare non putet posse, nisi illud mendacio asperfit. Ephorus vero non religiosissimae fidei, saepe decipitur, saepe decipit. Sicut hic Cometen, qui omnium mortalium oculis custoditus est, quia ingentis rei traxit eventus, cum Helicen et Burin ortu suo merferit, ait illum discessisse in duas stellas: quod praeter illum nemo tradidit. Quis enim posset observare illud momentum, quo Cometes solutus, et in duas partes redactus est? Quomodo autem si est qui viderit Cometen in duas dirimi, nemo vidit fieri ex duabus? Quare au-

tem non adiecit, in quas stellas divisus sit, cum aliqua ex quinque stellis esse debuerit?

XVII. Apollonius Myndius in diversa opinione est. Ait enim, Cometen non unum ex multis erraticis effici, sed multos Cometas erraticos esse. Non est, inquit, species falsa, nec duarum stellarum confinio ignis extensus: sed et proprium sidus Cometes est, sicut solis aut lunae. Talis forma est, non in rotundum restricta, sed procerior, et in longum producta. Ceterum non est illi palam cursus: altiora mundi secat: et tunc demum apparet, cum in imum cursus sui venit. Nec est quod putemus, eundem visum esse sub Claudio, quem sub Augusto vidimus: nec hunc qui sub Nerone Caesare apparuit, et Cometes detraxit infamiam, illi similem fuisse, qui post necem divi Iulii, ludis Veneris genitricis, circa undecimam horam diei emerfit. Multi variique sunt, dispares magnitudine, dissimiles colore. aliis rubor est sine ulla luce: aliis candor, et purum liquidumque lumen: aliis flamma, et haec non sincera, nec tenuis, sed multum circa se volvens fumidi ardoris. Cruenti quidam, minaces, qui omen post se futuri sanguinis ferunt. hi minuunt augentque lumen suum, quemadmodum alia sidera: quae clariora, cum descendere, sunt, maioraque ex loco propiore visuntur; minora, cum redeunt, et obscuriora, quia abducunt se longius.

XVIII. Adversus hoc protinus respondetur, non idem accidere in Cometes, quod in ceteris. Cometae enim quo primum die apparuerint, maximi sunt. Atqui deberent crescere, quo propius accederent.

Nunc autem manet illis prima facies, donec incipiant exstingui. Deinde quod adversus priores, etiam adversus hunc dicitur: Si erraret Cometes, essetque sidus, intra signiferi terminos moveretur, intra quod omne sidus cursus suos colligit. Nunquam apparet stella per stellam. Acies nostra non potest per medium sidus exire, ut per illud editiora prospiciat. Per Cometen autem non aliter quam per nubem ulteriora cernuntur: ex quo apparet, illum non esse sidus, sed levem ignem ac tumultuarium.

XIX. Zenon noster in illa sententia est: congruere iudicat stellas, et radios inter se committere: hac societate luminis existere imaginem stellae longioris. Ergo quidam nullos esse Cometas existimant, sed species illorum per repercussionem vicinorum siderum, aut per coniunctionem cohaerentium reddi. Quidam aiunt esse quidem, sed habere cursus suos, et post certa lustra in conspectum mortalium exire. Quidam esse quidem, sed non quibus siderum nomen imponas: quia dilabuntur, nec diu durant, et exigui temporis mora dissipantur.

XX. In hac sententia sunt plerique nostrorum; nec id putant veritati repugnare. Videmus enim, in sublimi varia ignium concipi genera, et modo coelum ardere, modo

*Longos a tergo flammarum albescere tractus,*

modo faces cum igne vasto rapi. Iam ipsa fulmina, etsi velocitate mira, simul et perstringunt aciem, et remittunt, ignes sunt aëris triti, et impetu inter se maiore collisi. Ideo ne resistunt quidem, sed expressi

fluunt, et protinus pereunt. Alii vero ignes diu manent: nec ante discedunt, quam consumtum est omne, quo pascebantur, alimentum. Hoc loco sunt illa a Posidonio scripta miracula, columnae, clypeiue flagrant, aliaeque insigni novitate flammæ: quæ non adverterent animos, si ex consuetudine et lege decurrerent. Ad hæc stupent omnes, et repentinum ignem ex alto efferunt, sive emicuit aliquid et fugit, sive compresso aëre et in ardorem coacto, loco miraculi stetit. Quid ergo? Non aliquando lacuna cedentis retro ætheris patuit, et vastum in concavo lumen? Exclamare posses: Quid est hoc?

—— medium video discedere coelum,

*Palantesque polo stellas.* ——

quæ aliquando non expectata nocte fulserunt, et per medium eruperunt diem. Sed alia huius rei ratio est, quare alieno tempore apparent, quas esse, etiam cum laterent, constat. Multos Cometas non videmus, quod obscurantur radiis solis: quo deficiente, quendam Cometen apparuisse, quem sol vicinus obtexerat, Posidonius tradit. Sæpe autem cum occidit sol, sparsi ignes non procul ab eo videntur. Videlicet ipsa stella sole perfunditur, et ideo adspici non potest: Cometae autem radios solis effugiunt.

XXI. Placet ergo nostris, Cometas, sicut faces, sicut tubas, trabesque, et alia ostenta coeli, denso aëre creari. Ideo circa Septemtrionem frequentissime apparent, quia illic plurimum est aëris pigri. Quare ergo non stat Cometes, sed procedit? dicam. Ignium modo alimentum suum sequitur. quamvis enim illi ad

superiora nisus est: tamen deficiente materia retroiens ipse descendit. In aëre quoque non dexteram laevamque premit partem. Nulla enim illi via est: sed qua illum vena pabuli sui duxit, illo repit, nec ut stella procedit, sed ut ignis pascitur. Quare ergo per longum tempus apparet, et non cito exstinguitur? Sex enim mensibus hic, quem nos Neronis principatu laetissimo vidimus, spectandum se praebeuit, in diversum illi Claudiano circumactus. Ille enim a Septemtrione in verticem surgens, Orientem petiit semper obscurior: hic ab eadem parte coepit, sed in Occidentem tendens, ad meridiem flexit, et ibi se subduxit oculis. Videlicet ille humidiora habuit, et aptiora ignibus, quae prosecutus est: huic rursus uberior fuit et plenior regio. Huc itaque descendunt, invitante materia, non itinere. Quod apparet duobus, quos spectavimus, fuisse diversum: cum hic in dextrum motus sit, ille in sinistrum. Omnibus autem stellis in eandem partem cursus est, id est, contrarius mundo. Hic enim ab ortu volvitur in occasum; illae ab occasu in ortum eunt. Et ob hoc duplex his motus est: ille quo eunt, et hic quo auferuntur.

XXII. Ego nostris non assentior. Non enim existimo Cometen subitaneum ignem, sed inter aeterna opera naturae. Primum quaecunque aër creat, brevia sunt. Nascuntur enim in re fugaci et mutabili. Quomodo potest enim in aëre aliquid idem diu permanere, cum ipse aër nunquam idem maneat? fluit semper, et brevis illi quies est. Intra exiguum momentum in alium, quam in quo fuerat, statum vertitur. Nunc pluvius, nunc serenus, nunc inter utrum-



que varius : nubesque illi familiarissimae , in quas coit , et ex quibus solvitur , modo congregantur , modo digeruntur , nunquam immotae iacent. Fieri non potest , ut ignis certus in corpore vago sedeat , et ita pertinaciter haereat , quam quem natura , ne unquam excuteretur , aptavit. Deinde si alimento suo haereret , semper descenderet. Eo enim crassior aër est , quo terris propior : nunquam Cometes in imum usque demittitur , neque appropinquat solo. Eriamnum ignis aut it quo illum natura sua ducit , id est , sursum : aut eo quo trahit materia , cui adhaesit , et quam depascitur.

XXIII. Nullis ignibus ordinariis et coelestibus iter flexum est. Sideris proprium est , ducere orbem. Atqui hoc an Cometae alii fecerint , nescio : duo nostra aetate fecerunt. Deinde omne quod causa temporalis accendit , cito intercidit. Sic faces ardent , dum transeunt : sic fulmina in unum valent ictum : sic quae transversae dicuntur stellae et cadentes , praetervolant et secant aëra. Nullis ignibus nisi in suo mora est. Illis dico divinis , quos habet mundus aeternos , quia partes eius sunt , et opera. Hi autem aliquid agunt , et vadunt , et tenorem suum servant , paresque sunt. Nam alternis diebus maiores minoresve fierent , si ignis esset collectivus , et ex aliqua causa repentinus. Minor enim esset ac maior , prout plenius aleretur aut malignius. Dicebam modo , nihil diuturnum esse , quod exarsit aëris vitio : nunc amplius adiicio. Morari ac stare nullo modo potest. Nam et fax et fulmen et stella transcurrens , et quisquis alius est ignis ex aëre expressus , in fuga est : nec apparet , nisi dum cadit.

Cometes habet suam sedem : et ideo non cito expellitur , sed emeritur spatium suum : nec exstinguitur , sed excedit. Si erratica , inquit , stella esset , in signifero esset. Quis unum stellis limitem ponit ? Quis in angustum divina compellit ? Nempe haec ipsa sidera , quae sola moveri credis , alios et alios circulos habent. Quare ergo non aliqua sint , quae in proprium iter et ab istis remotum secesserint ? Quid est , quare in aliqua parte coelum pervium non sit ? Quod si iudicas , non posse ullam stellam nisi signiferum attingere : Cometes potest sic latum habere circulum ; ut in hunc tamen parte aliqua sui incidat : quod fieri non est necessarium , sed potest.

XXIV. Vide ne hoc magis deceat magnitudinem mundi , ut in multa itinera divisus sit : nec hanc unam deterat semitam , ceteris partibus torpeat. Credis autem in hoc maximo et pulcherrimo corpore , inter innumerabiles stellas , quae noctem decore vario distinguunt , quae aëra minime vacuum et inertem esse patiuntur , quinque solas esse , quibus exercere feliceat , ceteras stare , fixum et immobilem populum ? Si quis hoc loco me interrogaverit : Quare ergo non quemadmodum quinque stellarum , ita harum observatus est cursus ? Huic ego respondebo : Multa sunt quae esse concedimus : qualia sint , ignoramus. Habere nos animum , cuius imperio et impellimur et revocamur , omnes fatebuntur : quid tamen sit animus ille rector dominusque nostri , non magis tibi quisquam expediet , quam ubi sit. Alius illum dicet esse spiritum , alius concentum quendam , alius vim divinam et Dei partem , alius tenuissimum aërem , alius incorporalem

potentiam. Non deerit qui sanguinem dicat, qui calorem. Adeo animo non potest liquere de ceteris rebus, ut adhuc ipse se quaerat.

XXV. Quid ergo miramur, Cometas, tam rarum mundi spectaculum, nondum teneri legibus certis: nec initia illorum finesque notescere, quorum ex ingentibus intervallis recursus est? Nondum sunt anni mille quingenti, ex quo Graecia

—— *stellis numeros & nomina fecit.*

Multaeque hodie sunt gentes, quae tantum facie noverint coelum, quae nondum sciant cur luna deficiat, quare obumbretur. Hoc apud nos quoque nuper ratio ad certum perduxit. Veniet tempus, quo ista quae nunc latent, in lucem dies extrahat, et longioris aevi diligentia. Ad inquisitionem tantorum aetas una non sufficit, ut tota coelo vacet. Quid, quod tam paucos annos inter studia ac vitia non aequa portione dividimus? Itaque per successiones istas longas explicabuntur. Veniet tempus, quo posterius nostri tam aperta nos nescisse mirentur. Harum quinque stellarum, quae se ingerunt nobis, quae alio atque alio occurrentes loco, curiosos nos esse cogunt, qui matutini vespertinique ortus sint, quae stationes, quando in rectum ferantur, quare agantur retro, modo coepimus scire. Utrum emergeret Iupiter, an occideret, an retrogradus esset, (nam hoc illi nomen imposuere cedenti) ante paucos annos didicimus. Inventi sunt qui nobis dicerent: Erratis, qui ullam stellam aut suppressere cursum iudicatis, aut vertere. Non licet stare coelestibus, nec averti: prodeunt omnia: ut semel missa sunt,

vadunt. Idem erit illis cursus, qui sui finis. Opus hoc aeternum irrevocabiles habet motus : qui si quando constiterint , alia ex adverso incident, quae nunc tenor et aequalitas servat.

XXVI. Quid est ergo , cur aliqua redire videantur ? Solis occurfus speciem illis tarditatis imponit , et natura viarum circularumque sic positorum , ut certo tempore intuentes fallant. Sic naves quamvis plenis velis eant , videntur tamen stare. Erit qui demonstret aliquando , in quibus Cometae partibus errent , cur tam seducti a ceteris eant , quanti qualesque sint. Contenti simus inventis : aliquid veritati et posteris conferant. Per stellas , inquit , ulteriora non cernimus , per Cometas aciem transmittimus. Primum si sit istud , non in ea parte sit , qua fidus ipsum est spissi ac solidi ignis , sed qua rarus splendor excurrit , et in crines dispergitur. Per intervalla ignium , non per ipsos vides. Stellae , inquit , omnes rotundae sunt , Cometae porrecti : ex quo apparet , stellas non esse. Quis enim tibi concedet , Cometas longos esse ? Quorum natura quidem , ut ceterorum siderum , globus est , ceterum fulgor extenditur. Quemadmodum sol radios suos longe lateque dimittit , ceterum ipsi alia est forma , alia ei quod ex ipso fluit lumini : sic Cometarum corpus ipsum corrotundatur , splendor autem longior quam ceterorum siderum apparet.

XXVII. Quare ? inquis. Dic tu mihi prius , quare luna dissimillimum soli lumen accipiat , cum accipiat a sole. quare modo rubeat , modo palleat. quare lividus illi et ater color sit , cum a conspectu solis excluditur. Dic mihi , quare omnes stellae inter se dissimilem habeant

aliquatenus faciem, diversissimam soli. Quomodo nihil prohibet, ista sidera esse, quamvis similia non sint: ita nihil prohibet, Cometas aeternos esse et fortis eiusdem, cuius cetera, etiamsi faciem illis non habent similem. Quid porro? mundus ipse, si consideres illum, nonne ex diversis compositus est? Quid est quare in Leone semper sol ardeat, et terras aestibus torreat: in Aquario adstringat hiemem, flumina gelu claudat? Et hoc tamen et illud sidus eiusdem conditionis est, cum effectu et natura dissimile sit. Intra brevissimum tempus Aries extollitur, Libra tardissime iungitur: et tamen hoc sidus et illud eiusdem naturae est: cum illud exiguo tempore adscendat, hoc diu proferatur. Non vides, quam contraria inter se elementa sint? gravia et levia sunt, frigida et calida, humida et sicca. Tota huius mundi concordia ex discordibus constat. Negas Cometen stellam esse, quia forma eius non respondeat ad exemplar, nec sit ceteris similis. Vides enim quam simillima sit illa, quae tricesimo anno revertitur ad locum suum, huic quae intra annum revisit sedem suam. Non ad unam naturae formam opus suum praestat, sed ipsa varietate se iactat. Alia maiora, alia velociora aliis fecit; alia validiora, alia temperatiora: quaedam autem eduxit a turba, ut singula et conspicua procederent; quaedam in gregem misit. Ignorat naturae potentiam, qui illi non putat aliquando licere nisi quod saepius facit. Cometas non frequenter ostendit, attribuit illis alium locum, alia tempora, dissimiles ceteris motus. Voluit et his magnitudinem operis sui colere, quorum formosior facies est, quam ut fortuitam putes, siue amplitudinem



eorum confideres, five fulgorem, qui maior est ardentiorque quam ceteris. Facies vero habet insigne quiddam et singulare, non in angustum coniecta et arctata, sed dimissa liberius, et multarum stellarum amplexa regionem.

XXVIII. Aristoteles ait, Cometas significare tempestatem, et ventorum intemperantiam atque imbrium. Quid ergo? non iudicas sidus esse, quod futura denuntiat? Non enim sic hoc tempestatis signum est, quomodo futurae pluviae.

*Scintillare oleum, & putres concrefcere fungos:*

aut quomodo indicium est faevituri maris, si marinae

*In sicco ludunt fulicae; notasque paludes*

*Deserit, atque altam supra volat ardea nubem:*

sed sic, quomodo aequinoctium in calorem frigusque flectentis anni, quomodo illa quae Chaldaei canunt, quid stella nascentibus triste laetumve constituat. Hoc ut scias ita esse, non statim Cometes ortus ventos et pluvias minatur, ut Aristoteles ait, sed annum totum suspectum facit. Ex quo apparet, illum non ex proximo, quae in proximum daret, signa traxisse, sed habere repocita et compressa legibus mundi. Fecit is Cometes, qui Paterculo et Vopisco consulibus apparuit, quae ab Aristotele Theophrastoque sunt praedicta. Fuerunt enim maximae et continuae tempestates ubique. At in Achaia, Macedoniaque, urbes terrarum motibus prorutae sunt. Tarditas, inquit, illorum argumentum est, graviores esse, multumque in se

*L. Ann. Seneca. Vol. IV.*

A a

habere terreni: ipsi praeterea cursus. fere enim compelluntur in cardines.

XXIX. Utrumque falsum est. De priore dicam prius. Quia tardius feruntur, graves sunt? Quid ergo? Stella Saturni, quae ex omnibus iter suum lentissime efficit, gravis est. Atqui levitatis argumentum habet, quod super ceteras est. Sed maiore, inquis, ambitu circuit, nec tardius it quam ceterae, sed longius. Succurrat tibi, idem me de Cometis posse dicere, etiam si segnior illis cursus sit. Sed mendacium est, ire eos tardius. Nam intra sextum mensem dimidiam coeli partem transcurrit hic proximus; prior intra pauciores menses recepit se. Sed quia graves sunt, inferius deferuntur. Primum non defertur, quod circumfertur. Deinde hic proximus a Septemtrione motus sui initium fecit, et per Occidentem in Meridiana pervenit, erigensque suum cursum oblituit. Alter ille Claudianus a Septemtrione primum visus, non desit in rectum assidue celsior ferri, donec excessit. Haec sunt quae aut alios movere ad Cometas pertinentia, aut me. Quae an vera sint, dii sciunt, quibus est scientia veri. Nobis rimari illa et coniectura ire in occulto tantum licet, nec cum fiducia inveniendi, nec sine spe.

XXX. Egregie Aristoteles ait, nunquam nos reverendiores esse debere, quam cum de diis agitur. Si intramus templa compositi, si ad sacrificium accessuri vultum submittimus, togam adducimus, si in omne argumentum modestiae fingimur: quanto hoc magis facere debemus, cum de sideribus, de stellis, de deorum natura disputamus, ne quid temere, ne

quid impudenter, aut ignorantes affirmemus, aut scientes mentiamur? Nec miremur tam tarde erui, quae tam alte iacent. Panaetio, et his qui videri volunt, Cometen non esse ordinarium sidus, sed falsam sideris faciem, diligenter tractatum est, an aequae omnis pars anni edendis Cometis satis apta sit: an omnis coeli regio idonea in qua creentur: an quaecunque ire, ibi etiam concipi possint: et cetera, quae universa tolluntur, cum dico illos fortuitos non esse ignes, sed intextos mundo, quos non frequenter educit, sed in occulto movet. Quam multa praeter hos per secretum eunt, nunquam humanis oculis orientia? Neque enim omnia Deus homini fecit. Quota pars operis tanti nobis committitur? Ipse qui ea tractat, qui condidit, qui totum hoc fundavit, deditque circa se, maiorque est pars operis sui, ac melior, effugit oculos, cogitatione visendus est.

XXXI. Multa praeterea cognata numini summo, et vicinam sortita potentiam, obscura sunt. Aut fortasse, quod magis mireris, oculos nostros et implent et effugiunt: sive illis tanta subtilitas est, quantam consequi acies humana non possit: sive in sanctiore secessu maiestas tanta deliruit, et regnum suum, id est, se, regit, nec ulli aditum dat, nisi animo. Quid sit hoc, sine quo nil est, scire non possumus: et miramur, si quos igniculos parum novimus, cum maxima pars mundi Deus lateat? Quam multa animalia hoc primum cognovimus seculo? et quidem multa venientis aevi populus ignota nobis sciet. Multa seculis tunc futuris, cum memoria nostri exoleverit, reservantur. Pusilla res mundus est, nisi in illo quod quaerat om-

nis mundus habeat. Non semel quaedam sacra traduntur: Eleusis servat, quod ostendat revisentibus. Rerum natura, sacra sua non simul tradit. Initiatos nos credimus: in vestibulo eius haeremus. Illa arcana non promiscue nec omnibus patent: reducta et in interiore sacrario clausa sunt. Ex quibus aliud haec aetas, aliud quae post nos subibit, dispiciet. Quando ergo ista in notitiam nostram perducentur? Tarde magna proveniunt, utique si labor cessat. Id quod unum toto agimus animo, nondum perfecimus, ut pessimi essemus. Adhuc in processu vitia sunt. Invenit luxuria aliquid novi, in quod insaniat. Invenit impudicitia novam contumeliam sibi. Invenit deliciarum dissolutio et tabes aliquid tenerius molliusque, quo pereat. Nondum satis robur omne proiecimus. Adhuc quidquid est boni moris, extinguimus laevitate et politura corporum. Muliebres munditias antecessimus; colores meretricios, matronis quidem non induendos, viri sumimus. Tenero et molli ingressu suspendimus gradum: non ambulamus, sed incedimus. Exornamus annulis digitos: in omni articulo gemma disponitur. Quotidie comminiscimur, per quae virilitati fiat iniuria, ut traducatur, quia non potest exui. Alius genitalia excidit, alius in obscenam partem ludi fugit, et locatus ad mortem, infamiae armatur. Egenus etiam, in quo morbum suum exerceat, legit.

XXXII. Miraris, si nondum sapientia omne opus suum implevit? Nondum tota se nequitia protulit. Adhuc nascitur, et huic omnes operam damus: huic oculi nostri, huic manus serviunt. Ad sapientiam quis accedit? quis dignam iudicat, nisi quam in transitu

noverit? Quis philosophiam, aut ullum liberale respicit studium, nisi cum ludi intercalantur, cum aliquis pluvius intervenit dies, quem perdere licet? Itaque tot familiae philosophorum sine successore deficiunt. Academici et veteres et minores nullum antistitem reliquerunt. Quis est qui tradat praecepta Pyrrhonis? Pythagorea illa invidiosae turbae schola praeceptorem non invenit. Sextiorum nova et Romani roboris secta, inter initia sua, cum magno impetu coepisset, exstincta est. At quanta cura laboratur, ne cuius pantomimi nomen intercidat? Stat per successores Pyladis et Bathylli domus: harum artium multi discipuli sunt, multique doctores. Privatim urbe tota sonat pulpitem. In hoc viri, in hoc feminae tripudiant. Mares inter se uxoresque contendunt, uter det latus illis. Deinde sub persona, cum diu trita frons est, transiunt ad ganeam. Philosophiae nulla cura est. Itaque adeo nihil invenitur ex his quae parum investigata antiqui reliquerunt, ut multa quae inventa erant, oblitterentur. At mehercules si hoc totis membris premeremus, si in hoc iuventus sobria incumberet, hoc maiores docerent, hoc minores addiscerent, vix ad fundum veniretur: in quo veritas posita est, quam nunc in summa terra et levi manu quaerimus.

---





L. ANNAEI SENECAE  
CLAUDII CAESARIS

ΑΠΟΚΟΛΟΚΥΝΤΩΣΙΣ.

THE HISTORY OF  
THE UNITED STATES OF AMERICA  
FROM 1789 TO 1861  
BY  
JAMES M. SMITH

L. ANNAEI SENECAE  
CLAUDII CAESARIS

ΑΠΟΚΟΛΟΚΤΝΤΩΣΙΣ.

**Q**UID actum sit in coelo ante diem tertium Idus Octobris, Asinio Marcello, Acilio Aviola Coss. anno novo, initio seculi felicissimi, volo memoriae tradere. Nihil offensae vel gratiae dabitur. Haec ita vera si quis quaesierit unde sciam : primum, si noluero, non respondebo. Quis coacturus est? Ego scio me liberum factum, ex quo suum diem obiit ille, qui verum proverbium fecerat, Aut regem, aut fatuum nasci oportere. Si libuerit respondere, dicam quod mihi in buccam venerit. Quis unquam ab historico iurato res exegit? Tamen si necesse fuerit auctorem producere, quaerite ab eo qui Drusillam euntem in coelum vidit. Idem Claudium vidisse se dicet iter facientem, non passibus aequis. Velit, nolit, necesse est illi omnia videre, quae in coelo agantur. Appiae viae curator est : qua scis et divum Augustum, et Tiberium Caesarem, ad deos isse. Hunc si interroga-veris, soli narrabit : coram pluribus nunquam verbum faciet. Nam ex quo in senatu iuravit se Drusillam vidisse coelum adscendentem, et illi pro tam bono nuntio nemo credidit quid viderit, verbis conceptis affirmavit, se non indicaturum etiamsi in me-

dio foro hominem vidisset occisum. Ab hoc ego quaecunque audiui, certe clara afferro, ita illum salvum et felicem habeam.

*Iam Phoebus brevior via contraxerat ortum  
Lucis, & obscuri crescebant cornua somni :  
Iamque suum victrix augebat Cynthia regnum ;  
Et deformis hiems gratos carpebat honores  
Divitis autumnus, iussuque senescere Baccho  
Carpebat raras serus vindemitor uvas.*

Puto magis intelligi, si dixero, mensis erat Octobris, dies tertius Eidus Octobris. Horam non possum tibi certam dicere. Facilius inter philosophos, quam inter horologia conveniet. Tamen inter sextam et septimam erat. Nimis rustice acquiescunt oneri poetae, non contenti ortus et occasus describere, ut etiam medium diem inquietent. Tu sic transibis horam tam bonam?

*Iam medium cursu Phoebus dividerat orbem,  
Et propior nocti sessas quatibat habenas,  
Obliquo flexam deducens tramite lucem.*

Claudius animam agere coepit, nec invenire exitum poterat. Tum Mercurius, qui semper ingenio eius delectatus esset, unam de tribus Parcibus seducit, et ait: Quid, femina crudelissima, hominem miserum torqueri pateris, nec unquam meritum, ut tamdiu cruciaretur? Annus sexagesimus et quartus est, ex quo cum anima luctatur. Quid huic invides? Patere mathematicos aliquando verum dicere, qui illum ex



quo princeps factus est, omnibus annis, omnibus mensibus efferunt. Et tamen non est mirum si errant: horam eius nemo novit. Nemo enim illum unquam natum putavit. Fac quod faciendum est.

*Dede neci. melior vacua sine regnet in aula.*

Sed Clotho: Ego mehercule, inquit, pusillum temporis adicere illi volebam, dum hos pauculos, qui supersunt, civitate donaret. Constituerat enim omnes Graecos, Gallos, Hispanos, Britannos, togatos videre. Sed quoniam placet aliquos peregrinos in semen relinqui, et tu ita iubes fieri, fiat. Aperit tum capsulam, et treis fusos profert. Unus erat Augurini, alter Babae, tertius Claudii. Hos, inquit, treis uno anno exiguis intervallis temporum divisos mori iubebo: nec illum incommutatam dimittam. Non oportet enim eum, qui modo se tot millia hominum sequentia videbat, tot praecedentia, tot circumfusa, subito solum destitui. Contentus erit his interim victoribus.

*Haec ait: & turpi convolvens flamina fuso,  
Abrupit stolidae regalia tempora vitae.  
At Lachesis redimita comas, ornata capillos,  
Pieria crinem lauro frontemque coronans,  
Candida de niveo subtemina vellere sumit,  
Felici moderanda manu: quae ducta colorem  
Assumere novum: mirantur pensa sorores.  
Mutatur vilis pretiosa lana metallo:  
Aurea formoso descendunt secula filo.  
Nec modus est illis, felicia vellera ducunt,*

*Et gaudent implere manus , sunt dulcia pensa.  
 Sponte sua festinat opus , nulloque labore  
 Molliā contorto descendunt stamina fuso.  
 Vincunt Tithoni , vincunt & Nestoris annos.  
 Phoebus adest , cantuque iuvat , gaudetque futuris :  
 Et laetus nunc plectrā movet , nunc pensa ministrat.  
 Detinet intentas cantu , fallitque laborem.  
 Dūnique nimis citharam , fraternaue carmina lau-  
 dant ,  
 Plus solito nevere manus : humanaue fata  
 Laudatum transcendit opus. Ne demite , Parcae ,  
 Phoebus ait : vincat mortalis tempora vitae ,  
 Ille mihi similis vultu , similisque decore ,  
 Nec cantu , nec voce minor : felicia lassis  
 Secula praeſtabit , legumque ſilentia rumpet.  
 Qualis diſcutiens fugientia lucifer aſtra ,  
 Aut qualis ſurgit redeuntibus heſperus aſtris :  
 Qualis cum primum tenebris aurora ſolutis  
 Induxit rubicunda diem , ſol adſpicit orbem  
 Lucidus , & primos e carcere concitat axes :  
 Talis Caefar adest , talem iam Roma Neronem  
 Adſpiciet ; flagrat nitidus fulgore remiſſo  
 Vultus , & effuſo cervix formoſa capillo.*

Haec Apollo. At Lachesis, quae et ipsa homini fortissimo faveret, fecit, et plena orditur manu, et Neroni multos annos de suo donat. Claudium autem iubent omnes χαίροντας, εὐφημοῦντας ἐκπέμπειν δόμων. Et ille quidem animam ebulliit, et eo desiit vivere videri. Exspiravit autem dum comoedos audit, ut scias me non sine causa illos timere. Ultima vox eius haec

inter homines audita est, cum maiorem sonitum emisisset illa parte, qua facilius loquebatur: Vae me, puto, concacavi me. Quid autem fecerit, nescio: omnia certe concacavit. Quae in terris postea sint acta, supervacuum est referre. Scitis enim optime: nec periculum est, ne excidant, quae memoriae publicum gaudium imprefferunt. Nemo felicitatis suae obliviscitur. In coelo quae acta sint, audite: fides penes auctorem erit. Nuntiatum Iovi, venisse quendam bonae staturae, bene canum, nescio quid illum minari: assidue enim caput movere, pedem dextrum trahere. quacuisse se cuius nationis esset? respondisse, nescio quid perturbato sono, et voce confusa, non intelligere se linguam eius: nec Graecum esse, nec Romanum, nec ullius gentis notae. Tum Iupiter Herculem, quia totum orbem terrarum pererraverat, et nosse videbatur omnes nationes, iubet ire et explorare, quorum hominum esset. Tum Hercules primo adspectu sane perturbatus est, ut qui etiam non omnia monstra timuerit: ut vidit novi generis faciem, insolitum incessum, vocem nullius terrestris animalis, sed (qualis esse marinis belluis solet) raucam et implicatam, putavit sibi tertium decimum laborem venisse. Diligentius intuenti, visus est quasi homo. Accessit itaque, et quod facillimum fuit Graeculo, ait: Τίς πόθεν εἶς ἀνδρῶν, πόθι τοὶ πτόλις; Ubi haec Claudius, gaudet esse illic philologos homines, sperat futurum aliquem historiis suis locum. Itaque et ipse Homérico versu Caesarem se esse significans, ait:

Ἰλιόθεν με φέρων ἄνεμος Κικύονεσσι πέλασσευ.

Erat autem sequens versus verior, aequè Homericus:

Ἔρθε δ' ἐγὼν πόλιν ἔπραθον, ὄλεσα δ' αὐτούς.

Et imposuerat Herculi homini minime vasfro, nisi fuisset illic Febris, quae fano suo relicto sola cum illo venerat: ceteros omnes deos Romae reliquerat. Iste, inquit, mera mendacia narrat. Ego tibi dico, quae cum ipso tot annos vixi: Lugduni natus est. Marci municipem vides: quod tibi narro, ad sextum decimum lapidem a Vienna natus est, Gallus germanus. Itaque quod Gallum facere oportebat, Romam cepit. Hunc ego tibi recipio Lugduni natum, ubi Licinius multos annos regnavit. Tu autem qui plura loca calcasti, quam ullus mulio perpetuarius, Lugdunenses scire debes, et multa millia inter Xanthum et Rhodanum interesse. Excandescit hoc loco Claudius, et quanto potest murmure irascitur. Quid diceret, nemo intelligebat. Ille autem Febrim duci iubebat, illo gestu solutae manus, et ad hoc unum satis firmæ, quo decollare homines solebat. Iusserat illi collum praecidi. Putares omnes illius esse libertos, adeo illum nemo curabat. Tum Hercules: Audi me, inquit, tu, et desine fatuari: venisti huc, ubi mures ferrum rodunt. Citius mihi verum, ne tibi alogias excutiam. Et quo terribilior esset, tragicus fit, et ait:

*Exprome propere, sede qua genitus cluas,  
Hoc ne peremptus stipite, ad terram accidas.  
Haec clava reges saepe maculavit feros.  
Quid nunc profatu vocis incerto sonas?*

*Quae patria , quae gens mobile eduxit caput ,  
 Ediffere. equidem regna tergemini petens  
 Longinqua regis , unde ab Hesperio mari  
 Inachiam ad urbem nobile advexi pecus ,  
 Vidi duobus imminens fluviis iugum  
 Quod Phoebus ortu semper obverso videt :  
 Ubi Rhodanus ingens amne praerapido fluit ,  
 Ararque dubitans quo suos cursus agat ,  
 Tacitus quietis alluit ripas vadis.  
 Estne illa tellus spiritus altrix tui ?*

Haec satis animose et fortiter. Nihilominus mentis suae non est , et timet *μωροῦ πληγὴν*. Claudius ut vidit virum valentem , oblitus nugarum , intellexit neminem parem sibi Romae fuisse : illic non habere se idem gratiae : Gallum in suo sterquilinio plurimum posse. Itaque quantum intelligi potuit , haec visus est dicere : Ego te , fortissime deorum Hercules , speravi mihi affuturum apud alios : et si quis a me notorem petisset , te fui nominaturus , qui me optime nosti. Nam si memoria repetis , ego eram , qui tibi ante templum tuum ius dicebam totis diebus mense Iulio et Augusto. Tu scis quantum illic miseriarum pertulerim , cum causidicos audirem , et diem et noctem : in quos si incidisses , valde fortis licet , maluisses Cloacas Augiae purgare : multo plus ego stercoreis exhausti. Sed quoniam volo , non mirum , quod impetum in curiam fecisti : nihil tibi clusi est. Modo dic nobis , qualem deum istum fieri velis : *ἐπικούρειος θεός* non potest esse : οὔτε αὐτὸς πρᾶγμα ἔχει , οὔτε ἀλλοις παρέχει. Stoicus ? quomodo potest rotundus esse (ut



ait Varro) sine capite, sine praeputio? Est aliquid in eo Stoici Dei: iam video, nec cor, nec caput habet. Si mehercules a Saturno petisset hoc beneficium, cuius mensem toto anno celebravit Saturnalia eius princeps, non tulisset. Illum Deum ab Iove, quem quantum quidem in illo fuit, damnavit incesti. L. Silanum enim generum suum occidit. Oro propter quid? sororem suam, festivissimam omnium puellarum, quam omnes Venerem vocarent, maluit Iunonem vocare. Quare, inquit, quaero enim, sororem suam stulte studere? Athenis dimidium licet, Alexandriae totum? Quia Romae, inquit, mures molas lingunt: hic nobis curva corrigit. Quid in cubiculo suo faciat, nescio: etiam coeli scrutatur plagas, deus fieri vult. Parum est quod templum in Britannia habet, quod hunc barbari colunt, et ut deum orant. *Ἀλώρου εἰλάτου χήν*. Tandem Iovi venit in mentem, privatis intra curiam morantibus sententiam dicere, nec disputare. Ego, inquit, P. C. interrogare vobis permiseram, vos mera mapalia fecistis. Volo fervetis disciplinam curiae. Hic qualiscunque est, quid de nobis existimabit? Illo dimisso, primus interrogatur sententiam Ianus pater: is designatus erat in Kal. Iulias postmeridianus Cos. homo quantumvis vaser, qui semper videt *ἅμα πρόσω καὶ ὀπίσω*. Is multa diserte, quod in foro vivat, dixit, quae notarius persequi non potuit: et ideo non refero: ne aliis verbis ponam, quae ab illo dicta sunt. Multa dixit de magnitudine deorum: non debere hunc vulgo dari honorem. Olim, inquit, magna res erat, deum fieri: iam fama nimium fecisti. Itaque ne videar in personam,

non in rem sententiam dicere, cenſeo ne quis poſt hunc diem deus fiat ex his, qui ἀρούρης καρπὸν ἔδουσιν : aut ex his, quos alit ζείδωρος ἄρουρα. Qui contra hoc SC. Deus factus, fictus, pictuſve erit, eum dedi larvis, et proximo munere inter novos auctoratos, ferulis vapulare placet. Proximus interrogatur ſententiam Diespiter Vicae Potae filius, et ipſe designatus Coſ. nummulariolus. Hic quaestu ſe ſuſtinebat, vendere civitatulas ſolebat. Ad huncce belle acceſſit Hercules, et auriculam ei tetigit. Itaque in haec verba cenſet : Cum Divus Claudius Divum Auguſtum ſanguine contingat, nec minus Divam Auguſtam aviam ſuam, quam ipſe Deam eſſe iuſſit, longeque omnes mortales ſapientia antecellat, ſitque e republica eſſe aliquem, qui cum Romulo poſſit

—— *ſerventia rapa vorare :*

cenſeo, ut D. Claudius ex hac die deus fiat, ita uti ante eum quis optimo iure factus ſit : eamque rem ad μεταμορφώσεις Ovidii adiiciendam. Variæ erant ſententiae, et videbatur Claudius ſententia vincere. Hercules enim, qui videret ferrum ſuum in igne eſſe, modo huc, modo illuc curſabat, et aiebat : Noli mihi invidere, mea res agitur : deinde ſi quid volueris, invicem faciam : Manus manum lavat. Tunc Divus Auguſtus ſurrexit ſententiae ſuae dicendae, et ſumma ſacundia diſſeruit. P. C. vos teſtes habeo, ex quo deus factus ſum, nullum verbum me feciſſe. Semper meum negotium ago. Sed non poſſum amplius diſſimulare, et dolorem quem graviorem pudor facit, continere. In hoc terra marique pacem peperī ? ideo civilia bella

compescui? ideo legibus urbem fundavi, operibus ornavi? Et quid dicam, P. C. non invenio: omnia infra indignationem verba sunt. Confugiendum est itaque a me ad Messalae Corvini disertissimi viri illam sententiam: Praecidit ius imperii. hic, P. C. qui nobis non posse videtur muscam excitare, tam facile homines occidebat, quam canis excidit. Sed quid ego de tot acribus viris dicam? Non vacat deslere publicas clades, intuenti domestica mala. Itaque illa omit- tam, haec referam. Etiam si Phormea Graece nescit, ego scio. ΕΝΤΙΚΟΝΤΟΝΤΚΗΝΔΙΗΞ. senescit. Iste, quem videtis, per tot annos sub meo nomine latens, hanc mihi gratiam retulit, ut duas Iulias proneptes meas occideret, alteram ferro, alteram fame: unum abne- potem L. Silanum. Videris Iupiter, an in causa mala, certe in tua, si hic inter nos futurus est. Dic mihi, Dive Claudii, quare quenquam ex his, quos, quasque occidisti, antequam de causa cognosceres, antequam audires, damnaisti? hoc fieri solet? in coelo non fit. Ecce Iupiter, qui tot annos regnat, uni Vulcano crus fregit, quem

Ῥίψε ποδὸς τεταγὼν ἀπὸ βηλοῦ δέπτεσίαιο,

et iratus fuit uxori, et suspendit illam: numquid oc- cidit? Tu Messalinam, cuius aequae avunculus maior eram, quam tuus, occidisti. Nescio, inquis? Dii tibi malefaciant: adeo istud turpius est, quod nescis, quam quod occidisti. Iste C. Caesarem non desit mortuum persequi. Occiderat ille focerum: hic et generum. Caius Caesar Crassi filium vetuit Magnum vocari: hic nomen illi reddidit, caput tulit. Occidit in una

domo Crassum Magnum, Scriboniam, Tristioniam, Affarionem, nobiles tamen: Crassum vero tam fatuum, ut etiam regnare posset. Cogitate, P. C. quale portentum in numerum deorum se recipi cupiat. Hunc nunc deum facere vultis? Videte corpus eius, diis iratis natum. Ad summam, tria verba cito dicat, et servum me ducat. Hunc deum quis colet? quis credet? denique dum tales deos facitis, nemo vos deos esse credet. Summa rei, P. C. si honeste inter vos gessi, si nulli durius respondi, vindicate iniurias meas. Ego pro sententia mea hoc censeo. Atque ita ex tabella recitavit: Quandoquidem Divus Claudius occidit socerum suum Appium Silanum, generos duos, Pompeium Magnum et L. Silanum, socerum filiae suae Crassum, frugi hominem, tam similem sibi, quam ovo ovum, Scriboniam socrum filiae suae, Messalinam uxorem suam, et ceteros, quorum numerus iniri non potuit: placet mihi in eum severe animadverti, nec illi rerum iudicandarum vacationem dari, eumque quamprimum exportari, et coelo intra dies xxx excedere, Olympo intra diem tertium. Pedibus in hanc sententiam itum est. Nec mora, Cyl-  
lenius illum collo obtorto trahit ad inferos,

*Illuc unde negant redire quenquam.*

Dum descendunt per viam sacram, interrogat Mercurius, quid sibi velit ille concursus hominum, num Claudii funus esset? Et erat omnium formosissimum, et impensa cura plenum, ut scires deum efferri, tibi-  
cinum, cornicinum, omnisque generis aeneatorum tanta turba, tantus conventus, ut etiam Claudius au-

dire posset. Omnes laeti, hilares, P. R. ambulabat  
 tanquam liber. Agatho et pauci caufidici plorabant,  
 sed plane ex animo. Iurisperiti e tenebris procedebant,  
 pallidi, graciles, vix habentes animam, tanquam  
 qui cum maxime reviviscerent. Ex his unus  
 cum vidisset capita conferentes, et fortunas suas deplorantes  
 caufidicos, accedit, et ait: Dicebam vobis,  
 Non semper Saturnalia erunt. Claudius ut vidit  
 funus suum, intellexit se mortuum esse. Ingenti enim  
 μεγαληγορίᾳ naenia cantabatur anapaestis:

*Fundite fletus ,  
 Fingite luctus :  
 Clamore forum :  
 Cordatus homo ,  
 Fuit in toto  
 Ille citato  
 Poterat celeres ,  
 Fundere Parthos ,  
 Persida telis ,  
 Tendere nervum :  
 Vulnere parvo  
 Pictaque Medi  
 Ille Britannos  
 Litora ponti ,  
 Scuta Brigantas  
 Colla catenis  
 Nova Romanae  
 Tremere Oceanum.  
 Quo non alius  
 Discere causas ,*

*Edite planctus ,  
 Resonet tristi  
 Cecidit pulchre  
 Quo non alius  
 Fortiter orbe.  
 Vincere cursu  
 Ille rebelles  
 Levibusque sequi  
 Certaue manu  
 Qui praecipites  
 Figeret hostes ,  
 Terga fugacis.  
 Ultra noti  
 Et caeruleos  
 Dare Romuleis  
 Iussit, & ipsum  
 Iura securis  
 Desflete virum ,  
 Potuit citius  
 Una tantum*



<i>Parte audita,</i>	<i>Saepe &amp; neutra.</i>
<i>Quis nunc iudex</i>	<i>Toto lites</i>
<i>Audiet anno?</i>	<i>Tibi iam cedit</i>
<i>Sede relicta,</i>	<i>Qui dat populo</i>
<i>Iura silenti,</i>	<i>Cretaea tenens</i>
<i>Oppida centum.</i>	<i>Caedite moestis</i>
<i>Pectora palmis,</i>	<i>O caufidici,</i>
<i>Venale genus.</i>	<i>Vosque Poëtae,</i>
<i>Lugete novi;</i>	<i>Vosque in primis</i>
<i>Qui concusso</i>	<i>Magna paraslis</i>

*Lucra fritillo.*

Delectabatur laudibus suis Claudius, et cupiebat diutius spectare. Iniicit illi manum Talthybius deorum nuntius, et trahit capite obvoluto, ne quis eum possit agnoscere, per campum Martium: et inter Tiberim et viam Tectam descendit ad inferos. Antecesserat iam compendiaria via Narcissus libertus, ad patronum excipiendum, et venienti nitidus, ut erat a balineo, occurrit, et ait: Quid dii ad homines? Celerius, inquit Mercurius, et venire nos nuntia. Ille autem patrono plura blandiri volebat. quem Mercurius iterum festinare iussit, et virga morantem impulit. Dicto citius Narcissus evolat. Omnia procliva sunt, facile descenditur. Itaque quamvis podagricus esset, momento temporis pervenit ad ianuam Ditis: ubi iacebat, ut ait Horatius, bellua centiceps, sese movens, villosque horrendos excutiens. pusillum subperturbatur (albam canem in deliciis habere consueverat) ut illum vidit canem nigrum villosum sane: quem non velis tibi in tenebris occurrere. Et magna

inquit voce : Claudius Caesar venit. Ecce extemplo cum plausu procedunt cantantes : *Εὐρίκαμεν, συγχάρισμαίμεν*. Hic erat C. Silius Cos. desig. Iunius Praetorius, Sex. Trallus, M. Helvius Trogus, Cotta Tectus, Valens, Fabius, Equ. Rom. quos Narcissus duci iusserat. Medius erat in hac cantantium turba Mnesther Pantomimus, quem Claudius decoris causa minorem fecerat. Nec non ad Messalinam cito rumor percrebuit, Claudium venisse. Convolarunt primum omnium liberti, Polybius, Myron, Harpocras, Amphaeus et Pheronactes, quos omnes, necubi imparatus esset, praemiserat. Deinde praefecti duo, Iustus Catonius, et Ruffus Pompeii F. Deinde amici, Saturnius Luscius, et Peto Pompeius, et Lupus, et Celer Asinius, consulares. Novissime fratris filia, fororis filia, gener, socer, focrus, omnes plane consanguinei. Et agmine facto Claudio occurrunt. Quos cum vidisset Claudius, exclamat, *Πάντα φίλων πλήρη*. Quomodo vos huc venistis? Tum Peto Pompeius : Quid dicis, homo crudelissime? Quaeris, quomodo? Quis enim nos alius huc misit quam tu, omnium amicorum interfector? In ius eamus : ego tibi hic fellas ostendam. Ducit illum ad tribunal Aeaci. is lege Cornelia, quae de sicariis lata est, quaerebat : postulat nomen eius recipi, edit subscriptionem : Occisos Senatores xxx, Equites Rom. cccxv, atque plures : ceteros ccxxi. *ὅσα φάρμακος τε κέρως τε*. Exterritus Claudius oculos undecunque circumfert, vestigat aliquem patronum qui se defenderet. Advocatum non invenit. Tandem procedit P. Petronius, vetus convictor eius, homo Claudiana lingua disertus, et

postulat advocationem. Non datur. Accusat Pedit Pompeius magnis clamoribus. Incipit Petronius velle respondere. Aeacus, homo iustissimus, vetat. Illum tantum altera parte audita condemnat, et ait: Εἰς πάθοι τὰ κ' ἔρξε δίκη κ' ἰθεὺς γένοιτο. Ingens silentium factum est. Stupebant omnes, novitate rei attoniti: negabant hoc unquam factum. Claudio iniquum magis videbatur, quam novum. De genere poenae diu disputatum est, quid illum pati oporteret. Erant qui dicerent, si uni dii laturam fecissent, Tantalum siti periturum, nisi illi succurreretur: non unquam Sisyphum onere relevari; aliquando Ixionis miseri rotam sufflaminandam. Non placuit ulli ex veteranis missionem dari, ne vel Claudius unquam simile speraret. Placuit novam poenam excogitari debere, instituentum illi laborem irritum, et alicuius cupiditatis species sine fine et effectu. Tum Aeacus iubet illum alea ludere pertuso fritillo. Et iam coeperat fugientes semper tesseras quaerere, et nihil proficere.

*Nam quotiens missurus erat resonante fritillo,  
Utraque subducto fugiebat tessera fundo:  
Cumque relictos auderet mittere talos,  
Lufuro similis semper, semperque petenti,  
Decepere fidem: refugit, digitosque per ipsos  
Fallax assiduo dilabitur alea furto.  
Sic cum iam summi tanguntur culmina montis;  
Irrita Sisyphio volvuntur pondera collo.*

Apparuit subito C. Caesar, et petere illum in servi-

tutem coepit: producit testes, qui illum viderant  
ab illo flagris, ferulis, colaphis vapulantem. Adiudi-  
catur C. Caesari: illum Aeacus donat. Is Menandro  
liberto suo tradidit, ut a cognitionibus ei esset.


---

EXCERPTA QUAEDAM

E LIBRIS

SENECAE.





## EXCERPTA QUAEDAM

## E LIBRIS

## S E N E C A E.

**H**ONESTA, inquit Epicurus, res est, paupertas laeta. Illa vero iam paupertas non est, si laeta est. Cui cum paupertate bene convenit, dives est. Non qui parum habet, sed qui plura cupit, pauper est. Quid enim refert, quantum illi in arca, quantum in horreis lateat, quantum pascat aut foeneret, si alieno imminet, si non acquisita, sed acquirenda concupiscit? Quis sit divitiarum modus, quaeris? Primo, habere quod necesse est: secundo, quod satis est. Nulli potest secura vita contingere, qui de producenda nimis cogitat. Nullum bonum iuvat habentem, nisi ad cuius amissionem praeparatus est animus. Magnae divitiae sunt, lege naturae composita paupertas. Lex autem naturae, scis quos terminos nobis statuit? Non esurire, non sitire, non algere. Uti famem sitimque depellas, non est necesse maria tentare, nec castra sequi. Parabile est quod natura desiderat, & cito apponitur. Ad supervacua sudatur: illa sunt quae togam terunt, quae nos senescere cogunt, quae in aliena litora impingunt. Ad manum est, quod satis est. Si cui sua non videntur amplissima, licet totius mundi dominus sit, miser est. Miser est, qui se beatissimum non iudicat, licet toti mundo imperet. Non est beatus, qui se id non putat

*esse. Nihil habeamus, quod cum magno emolumento infidiantis eripi possit. Quam minimum in corpore tuo sit spoliolum. Nemo ad humanum sanguinem venit propter ipsum, vel admodum pauci. Nudum latro transmittit: etiam in obfessa via pauperi pax est. Is maxime divitiis fruitur, qui minime indiget. Si ad naturam vives, nunquam eris pauper: si ad opinionem, nunquam dives. Exiguum natura desiderat, immensum opinio. Si congeratur in te quidquid multi locupletes possederunt, si ultra privatum pecuniae modum fortuna te provehat, auro tegat, purpura vestiatur, eo deliciarum opumque perducatur, ut terram marmoribus abscondas, non tantum liceat habere, sed calcare divitias; accedant statuæ & picturae, & quidquid ars ulla luxuriae auro & argento elaboravit; maiora cupere ab his discas. Desideria naturalia, finita sunt: ex falsa opinione nascentia, ubi desinant, non habent. nullus enim terminus falso est. Veritati aliquid extremum est: error immensus est. Retrahe te ergo a vanis: & cum voles scire, an naturalem, an vanam habeas cupiditatem, considera num alicubi consistat. Si longe progressio semper aliquid longius restat, scito id naturale non esse. Paupertas expedita, secunda est. cum classicum cecinit, scit non se peti: cum aliquo conclamatum est, quomodo exeat, non quid efferat, quaerit. At cum navigandum est, non strepitu portus, non unius comitatu inquieta sunt litora. Non circumstat illum turba hominum, ad quos pascendos transmarinarum regionum optanda est fertilitas. Facile est pascere paucos ventres, & bene institutos, & nihil aliud desiderantes quam impleri. Parvo fames constat, magno fastidium. Paupertas contenta est desiderii instantibus satisfacere.*

*Sanus dives est, qui licet habeat divitias, eas tamen ut fugientes habet. Quid ergo est, quare recuses eam contubernalem, cuius mores sanus dives imitatur? Si vis vacare animo, aut pauper sis oportet, aut pauperi similis. Non potest studium salutare fieri sine frugilitatis cura. Frugalitas, paupertas voluntaria est. Perpeffi sunt multotiens exercitus inopiam omnium rerum, vixerunt herbarum radicibus, & dictu foedam tulerunt famem. & haec omnia perpeffi sunt pro regno, quo magis mireris, alieno. Dubitabit aliquis ferre paupertatem, ut animum a furoribus liberet? Multis, divitiis parasse, non finis miseriarum fuit, sed mutatio. Nec hoc miror. Non in rebus vitium, sed in animo ipso est. Illud quod paupertatem gravem nobis fecerat, & divitias graves faciet. Quemadmodum nihil refert, utrum aegrum in lecto ligneo, an in aureo colloques; quocunque illum transtuleris, morbum suum secum transfêret: sic nihil refert, utrum aeger animus in divitiis an in paupertate sit; malum suum illum sequitur. Ad securitatem non est opus fortuna. Quod enim necessitati sat est, dabit, licet irata. Ne imparatos nos fortuna deprehendat, fiat nobis paupertas familiaris. Securius divites erimus, si sciemus quam non sit grave pauperes esse. Incipe cum paupertate habere contubernium.*

Aude hospes contemnere opes, et te quoque  
dignum

Finge Deo. —

*Nemo alius dignus Deo est, nisi qui opes contemnit.  
Quare possessiones tibi non interdico, sed efficere volo,*

ut illas intrepide possideas. quod uno consequeris modo, si te etiam sine illis bene victurum speraveris, & si illas tanquam exituras adspexeris. Discedat quisquis non te, sed aliud in te sequebatur. ob hoc unum est amanda paupertas, quod a quibus ameris, ostendit. Multum est, non corrumpi divitiarum contubernio. Magnus ille est, qui in divitiis pauper est. Nemo nascitur dives. Quisquis exit in lucem, iussus est pane & lacte esse contentus. ab his initiis regna nos non capiunt. Panem & aquam natura desiderat. nemo ad haec pauper est. intra quae si quis desiderium suum cluserit, cum ipso Iove de felicitate contendat. Res inquieta, fecilitas est; ipsa se exagitat, movet cerebrum, non in uno genere. alios in cultum irritat, alios in potentiam, alios inflat, alios mollit. Si vis scire quam nihil mali sit in paupertate, compara inter se vultum pauperis & divitis. Saepius pauper & fidelius ridet: nulla solitudine concutitur, in alto est. cura velut nubes levis transit. Horum qui felices vocantur, hilaritas ficta est: huic gravis & suprema superbia, licet non palam, tristitia est; eo quidem gravior, quod interdum non licet palam esse miseros, sed inter aerumnas cor ipsum exedentes, necesse est agere felicem. Abstrahunt a recto divitiae, honores, potentiae, & cetera: quae opinione hominum cara sunt, pretio suo vilia. Nescimus aestimare res, de quibus non cum fama, sed cum rerum natura deliberandum est. Nihil habent ista magnificum, quod mentes nostras in se trahat, praeter hoc quod mirari illa consuevimus. non enim quia concupiscenda sunt, laudantur: sed quia concupiscuntur. Hanc praecedentem causam habent divitiae. mutant animos, superbiam & arrogantiam pariunt, invidiam trahunt; eo usque mentem alienant,



*ut fama pecuniae nos etiam nocitura delectet. Bona omni culpa carere decet : pura sunt , non corrumpunt animos , non sollicitant : extollunt quidem animos & delectant , sed sine tumore. Quae bona sunt , fiduciam faciunt ; divitiae audaciam. Quae bona sunt , magnitudinem animi dant , divitiae insolentiam.*

## EXCERPTA ALIA.

**L**ICET cunctorum poetarum carmina gremium tuum semper illustrent ; aliquando deliberans , hoc tibi opusculum pro accidentibus casibus dirigere curavi , quod non praecedentes , sed posterius narrabunt. Unde ergo primus incipimus ? Si tibi videtur , a morte. Ab ultimo , inquis ? Immo a maximo. Ad hoc praecipue gens humana contremit : nec immerito tibi videtur hoc facere. Ceteri timores habent aliquem post se locum : mors omnia abscindit. Alia nos torquent : mors omnia devorat. Omnium quae horremus , ad hanc exitus spectat , aliorum quae per circuitum. Etiam qui alioqui se nihil timere iudicant , hoc timent. Quidquid aliud extimescimus , habet aut remedium , aut solatium. Sic ergo te forma , ut si quis tibi palam mortem minetur , omnes terriculas eius deludas.

Morieris. Ista hominis natura est , non poena. Morieris. Hac conditione intravi , ut exirem. Morieris. Gentium ius est , quod acceperis , reddere. Morieris. Peregrinatio est vita. Multum cum deambulaveris , domum redeundum est. Morieris. Putabam te aliquid novi dicere. ad hoc veni , hoc ago , huc me singuli dies adducunt. Nascenti mihi natura protinus hunc posuit terminum.

*Quid habeo quod indigner? in haec verba iuravi. Morieris. Stultum est timere, quod vitare non possis. istud non effugit, etiam qui distulit. Morieris. Nec primus, nec ultimus. multi me antecesserunt, omnes sequentur. Morieris. Hic est humani officii finis. Quis sanus exauctorari moleste tulit? Quo transit orbis, ego transibo. ad hanc conditionem cuncta gignuntur. Quod coepit, & desinit. Morieris. Nihil grave est, quod semel est. Aes alienum meum novi. hoc quidem cum eo creditore contraxi, cui decoquere non possum. Morieris. Dii melius. Nemo hac re melius mortalibus minari potest.*

*Sed decollaberis. Quid interest, utrum caesim moriar, an punctim? Sed saepe ferieris, & multi in te gladii concurrent. Quid refert, quam multa sint vulnera? non potest amplius quam unum esse mortiferum.*

*Peregre morieris. Undecunque ad inferos una via est. Peregre morieris. Ego quod debeo, solvere paratus sum. videat foenerator, ubi me appellet. Peregre morieris. Nulla terra est aliena mortuo. Peregre morieris. Non est gravior foris quam domi somnus. Peregre morieris. Hoc est, in patriam sine viatico pervenire.*

*Sed iuvenis morieris. Optimum est, antequam optes, mori. Iuvenis morieris. Hoc unum est, quod aequae ad iuvenem quam ad senem pertinet. Non citamur ex censu, nec exigitur numerus annorum. & adolescentes & impuberes eadem fati necessitas ducit. Optimum est mori, cum iuvat vivere. Iuvenis morieris. Quicumque ad extremum fati sui venit, senex moritur. Non enim refert quae sit hominis aetas, sed quae sit meta. Iuvenis morieris. Fortasse alicui malo subducit me fortuna: si nulli alii, vel senectuti. Iuvenis morieris. Non refert, quot annos*

*habeam, sed quot acceperim. si plus vivere non possum; haec est senectus mea.*

*Insepultus iacebis. Quid aliud respondeam, quam illud Maronis?*

—— Facilis iactura sepulcri.

*Si nihil sentio, non pertinet ad me iactura corporis insepulti. Si sentio, omnis sepultura tormentum est. Insepultus iacebis.*

—— Coelo tegitur, qui non habet urnam.

*Quid interest, ignis me an fera consumat, an tellus omnium sepultura? Istud non sentienti supervacuum est, sentienti onus. Insepultus iacebis. At tu combustus, at tu obrutus, at tu inclusus, at tu patridus, at tu evisceratus & constrictus, ac traditus lapidi, qui te paulatim edat & exsiccat. Nulla est sepultura. non sepelimur, sed proicimur. Non sepelieris. Quid inter tutissima trepidas? Ultra poenarum omnium terminum isle locus est. Vitae multa debemus, morti nihil. Non defunctorum causa, sed vivorum, inventa est sepultura, ut corpora & visu & odore foeda amoverentur. alios terra obruit, alios flamma consumsit, alios lapis ossa redditurus inclusit. Non defunctis, sed nostris oculis parcimus.*

*Aegroto. Venit tempus quo experimentum mei caperem. Non in mari tantum, aut in proelio, vir fortis apparet. exhibetur etiam in lectulo virtus. Aegroto. Non potest istud toto seculo fieri. aut ego febrem relinquam, aut ipsa me: semper una esse non possumus. Cum morbo mihi res est: aut vincetur, aut vincet.*

*Male de te loquuntur homines. Sed mali. Moverer, si de me Marcus Cato, si Laelius Sapiens, si alter Cato, si duo Scipiones ista loquerentur. Nunc malis displicere, laudari est. Non potest ullam auctoritatem habere sententia, ubi qui damnandus est, damnat. Male de te loquuntur. Moverer, si iudicio hoc facerent: nunc morbo faciunt. non de me loquuntur, sed de se. Male de te loquuntur. Bene nesciunt loqui: faciunt, non quod me reor, sed quod solent. quibusdam enim canibus sic innatum est, ut non pro feritate, sed pro consuetudine latent.*

*Exsulabis. Erras: cum omnia fecerim, patriam meam transire non possum. Omnium una est. extra hanc nemo proficisci potest. Exsulabis. Non patria mihi interdicitur, sed locus. In quamcunque terram venio, in meam venio. Nulla terra exsilium est, altera patria est. Non eris in patria. Patria est, ubicunque bene est. Illud autem per quod bene est, in homine, non in loco est. in ipsius potestate est, quæ sit illi fortuna. Si enim sapiens est, peregrinatur; si stultus, exsulat. Exsulabis. Hoc dicis: alterius loci civitate donaberis.*

*Dolor imminet. Si exiguus est, feramus: levis est patientia. Si gravis est, feramus: non levis est gloria. Dolor clamorem exprimat, dum secreta non exprimat. Non potest homo par dolori esse. Nec rationi dolor. Dura res est dolor. Immo tu mollis. Pauci dolorem ferre potuerunt. Simus ex paucis. Imbecilles natura sumus. Naturam infamare nolite. Illa nos fortes genuit. Fugiamus dolorem. Quid, quod ille sequitur fugiens?*

*Paupertas mihi gravis est. Immo tu paupertati. Non in paupertate vitium est, sed in paupere. Illa expedita*

*est, hilaris, tuta. Pauper sum. Nescis te opinione, non re, laborare. pauper es, quia videris. Pauper sum. Nihil deest avibus. pecora in diem vivunt. feris ad alimenta solitudo sua sufficit.*

*Non sum potens. Gaude; impotens non eris. Iniuriam accipere potero. Gaude; facere non poteris. Magnam pecuniam habet. Hominem illum iudicas? arca est. Quis aerario, quis plenis loculis invidet? Et iste quem dominum pecuniae existimas, locus est. Multum habet. Utrum avarus, an prodigus est? Si avarus, non habet; si prodigus, non habebit. Iste quem beatum credis, saepe dolet, saepe suspirat. Multi illum comitantur. Meluscae sequuntur, cadavera lupi, frumenta formicae. praedam sequitur ista turba, non hominem.*

*Pecuniam perdidisti. Fortasse te illa perdidisset. Pecuniam perdidisti. Sed habuisti. Pecuniam perdidisti. Sed habebis inde periculi minus. Pecuniam perdidisti. O te felicem, si cum illa avaritiam perdidisti! Sed si manet illa apud te, es tamen utcunque felicior, quod tanto malo materia subducta est. Perdidisti pecuniam. Et illa quidem quam multos? Eris nunc in via expeditior, domi tutior. Non habebis, sed non timebis heredem. Exoneravit te fortuna, si intelligis, & tutiore loco posuit. Damnum putas? remedium est. Desles, gemis, miserum te clamitas, quod opibus excussus es? Tuo vitio ista tibi iactura tam tristis est. Non tam moleste ferres, si tanquam perditurus habuisses. Perdidisti pecuniam. Nempe quam ut tu haberes, alius ante perdiderat.*

*Oculos perdidisti. Habet & nox suas voluptates. Oculos perdidisti. Quam multis cupiditatibus via incisa est? quam multis rebus carebis, quas ne videres, vel eruendi*



*erant? Non intelligis partem innocentiae esse caecitatem. Huic oculi adulterium monstrant, huic incestum, huic domum quam concupiscat, huic urbem, & mala omnia. Certe irritamenta sunt vitiorum ducesque scelerum.*

*Amisi liberos. Stultus es, qui desleas mortem mortaliū. Quid istud aut novum, aut mirum est? Quam rara est sine isto casu domus? Quid si infelicem voces arborem, quod stante ipsa cadunt poma? & hic tuus fructus est. Nemo extra ictum vulneris positus est. Ducuntur ex plebeia domo immatura funera, ducuntur & ex regia. Non est idem ordo fati, qui & aetatis. Non quomodo quisque venit, emittitur. Quid tamen est quod indigneris? Quid contra expectationem tuam evenit? Periere perituri. Sed ego illos superstites optabam. Verum hoc nemo tibi promiserat. Perierunt liberi mei. Habebant illi cuius essent magis quam tui: apud te precario morabantur. Educandos tibi fortuna mandaverat. recepit illos, non abstulit.*

*Naufragium feci. Cogita non quid perdideris, sed quod evaseris. Nudus exii. Sed existi. Omnia perdidi. Sed perire potuisti una cum omnibus.*

*In latrones incidi. Sed alius in accusatores, alius in fures, alius in fraudatores. Plena est insidiis via. Noli conqueri quod incideris: gaude quod evaseris. Inimicos graves habeo. Quomodo adversus feras munimenta conquiris, quomodo adversus serpentes: sic adversus inimicos auxilia circumspice, quibus illos aut arceas, aut compefcas, aut quod optimum est, places. Inimicos habeo. Illud est peius, quod amicos non habes.*

*Amicum perdidi. Iam enim te habuisse certum est? Amicum perdidi. Alium quaere: & ibi eum quaeras,*

ubi invenire possis. Quaere inter liberales artes, inter honesta & recta officia: quaere in laboribus. Ad mensam ista res non quaeritur. quaere aliquem frugi. Perdidisti amicum. Fortem animum habe, si unum: erubescere, si unicum. quid tu in tanta tempestate ad unam anchoram stabas?

Uxorem bonam amisisti. Utrum inveneras bonam, an feceras? Si inveneras, habere adhuc te posse ex hoc intelligas licet, quod habuisti. si feceras, bene spera. res periit. salvus est artifex. Amisisti uxorem bonam. Quid in illa probabas? Pudicitiam? Quam multae diu custoditam perdidere? Decus? Quam multae inter probatas matronalis ordinis, esse coeperunt postea inter exempla mutatarum? Delectabat te fides eius? Quam multas ex optimis coniugibus pessimas videmus, ex diligentissimis solutissimas? Omnium quidem imperitorum animus, maxime tamen muliebris, in lubrico est. Si bonam uxorem habuisti, non potes affirmare in illo eam permansuram fuisse proposito. Nihil tam mobile quam feminarum voluntas; nihil tam vagum. Novimus veterum matrimoniorum repudia; &, foediores divortio, male cohaerentium rixas. Quam multae quos in adolescentia amaverunt, in communi reliquere senectute? quoties anile divortium risimus? quam multarum notus amor odio notiore mutatus est? Sed haec & fuit bona, & fuisset, si vixisset. Mors effecit, ut affirmare id sine periculo possis. Bonam uxorem amisisti. Invenies, si nihil quaeris nisi bonam. Tu modo ne imagines proavosque respexeris, nec patrimonium, cui iam ipsa nobilitas cessit. Ista diu cum forma non repugnabunt. Facilius reges animum nulla vanitate tumentem. Non multum abest a contentu viri,

*quae se nimis suspicit. Duc bene institutam, nec maternis inquinatam vitiis : non cuius auriculis utrimque bina patrimonia debeant : non quam margaritae suffocent, cui minus sit in dote quam in veste : quam in patiente sella circumlatam per urbem populus ab omni parte aequae ut maritus inspexerit : cuius sarcinis domus sit angusta. Hanc facile ad tuos mores rediges, quam nondum corruerunt publici. Uxorem bonam amisi. Non erubescis flere, & intolerabilem vocare iacturam? Hoc unum deest ; utrum illam lugeas, an non. Cum maritum te cogitaveris, cogita & virum. Amisi uxorem bonam. Soror bona non potest recuperari, nec mater. Uxor adventitium bonum est : non est inter illa, quae semel unicuique contingunt. Amisi uxorem bonam. Multos tibi numerare possum, quibus bonam uxorem lugentibus successit melior.*

*Mors, exsilium, luctus, dolor, non sunt supplicia, sed tributa vivendi. Neminem illaesum fata transmittunt. Felix est, non qui aliis videtur, sed qui sibi.*

Haec excerpta libenter omissem. Senecae enim non esse, vel caeco perspicuum est. Sed veritus sum, ne quis ea, cuicuiusmodi sunt, sublata quereretur. Et in eis tamen multa ex vetere libro emendavimus.

F R A G M E N T A

E L I B R I S

S E N E C A E.

THE UNIVERSITY OF CHICAGO

LIBRARY

520 EAST 58TH STREET



## F R A G M E N T A

E L I B R I S

S E N E C A E

Q U I I N T E R C I D E R U N T .

*Quintil. cap. III, lib. VIII.*

NOSTRI autem in iungendo, aut derivando paulum aliquid ausi, vix in hoc fatis recipiuntur. Nam memini iuvenis admodum inter Pomponium et Senecam etiam praefationibus esse tractatum, an *gradus eliminat*, apud Attium in tragoedia, dici oportuisset.

*Cap. V. eiusdem libri.*

Facit quasdam sententias sola geminatio, qualis est Senecae in eo scripto, quod Nero ad Senatum misit occisa matre, cum se periclitatum videri vellet: *Salvum me esse adhuc nec credo, nec gaudeo.*

*Cap. II, lib. IX.*

Novi vero, et praecipue declamatores, audacius, nec mehercules sine motu quodam imaginantur, ut

Seneca in controversia, cuius summa est, quod pater filium et novercam, inducente altero filio, in adulterio deprehensos occidit. Duc, sequor: accipe hanc senilem manum, et quocunque vis imprime. Et paulo post: Adspice, inquit, quod diu non credidisti. Ego vero, non video, nox oboritur, et crassa caligo. Habet haec figura manifestius aliquid. Non enim narrari res, sed agi videtur.

*Ibidem.*

Nam in totum iurare, nisi ubi necesse est, gravi viro parum convenit. Et est a Seneca dictum eleganter, Non patronorum hoc esse, sed testium.

*Plinius Nat. Hist. lib. VI, c. XVII.*

Seneca etiam apud nos tentata Indiae commentatione, LX annes eius prodidit, gentes duodeviginti centumque. Par labor sit montes enumerare.

*Cap. LIII, lib. IX.*

Aevi piscium memorandum nuper exemplum accepimus. Paufilypum villa est Campaniae, haud procul Neapoli. in ea in Caesaris piscinis a Pollione Vedio coniectum piscem, sexagesimum post annum exspirasse scribit Annaeus Seneca, duobus aliis aequalibus eius ex eodem genere etiam tunc viventibus.

*Suetonius Tiberio, cap. LXXIII.*

Seneca eum (Tiberium) scribit, intellecta defec-

tionem, exentum annulum, quasi alicui traditurum, parumper tenuisse : dein rursus aptasse digito, &c.

*A. Gellius, cap. II, lib. XII. Noct. Atticarum.*

Seneca in lib. XXII. Epistolarum moralium quas ad Lucilium composuit, deridiculos versus Q. Ennium de Cethego, antiquo viro, fecisse hos dicit :

—— *Dictus ollis popularibus olim ,  
Qui tum vivebant homines , atque aevum agitabant.  
Flos delibatus populi & suada medulla.*

Ac deinde scribit de iisdem versibus verba haec : Admiror eloquentissimos viros, et deditos Ennio, pro optimis ridicula laudasse. Cicero certe inter bonos eius versus et hos refert. Atque id etiam de Cicerone dicit. Non miror, inquit, fuisse qui hos versus scriberet, cum fuerit qui laudaret : nisi forte Cicero summus orator agebat causam suam, et volebat hos versus videri bonos. Paulo post : Apud ipsum quoque, inquit Seneca, Ciceronem invenies etiam in prosa oratione quaedam, ex quibus intelligas, illum non perdidisse operam, quod Ennium legit. Ponit deinde quae apud Ciceronem reprehendat, quasi Enniana, quod ita scripserit in libris de Republica : Ut, Menelao Laconi fuit suaviloquens iucunditas. et, quod alio in loco dixerit, Breviloquentiam in dicendo colat. Deinde : Non fuit, inquit Seneca, Ciceronis hoc vitium, sed temporis. necesse erat haec dici, cum illa legerentur. Deinde adscribit, Ciceronem haec ipsa interposuisse ad effugiendam infamiam nimis lascivae

orationis et nitidae. De Virgilio quoque eodem in loco verba haec ponit : Virgilius quoque noster non ex alia causa duros quosdam versus, et enormes, et aliquid supra mensuram trahentes interposuit, quam ut Ennianus populus agnosceret in novo carmine antiquitatis aliquid. Addit non multo post ex Seneca : Quidam sunt tam magni sensus Q. Ennii, ut licet scripti sint inter hircosos, possint tamen inter unguentatos placere. Et cum reprehendisset versus quos supra de Cethego posuimus, Qui huiusmodi, inquit, versus amant, liceat sibi eosdem admirari et Soterici lectos. Audias tamen commemorari ac referri paucà quaedam quae ipse idem Seneca bene dixerit : quale est illud quod in hominem avarum et avidum et pecuniae sitientem dixit : Quid enim refert quantum habeas ? multo illud plus est quod non habes.

*Tertullianus de anima, cap. XLII.*

Multo coactius Seneca : post mortem, ait, omnia finiuntur, etiam ipsa.

*Lactantius divin. inst. lib. I, cap. IV.*

Annaeus quoque Seneca, qui ex Romanis vel acerrimus Stoicus fuit, quam saepe summum Deum merita laude prosequitur ? Nam cum de immatura morte differeret, Non intelligis, inquit, auctoritatem ac maiestatem iudicis tui ? Rector is orbis terrarum, coelique et deorum omnium Deus : a quo ista numina, quae singula adoramus et colimus, suspenso sunt. Item in Exhortationibus : Hic, cum prima fundamenta molis

pulcherrimae iaceret, et hoc ordiretur, quo neque maius quidquam novit natura, nec melius, ut omnia sub ducibus suis irent, quamvis ipse per totum se corpus intenderat, tamen ministros regni sui deos genuit. Et quam multa alia de Deo nostris similia locutus est? quae nunc differo, quod aliis locis opportuniore sunt.

*Cap. VII.*

Et est illud verum, quod dixisse in Exhortationibus Senecam supra retuli, Genuisse regni sui ministros Deum.

*Eodem cap. VII.*

Quod Seneca, vit acutus, in Exhortationibus suis vidit. Nos, inquit, aliunde pendemus. Itaque ad aliquem respicimus, cui, quod est optimum in nobis, debeamus. Alius nos edidit, alius instruxit: Deus ipse se fecit.

*Eiusdem lib. cap. XVI.*

Non illepide Seneca, in libris Moralis philosophiae: Quid ergo est, inquit, quare apud poëtas salacissimus Iupiter desierit liberos tollere? Utrum sexagenarius factus est, et illi lex Papia fibulam imposuit? an impetravit ius trium liberorum? an tandem illi venit in mentem, Ab alio exspectes, alteri quod feceris? et timet, ne quis sibi faciat, quod ipse Saturno?

*Lib. II, cap. II.*

Recte igitur Seneca in libris Moralibus: Simulacra,



inquit, deorum venerantur : illis supplicant genu posito : illa adorant : illis per totum assident diem, aut adstant : illis stipem iaciunt, victimas caedunt : et cum haec tantopere suspiciant, fabros qui illa fecere, contemnunt.

*Eiusdem lib. cap. IV.*

Merito igitur etiam senum stultitiam Seneca deridet. Non, inquit, bis pueri sumus ( ut vulgo dicitur, ) sed semper. Verum hoc interest, quod maiora nos ludimus.

*Cap. IX.*

Melius igitur Seneca, omnium Stoicorum acutissimus, qui vidit nil aliud esse Naturam, quam Deum. Ergo, inquit, Deum non laudabimus, cui naturalis est virtus? Nec enim illam didicit ex ullo. Immo laudabimus, quamvis enim naturalis illi sit, sibi illam dedit, quoniam Deus ipse Natura est.

*Lib. III. cap. XV.*

Eodem ductus errore Seneca, ( quis enim veram viam teneret, errante Cicerone? ) Philosophia, inquit, nihil aliud est, quam recta vivendi ratio : vel, honeste vivendi scientia : vel, ars recte vitae agenda. Non errabimus, si dixerimus, philosophiam esse legem bene honesteque vivendi. Et qui dixerit illam regulam vitae, suum illi nomen reddiderit.

*Ibidem.*

Idem Seneca in Exhortationibus: Plerique, inquit, philosophorum tales sunt, ut sint disertissimi in convicium

suum. quos si audias in avaritiam, in libidinem, in ambitionem perorantes, professionis indicium putes: adeo redundant in ipsos maledicta in publicam missa. quos non aliter intueri decet, quam medicos, quorum tituli remedia habent, pyxides venena.

*Ibidem.*

Faciet sapiens, inquit idem Seneca, etiam quae non probabit, ut etiam ad maiora transitum inveniat: nec relinquet bonos mores, sed tempori aptabit: et quibus alii utuntur in gloriam, aut voluptatem, utetur agenda rei causa. Et paulo post: Omnia quae luxuriosi faciunt, quaeque imperiti, faciet et sapiens, sed non eodem modo, eodemque proposito.

*Cap. XVI. eiusdem libri.*

Et Seneca: Nondum sunt, inquit, mille anni, ex quo initia sapientiae nota sunt. Multis ergo seculis humanum genus sine ratione vixit.

*Cap. XXIII.*

Fuisse Seneca inter Stoicos ait, qui deliberaret, utrumne Soli quoque suos populos daret: inepte scilicet, qui dubitaverit.

*Cap. XXV.*

Platonem quidem redemisse Aniceris quidam traditur tertio VIII. Itaque infectatus est conviciis redemptorem Seneca, quod parvo Platonem aestimaverit.

*Lib. V, cap. IX.*

Qui volent scire omnia, Senecae libros in manus fumant, qui morum vitiorumque publicorum et descriptor verissimus, et accusator acerrimus fuit.

*Eiusdem lib. cap. XIV.*

Recte igitur Seneca, incongruentiam hominibus obiectans, ait: Summa virtus illis videtur magnus animus. et iidem eum, qui contemnit mortem, pro furioso habent. quod est utique summae perversitatis.

*Lib. VI, cap. XVII.*

Item Senecae, in libris Moralis Philosophiae dicentis: Hic est ille homo honestus, non apice, purpurae, non lictorum insignis ministerio, sed nulla re minor: qui cum mortem in vicino videt, non sic perturbatur, tanquam rem novam viderit: qui, sive toto corpore tormenta patienda sunt, sive flamma ore recipienda est, sive extendendae per patibulum manus, non quaerit quid patiatur, sed quam bene. Qui autem Deum colit, haec patitur, nec timet.

*Cap. XXIV, lib. VI.*

Nec lucrari se quisquam putet, si delicti conscium non habebit. scit enim ille omnia in cuius conspectu vivimus, nec si universos homines celare possumus: cui nihil absconditum, nihil potest esse secretum. Exhortationes suas Seneca mirabili sententia terminavit: Magnum, inquit, nescio quid, maiusque quam cogi-

tari potest, numen est. cui vivendo operam damus, huic nos approbemus. Nihil prodest inclusam esse conscientiam. patemus Deo. Quid verius dici potest ab eo qui Deum nosset, quam dictum est ab homine verae religionis ignaro?

*Ibidem.*

Idem in eiusdem operis primo: Quid agis? inquit, quid machinaris? quid abscondis? Custos te tuus sequitur. Alium tibi peregrinatio subduxit, alium mors, alium valetudo: haeret hic, quo carere nunquam potes. Quid locum abditum legis, et arbitros removes? Putas tibi contigisse, ut oculos omnium effugas? Demens, quid tibi prodest non habere conscientium, habenti conscientiam?

*Eiusdem cap. XXV.*

Quanto melius et verius Seneca? Vultisne vos, inquit, Deum cogitare? magnum et placidum, et maiestate leni verendum: amicum, et semper in proximorum: non immolationibus et sanguine multo colendum: quae enim ex trucidatione immerentium voluptas est, sed mente pura, bono honestoque proposito. Non templa illi, congestis in altitudinem saxi, struenda sunt: in suo cuique consecrandus est pectore.

*Lib. VII, cap. XV.*

Non inscite Seneca Romanae urbis tempora distribuit in aetates. Primam enim dixit infantiam sub rege Romulo fuisse, a quo et genita, et quasi educata sit Roma: deinde pueriniam sub ceteris regibus, a quibus

*L. Ann. Seneca. Vol. IV.*

Dd

et aucta sit, et disciplinis pluribus institutisque formata: at vero Tarquinio regnante, cum iam quasi adulta esse coepisset, servitium non tulisse, et reiecto superbae dominationis iugo, maluisse legibus obtemperare, quam regibus: cumque esset adolescentia eius sine Punici belli terminata, tum denique confirmatis viribus coepisse iuvenescere. Sublata enim Carthagine, quae tam diu aemula Imperii fuit, manus suas in totum orbem terrarum marique porrexit: donec regibus cunctis et nationibus imperio subiugatis, cum iam bellorum materia deficeret, viribus suis male uteretur, quibus se ipsa confecit. Haec fuit prima eius senectus, cum bellis lacerata civilibus, atque intestino malo pressa, rursus ad regimen singularis imperii reeidit, quasi ad alteram infantiam revoluta. Amissa enim libertate, quam Bruto duce et auctore defenderat, ita consenuit, tanquam sustentare se ipsa non valeret, nisi adminiculo regentium niteretur.

*B. Hieronymus adversus Iovinianum libro primo.*

Claudia virgo Vestalis, cum in suspensionem venisset stupri, et simulacrum matris Idaeae in vado Tyberis haereret, ad comprobendam pudicitiam suam fertur cingulo duxisse navem, quam multa millia hominum trahere nequiverant. Melius tamen, inquit Lucani poetae patruus, cum illa esset actum, si hoc quod evenit, ornamentum potius exploratae fuisset pudicitiae, quam dubiae patrocinium.

*Eodem libro.*

Scripserunt Aristoteles, et Plutarchus, et noster Se-



neca, de matrimonio libros, ex quibus et superiora nonnulla sunt, et ista quae subiicimus. Amor formae oblivio est, et infaniae proximus, foedum minimeque conveniens animo sospiti vitium. turbat consilia, altos et generosos spiritus frangit, a magnis cogitationibus, ad humillimas detrahit: querulos, iracundos, temerarios, dure imperiosos, serviliter blandos, omnibus inutiles, ipsi novissime amoris, facit. Nam cum fruendi cupiditate insatiabili flagrat, plura tempora suspicionibus, lacrimis, conqueſtionibus perdit, odium sui facit, et ipse novissime sibi odio est.

*Paulo infra.*

Refert praeterea Seneca, cognovisse se quendam ornatum hominem, qui exiturus in publicum, fascia uxoris pectus colligabat, et ne puncto quidem horae praesentia eius carere poterat; potionemque nullam, nisi alterius tactam labris, vir et uxor hauriebant: alia deinceps non minus inepta facientes, in quae improvida vis ardentis affectus erumpebat.

*In fine.*

Nam quid, ait Seneca, de viris pauperibus dicam? quorum in nomen mariti, ad eludendas leges quae contra coelibes sunt, pars magna conducitur. Quomodo potest regere mores, et praecipere castitatem, et mariti auctoritatem tueri, cui nupſit?

*B. Augustinus, de civitate Dei, lib. VI, cap. X.*

Libertas fane quae huic defuit, ne istam urbanam theologiam, theatricae simillimam, aperte sicut illam

reprehendere auderet, Annaeo Senecae, quem nonnullis indiciis invenimus Apostolorum nostrorum clauisse temporibus, non quidem ex toto, verum ex aliqua parte non defuit. Affuit enim scribenti, viventi defuit. Nam in eo libro quem contra superstitiones condidit, multo copiosius ac vehementius reprehendit ipse civilem istam et urbanam theologiam, quam Vatro theatricam atque fabulosam. Cum enim de simulacris ageret: Sacros, inquit, immortales, inviolabilesque deos in materia vilissima atque immobili dedicant. Habitus illis hominum, ferarumque, et piscium, quidam vero mixtos ex diversis corporibus induunt. Numina vocant, quae si spiritu accepto subito occurrerent, monstra haberentur. Deinde aliquanto post, cum theologiam naturalem praedicans, quorundam philosophorum sententias digessisset, opposuit sibi quaestionem, et ait: Hoc loco dicet aliquis: Credam ego coelum et terram deos esse, et supra lunam alios, infra alios? Ego feram aut Platonem, aut Peripateticum Stratonem, quorum alter fecit Deum sine corpore, alter sine animo? Et ad hoc respondens, Quid tandem? inquit: Veriora tibi videntur T. Tatii, aut Romuli, aut Tulli Hostilii somnia? Cluacinam T. Tatius dedicavit deam, Picum Tiberinumque Romulus, Hostilius Pavorem atque Pallorem, teterrimos hominum affectus: quorum alter mentis territae motus est, alter corporis, ne morbus quidem, sed color. Haec numina potius credes, et coelo recipies? De ipsis vero ritibus crudeliter turpibus quam libere scripsit? Ille, inquit, viriles sibi partes amputat, ille lacertos fecat. Ubi fratros deos timent, qui sic propi-

tios habere merentur ? dii autem nullo ipsi debent coli genere , si et hoc volunt. Tantus est perturbatae mentis et sedibus suis pulsae furor , ut sic dii placentur , quemadmodum ne homines quidem saeviunt. Teter-  
rimi , et in fabulas traditae crudelitatis tyranni , laceraverunt aliquorum membra , neminem sua lacerare iusserunt. In regiae libidinis voluptatem castrati sunt quidam , sed nemo sibi , ne vir esset , iubente domino , manus intulit. Se ipsi in templis contrucidant , vulneribus suis ac sanguine supplicant. Si cui intueri vacet quae faciunt , quaeque patiuntur ; inveniet tam indecora honestis , tam indigna liberis , tam dissimilia fanis , ut nemo fuerit dubitaturus , furere eos , si cum paucioribus furerent ; nunc sanitatis patrocinium est insanientium turba. Iam illa quae in ipso Capitolio fieri solere commemorat , et intrepide omnino coarguit , quis credat nisi ab iridentibus aut furentibus fieri ? Nam cum in sacris Aegyptiis Osirim lugeri perditum , mox autem de invento magnum esse gaudium derisisset ; cum perditio eius inventioque fingatur , dolor tamen ille atque laetitia , ab eis qui nihil perdidierunt , nihilque invenerunt , veraciter exprimitur : Huic tamen , inquit , furori certum tempus est. Tolerabile est , semel in anno insanire. In Capitolium perveni , pudebit publicatae dementiae , quod sibi vanus furor attribuit , officii. Alius numina Deo subiicit , alius horas Iovi nuntiat , alius lictor est , alius unctor , qui vano motu brachiorum imitatur ungentem. Sunt quae Iunoni ac Minervae capillos disponant , longe a templo , non tantum a simulacro , stantes , digitos movent ornantium modo. Sunt quae spe-

culum teneant : sunt quae ad vadimonia sua deos advocent : sunt qui libellos offerant, et illos causam suam doceant. Doctus Archimimus, senex iam decrepitus, quotidie in Capitolio mimum agebat, quasi dii libenter spectarent, quem homines desierant. Omne illic artificum genus, operantium diis immortalibus, desidet. Et paulo post : Hi tamen, inquit, etiamsi supervacuum usum, non turpem nec infamem Deo, promittunt. sedent quaedam in Capitolio, quae se a Iove amari putant : nec Iunonis quidem, si credere poetis velis, iracundissimae respectu terrentur. Hanc libertatem Varro non habuit, tantummodo poëticam theologiam reprehendere ausus est, civilem non ausus est, quam iste concidit. Sed si verum attendamus, deteriora sunt templa, ubi haec aguntur, quam theatra, ubi finguntur. Unde in his sacris civilis theologiae has partes potius elegit Seneca sapienti, ut eas in animi religione non habeat, sed in actibusingat. Ait enim : Quae omnia sapiens servabit tanquam legibus iussa, non tanquam diis grata. Et paulo post : Quid quod et matrimonia, inquit, deorum iungimus, et ne pie quidem, fratrum scilicet et sororum ? Bellonam Marti collocamus : Vulcano Venerem : Neptuno Salaciam : quosdam tamen coelibes relinquimus, quasi conditio defecerit : praesertim cum quaedam viduae sint, ut Populonia, vel Fulgora, et diva Rumina, quibus non miror petito rem defuisse. Omnem istam ignobilem deorum turbam, quam longo aevo longa superstitio congeffit, sic, inquit, adorabimus, ut meminimus, cultum eius magis ad morem, quam ad rem pertinere. Nec leges ergo illae, nec mos, in ci-

vili theologia id instituerunt, quod diis gratum esset, vel ad rem pertineret: sed iste, quem philosophi quasi liberum fecerunt, tamen quia ILLUSTRIS POPULI ROMANI SENATOR erat, colebat quod reprehendebat, agebat quod arguebat, quod culpabat adorabat.

*Cap. XI, de eodem Seneca.*

Hic inter alias civilis theologiae superstitiones reprehendit etiam sacramenta Iudaeorum, et maxime sabbata: inutiliter id eos facere affirmans, quod per illos singulos septem interpositos dies septimam fere partem aetatis suae perdant vacando, et multa in tempore urgentia non agendo laedantur. Christianos tamen, iam tunc Iudaeis inimicissimos, in neutram partem commemorare ausus est: ne vel laudaret contra suae patriae veterem consuetudinem, vel reprehenderet contra propriam forsitan voluntatem.

*Ibidem.*

De illis fane Iudaeis cum loqueretur, ait: Cum interim usque eo sceleratissimae gentis consuetudo convaluit, ut per omnes iam terras recepta sit, victi victoribus leges dederunt. Mirabatur haec dicens, et quid divinitus ageretur, ignorans. Subiecit plane sententiam, qua significaret, quid de illorum sacramentorum ratione sentiret. Ait enim: Illi tamen causas ritus sui noverunt, et maior pars populi facit, quod cur faciat, ignorat.

*Scriptor vitae P. Virgilii Maronis.*

Seneca tradidit, Iulium Montanum poëtam soli-



tum dicere, involaturum se quaedam Virgilio, si e-  
vocem posset, et os, et hypocrisin. eosdem enim ver-  
sus, eo pronuntiantē, bene sonare; sine illo, inare-  
scere quasi mutos.

*Servius in VI. Aeneid.*

Seneca scripsit de situ et sacris Aegyptiorum. hic  
dicit, circa Sienem, extremam Aegypti partem, esse  
locum, quem Philas, hoc est, Amicas vocant: ideo  
quod illic est placata ab Aegyptis Isis, quibus irasce-  
batur, quod membra mariti Osiridis non inveniebat,  
quem frater Typhon occiderat. Quae inventa postea  
cum sepelire vellet, elegit vicinae paludis tutissimum  
locum, quem ad transitum constat esse difficilem. li-  
mosa enim est et papyris referta.

*Idem Servius in IX. Aeneid.*

Ganges fluvius Indiae est, qui secundum Senecam  
in situ Indiae novem alveis fluit, secundum Melonem  
septem: qui tamen et ipse commemorat, nonnullos  
dicere, quod tribus alveis fluat.

*Priscianus lib. VII.*

Seneca Ovidium sequens, Gausapa si fumfit, gau-  
sapa sumta proba.

*Concilium Turonense II, Can. XV.*

Aliqui Laici, dum diversa perpetrant adulteria,  
hoc quod de se sciunt, in aliis suspicantur, sicut ait  
Seneca, pessimum in eo vitium esse, qui in id, quod  
insanit, ceteros putat furere.

---

V. Wroni, *Jul. Ludus de morte Claudii*,  
*Riv. di Filol.* XLI, 1.

K. Busche, *Krit. Beitr. zu Senecas Natur*  
*Quaest.* - *Rhein. Mus.* LXX, 4.

O. Hense, *Zu Senecas Brieff.*

*Rh. Mus.* 74, 2.



PA  
6661  
A2  
1782  
v.4

Seneca, Lucius Annaeus  
L. Annaei Senecae philosophi  
Opera Ed. accurata

PLEASE DO NOT REMOVE  
CARDS OR SLIPS FROM THIS POCKET

---

UNIVERSITY OF TORONTO LIBRARY

---

